




7123


Augustianie



7123

AUG.





PARS SECUNDA
ACTUS INTERNOS
VARIARUM VIRTUTUM
COMPLECTENS,

Ex quibus

EXERCITIA

P R O
INCIPIENTIBUS, PROFICIENTIBUS,
ET PERFECTIS.

Secundum triplicem viam
PURGATIVAM, ILLUMINATIVAM,
ET UNITIVAM

Concinnata,

Ac per omnes Ferias distincta,
& simul conjuncta cum Præsentia DEI
singulis Feriis destinata.

*Quibus adduntur Actus variis tem-
poribus exercendi,*

Quæ sunt pleraq; ex Sanctis Patribus,
& aliis piorum Virorum libellis col-
lecta, & pro commodiori usu
in ordinem redacta.



V I L N Æ

Typis S.R.M. Academicis Societatis JESU.


Anno Domini 1741.

Ad Vn. Fr. Thom. Woytkiewicz Aug.



Quid pretiosius tempore? cætera,
quæ habemus in mundo, aliena sunt;
tempus autem propriè nostrum est, si
tamen illò utimur ad salutem. Illud
siquidem Divina nobis clemētia con-
tulit ad plangendum errata, ad poēni-
tentiam faciendam, ad promerendam
indulgentiam, ad virtutes acquiren-
das, ad multiplicanda merita, ad ven-
dicandam gratiam, ad inferni suppli-
cia evadenda, & ad æternam gloriam
consequendam. *Laurent: Justin:*
lib: de vita sol: cap: 10.

Nihil est virtuti par, quæ nos &
in futuro sæculo è gehenna eripit, &
Regnò cælorum nobis frui concedit:
& non hominibûs solùm, sed & ipsò
salutis nostræ inimicò Diabolò forti-
ores efficit. *Sanctus Chrysostomus*
Hom: 8. in Genes: Aug. 7123



1967 D 86 St. Dr.
Bibl. Jug.



P R Æ F A T I O.

Necessitas istorum Exercitiorum
& usus ostenditur.

QUicumq; tenentur tendere ad perfectionem, sicut sunt omnes Religiosi, omnino debent tenere hanc triplicem viam perfectionis; videlicet, viam Purgativam, quæ est Incipientium: viam Illuminativam, quæ est Proficientium: & viam Unitivam, quæ est Perfectorum: & ideo necesse est eos hujus triplicis viæ exercitia servare, qui volunt citò ad perfectionem pervenire. Ut autem facilius id consequantur, Purgativæ viæ exercitiis à principio præcipue incumbere debent, illaq; in aliis viis continuare, ut magis ac magis purgatam animam ac puram habeant. Nam in via Purgativa propterea purgationi animæ insistentum est, ut pura anima nostra fiat: sed in via Illuminativa, ut purior sit, curandum: jam verò in via Unitiva, ut sit purissima, ad hoc, ut ad unionem intimam cum DEO disposita reddatur.

P R Æ F A T I O.

Sunt autem exercitia viæ Purgativæ; evacuatio & fuga peccatorum, pœnitentia, mortificatio sensuum & passionum, amoris proprii, voluntatis, & judicii, vitiorumquæ extirpatio, quæ omnia in qualibet via exercenda, cum tali tamen differentia, quod hæc in via Purgativa cum difficultate & labore fiant: verùm in via Illuminativa non sentitur difficultas tanta: at in via Unitiva, ubi pax est in anima, & summa tranquillitas, post superata in aliis viis bella, jam illa non tantùm facili negotio, sed etiam cum delectatione peraguntur: qua de re habetur aurea doctrina P. N. Thomæ à JESU in libello dicto: Orationis mentalis via brevis & plana Cap: 15. cuius titulus est.

Quod anima quæ proficere cupit, ab initio viæ purgativæ, usq; ad omnimodam viæ unitivæ perfectionem, semper debeat eadem exercitia frequentare.

Quod caput, paucis brevitatis causâ demptis, hic inseritur.

*Una inter præcipuas exigui in spirituali vita progressus causa est crebra exercitiorum mutatio, nimiaq; inconstantia in cæptis relinquendis, & in novis
ample-*

P R Æ F A T I O.

amplectendis facilitas. Unde fit, ut plura diversaq; prosequentes, hodie hoc, cras aliud, perendie illud, in fine anni nihil reperiuntur apprehendisse.

Igitur ostendamus nunc, quæ potissimum ea sint exercitia, quæ ab initio conversionis usq; ad vitæ finem perseveranter continuari possint, ac debeant, ad quæ tanquam ad certas stationes recurrens anima, reliquorum operum suorum seriem, debitò modò ordinare possit. Nequè enim aliud intendimus, quàm firmas fixasquè præfigere columnas & bases, quibus innixum spiritualis ædificii fundamentum, in perfectionis cœlestis fastigium & culmen exurgat.

Sunt autem tres columnæ vitæ spiritualis: Prima est Puritas sive purgatio, quæ nihil aliud est, quàm continuum, noxia omnia, quæ contra veram puritatē ac munditiam cordis in omni statu occurrunt, impedimēta, tollendi studium: Quod consistit in vera peccatorum contritione, sui ipsius abnegatione, passionū mortificatione, omnium curarum inutilium imaginumq; abstractione, usquè dum illud de nobis dici possit; Beati mundo corde,

P R A E F A T I O.

corde, quoniam ipsi DEUM videbunt. En itaq; lector charissime exercitium puritatis sive purgationis, quod à primo conversionis tuæ die, usq; ad ultimum vitæ tuæ continuò prosequi debes; quantumcunq; enim quis perfectus sibi videatur, semper tamen habebit in hac mortali vita quod mortificet; quod purget, nec unquã deerunt ei, quæ auferat, impedimēta.

Secunda vitæ spiritualis columna, continuumquē ad quod recurrere debemus exercitium, est Lux, cognitio nimirum sui ipsius, & cognitio DEI: in quibus duobus universā Christianæ Philosophiæ perfectionem S. Augustinus complexus est, hīs ad hoc utens terminis: noverim te. Et S. Franciscus: Quis es tu Domine, & quis sum ego? Hæc itaq; cognitio initium sumit in via purgativa, & in omnibus continuata viis, majorem semper acquirit perfectionem.

Primò siquidem peccata nostra, earūquē turpitudinem, nostramquē erga DEUM ingratitudinem agnoscimus. Deinde ipsum quoquē DEUM ex misericordiæ, justitiæquē, præcipuē verò acerbissimorum dolorum Christi Domini affectuosa
& com-

P R Æ F A T I O.

& compassiva consideratione cognoscimus. Hæc autem viæ Purgativæ imperfecta cognitio, in Illuminativa in virtutem transit humilitatis, desideriumquæ proprii contemptûs. DEI quoquæ notitia, quæ antea erat quasi rudis & animalis, & infantium spiritualium propria, crescit innumerabilium ipsius perfectionum contemplatione, præcipuè meditatione & imitatione virtutum omnium, eminentissimè in Sacratissimâ Christi Domini Humanitate resplendentium. Ac tandem in via Unitiva, ista sui ipsius cognitio in tantum excrescit, ut anima intra seipsam profundissimè humiliata, ab omnibus contemni, despici, pro nihilo haberi, quinimo si fieri posset seipsam annihilare concupiscat; & summô studiô omnem ignominia occasionem quærat, maximaquæ exultatione omnem honoris proprii jacturam perferat: tantò enim perfectiùs seipsam anima cognoscit, quantò ampliùs in DEI cognitione perficitur: quæ profecto DEI cognitio, hac in via multò quàm in præcedentibus purior & perfectior, in sublimiorem ipsius DEI contemplationem, sive notitiâ afflurgit.

Tertia

P R Æ F A T I O.

Tertia deniquè columna sive perpetuum exercitium est Amor, ad quem cætera omnia tanquam in finem ordinantur. Hic in via Purgativa adhuc impurus, imperfectus, & quodammodo mercenarius per actus attritionis sive contritionis exerceri solet. In Illuminativa verò à passionum nostrarum inquinamenti magis depuratur, & cum ipsa cognitione magis perficitur. Ac deniquè cum in viæ Unitivæ statu multò nobilior & eminentior sit cognitio, multò quoque ferventior & ardentior est illius amor. Atque ita unus idemque amor, in via Purgativa adhuc tepidus, aut saltem sensibilis & impurus, in Illuminativa fervet; in Unitiva omnibus contrariis devictis & expulsis, exardescit. Eodem modò, quò idem calor lignum primò remissè calefacit, postea intenditur, & eousque augetur, ut lignum in ignis formam transmutet. Quis autem est iste calor, nisi de quo loquimur, amor? qui eousque excrescit, usque dum felicissimâ metamorphosî hominem in DEUM convertat, & transformet.

Porro

P R Æ F A T I O.

Porro in multiplici affectuum horum exercitiorum varietate, illos seligere poterit anima, qui uberioris devotionis sensuum causare solent, vel à quibus, considerata officii vel personæ qualitate, majorem in se profectum vel subsidium emanaturum confidit.

Advertendum est consequenter, quomodo quis in harum viarum exercitio faciat progressus, nunquam tamen priora esse deferenda, sed debito modo & ordine posterioribus jungenda. Quinimò quantò plùs proficit, tantò perfectiùs priora continuare debet. Exempli gratia, contritio & abominatio, quæ sunt viæ Purgativæ, nequaquam in posterioribus viis omittuntur, sed perficiuntur. Similiter passionum mortificatio, & virtutum acquisitio, quæ ad viam Illuminativam spectant, multò perfectiùs & ferventiùs in via Unitiva debent exerceri.

Ex quibus omnibus manifestò apparet, quomodo per totam spiritualem vitam eadem exercitiorum series continuari & servari possit; immò ipsa eadem esse omnium viarum exercitia, solùm inter se

166 majori

P R Æ F A T I O.

majori minorivè perfectione distincta.

Neminem terreat hæc multiplicitas & varietas actuum virtutum & affectuum: quia hæc collecta sunt pro omnibus Ascetis. Sunt enim multi, qui habent commoditatem, & tempus ad hæc exercitia præscripto ordine facienda: quibus verò tempus commodum deerit, ad omnes actus hic propositos exercendos, isti possunt saltem aliquos, vel aliquarum virtutum facere juxta beneplacitum suum. Sed sciendum est, quòd eò plura merita lucrabimur, quò plures virtutes exercuerimus.

Et quamvis unusquisq; specialiter illam virtutem exercere debeat, quæ ipsi pro mense cum Patrono sorte obvenit: tùm etiam, quam pro hebdomada aliqua sumpsit: vel quam ratione alicujus occasionis, officii & suæ necessitatis aliquis colere vellet: tamen neq; his omnibus ordo virtutum hic positus impedimentum aliquod asseret, quominus virtutes dictas exerceant simul cum istis, quæ hic sunt pro qualibet FERIA notatæ: tantummodo quilibet nostrum designatas habeat certas horas, quibus hæc expediat.

P R Æ F A T I O.

Ut insignem ex his exercitiis percipiamus fructum, debemus omninò curare, ut fideliter adimpleamus hæc omnia, quæ hic proponimus dicendo : Domine, firmissimè propono, cupio, volo : aliàs nunquam in via perfectionis aliquem progressum faciemus.

Sed operæ pretium est scire, quamdiu unusquisq; nostrum, in qualibet via, exercitiis propriis vacare debeat. Sunt aliqui Magistri spirituales, qui satis esse putant quatuor aut sex menses, pro exercitiis viæ Purgativæ: præsertim cum certa indicia perfectæ purgationis animæ suæ aliquis in se perspecta habuerit: videlicet, si ea, quæ prius movebant ad timorem, compunctionem, & dolorem, modò excitent ad amorem. Non obscurum etiam erit hujus rei signum, suiipsius odium, tantaq; peccatorum abominatio, ut pro toto mundo ea repetere nequaquam vellet. Itaq; jam aliquot mensibûs transactis à principio vocationis suæ bonum erit, in exercitia viæ Illuminativæ incumbere, maximè, cum in Ordine nostro, Purgativæ & Illuminativæ exercitia simul proponantur.

*Illuminativæ autem viæ exercitiis tam
diu*

P R Æ F A T I O.

diu incumbendum, donec animæ jam edomitas passiones habeat, habitusq; virtutum ita altè radicos, ut in earum exercitio firmitatem facilitatemq; experiatur.

Unitivæ deniq; certum tempus præfigi non debet, cum quoddam æternæ unionis hæc sit initium: in qua via interim nemo negligat præcedentium viarum exercitiis sese perficere.

Hujus viæ Unitivæ Actibûs poterit quilibet uti, tum ei pro sua devotione placuerit; præsertim in certis Festivitatibus, & post SS. Eucharistiæ sumptionem, actibus Adorationis, Laudis, Gratiitudinis, Amoris DEI, Desiderii videndi DEUM. Immo bonum esset sæpiùs exercere actus Desiderii amandi DEUM, & Petitionis amoris DEI, de quibus pag: 136. 145.

Isti verò omnes Actus potius mente, quàm ore exercentur.



EXER-



EXERCITIA INCIPIENTIIUM SEU, VIÆ PURGATIVÆ.

Hæc via consistit in purgatione animæ,
quæ requirit.

1. ***E**vacuationem peccatorum: & hæc fit, tum
per Confessionem, tum per veræ Contritio-
nis actum.*
2. *Mortificationem sensuum externorum, &
internorum.*
3. *Mortificationem passionum: Amoris proprii:
Voluntatis propriæ: & Judicij.*
4. *Extirpationem vitiorum, quæ fieri potest,
per fugam, & abominationem eorum, atque
per actus contrariarum virtutum.*

PRO DIE DOMINICO.

Hac die pro DEI Præsentia est Christus Dominus
infantulus in præsepio reclinatus.

***H**inc haberi potest motivum ad actus contri-
tionis: Mortificationem Sensuum externo-
rum, & internorum in communi: Mortificatio-
nem*

2 *Exercitia*
nem Passionum in communi : Mortificationem
Amoris proprii : Extirpationem vitij Accidie,
& virtutem Diligentie.

Actus Contritionis.

O Amantissime JESU, qui ex MARIA Virgine, in stabulo natus, in vili præsepio reclinatus, multa incommoda pro peccatis nostris pertulisti, & vagitum, vel potius gemitum edidisti, atquæ lachrymas pijsimas effudisti.

Ecce quid pro me fecisti? ego autem quid retribuui tibi Domino meo? nisi summam ingratitude pro tantis beneficijs, malitiam pro bono, & pro tam ineffabili charitate, impietatem maximam, per quam multis peccatis gravissimis, te DEUM meum totâ vitâ offendi; de quo nunc ex amore tui doleo, & præ dolore ob tuam offensam coram te gemo.

Utinam te, Domine, nunquam offendissem! Utinam prius occubuissem, quàm tibi Domino meo displicissem! jam potius moriar, quàm te vel levitèr offendam.

Et quia infinitè bonus es: ideo omnium peccatorum meorum veniam à te spero.

O JESU, Pastor bone, qui venisti in mundi desertum quærere ovem perditam: ego sum, qui erravi, sicut ovis quæ periit, & longè à te Pastore optimo toties recessi, quoties in te peccavi: sed quære servum tuum Domine, & fac, ut nunquam à te recedam, & obliviscar mandata tua.

Ecce

Ecce & ego jam revertor ad te, cum intimo cordis mei dolore, & detestatione peccatorum meorum; quia sunt offensâ tua.

Ne, quæso, projicias me à facie tua; nec avertas à me oculos misericordiæ tuæ.

O quàm amarum mihi dereliquisse te Dominum, & DEUM meum! sed quia tu dixisti: Vivo ego, nolo mortem peccatoris; sed ut convertatur, & vivat.

Convertor jam ad te Domine, in toto corde, ut, & tu convertaris ad me, o unica spes mea!

Et quamvis abijceres me: quamvis infernum, quem promerui, reservares mihi: nihilominus adhærebo tibi: & unum tecum esse volo in æternū.

*Actus pro mortificandis sensibus externis
& internis.*

BEnignissime JESU, qui pro nobis incarnari, homo, & infans fieri dignatus es: sicut infantes sensibûs suis externis & internis nesciunt malè uti; ita & ego, amore tui, nolo unquam sensibus meis externis, & internis uti in malum, & ad offensam tui.

Dulcissime JESU, in unionem amoris tui, ex quo propter me omnia delectabilia tibi subtraxisti, volo abstinere ab omni sensuum delectatione ob amorem, honoremque tuum, & bene-placitum tuum.

Omnes sensus meos, & vires omnes animæ, & corporis, à noxiis, & vanis, & superfluis delectati-

onibus, viriliter, & cum labore studio abstrahere volo.

Clementissime JESU, omnes imagines vanas ex mea Imaginativa expungere, & tantummodo tuæ sacratissimæ Humanitatis imagines varias formare mihi, & repræsentare conabor.

Dilectissime JESU, omnia illa, quæcunq; Æstivativa mea judicaverit esse convenientia, seu bona; quia jucunda, & commoda, & honorifica; firmissimè statuo fugere: & quæcunq; judicaverit disconvenientia, seu mala; quia molesta, & amara, & contemptibilia; illa, ex amore tui, eligere, & amplecti volo.

Omnes notitias noxias, & inutiles, & quæ per meum visum, auditum, & alios sensus percepi, oblivioni tradere: jam verò notitias, quæ ad gloriam, honorem, amorem, & beneplacitum tuum spectant; vel etiam ad meam & proximorum salutem sunt necessariæ, memoriâ retinere curabo.

Nolo Domine habere oculos, nisi ad te videntum: neq; aures, nisi ad te audiendum: neq; linguam, nisi ad loquendum de te: neq; cor, nisi ad te amandum: neq; memoriam, nisi ad recordationem tuæ dulcedinis: nequè intellectum, nisi ad cognitionem tuæ Majestatis: neq; manus, nisi ad tuum famulatum; neq; pedes, nisi ad tuum obsequium: neq; corpus, nisi tibi ad victimam: nequè vitam, nisi tibi ad sacrificium.

Cupio, Domine JESU, ut quoties âerem ad me attraho, te ipsum cordiali affectu intra me attraham:

ham: quatenus omnes meae cogitationes, verba, & opera mea, tuis cogitationibus, verbis, & operibus uniantur, & sic unita, DEO Patri, ad maiorem ejus gloriam, repræsententur.

Extingue Domine omnes imagines extraneas in corde meo, ut pacem, five delectationem, nullibi, vel quæram, vel inveniam, nisi in te dulcissime DEUS meus.

O Dilectissime JESU, omnes sensus meos, omnes vires, cogitatus, & affectus meos include in Cor tuum, ut tecum sim totus, & maneam in æternum.

Actus pro mortificandis Passionibus in communi.

O Amantissime JESU, qui inter alia dona naturæ affectibus dotasti me, ut illis tanquam instrumentis uterer ad tuum obsequium, ad benè vivendum, & acquirendas virtutes. Sed quia appetitus mei affectus, qui passionibus vocantur, ex vitiata per peccatum primorum parentum nostrorum natura, semper propendent in malum: ideo eos ab omni malo cohibere, ne te per eos unquam offendam, firmissimè statuo.

Scio, Domine mi benignissime, affectuum nostrorum, & passionum actus, ex natura sua esse indifferentes; hoc est, neque bonos, neque malos: fieri autem bonos, si ad verum bonum, & ad aliquid licitum, & modo ordinato, ac moderato tendunt: malos verò, si ad malum, si ad illicitum, & vetitum feruntur, vel modo immoderato: proinde ego

retrahere illos ab omni malo, & re illicita, sed semper ad bonum, & licitum convertere, & ex immoderatis, facere moderatos omnibus viribus conabor.

Non tantum ab illicitis rebus, & vetitis, sed etiam à licitis; videlicet, à cibo, vel potu, à quiete, vel somno, à visu, vel auditu, & alijs similibus, ex amore tui, abstinere statuo.

Dulcissime JESU, etiam si appetitus meus sensitivus nihil quærat, nisi commoda, & delectabilia, & honorifica; tamen nolo unquam commoditatē, nisi ex necessitate, seu magis ex tua Divina voluntate; jam verò omnia oblectamenta, & honorifica fugere semper volo.

Si quando appetitui meo oblatum fuerit aliquod bonum utile, sive delectabile, sive honorificum, tunc ego statim ipsi alia bona meliora proponam: videlicet, bona virtutis, secundum modum humanum, & omnibus hominibus communem: vel bona cælestia, secundum modum Christianum: sed præcipuè exemplar tuæ Vitæ sanctissimæ, secundum Religiosorum morem & modum.

Quæcunq; tibi Domine DEUS meus placita esse cognovero, ea sola verè bona judicabo, amabo, desiderabo, & sollicitè quæram: & quæcunq; displicere tibi intellexero, illa verè mala censebo, & odiò habebō, & audacter ea persequar, & fugiam: & si evenerint, de illis ex animo dolebo.

10

Via Purgativa.

Actus pro mortificando amore proprio.

O Dulcissime JESU, qui veniens in hunc mundum, illa, quæ sunt magis molesta carni, & contemptibilia; hoc est, illa, quæ sunt amorì proprio contraria, elegisti: proinde & ego ob amorem tuum talia exnunc eligo, amplector; & semper eadem quærere, & de inventis, & oblatiis gaudere, atq; amorì proprio perpetuus inimicus esse firmissimè propono.

Benignissime JESU, quia amor proprius est amorì tuo contrarius: non enim te, nec honorem tuum, nec tuum bene-placitum, sed potius seipsum, commodumq; suum, & æstimationem, variaquæ oblectamenta quærit: ideò tanquam hostem tuum, & meæ salutis pessimum, omnisq; peccati, & mali radicem odiò habere, nec illi unquam satisfacere volo.

Abominor amorem proprium; quia quæ sua sunt, quærit, non quæ JESU Christi.

Nolo Domine, ut reperiatur ille amor inordinatus in me, quò homo vult sibi omnia bona propter seipsum, & fugit omnia adversa propter seipsum: hoc est, quò homo diligit se propter se: sed super omnia, te solum, propter te, diligere volo; meipsum quoq; & alia omnia ex charitate diligenda, propter te, & in te.

Absit à me Domine, ut aliquid unquam appetam illicitum, & ex licitis, propter meum commodum, honorem, & voluptatem meam, sed purè

propter te DEUM meum, tuumq; bene-placitum.

Profiteor, quòd sicut nemo potest unò oculò simul cælum & terram aspicere: ita nemo potest, & tibi, & sibi, tanquam fini inhærere: ideo ego amoris proprii oculum elicere mihi volo; ut te solum, tanquam finem meum unicum aspiciam, tibiq; soli placere in omnibus intendam.

Domine DEUS meus, omnes cogitationes, desideria, verba, & actiones meas, ad tui solius gloriam, & honorem, dirigere firmissimè statuo.

Nolo Domine mi, propter me ipsam ab alijs amari, laudari, timeri, revereri; sed potius contemni, vilipendi, & ignominiâ affici ab omnibus desidero: & propterea, nolo ex amore proprio, ob erubescentiam, defectus meos, tam naturales, quàm morales, & imperfectiones, ac vitia occultare, aut illa excusare, vel extenuare, ut omnibus pateat vilitas & indignitas mea.

Pro nihilo habeo, hominibus placere, aut displicere: sed tantummodo, tibi soli D E O meo, Creatori, & Domino meo.

Ælus pro extirpando vitio Acediæ.

O Amantissime JESU, quem venientem in hunc mundum sui non receperunt, & ad te in stabulo natum, ac in præsepio jacentem, salutandum, adorandum, honorandum, accurrere gravabantur propter Acediam: quod vitium ego abominor ex amore tui.

Displicet mihi valdè ob amorem tuum dulcissime

Via Purgativa.

cissime Domine JESU, omnis tristitia de bono Spirituali: displicet tædium, quod aliquando in bonis actibus habui: displicet torpor mentis, propter quem, sæpissimè refugiens molestiam, & laborem, bona spiritualia, vel exercitia inchoare neglexi.

Heu me miserum! qui vocatus ad vitam Spiritualem, omnia spiritualia exercitia segniter, tepidè, & remissè perago. Namq; meditationes meas expedio sine recollectione, & sine fructu; orationes sine devotione; horas canonicas sine reverentia, & attentione; examen conscientiae sine emendatione; totam vitam sine mortificatione, sine profectu, sine virtutum exercitatione; de quibus me nunc accuso, arguo, & reprehendo, coram tua Divina Majestate: & ex intimo corde, propter te DEUM meum summè dilectum, doleo; ac emendationem propono.

O utinam Domine mi benignissime! omnes præteritos dies gratiae tuæ benè expendissem, quos mihi dedisti, ad dignos pœnitentiae fructus faciendos, ad benè operandum, ad salutis negotia diligenter peragenda; quos ego, in vanis negotiis, & occupationibus, in lectione inutili, in confabulationibus minimè necessariis, & in otio, expendi, vel potius perdidi, quorum omnium, ex amore tui, nunc me pœnitet maximè. Te supplex rogo, per viscera misericordiae tuæ, digneris indulgere, & me adjuvare, ut reliquum vitae meae tempus, benè, sanctè, & juxta beneplacitum tuum expendam.

As

Non

Non solum o Domine mi clementissime, ipsum vitium Acediæ abominor, & execror, verum & alia hujus vitii pessima germina; videlicet, malitiam, seu detestationem ipsorum bonorum spiritualium.

Rancorem; hoc est, indignationem contra proximos me ad spiritualia inducentes.

Desperationem, de assequenda beatitudine, propter defectum gratiæ, & meritorum priorum.

Puillanimitatem, ad inchoanda illa bona, quæ propter te, facere debemus, & possumus.

Torporem, pigritiam, & negligentiam, ad explenda tua præcepta.

Evagationem mentis ad illicita, in his præsertim, in quibus tenemur attenti esse.

Per quæ omnia, quia aliquando te infinitè bonum offendi, doleo vehementer, & veniam humiliter peto.

*Actus diligentie virtutis contrarie
vitio Acediæ.*

O Dilectissime JESU, qui veniens in hunc mundum, exultasti ut Gigas, ad currendam viam mandatorum æterni Patris tui, quæ modò perfectissimò, & animò ferventissimò semper fecisti: proinde & ego exemplum tuum secutus, expulsam acediã, socordiã, & tepiditate, summo cum fervore, & diligentia, omnia mandata tua, & voluntatem tuam facere semper, & adimplere volo.

Nolo

Nolo unquam dare locum tristitiæ, vel alicui tædio in bono opere, & in actibus spiritualibus, quos cum omni animi alacritate, & lætitiâ incipere, & in eis continuandis perseverare usq; ad finem contendam.

Dabo operam, o Domine mi, ut nunquam, ob aliquam molestiam corporis, laborem, aut difficultatem, ea, quæ, pro tuo honore, vel proximorum salute, & ex præcepto agenda sunt, tempore debito agere omittam: tantam diligentiam, & sollicitudinem, singulis bonis operibus apponere curabo, ac si tota salus mea ex uno quoq; penderet.

Quemlibet actum bonum, eo cum fervore spiritûs, & curâ, expedire conabor, ac si illud opus ultimum esset; & ac si statim essem moriturus, & rationem de eo, tibi districto Judici redditurus.

Nolo unquam indignari contra aliquem, me ad benè agendum inducentem; immò pro eo ferventer orare statuo.

Benignissime DEUS in laudibus tuis divinis, & in oratione attentissimus ero; nec unquam voluntariam distractionem, & evagationem animi admittam.

Amantissime DEUS ad omnia opera tibi grata, & ad omnem obedientiæ, ac omnium aliarum virtutum actum obeundum, me vigilem, expeditum, & alacrem esse propter te decerno.

PRO FERIA SECUNDA.

Hac die pro Præsentia DEI, est Christus lavans pedes Discipulorum.

***H**inc incitamentum haberi potest ad Contritionem: ad mortificandum visum, & passionem Amoris, & concupiscentiæ, seu Desiderij, & Judicij proprij, ad extirpandum vitium Superbiæ, & ad exercendam virtutem Humilitatis.*

Actus Contritionis.

O Puritatis amator Dulcissime JESU! qui pedes discipulorum tuorum lavando, eos ab omni macula mundare voluisti; quiq; etiam me peccatorem per sacrum lavacrum Baptismi, sublatâ originali maculâ, mundum reddidisti: quam munditiem, ô quâm sæpius per actualia peccata amisi!

O quam frequenter animam meam inquinavi! quâm crebrò sædissimis sceleribûs eam conspurcavi!

Et quomodo sine pudore apparebo conspectui tuo? Mundi enim sunt oculi tui, ne videas malum: & respicere iniquitatem non poteris.

Agnosco Domine mi, & humiliter confiteor, me propter innumera peccata mea, eorumq; sæditatem, coram te, & Sanctis tuis, atq; omnibus creaturis, esse abominabilem, odibilem, omniq; confusione, & pænâ esse dignissimum. Ac propterea me ipsum, sicut veritas & æquitas exigat, odi, detestor, arguo, vilipendo, & contemno: atq;
ab

ab aliis, odio haberi, contemni, & pro meis contra te offensis, infidelitatibus, & inobedientiis castigari desidero, expecto, peto; & inde gaudere, & gratias agere propono.

Odi quoq; , & detestor, ex amore tui, offensam tuam, & omnem ingratitudinem meam erga te, & inobedientiam omnem, tuæ voluntatis transgressionem, eamq; dignis pœnitentiæ fructibus, in me punire, vindicare, & ulcisci volo: ac illam magis horreo, & timeo, & cum majori sollicitudine, ac studio eam fugere, & vitare desidero, & statuo, plùs quàm omne malum pœnæ temporale, & æternum: credens, & sciens, eam esse infinitè majus malum, cæteris malis pœnæ.

O clementissime Domine mi, qui dixisti per Isaiam Prophetam: Lavamini: mundi estote: auferite malum cogitationum vestrarum ab oculis meis: quiescite perversè agere. Tunc si fuerint peccata vestra ut coccinum, quasi nix dealbabitur: & si fuerint rubra, quasi vermiculus, velut lana alba erunt.

Ecce jam nolo amplius perversè agere: jam nolo te offendere: jam nullum malum non modò facere, sed ne cogitare quidem volo. Tu verò Domine DEUS meus, lava me ab iniquitate mea: & à peccato meo munda me.

Quis enim potest facere mundum de immundo, non ne tu, qui solus es? Si enim tu lavabis me; tunc super nivem dealbabor: quod à te humiliter peto, & me obtenturum, per tuam infinitam bonitatem spero.

Actus

Actus pro mortificando visu.

MOdestissime JESU, qui inclinatorum ad pedes lavandos Discipulorum tuorum, etiam oculos ad terram inclinasti: cujus exemplò, semper oculis demissis incedam, nec illos, sine justa causa, & necessitate elevabo.

Dilectissime JESU, in unione amoris illius, ex quo tu propter me, omnia delectabilia tibi subtraxisti; ex amore tui, omnia visus oblectamenta vitare propono.

In incessu, domi, vel foris, in Choro, Claustro, Refectorio, & in aliis locis, diligentem oculorum meorum custodiam habebo; ut nullam rem videam, nisi ob meram necessitatem.

Firmissimè decerno me oculos à rebus minimè necessariis averfurum propter te.

Nolo mitissime Domine, aliquid in hac mortalitate pulchrum intueri.

Abfit à me Domine, ut aliquid curiosè intuear.

Quin etiam illa, quæ videre licet, intueri nolo, ut te tandem videre queam.

Ex animo desidero, Dulcissime Domine, me nunquam (quod ego animadvertam) rem aliquam, quæ à te animum divertat, intuiturum.

Desideratissime DEUS averte oculos meos ne videant vanitatem.

Malo Domine, ut mihi oculi eruantur, quàm vel semel illis abuti.

*Actus pro mortificanda passione: Amoris, &
Concupiscentiæ, seu Desiderij.*

O Mundissime JESU, qui pedes Discipulorum lavare voluisti, ut in conspectu tuo essent mundissimi: ecce affectus nostri pedes sunt animæ, quibus ambulat per terram; dum per amoris, & concupiscentiæ affectus, res terrenas sectatur, ipsiq; adhæret: proinde, ut sint mundi semper in oculis tuis, eos à rebus terrenis avertere conabor.

Nolo Domine mi, ut aliquid amem, & concupiscam terrenum, & noxium, & tibi displicens: sed tantummodo; ut te diligam super omnia.

Absit à me Domine, ut amem, & desiderem aliquid illicitum; videlicet, mundanos honores, divitias inutiles, vel impuras delectationes: siquidem & lumen rationis, & fides Sancta me convincit, vanos esse omnes mundi honores, falsas quoq; terrenas divitias, & momentaneas illas delectationes omnes, magisq; bestiis quàm hominibus convenientes: & ideo amoris mei, & desiderii affectum, ad cælestes Sanctorum honores, ad veras gratiæ & gloriæ cælestis divitias, atq; ad æternas beatitudinis æternæ delectationes, convertere curabo.

Quamvis, dulcissime JESU, aliquid licitum fuerit; tamen in illud amore immoderato, & nimis intenso nunquàm ferri volo.

Quod si me nimis inclinatum ad aliqua sensero; cogitabo, indigna hæc esse humano amore, saltem

saltem tam vehementi: siquidem solum ad bonum virtutis sic tendere debeo.

Vel cogitabo, omnia bona terrena non mereri hominis amorem, qui ad caelestia, & aeterna bona possidenda creatus est.

Insuper, exemplum tuae Sanctissimae vitae mihi proponam, dicendo intra me: Maximum esse inconueniens Religiosum haec terrena tantopere affectare, qui tuarum actionum sanctissimarum exemplar imitari debet.

O Clementissimae JESU, ut tua gratia, passiones meas, & inordinatos affectus citius vincere possim, amorem praecipue proprium, unde omnes passiones oriuntur, moderari volo: & statim ut videro aliquid iucundum, utile, vel honestum, cor meum ab his auertere, & ad caelestia suspirare festinabo.

Itaque, si ad aliquod bonum delectabile, escam, scilicet, aut potum, amorem in me excitari agnovero; statim cor in caelum efferam, ajens: Quanto mihi suavius convivium erit in caelo, ubi esca erit, Panis Angelorum; & potus, ipse fons vitae.

Si ad aliquod utile; nempe cellam commodam, aut sedile: tunc dicam ad me: Quanto mihi commodior erit sedes in caelo, & mansio aeterna super domum David.

Si vero ad bonum honorificum, seu honorem, propter aliorum existimationem, de aliquantulo meo ingenio, literatura, seu dexteritate ab aliis concepta: illico ad gloriam caelestem cor meum attollam,

attollam, ajens: Quāto mihi honorificentior erit concepta de me exultatio, in amplissima DE I curia, & universi mundi theatro.

Aelus pro mortificando Judicio proprio.

O Sapientissime JESU, qui beatum Petrum Apostolum tuum, dum sibi lavari pedes recusaret, abnegare proprium Judicium voluisti: fac quæso, me mortificatum habere semper idem Judicium; prout & ego illud mortificare, & abnegare propono.

Volo Domine JESU, ut Judicium meum sit semper conforme Judicio tuo Divino, & aliorum hominum, præsertim Superiorum meorum.

Profiteor me nihil scire, nihil ad sobrietatem sapere; sed omnes alios prudentiores, doctiores, & sapientiores me esse reputo: & ideo nemini me præferre, nec ullum contemnere, firmissimè statuo.

Non illud, quod mihi rectum, & bonum videbitur; sed quod tu, & Superiores mei judicaveritis, eligam, & bonum esse credam, proprium sensum relinquens, illum abnegans, & in obsequium fidei, ac obedientiæ humiliter captivans.

Profecto Clementissime DEUS, tametsi Superiores mei homines agrestes, & ignari esse videbuntur: tamen quidquid mihi dixerint, quasi cælestia oracula suscipiam.

Ab sit à me Domine, ut aliquando improbem, quod Superiores mei, vel alii viri boni probaverint.

Quidquid est in Regula Sancta: quidquid in

B. Confli-

Constitutionibus, Instructionibus, Ordinationibus, & Decretis Superiorum præscriptum, nullò modò unquam examinare, & ad meum sensum explanare audebo.

Nunquam contra dispositiones Superiorum, ob honorem, & amorem tuum, mussitabo; vel discursus aliquos admittam.

Nolo unquam esse contrarius doctrinæ, sententiis, & dogmatibus manifestè notis, ac sapientum hominum consensu approbatis.

In rebus dubiis libenter ab aliis consilium petam, eidemq; faciliè acquiescam.

Non solum Superioribus, & Confessariis meis; sed etiam aliis spiritualibus viris, conscientiæ meæ latebras, promptò animò aperire, & ab eis, in rebus ad salutem meam pertinentibus, dirigi volo.

Aëtus pro extirpando vitio Superbiæ.

Humillime JESU, qui pedes Discipulorum tuorum lavando, exemplum humilitatis nobis dedisti; quod exemplum amore tui imitari propono, & per humilitatis virtutem, pessimum vitium Superbiæ, ex animo meo, extirpare volo.

Abominor Domine mi clementissime, propter te, omnem inordinatum appetitum excellentiæ, cui debetur honor, & reverentia, in quo inordinato appetitu, consistit vera superbia.

Detestor simul, & hujus vitii abominandas species: & ideo nunquam præsumā aliqua bona, quæ habeo

habeo à me ipso habere: vel pro meis meritis, à te Domino meo illa accepisse: vel gloriari me habere, quæ non habeo: vel ex his, quæ habeo, singulariter excellens videri, cæteris despectis.

Displicent mihi illa vitia, quæ oriuntur ex Superbia; eaq; vitare firmissimè statuo; videlicet, curiositatem, & immodestiam oculorum.

Levitatem animi, quam verbositas & clamor ostendit.

Ineptam lætitiâ; ut non sim promptus ad risum, & jocum; Jactantiâ; cujus signum est multiloquium.

Singularitatem; ut teneam communem vivendi in Religione Regulam.

Arrogantiâ: ne me credam aliis meliorem.

Præsumptionem; ut non me putem aliis utilior, aptior, & dignior.

Defensionem, & excusationem peccatorum.

Simulatam peccatorum confessionem, quæ pro peccatis pœnam subire non vult.

Rebellionem; ne me Superioribus subijcere detrectem, eosq; contemnam.

Libertatem peccandi; ut non libenter voluntatem propriam faciam.

Peccandi consuetudinem, per quam vivitur sine tuo Divino timore.

Odi maximoperè, & vanam Gloriam; hoc est, immoderatum appetitum inanis gloriæ, seu vanæ manifestationis propriæ excellentiæ.

Propterea nolo unquam appetere, vel gaudere,
B2 laudari,

20 *Exercitia*

laudari, aut honorari, pro re vana, caduca, & multò minùs, pro re vituperabili.

Odio habeo, & illa vitia, quæ vanæ gloriæ dicuntur filia: scilicet, jactantiam; ut nunquam verbis me extollam.

Præsumptionem novitatum; ne per illas excitem hominum admirationem.

Hypocrisim; ut nunquam per falsa dicta, vel facta, videri, aut laudari queam.

Pertinaciam; ut nunquam nimis propriæ sententiæ adhæream, nolens cedere saniori, & meliori; ne inferior appaream.

Discordiam; ut à proprio sensu, & voluntate, facile recedere velim, & aliis consentiam.

Inobedientiam; ut nunquam parere tuis, & Superiorum mandatis renuam.

*Actus Humilitatis, virtutis contrariæ
vitio Superbiæ.*

O Humillime JESU, sicut displicet mihi vitium Superbiæ; ita multum mihi placet virtus Humilitatis, quam tu nos, & factò, & verbò docuisti, dicens: Discite à me; quia mitis sum, & humilis corde. In cujus virtutis exercitio, omnem operam collocare decerno.

Nolo Domine mi, appetere ullam excellentiam, & manifestationem ejus, atq; ab aliis honorari.

Desidero, ut omnes cognoscant meam vilitatem, meq; parvi pendant, & contemnant; de quo contemptu lætari, & contemprores amare volo: sicut

cut & ego meipsum contemno, & vilipendo.

Confiteor coram toto mundo, me esse omnium vilissimum, & contemptibilem: quia nihil sum, sed gratiâ tuâ sum id, quod sum: nihil scio: nihil possum: nihil habeo, præter innumeram multitudinem iniquitatum, scelerumq; meorum.

Fateor, Domine mi Sanctissime, quòd sim sentina iniquitatum, vitiorum pelagus, scelerum abyssus: quòd sim sacrilegus, & latronibus, publicanis & veneficis, gentilibus & damnatis, ipsiq; daemonibus pejor.

Palam dico, quòd sim deformior omnibus leprosis, & ulcerosis: imò sum sterquilinum, ac omnium immunditiarum, & sordium colluvies, & receptaculum sœdissimum; sum ulcus, vel apostema sœtidissimum, ex quo tanta sanies peccatorum, tantaquè lues flagitiorum, & iniquitatum effluxit.

Omnia bona, quæ habeo, aut facio, tuæ bonitati, & liberalitati, non verò meæ virtuti, industriae, vel meis meritis adscribo: nec unquam patiar, pro aliquo bono laudari, & honorari: sed omnem laudem, & gloriam, tibi soli tribuere semper volo.

Absit à me, Domine mi benignissime, ut ex donis, quæ à te accepi, elever, aut superbiam, vel propter illa vanè in me complaceam, & me alicui præferam, vel quempiam contemnam: verum magis timere conabor, ob accepta hæc tua bona; ne in me sint vacua, quibus me indignissimum

esse, & præsentiûs, & futuris sincerè judico.

Omnia opera mea contemno, nihil facio, & vilipendo, atq; confiteor, quòd sint indigna, quæ tibi placeant, aut sint coram te alicujus meriti.

Agnosco, & profiteor, me esse tuum servum inutilem, & ingratissimum, atq; ad omnia ineptû, rudem, & inertissimum: & idè omnibus aliis hominibus, non tantû majoribus, & æqualibus, inferioribusq; , sed universis, etiam scelestissimis me subijcio, & subter omnes creaturas, me deijcio.

PRO FERIA TERTIA.

Hac die, pro præsencia DEI, est Christus Dominus orans in horto.

*H*unc motivum haberi potest ad Contritionem: ad mortificationem Odoratus: passionis Gaudii, seu Delectationis: propriæ Voluntatis: ad eradicandum vitium Avaritiæ: ad exercitium virtutis Paupertatis.

Actus Contritionis.

O Dulcissime JESU, qui in horto, copiosum sanguineum sudorem, ex toto corpore fudisti, & quasi omnibûs membrîs, pro peccatis nostris flevisi: O si & ego tecum amarè fleam! O si plorans plorem die ac nocte, propter peccata mea, quibûs permulctis, tuam infinitam bonitatem offendi!

Doleo, & ex toto corde detestor, & desleo tuam gloriam, & injuriam infinitam, à me vilissima creatura tuae Divinae Majestati factam. Et

Et quia dolor meus, valdè modicus & imperfectus est; obsecro te; ut per dolores tuos internos, & cordis tui contritiones, tuæq; Matris compassionem. B. Petri, atq; Beatæ Magdalenæ, & cæterorum omnium, qui unquam verè pœnituerunt, contritiones, & lachrymas quidquid mihi in hoc deest, benignè, & abundanter suppleas: & sicut potes, scis, & vis; & quantum, ac quando vis; hunc veræ contritionis dolorem, in me, cæterosque peccatores infundas, augeas, conserves, & perficias, ad tuam, Sanctorumq; tuorum gloriam, & meam, omniumq; peccatorum salutem.

Omnia singula peccata mea, unâ cum peccatis omnium vivorum, ac defunctorum, depono in charissima tua vulnera, & pretiosum sanguinem tuum; projicio in immensum ignem amoris tui: demergo in pelagus exuperantium meritorum tuorum: & abscondo in abyſſo infinitarum misericordiarum, & miserationum tuarum; ut ibi, per merita sanctissimæ Humanitatis tuæ, & acerbissimæ passionis, nec non per preces & merita piissime Matris tuæ, Beatorum Angelorum, Patronorum meorum, & omnium Sanctorum, & electorum tuorum, expientur, absorbeantur, & ad nihilum redigantur.

Abrenuncio amore tui, & sicut vis, omnibus ac singulis peccatis, & vitiis parvis, & magnis, & ab omnibus, quæ tibi displicent, integrâ voluntate me avertō.

Eligo, & propono, per gratiam tuam, vitare

24. *Exercitia*

deinceps quidquid tibi displicet : paratus mori potius, & quemlibet cruciatum perpeti, quàm scilicet, & ex proposito te offendere.

Amore tui, & tui honoris, ac Justitiæ zelo, dignos pœnitentiæ fructus facere firmissimè propono.

Esurio desideranter, omnia peccata mea, per tuam Justitiã, in me dignè castigari, & puniri : ut sicut peccando te inhonoravi; sic libenter pœnam, pro peccatis meis patiendo; te honorem, & glorificem.

Agnosco me nullis meis operibus, laboribus, & passionibus, posse pro illis dignè satisfacere : maxime, cum æterna gehennæ pœna eis debeatur, ad quam perferendam, cum gratia, & amore tuo, quandocunq; & quomodocunq; tibi placuerit, me totum resigno, & paratum offero. Sed quia pro nobis dignatus es pati, & mori, ut ab æternis pœnis nos redimeres, & ad tuam gratiam, & gloriam nos revocares; quia insuper vis, & gratum habes, ut hanc tuam passionem, & mortem tibi offeramus, & repræsentemus, in satisfactionem, & propitiationem pro peccatis nostris, & totius mundi; ideò, ut huic tuo satisfaciam desiderio, & possim, gratiã tuã recuperatã, gratum tibi obsequium præstare; Offero tibi, per suavissimum cor tuum, in Spiritu S. tuam passionem & mortem, simul cum omnibus, quæ assumpsisti, fecisti, & per tulisti pro nostra salute, & cum omnibus meritis, passionibus, & exercitiis Beatissimæ Matris tuæ

Virgi-

Virginis **MARIÆ**, & omnium Sanctorum, ac electorum tuorum.

Credo, hanc oblationem esse sufficientissimam pro peccatis, non solum meis, sed etiam totius mundi. Pie etiam confido, per eam, omnia peccata mea expiari, & debitam pro eis pœnam, plenissimè persolvi: gratiam, & amicitiam tuam mihi restitui; & ad spem vitæ æternæ me admitti.

Actus pro mortificando Odoratu.

O Amantissime **JESU**, qui à Judæis captus, ligatus, & ad Caipham deductus, ibidem in fœtidum locum, & immunditiæ plenum detrusus fuisti; ubi sacratissimum tuum Odoratum maximè afflictum habuisti: gratias tibi ago pro his omnibus, quæ in hoc sensu pati dignatus es: ego quoq; ob amorem tuum, quacunq; oblata occasione, omnes fœtores, & res malè olentes sustinendo; odoratum meum affligere propono.

Benignissime **JESU**, in unione illius amoris, ex quo tu omnia delectabilia tibi subtraxisti in tēris; ego quoq; ex amore tui, omnia odoratus oblectamenta fugere propono.

Absit à me carissime **JESU**, ut suffusus, vel unguentus, vel aliquas res gratissimi odoris, adhibeam in cella, ut odoratus meus suas experiatur delicias.

Si contingat, me per hortos ambulare, & ibi, inter flores, jucundissimos spirantes odores, commorari; nolo ex illis carpere quemquam, immò nequidem tangere.

Quæram

Quæram occasiones infirmis inservire; vel ex oblatiis occasionebus gaudebo: & ibi, quantumvis graves odores, libenter amore tui tolerabo.

Lætabor de officio humilitatis, mihi aliquando assignato, & de occasione, omnes immunditias domus purgandi, & fætores percipiendi.

Quoties, vel in Templo thuris odores, aut florum in horto sensero; toties illa odoramenta, erunt mihi, ad orationem, & laudes tuas Divinas incitamenta, ut dirigatur oratio mea, sicut incensum in conspectu tuo. Conabor semper, dare tibi Domino meo odorem suavitatis, per exercitium variarum virtutum, præsertim caritatis, & humilitatis, pœnitentiæ, & mortificationis, obedientiæ, & mansuetudinis, patientiæ, & cordis puritatis.

Actus pro mortificanda passione Gaudij seu Delectationis.

O Piissime JESU, qui in horto, in summa angustia, mærore, & afflictione, exclusus omnî solatiô, propter meam salutem fuisti: ideò, & ego abrenuncio universis hujus vitæ solatiis, & oblectamentis, atq; omni vano gaudio, ob amorem tui.

Fugiam, quantum erit possibile, omnium creaturarum delectationes, propter te summè dilectû: & in te solo delectari propono.

Nolo unquam in rebus illicitis delectari, & potius malo mori, quàm talem delectationem, deliberato animo admittere, & in illa morari.

Dul-

Via Purgativa. 27

Dulcissime JESU, si quando contingat me ex necessitate, & ex tua Divina voluntate, uti aliqua re delectabili, præcipuè escâ, vel potu; protestor, quòd nullam inde actu deliberato, delectationem haurire volo.

Mallem Domine, ut res illa mihi foret injuncta, & tunc uterer ipsâ propter te.

Utinam mitissime JESU Christe, res illa mihi molestiam citò generet, ne quid mihi placeat, præter te.

Non tantum noxia, & illicita, sed quæcunque alia terrena mihi proponantur, nolo in ipsis mihi complacere, nec delectari, nec illa desiderare: Tu enim solus, præ omnibus creaturis, eris dilectus mihi in æternum: Tu solus desiderabilis: Tu solus delectabilis.

Si licitam delectationem sensus meus aliquando perceperit, respuendo illam, & ad te cor meum elevando dicam: Ego verò delectabor in Domino.

Si gaudium aliquòd animæ irrepserit meæ, dicam: Ego autem in Domino gaudebo, & exultabo in DEO JESU meo.

Renuit consolari anima mea: Memor fui DEI, & delectatus sum.

Si quando dæmon impuras delectationes svaserit mihi, & objecerit appetitui meo, illicò Domine, timorem tuum, judiciorumq; tuorum terrorem, & suppliciorum inferni horrorem, atque cælestem gloriam, omne delectamentum in se habentem, mihi proponere curabo.

Actus

Actus pro mortificanda propria Voluntate.

Humillime JĒSU, qui in horto ad Patrem tuum æternum dixisti: Pater, non mea, sed tua voluntas fiat: quibus verbis, voluntati tuæ propriæ abrenuntiasti: propterea, & ego amore tui, voluntati meæ propriæ renuntio, eamquæ abnego.

Execror meam voluntatem propriam, quæ non est tuæ, vel vicarii tui voluntati conformis; & per quam aliquid cupio, & volo, non propter te, nequæ secundum te, sed propter me, meamquæ utilitatem.

Credo voluntatem meam propriam, esse radicem, & causam præcipuam omnis peccati, & transgressionis tuæ voluntatis, ac totius mali: propterea illam, tanquam hostem salutis meæ perniciosissimum odi perfectè, & semper odio habere, & horrere volo propter te, & per te, propono.

Abominor tanquam detestabile malum, voluntatem propriam; non solùm, quia est omnium flagitiorum mater pessima, sed multò magis, quia est tibi inimica; per quam, homo subtrahit se, à tua gubernatione, & quasi aufert à te jubendi potestatem.

Profiteor Domine mi, quòd, qui mundum, & omnia terrena, propter te reliquit, voluntate propriam retentam, hic homo vilissima, quæq; obtulit tuæ Divinæ Majestati, & holocaustum pingve propriæ voluntatis, sibi, tanquam idolo consecravit: proinde ego, qui mundum, & omnia, quæ
mundi

mundi sunt, amore tui dimisi, simul & voluntatem meam propriam dimitto, abnego, eamq; integræ tuæ voluntati subijcio : & sic me totum, & omnia, totaliter in holocaustum, tibi DEO meo vero consecro.

Cavebo semper, ne propriam voluntatem sequar, & ex ejus impulsu aliquid agam, vel dimittam: sed tuam Sanctissimam voluntatem, semper inquiram, dicens: Domine, quid me vis facere? Loquere Domine: quia audit servus tuus.

Abfit à me Domine, ut, postquam audiero vocem tuam, & cognovero voluntatem tuam, habeam obduratum cor meum, ne tuam voluntatem Sanctissimam adimpleam.

Dilectissime D E U S meus, si quando fecero, quòd voluero; nolo propter me ipsum, istud facere, sed ad honorem tuum, & proximorum utilitatem: intendèdo, semper placere tibi, & aliis prodesse, non autem satisfacere, propriis affectibus meis.

Quidquid voluntas propria suggererit, & gratum habuerit, id omnè quatenus tale, hoc est, quatenus à propria voluntate procedit, quæritur, & non propter te concupiscitur, verè malum, & mihi nocium reputabo: ac ideò, illud recusare, & fugere, propter te volo.

Si propter te, tuumq; honorem & bene-placitum, oportuerit me aliquid recipere, vel assumere, quòd propriæ voluntati, & sensualitati gratum, & jucundum fuerit, nolo unquam aliquid tale propter

pter delectationem sumere; seu, quia propriæ voluntati, seu sensualitati gratum est: sed duntaxat propter te, & secundum te: hoc est, quia tu vis, & eô modô, ac mensurâ, quibûs vis, ut illud sumam.

Quidquid propriæ meæ voluntati durum, aut ingratum est, illud omne judicabo esse bonum, & mihi utilissimum: & propterea id semper amare, & desiderare, propter te, & per te decerno, vel aliunde mihi illatum, cum gaudio illud tolerare volo.

Paratum cor meum DEUS, paratum cor meum, & facere quod vis, & dimittere illud, quando vis.

Volo, ut cibus meus sit dulcissimus, facere semper Sanctissimam voluntatem tuam.

Ut penitus abnegem propriam voluntatem; idè semper non meam, sed alienam voluntatem sequar, non tantum Superiorum meorum, verum etiam cujuscunq; fratris mei, modò non sit contraria tuæ Divinæ voluntati.

O Bone JESU doce me facere voluntatem tuam; quia DEUS meus es tu.

Fiat voluntas tua Domine, beneplacens, & perfecta, à me in terra, sicut facta est, & fit, à te JESU Christo homine, & à Matre tua Virgine MARIA, omnibûsq; Angelis, & Sanctis in cælo.

Actus pro eradicando vitio Avaritiæ.

O Amantissime JESU, quem impius Judas, vitio avaritiæ excæcatus, & seductus, inimicis tuis

Judæis

Judæis vilissimò pretiò vendidit: unde hujus vitii cognoscens malitiam, illud ex animo detestor propter te.

Execror immoderatam acquirendi, & habendi bona temporalia cupiditatem, sivè illa cum injuria, sivè absq; injuria proximi fiat.

Quia radix omnium malorum cupiditas, hoc afferente B. Paulo Apostolo: & quia avaritia, est idolorum servitus: ideò, sicut idololatriam, & omne scelus, quod tibi displicet; ita avaritiam, & pravam cupiditatem abominor.

Displicet mihi modò, quod ante placuit: placuerunt autem aliquando divitiæ, opes, aurum, argentum, & alia terrena; quæ, si nonnunquam habere, inordinate desideravi, vel aliis invidi, ex amore tui doleo.

Confundor, & erubesco, quòd ego, qui creatus sum ad cælestes divitias, & bona æterna quærenda, terrenis divitiis, vanis, & caducis, immoderato affectu, aliquando adhæsi; quæ modò calco, & ut stercora arbitror, & æstimo.

Arguo me, & graviter, coram te Domino meo reprehendo; quòd sæpiùs necessariis non contentus, superflua quæsi.

Multi sunt, qui Avaritiam, sordes, & cænum appellant, & avaros homines, sordidos vocant: ideò, si quando his sordibùs, & cænò animam meam sædavi, & te offendi, nunc, ob purum amorem tuum doleo.

Execror, & pessimas Avaritiæ filias: videlicet,
obdura-

obdurationem, violentiam, inquietudinem, fallaciam, fraudem, perjurium, prodicionem: & quod per hæc, homines avaritiæ dediti, sæpè te Dominum DEUM nostrum offendunt: dum obdurantur; nec ad misericordiam fleuntur: dum in acquirendo, vim inferunt: cupiendo; solliciti sunt: fallunt verbis: fraudant operibus: perjurant: & si opus est, produnt: & alii à fide desciscunt, multum doleo.

*Actus Paupertatis virtutis contrarie
Avaritiæ.*

O Amantissime JESU, qui pro nobis egenus factus es, & pauperrimus, ita, ut non haberes, ubi reclinares caput tuum: ecce propter te, omnes divitias, & opes mundi contemno, & sicut hæc in effectum dereliqui, ita ne minimo affectu illis adhærere volo.

Paratus sum, ut verus pauper, etiam sub scala, vel in aliquo angulo domus pernoctare, & manere, si mihi cella, quæ non tum dignus non designaretur.

Desidero etiam cibum pauperum vesci, hoc est, reliquiis ciborum illorum, quibus famuli tui vescuntur, vel micis cadentibus de mensa servorum tuorum.

Nolo unquam esse sollicitus, ne mihi aliquid desit, sive in cibo, sive in vestitu, sive in commoda habitatione, & in aliis rebus.

Libenter tolerabo omnes necessitates, indigentias, carentias, defectus rerum necessariarum, & quidquid mihi defuerit, gaudebo.

Vita-

visa; hoc est, non prævifa, nec præcognita: dicitur *Brevissima*; quia parùm durat. Mens enim tunc ex uno cogitatu, ad alium facilè transit, & per multa sinè ordine ullo vagatur, & in nullo stabilitur; ex eo, quòd non nittur profundius investigare veritatem.

Et ideò talis *Cogitatio* dicitur esse cum modico labore, & cum modico fructu. *Meditatio* autem fit cum labore, & fructu. Sed *Contemplatio* sinè labore, cum insigni fructu.

Meditatio propriè sumpta est discursus Intellectus voluntatem nostram ad bonum hortantis, vel à malo debortantis. Dicitur discursus, quasi per multas considerationes cursus, quas facit intellectus investigando veritatem: ut, si hanc veritatem vellemus habere notam, quòd virtus humilitatis sit amplectèda, & exercenda; debemus expendere hujus virtutis naturam, proprietates, & effectus ejus, quæ considerationes ostendunt nobis hanc veritatem; quòd necessario debemus amplecti, & quærere hanc virtutem humilitatis.

Eodem modo, ut habeamus cognitam hanc veritatem, quòd vitium superbiæ est nobis fugiendū; examinanda est nobis natura hujus vitii, proprietates, causæ, & effectus.

Dicitur voluntatem nostram ad bonum hortantis, vel à malo debortantis. ut sciamus, quòd ideò illum discursum facere debemus, ut excitemus voluntatem nostram ad aliquod bonum amplectencū; & retrahamus eam ab aliquo malo; ita, ut *Incipientes*

entes excitentur ad odium, & fugam peccati, ad vitia extirpanda, ad poenitentiam, & verum dolorē de peccatis, ad mortificandos sensus, & inordinatos affectus, ex quibus vitia nascuntur. *Proficientes* verò ad exercendas virtutes. *Perfecti* autem ad amorem DEI.

Hinc patet *summa necessitas meditationis recte instituendæ*: tum propter quotidianam renovationem, & emendationem vitæ, quæ consistit in fuga, & extirpatione vitiorum, & acquisitione virtutū: tum propter acquirendam perfectionem, & sanctitatem, quæ requirunt eadem: tum propter excitandam in nobis Devotionem, quæ nihil est aliud, quàm prompta voluntas offerendi se ad obsequiū DEI. Hæc *Devotio nascitur in nobis* ex consideratione bonitatis, & beneficiorum DEI, quæ excitat in nobis dilectionē eius, ex qua proponimus, vitare mala, & quidquid displicet DEO; & facere bona, seu in virtutibus nos exercere, passiones cohibere, & secundum vocationem nostram DEO servire; & per hoc facimus gratum obsequium DEO: ex eadem Devotione, & bona meditatione oritur debita Gratiarum actio, & prompta Oblatio, & fervens Petitio.

Et quoniam Meditatio non fit propter se, verum propter excitandos affectus bonos in voluntate: *Sciendum est*, quòd aliquando affectus citò excitatur, & citò evanescit; & tunc resumenda est meditatio; ad quod plurimùm conducit breves quasdam meditationes ultimis partibus intermiscere, ut sic affectus

Quis identidem excitentur. Aliquando non statim affectus per meditationē movetur; & tunc aliquantulum in ea persistendum, rogando DEUM, ut nos adjuvet. Sed si media hora Orationis transierit; relinquatur meditatio, atq; ad alias partes Orationis transeundum: videlicet, ad Gratiarū actionē, Oblationem, & Petitionem, Et idem dicendum; si nulum aliquis potest tacere discursum.

De modo Meditandi.

Modus Meditandi, *alius est ex parte personæ meditantis; Alius ex parte materiæ meditandæ. Ex parte personæ meditantis modus meditandi est*, ut facturus aliquis meditationē de quacunq; materia assumpta: *Primo*, faciat sibi præsentem Dominū in illa imagine, in qua Præsentiam DEI diurnam habet. Quod si contingat Meditatio de alio mysterio Passionis Christi, non verò de illo, de quo habetur Præsentia DEI diurna, tunc reliquā diei Præsentia, & imagine Christi, assumatur imago illius mysterii, de quo quis meditatur. Formentur autem istæ imagines, intra nos, hoc est in corde; vel propè nos, propter maiorem recollectionem. Si verò aliquis in hoc difficultatē senserit, & per experientiam didicerit, ex modo alio Præsentia DEI, maiorem fructum se percipere in Oratione, tunc potest illum modum tenere. Aliqui svadent, ut orantes imaginentur Cælum esse apertum, & Sanctissimā TRINITATEM cum omnibus Sanctis illum aspicientem, & Angelos orationes nostras eidem offerentes: Alii,

ut concipiant DEUM, ut lucem splendidissimā totum mundū illuminantem, & replentem, & eū qui orat illā luce esse circumdatū, & in ea permanentē.

Secundō, ut meditationem faciat aliquando seipsum alloquendo: v.g. dum considerat Christū Dominū flagellatum ad seipsum dicendo: *Considera anima mea. Quid passus est Christus, pro te in illa crudeli & ignominiosa flagellatione?* quos tunc dolores pertulit pro te, dum à tot impiis tortoribus flagellaretur? &c. Præterea considera. *Quis est iste, qui pro te flagellatus est?* &c. Deinde considera, *Cur flagellatus est?* hoc est; ex qua causa, ob quā causam &c. Considera quoque, *Quomodo se gessit Christus in illa flagellatione?* quanta cum humilitate, patientia, mansuetudine? &c. omnes tunc dolores & tormenta pertulit? &c. *Qui modus Meditandi Incipientibus convenit.*

Aliquando meditationē instituere aliquis potest, alloquendo DEUM, sicut jam exercitati in oratione faciunt. Qua in re unusquisq; seipsum probet, qui modus meditandi melius ipsi succedit.

Alius modus meditandi est, ex parte materiae meditanda; ut sciamus quomodo meditationē formare debeamus, de personis, & actionibus earū: videlicet, de DEO, Virgine Sanctissima: & aliis Sanctis? quomodo de virtutibus & vitiis? quomodo de Sacrae Scripturae verbis?

Modus Meditandi de DEO erit.

UT consideremus tres in una Divinitate Personas: Patrem, Filium, & Spiritum Sanctum,

Etum, secundum symbolum S. Athanasii; præterea
 Perfectiones Divinas, quæ quia sunt infinitæ, sal-
 tẽ magis notas; ut Omnipotentiam, Sapientiam, Bonita-
 tẽ, Providentiam, Infinitatem, Immensitatẽ, Æterni-
 tatem, Pulchritudinem, Immutabilitatem, Veritatẽ,
 Justitiam, Misericordiam, & alias: *quæ considera-
 tiones Perfectis competunt*, ex quibus, moventur
 ad amorem DEI, ad exercendos actus Fidei, Spei,
 Adorationis, Laudis, Gaudii de bonis DEI, Gra-
 titudinis, & Resignationis.

*Proficientibus quoque convenit considerare il-
 las DEI Perfectiones*, ex quibus moventur ad
 formandam in se similitudinem DEI, per exerciti-
 um virtutum. Ad hoc enim creatus est homo, ad
 imaginem & similitudinem DEI, ut sicut DEUS
 Creator, teste S. Ambrosio Lib: de Parad: c. 3. Qui
 hominem ad similitudinem suam creavit, est cha-
 ritas, est bonus, & justus, patiens, atq; mitis,
 mansuetus atq; misericors: (*sunt verba S. Doct:*)
 ita homo creatus est, ut charitatem haberet, &
 bonus esset & justus, ut patiens atq; mitis, & mun-
 dus atque misericors foret. Quas virtutes, quantò
 plùs quis habet in se, tantò majorem sui conditoris
 gerit similitudinem. Imago, itaq; DEI est, in ipsa
 animæ spirituali substantia: similitudo verò DEI in
 virtutibus illis, per quas DEO similes efficimur.

*Incipientes etiam possunt expendere aliquas
 Perfectiones Divinas*, ex quibus moventur, ad cõ-
 tritionem, ad odium, & fugam peccati, ad extir-
 panda vitia, ad mortificandas passiones, ad timorẽ
 C₃ DEI,

DEI, & ad Spem in Misericordia DEI. Tgitur ad Incipientes pertinet considerare Bonitatem DEI. Iusticiam, & Misericordiam ejus. Bonitatem quam offenderunt, ut de peccatis suis doleant; Iustitiā, ut DEUM timeant: Misericordiam, ut non desperent.

Modus meditando de Christo Domino nostro erit.

UT aliquando consideremus ejus nomina Sanctissima, quæ plurima in Sacra Scriptura reperiuntur: ut quod vocetur, Filius DEI, ante Luciferum genitus in splendoribus Sanctorum, Verbum Patris, Splendor, & Figura substantiæ ejus, Cander Lucis æternæ, Sol Iustitiæ, Rex gloriæ, Rex regum, Dominus Dominantium, Sanctus Sanctorum, Verbum Caro Factum, Princeps pacis, Lux mundi, Via, Veritas, & Vita, Pastor bonus, Agnus mansuetus, Leo de tribu Juda, Aquila magnarum alarum, & alia: sub quibus nominibus diversis, *possumus meditari de Christo*, pro diversitate solemnitatum & temporum; videlicet, *in Sacratissima ipsius Nativitate*, quod sit Pastor bonus, qui venit in mundum, quærere, & congregare oves dispersas, & ideò in stabulo nasci dignatus est. *In festo Circumcisionis*, ut Agnus mansuetus. *Epiphaniæ*, ut Rex Regū. *Resurrectiōis*, Sol, aut Leo, de quo scriptum est: *Vicit Leo de tribu Juda: Ascensionis*, ut Rex gloriæ, vel, ut Aquila provocās ad volandū pullos suos; *Aliquando verò* immò sæpius expendemus ejus vitam Sanctissimā, cujus Historia in quatuor Evangeliiis est descripta; ubi expressæ sunt actiones ejus, ut eas imitemur: & do-

ctrina,

Strina, ut eam amplectamur: de quo S. Basilius in *Const. Monast: cap: 2. sic ait.* Omnis actio, omnis item sermo Salvatoris nostri JESU Christi, excolendæ pietatis, virtutisq; obeundæ Regula est; propter hoc enim etiam humanam naturam suscepit, ut in se velut in tabula quadam, verã nobis pietatem ac virtutem depingeret, eamq; omnibus nobis ante oculos statutam unicuiq; pro viribus imitandam ceu Archetypum proponeret.

Dum verò aliquis considerare vellet Christi Domini actiones, vel ejus sacratissimam Passiorẽ, hoc faciet, examinando circumstantias istas. *Quis, Quid, Cur, Quomodo:* hoc est, personam, Opus, causam, & Modum. Possumus etiam aliquando meditationẽ instituire, de fine actionum, & passionum vitæ, & mortis Christi Domini nostri, qui duplex fuit: *Gloria*, scilicet, *Patris eterni*; & *humani generis utilitas*; ut exemplo ejus, gloriam DEI in omnibus actionibus nostris, & salutem nostram proximorumq; nostrorum quæramus.

Modus Meditandi, de quibuscunq; Sanctis erit.

Considerando eorum nomen, statum, dignitatem, vitam, virtutes, actiones, afflictiones, labores, doctrinã, gratias, & beneficia DEI; præsertim gratiam electionis, vocationis, justificationis, & sanctitatis: & quomodo sint cooperati gratiæ DEI. Insuper mortem felicissimam, & gloriam sempiternam, & miracula.

Etiã posset aliquis meditationẽ instituire de Sanctis, secūdã illas circumstantias omnibus notas. *Quis,*

Quid, ubi, Quibus auxiliis, Cur, Quomodo, Quando.

Modus meditandi de virtutibus moralib9 erit.

Considerando earum nomen, naturam, causas, affectus, actus, proprietates, media ad illas acquirendas.

Nomen *virtutis* deducitur à vico. Nam significat robur, & fortitudinem, quæ est viris propria.

Natura virtutū cognoscitur ex definitione earū.

Causa virtutum prima, & universalis est DEUS; nos autem causa proxima per actus internos virtutum. Et ideo facilis est virtus. quia ad eam acquirendam nobiscum concurrit DEUS, nos excitando, & adjuvando.

Effectus virtutis sunt innumeri, qui recensentur, cum proprietatibus virtutis.

Actus virtutum sunt modi, & instrumenta, quibus acquiruntur; quorum actuum exercitia, per Férias distincta, & per hebdomadas divisa inferiùs habentur in Par: 2.

Proprietates Virtutum sunt *Honestas, Utilitas, Delectabilitas, & Pulchritudo*; ex quibus sumuntur incitamenta virtutum; & quæ præcipuè in meditatione considerandæ sunt, ut excitetur voluntas nostra ad amorem, & desiderium virtutis. Voluntatem enim nostram nihil potest moveri, nisi bonū, quod dividitur in honestum, utile, & delectabile: Pulchrum quoq; idem est in virtute, ac bonū, Itaq; cum virtus sit honesta, utilis, delectabilis, & pulchra, habet in se omnem rationem boni; quod cū

in Meditatione expendetur, facile voluntas ad virtutem amandam, & desiderandam inclinabitur.

Honestas est virtus, immò ipsa honestas: quia sola hominem honestat, & decet. Est enim naturæ rationali propria, ipsiq; conformis: quia omnes actiones nostras condecorat, ac honestat: facit nos quoq; similes DEO, ac DEI-formes: præterea venerabiles, ac omni honore dignissimos, efficit, Ipsa est Mater gloriæ, honoris, & nominis immortalis. Ipsa nobilitas animarum nostrarum. Sola est laudabilis, sola per se appetibilis; cū simpliciter in se sit bona. Est enim participatio Divinæ Perfectionis, & Bonitatis.

Utilitas est virtus: quia nos bonos, & opera nostra bona facit, evacuatur peccata, eradicat vitia, pronitatē ad malum moderatur, difficultatē ad bonum vincit, vehementiam passionum in nobis impedit, partem inferiorem superiori totaliter subdit, perficit potentias animæ nostræ, ut operationes suas perfectas producat.

Non solum autem utilis, sed etiam necessaria est virtus: quia sinē illa neq; placere DEO, neq; finem nostrū, qui est vita æterna, consequi possumus: quia per illam benè, & sanctè vivimus, vitā, & gloriam æternam promeremur: quia est pretium, quo regnum Cælorum emitur: est vis: quā violenter rapitur: est jus; quō in hæreditatem homo assumitur; est character, quō Filii DEI ad Cælū admittuntur; est vestis nuptialis, quā decorari oportet eos, qui ad Cœnam Regis æterni vocantur.

Jucunda seu delectabilis est virtus, non tantum; ut jam acquisita, & adepta; sed etiam; ut est in adeptione, & acquisitione: Nā exercendo virtutes gaudemus, & quia scimus, quod exercitio virtutis DEO placemus; & propter conscientiam rectē facti; & propter spem præmii gloriæ cœlestis à DEO fidei promissæ; & propter instinctum naturæ rationalis, quæ delectatur in operibus bonis. Delectabilis est quoq; virtus jam adepta, & acquisita; quia illa sola possessores suos, pura & perpetua delectatione perfundit, sola vera voluptate animum nostrum faciat, & quietat; sola plenam lætitiā, jucunditatē, tranquillitatem, & quietem nobis affert. Unde S. Chrysostomus Hom. 1. ad Rom: Si, inquit, voluptate frui volumus ante omnia alia, fugiamus vitia, virtutemq; sectemur; aliter enim nobis non licet voluptatis, participes fieri. Et bene: Nā voluptas ex præsentia rei convenientis nascitur; nihil autem convenientius est naturæ rationali, quā virtus; & ideo ex nulla re, tantummodò ex virtute sola voluptatem, & delectationem veram, & purā, atq; hominē dignam habere possumus. Et quamvis à longē conspecta virtus, aliquando nobis incutiat timorem, & amara videatur, tamen gustata dulcescit, & sui amorem nutrit.

Pulchra est quoq; virtus: quia est ornamentum animæ nostræ, propter quod anima dicitur. Cant. 6. Pulchra, & decora, & amica DEI, id est, Charissima: quia est vestis nuptialis, sine qua DEO placere nemo potest: quia rebus pulcherrimis comparantur

ratur, ut foli, lunæ, stellis, & lapidibus pretiosis, Sol est, *inquit S. Bernardus serm: 27. in Cant:* fervens charitas; Luna continentia; stellæ, aliæ virtutes. Hæc unica virtutis est pulchritudo, quam si oculis carnis homines viderent, omnium amorē in se concitaret. Hanc cœlestis Sponsus amat, qui respiciens humilitatem ancillæ suæ; id est, Virginis *MARIÆ*, hujus amore captus, descendit de Cœlis. Hanc diligunt Angeli Sancti, de quibus dicitur; *Reclī diligunt te:* Angeli Sancti omninō sunt recti: *ait S. Bernardus serm: 24. in Cant:* qui animam virtute pulchram diligunt, dum eam sibi similem esse conspiciunt.

Modus meditando de vitiis erit.

CONSIDERANDO eorum nomen, naturam, causas, effectus, proprietates, actus, remedia, seu media ad illa extirpanda, & ad excitandum odiū vitiorum.

Nomen vitii deducitur à vitando; quia significat malum, quod vitari debet.

Natura cognoscitur ex descriptione ejus, quæ est talis: Est prava dispositio mentis ad peccatum inclinans.

Causa vitii, ut sumitur pro actu vitioso seu peccato, est Dæmon svadens malum, & voluntas nostra ipsi obediens: ut autem vitium sumitur pro habitu, seu pro illa prava dispositione, tunc vitii causa sunt præcedentia peccata, seu actus vitiosi.

Effectus vitii recensentur cū proprietatibus vitii.

Actus quoq; vitiorum, præsertim septem Capituli.

talium habentur inferiùs per Ferias distincti, primâ Hebdomadâ, *Par: 2.*

Proprietas vitiorum est, malitia habens in se trinom rationem mali, quod sit malum inhonestum, inutile, insuave, & amarum.

Inhonestū est: quia de decet hominē rationalē. Est enim disconveniens & disforme naturæ rationali; & ideo est contra naturā rationalem: quod infames & ignominiosos homines reddit, & ipsum omni vituperatione, & odio est dignum. Præterea *est deformitas animæ*, ejus pulchritudinem deturpans, quā super carbones sit denigrata super omnem immunditiem sædata, omni execratione digna, & maximopere displicens DEO. *Et turpitudine crudescenda; est feditas* vilissima, quæ dehonestat animam. *Est contumelia* nobilitatis nostræ.

Inutile, propter summum dampnum DEO illatum, privans illum debito honore: quia est injuria infinita DEO facta; quia peccando legem DEI contemnimus, & nos à DEO, Creatore, summo & incommutabili bono avertendo, ad infimum, & incommutabile bonum creaturæ convertimus, in quo est infinitus DEI contemptus. Est quoq; inutile, propter damnum nobis illatum: quia nos spoliatur gratia sanctificante, & omnibûs Spiritûs S. donis, ac virtutibûs infusis: privat nos jure regni cœlestis; causat reatum pœnæ æternæ: facit animam diaboli captivam, & inferni incolam; quia nos inclinat semper ad malum: quia per peccatum amittitur nitor, & pulchritudo animæ, & inducitur turpis macula, per affectū inordinatū ad creaturas. *In-*

Insuave est, & amarū: Est enim venenum. Quis enim lætò animò cibum & potum venenò imbutū sumeret? *Est dirus Tyrannus;* ut ait S. Chrysostomus, qui nostrā animam continuò crudeliter torquet. *Est dæmon,* qui animam in peccato hærentē possidet; & ideò, quot vitia habuerit homo, tot dæmones, ut B. Cæsarius testatur: qui ut animarum nostrarum ferocissimi hostes, eas, ut captivas, supra modum affligunt. *Est crux:* ut S. Bernardus de vitio ambitionis asserit: O ambitio, inquit, ambientium crux, quomodo omnes torques? nil enim acrius cruciat, nil molestius inquietat. *Est vermis* diu noctuq; rodens animam. Præterea est vitium insuave; quia privat nos consolationibus Divinis, quas solet DEUS communicare justis; tum etiam serenitate ac lætitiā, quam actus boni & virtuosī nobis adferunt; tum cordis tranquillitate, incutiens nobis timorem judiciorum DEI, ac pœnarum inferni, commemorans quoq; nos, esse inimicos DEI, factos odibiles ei, & Angelis ejus.

Modus meditandi de seipso, ad cognitionē sui erit.

CONsiderando hominis nomen, naturam, causas, proprietates, vitæ misérias, actiones, ejus novissima.

Nomen hominis est ab humo desumptum: quia de humo, seu de terra factus est; & ideò homo humilis, & sui contemptor esse debet.

Natura hominis ex definitione patet: quia est animal rationale. Nam hoc totum habet, quod animal: videlicet, sensus externos & internos,
per

per quos cognoscit suæ naturæ, & vitæ necessaria: habet quoq; appetitum, per quem appetit illa. Præterea habet rationem, per quam differt ab animalibus. Hinc homo est compositus *ex parte inferiori sensitiva*, ad quam pertinet sensus, & appetitus sensitivus; & *ex parte superiori rationali*; inter quas partes, est continua pugna; quia ut homo per peccatum factus est rebellis DEO in paradiso, sic etiam in homine factus est pars inferior rebellis superiori.

Ab aliis describitur homo, quod sit *centrum universi*: quia sicut lineæ à circulo deductæ ad centrum ibi copulantur, ita omnium creaturarum perfectiones in homine congregantur. Deinde quod sit *Compensium omnium operum DEI*, qui dedit homini esse cum elementis, & rebus non viventibus: vivere, cum plantis, & arboribus: sentire cum piscibus, avibus, & animalibus: & intelligere cum Angelis. Insuper est *parvus mundus*, in quo DEUS perfectiones reperiunt in hoc visibili toto mundo inclusit.

Causa efficiens hominis est DEUS, Creator noster; ipse enim creat animas nostras; ipse quoq; creavit limum terræ, de quo formavit corpus primi hominis, de quo limo & nos sumus.

Causa Materialis hominis est terra, pulvis, & cinis.

Causa formalis hominis est anima rationalis, quæ est forma hominis: sed forma animæ, est imago DEI.

Causa

Mentali. 47

Causa finalis primaria est DEUS: ipse enim est finis noster ultimus, qui nos creavit propter se, ut ei serviamus, ut eum diligamus tanquam summum bonum, propter se super omnia appetibilia: *secundaria Causa finalis est æterna beatitudo,* quæ est finis noster ultimus secundarius: seu finis Cujus, est DEUS: & finis Quo, est æterna beatitudo, in qua est DEI fruitio,

Actus hominis, ut est naturæ rationalis sunt illi proprii, qui sunt convenientes & conformes rectæ rationi, quales sunt actus virtuosus, & boni. Nam tales sunt secundum rationalem naturam: Mali autem, & vitiosi, sunt contra naturam humanam.

Proprietates hominis sunt relinquendæ Philosophis; sed nos consideremus in meditatione proprietates animæ rationalis: videlicet quòd sit spiritus; quòd sit incorporea, immortalis, in partes quantas; quòd sit tota in toto corpore, & in qualibet parte corporis; quòd sit capax æternæ beatitudinis. *Dignitas hominis* consistit in eo, quòd sit ad imaginē & similitudinem DEI factus; quòd sit rationalis; quòd sit post Angelos omnium creaturarum nobilissimus; quòd sit Præses à DEO cōstitutus, super omnes creaturas hujus mundi; quòd DEUS clementissimus ex summa dilectione erga hominem pro eius salute, Unigenitum Filium suum misit in terrā, ut homo fieret, & pro ipso moreretur; quòd DEUS hanc homini potestatem dedit, ut Filius DEI fieret; quòd sit capax gratiæ DEI sanctificantis, quæ est participatio Divinæ naturæ; insuper, quòd natura
humana-

humana in Christo Domino nostro, supra omnes Angelorum choros, usq; ad thronum gloriæ, ad dexteram cœlestis Patris sit exaltata.

Conditio hominis præsens est, pronitas ad malum & peccatum, & multæ miseræ vitæ ipsius: tandem mors, quam sequitur iudicium DEI, tandē vel infernus, vel gloria cœlestis.

Modus meditando Sacram Scripturam.

Frequens est in nostra Religione usus considerandi Sacram Scripturam: partim cum super Evangelia pro diebus Dominicis, & Festis Sanctorum meditationes leguntur: partim cū pro præparatione ad Sanctissimæ Eucharistiæ sumptionem, punctum aliquod ex Evangelio currentis Festi, vel diei Dominicæ consideratur. Igitur, ut cum majori fructu istæ meditationes circa Sacram Scripturam fiant, *Sciendum nobis est, Verborum S. Scripturæ esse multiplicem sensum: primò Literalem: deinde triplicem Mysticum seu spiritua-lem; videlicet, Tropologicum seu Moralem, Allegoricum & Anagogicum.*

Sensus Literalis Significatur per verba, aliquādo secundum propriam significationem; ut cum dicitur, DEUS iudex, justus, fortis, & longanimis. Aliquando, secundum significationem figurativam, seu metaphoricam; ut cum de Christo Domino dicitur, Quod sit Leo: quia est fortis: vel Petra; quia est immobilis, & constans: vel Agnus; quia mansuetus,

Sensus Tropologicus seu Moralis est, quando

Nolo unquam per audaciam aggredi aliquid, quod potius fugiendum est; & quod indignum est homine ratione prædito, & magis Christiano, & maximè Religioso, qui vitam tuam sacratissimam, dilectissime JESU, imitari debet.

Abstine à me, clementissime DEUS meus, ut ea, quæ ultra vires meas sunt, attentare audeam: sed tunc audaciam humilitate, & sancto timore tuo, temperare conabor.

Si quando honor tuus, & gloria, meæ animæ, vel proximorum salus id requiret: tunc ad universa pericula, audacter tuâ Divinâ adjutus gratiâ, vitam meam exponere non verebor.

Utinam aliqua occasio Martyrii pro te subeundi mihi detur! & ego confidens auxilio tuo, sanguinem meum profundere, ob amorem tuum, sum paratus.

Actus pro extirpando vitio Invidiæ.

O Amantissime JESU, quem per invidiam Judæi Pilato tradiderunt, & ex invidia regalis tuæ dignitatis, coronâ spineâ crudeli, & ignominiosâ coronarunt: sis infinites benedictus, pro his omnibus, quæ tunc pro nobis passus es: quorum causâ, quia Invidiæ vitium fuit; ideo illud ex amore tui detestor.

O benignissime JESU, quia Invidia, est tristitia de bono alterius; Est odium felicitatis alienæ inde procedens; quòd invidus, vellet esse in omnibus bonis singularis: unde, si aliquando ejusmo-

di singularitatem desideravi: & propterea, si aliorum eminentiam texi: vel apertam virtutem calumniatus sum: seu quod laudandum erat, vituperavi: vel quod bonum facere non potui, alios impedivi: de his omnibus, in quantum sunt offensa tua, propter te DEUM meum summè dilectum, doleo ex toto corde.

Abominor, Domine mi, & illa omnia mala, quæ ex hoc vitio oriuntur, videlicet: Odium, Suffurationem, Detractionem, Lætitiā de proximi adversis, Afflictionem de prosperis.

Displicet mihi modò valdè, quia tibi Domino meo displicet; si quando proximum odio habui, & ex hoc odio ab ejus amore averſus fui: vel ei optavi, aut procuravi aliquod malum: vel bonum, quod facere tenebar, ipsi denegavi.

Displicet, si per detractionem, denigravi, corrumpi, aut diminui bonam famam, seu reputationē, & æſtimationem proximi: vel ei falſum impoſui: vel peccatum ejus occultum revelavi: aut verbis exaggeravi: vel si bonum ejus negavi: aut malitioſè reticui, aut diminui: vel si detrahentes proximo, libenter audivi, nec eos reprehendi, dum potui.

Displicet, si mærorem de bonis, & prosperitate aliorum habui: vel de eorum malis, & adverſitate lætatus ſum; qui condolere potiùs eorum malis, tanquam propriis, & congaudere bonis eorum, tanquam meis, tibi què pro eis gratias agere debui.

*Actus Charitatis virtutis Invidiæ vitio
contrariæ.*

O Dilectissime JESU, qui ex nimia charitate quâ dilexisti nos, pro nobis pati, flagellari, spinis coronari, & mori dignatus es: & qui proximus passioni, & morti, nobis quoq; charitatem mutuam præcepisti, dicens: Mandatum novum do vobis, ut diligatis invicem, sicut dilexi vos. In hoc cognoscent omnes, quia discipuli mei estis, si dilectionem ad invicem habueritis: ideo mandatum hoc, modo perfectissimo adimplere, & proximos meos, sicut me ipsum, diligere volo.

Amabo Domine JESU, omnes proximos, propter te: hoc est, quia tu vis, & tibi placet, ut hoc faciam, & in hoc tibi gratum obsequium exhibeam, quia superdignissimus es.

Amabo illos in te: hoc est, quatenus aliquid tuum sunt: quia ad imaginem, & similitudinem tuam creati, tuiq; sunt filii, & à te dilecti.

Amabo eos per te: hoc est, per infusam in cordibus nostris charitatem.

Amabo ipsos, secundum te: id est, eo modo, quo vis id fieri, & secundum exemplar tuum, quod ostendisti, diligendo nos.

Amabo eos dulciter absq; amaritudine, sed cum suavi, & benevola affectione, bonum ipsis favendo, & desiderando.

Amabo eos sapienter, ea tantum illis optando bona, quæ tu vis, ut optemus, & quæ sunt illis verè salubria.

Amabo eos prudenter, ea tantum ab eis deprecando mala, quae tu vis, ut deprecemur, & quae verè sunt illis nociva; nunquam palando, aut amando eorum vitia; sed odiendo, & persequendo.

Amabo eos efficaciter, non verbo, & lingua solum, sed opere, & veritate amorem meum comprobando, & charitatis ac misericordiae opera, & obsequia illis impendendo.

Amabo eos fortiter, adversa quaeque pro eorum salute tolerando, ardua aggrediendo, & animam etiam meam, si opus esset, amore tui, & imitatione, pro eis ponendo.

Amabo eos constanter, non in prosperitate tantum eorum, sed etiam in adversis, illis fideliter, & constanter assistendo, & succurrendo.

Amabo eos ordinate, prius, & singularius illos amando, quos tu vis prius, & singularius amari.

Nolo jam amplius dolorem aliquem, seu tristitiam de bonis alienis habere: sed potius laetabor semper, tanquam de propriis: tibi quoque gratias agam, sicut pro nostris; & pro eorum conservatione, & augmento, ad tuam gloriam, orabo.

Conabor revereri, & sublimiter de meis proximis sentire.

Benè judicabo, de illis semper, & operibus eorum non aperte malis: aut facile bona de illis audita credam.

Opto, & quantum commodè potero, procurare illis volo, omne bonum, tibi placitum, & illis salutiferum.

Liben-

Libenter narrabo, & prædicabo aliis bona, & virtutes eorum: & ab aliis laudari eos gaudebo.

Quandocunquè, & quantum, secundum te, & per te, valebo, proximorum necessitatibus, & indigentis, tam corporalibus, quam spiritualibus succurrere firmissimè propono.

Et quidquid minùs effectu, & re ipsa, præstare potero, pio desiderio, & ferventi oratione supplere volo.

PRO FERIA SEXTA.

Hac die pro DEI Præsentia, est Christus Dominus Crucem bajulans: vel Cruci affixus.

*H*inc occasio haberi potest ad Contritionem: ad mortificationem Gustûs: passionis Desperationis & Timoris: ad odium Gulæ: ad exercitium virtutis Abſtinentiæ.

Actus Contritionis.

O Dilectissime JESU, qui pro nobis, cruci ignominiosæ affixus fuisti, in qua acerbissimos dolores per tres horas pertulisti: sed quis tam crudelis in te fuit? ego, ego sum, qui te Dominum meum, DEUM meum, Creatorem meum, crucifixi. Nam qui in te peccant, iterum te crucifigunt.

O quanta impietas! o quanta indignitas! ô quanta mea malitia! major certè, quam Judæorû, quos tu excusare coram tuo Patre æterno, & pro ipsis ferventissimè, & amanter orare dignatus es.

D3. dicens:

dicens : Pater ignosce illis : quia nesciunt , quid faciunt.

At me quis excusabit coram te, & Patre æterno, & Spiritu Sancto ? nemo certè : immò omnes creaturæ me accusant : quia te Creatorem suum occidi.

Verùm & ego ipsemet non me excuso : sed cum gravi indignatione , contra me, coram tua Divina Majestate, me accuso, arguo : & tanquam impiissimum, iniquissimum, & omnium hominum nequissimum reprehendo.

Verè, verè, confiteor, quia nihil mihi debetur, nisi cruciatus inferni, nisi cum scelestissimo traditore Juda damnatio, nisi perpetua omnium damnatorum tormenta.

Quid igitur faciam ? quo ibo ? quo me vertam ? nisi ad te, bone JESU, spes mea ; qui propter peccatores, in mundum venisti & qui pro peccatoribus, in cruce mori dignatus es.

Fateor, quia peccavi in te DEUM meum, Creatorem meum, Patrem meum : jam nunc vehementissimè doleo, quòd unquam offenderim te, quem nunc amo, ex toto corde super omnia.

Doleo, quia magnitudo bonitatis tuæ infinita est à me offensa.

Doleo, quia tam ingratus, in te peccando, fui, qui me sanguine tuo pretioso redemisti.

O utinam nunquam te offendissem ! o si totius vitæ meæ, omnes dies præteritos, omnes horas, & momenta, pro maxima gloria tua impendissem !

Lugant,

Lugeant, lugeant, præcordia mea die ac nocte, propter intolerabilem iniquitatem meam: quia te DEUM meum, summo amore, summo honore, & reverentiâ dignissimum multoties offendi.

O utinam scindatur cor meum, præ dolore, propter offensam tui summi boni! sicut scissæ sunt petrae in passione tua.

O si nunc contremiscant, & commoveantur in me viscera mea, præ contritione cordis mei vehementi, ob tuam injuriam! sicut commota est, & contremuit terra, in morte tua.

Hoc quidem est desiderium meum, hic affectus, quem tu complere digneris in effectu.

Suppleat quæso, sanguis tuus pretiosus, defectum lachrymarum mearum.

Suppleant dolores tui acerbissimi, defectum doloris mei.

Suppleat tua sacratissima Passio, ubi deficit mea contritio.

Ego autem conijcio, in pretiosa vulnera tua, omnia peccata mea; ut illa, quantacunq; fuerint, exurantur igne amoris tui, prout in tua infinita bonitate spero.

Parce mihi Domine JESU, & concede mihi, quod à Patre tuo æterno postulasti crucifixoribus tuis.

Statuo millies mori, quàm committere vel unum peccatum mortale. Sed quia nihil sine te possum: igitur obsecro te, per tuam sacratissimam Passionem, da mihi ab omni peccato præservatiõem.

Actus pro mortificando sensu Gustus.

O Svavissime JESU, qui in domo Caiphæ, spuris sætentibus, os tuum, sacrosanctum repletum habuisti: & in monte Calvariæ acetum cum felle mixtum gustasti, cujus amaritudine, tuus sacratissimus gustus affligtus fuit: proinde & ego, ob amorem tuum, gustum meum affligere, per aliqua ipsi ingrata, statuo.

Benignissime JESU, in unione amoris illius, ex quo tu propter me, omnia delectabilia tibi subtraxisti; omnia oblectamenta gustui meo subtrahere volo.

Clementissime JESU, si contingat aliquando, me gratum palato meo, aliquem potum, & cibum sumere; protestor, me nullam inde voluptatem percipere velle.

Libentiùs dulcissime JESU, ad viliora, & gustui meo insipida, animum meum inclinabo: immò aliquando ex sapidis, insipida facere, nec de cibo, vel potu, conqueri, & loqui volo.

Nolo unquam cibum, & potum sumere, pro capienda ex eis voluptate: sed tantum pro naturæ necessitate; & ad implendam tuam sanctissimam voluntatem; & ut corpus corroboretur meum, ad serviendum tuæ Divinæ Majestati.

Nunquam specialem cibum mihi procurabo, sed communibus cibus, qui omnibus apponentur, contentus ero.

Ab omnibus cibus delicatioribus, & pretiosiore snotu, si absq; singularitatis nota id facere potero, en per abstinere curabo.

Si

Si quid mihi defuerit, ex illis cibis, qui aliis ministrabuntur, tacebo, nec illud petam.

Nullum cibum, & potum, unquam gustare, absquē necessitate propono.

Semper aliquid modicum, ex illis cibis, qui mihi offerentur, vel apponentur, præfertim illud, quod magis palato arridebit, relinquere statuo.

Gaudebo, si ex communibus cibis, vilior, & minor portio, vel gustui meo minùs placens offeretur.

Nunquam, ad nimiam satietatem, potum, & cibum capiam: nec extra tempora consveta: nisi interveniente aliqua necessitate, vel obedientia, & tuâ Sanctissimâ voluntate.

Etiam cibos communes, & viliores, sine aviditate sumam: & reficiendo corpus, simul meam mentē, piâ aliqua lectione reficere operâ dabo.

Actus pro mortificanda passione Desperationis.

O Spes mea, dulcissime JESU, nullam unquam desperationem, quæ tibi displicet, admittere volo.

Quia desperatio, est recessus appetitus à bono, quod judicatur impossibile: si illud bonum non fuerit verum, sed apparens; à tali bono semper recedere, & spei resistere, eamq; ad vera bona, & cœlestia erigere curabo.

Verè agnosco, & hoc profiteor, quia aliis debetur cælum; beatorum gloria, & præmia æterna, mihi verò infernus, confusio perennis, & supplicia: tamen non despero in tua infinita misericordia,

cordia, per quam, à pænis inferni eripiar, & gloriæ cælestis particeps efficiar.

Abſit à me, Domine mi clementiſſime, ut de his desperem, quæ à te sperare debeo: nimirum peccatorum veniam, vitæ emendationem, tentationum victoriam, in gratia tua finalem perfeverantiam, vitamq; æternam.

Tanta est ſublinitas meæ ſalutis, & gloriæ cæleſtis, ut hæc excedant vires meas, ad illa obtinenda: nihilo minùs non deſpero, de eorum adæptione, per tuam Divinam gratiam, & auxilia.

Quamvis ſæpiùs in hæc vitia N. N. turpiter labar: tamen non deſpero, quin poſt tot fragilitatis meæ lapſus, ex his conſurgam, tuâ adjutus gratiâ, quæ extirpare conabor.

Fateor, Domine DEUS meus, me frequentiffimè deficere in his, videlicet: in obedientia, modestia, ſilentio, humilitate, patientia & ab his paſſionibus N. N. me ſuccubuiſſe: attamen nolo deſperare, de tuis Divinis auxiliis, ad ſuperandas meas paſſiones, & in illis defectibus emendatione.

Ecce Domine mi, poſt tot annorum in Religione decurſum, nullum proſectum video in virtutibus Sanctis me feciſſe: immò, neq; me adhuc incepiſſe agnoſco: nihilominùs abſit à me, ut ſpem amittam, me aliquâdo incepturum ſervire tuæ Divinæ Majeſtati, ſecundùm vocationem meam; & progreſſum facturum in exercitio virtutum, & in via perfectionis: cùm tu Domine DEUS meus, dexteram tui auxilii mihi porrexeris, quod ſupplex oro.

Actus

Actus pro mortificanda passione Timoris.

EA est fragilitas nostra, dulcissime JESU, ut ea mala ardua futura formidemus quæ non sunt timenda; quia non sunt vera mala: proinde & ego omnem talem formidinem, ob amorem tuum, procul à me repellere curabo.

Si ob imminentem aliquem laborem, correptionem, humiliationem, afflictionem, vel pœnam, occupaverit timor animam meam, semper ejusmodi timorem procul arcere conabor.

Abstine à me, Domine clementissime, ut, propter aliquem vanum timorem, vel aliquid illicitum, & tibi displicens committam: vel aliquod bonum, & quod tu vis à me fieri, tibiq; placet, omittam.

Sicut nolo amare, & desiderare terrena; ita nolo eorum jacturam timere.

Profectò, Domine mi, nolo unquam ibi trepidare, ubi non erit timor, seu ubi non convenit hominem timere ratione munitum, & maximè Christianum; & multò magis Religiosum: cujus proprium munus est sequi te Christum Dominum usq; ad mortem crucis crudelissimam, & ignominiosissimam.

O Bone JESU, qui dixisti: Nolite timere eos, qui occidunt corpus, animam autem non possunt occidere: sed potius timete eum, qui potest, & animam, & corpus perdere in gehennam: itaque neminem alium, nisi te supremum Dominum universorum semper timere volo, quem etiam omnes Sancti timent.

Equidem

Equidem hæc meritò, tanquam verè mala timere debeo, videlicet: offensam tuam, privationē gratiæ tuæ, & gloriæ, atq; æternā damnationem.

Si quando appetitus meus, timore vehementi corripitur, propter instans aliquod grande malum; tunc ego arcendo hunc merum, dicam; Dominus illuminatio mea, & salus mea, quem timebo? Dominus protector vitæ meæ, quàm, sæculo abdicato, suscepi: à quo trepidabo?

Profectò, non modò ulla pericula, & difficultates DEI gratiā subeundas, volo formidare: sed etiam si consistant adversum me castra, non timebit cor meum.

Actus pro mortificando vitio Gulæ.

O Svavissime JESU, qui pro nobis in cruce, aceto cum felle mixto potatus fuisti, solvendo pænas, quas promeruimus per vitium gulæ: gratias tibi ago infinitas, pro hac tua infinita bonitate: & simul nefandum hoc vitium gulæ, ob amorem tuum, execror, abominor, detestor.

Scio Domine, quia gulæ vitium, nihil aliud est, nisi inordinatus appetitus cibi, & potûs, per quem inordinatum appetitum, fateor, me sæpè te offendisse; de quo nunc doleo, propter te DEUM meum summè dilectum.

O quàm frequenter peccavi, sumendo cibum & potum, Præproperè, lautè, nimis, ardentè, studiòse! Hoc est: debitum tempus præveniendò: delicata,

licata, & pretiosa esculenta quærendo, vel saltem desiderando: quantitatem cibi, & potus, juxta necessitatem naturalem, non servando: nimis avidè, immodestè, & festinanter eos sumendo: nimis accuratè & curiosè præparari procurando: de quo nunc erubesco, & confundor, & ex corde, propter te infinitè amabilem doleo.

O utinam in desideriis carnis, curam non fecissem unquam! & in corporis refectiōe, utinam nunquam quæsissem voluptatem, & delectationem, sed solum necessitatem!

Execror, abominor, detestor, & alia vitia, ex immoderato cibo, & potu provenientia, videlicet: Ineptam lætitiā, Multiloquium, Scurrilitatem, Immunditiem, Somnolentiam, atq; ad bona spiritalia Torporem, per quæ omnia, quoties tuam Divinam Majestatem læsi, ex intimo doleo, veniamq; humiliter peto.

*Actus Abſtinentiæ virtutis contrariæ
vitio Gule.*

O Svavissime JESU, qui pro nobis amarum fel cum aceto gustasti, ut inordinatum appetitum nostrum cibi & potus damnares, & ad virtutem abſtinentiæ nos invitares: ecce jam, ex amore tui, mihi multum in hac virtute complaceo, quam servare semper, in sumptione cibi, & potus, firmissimè propono.

Temperantissime JESU Chriſte, decerno escā & potu, eo tantum uti, ut natura ad serviendum tibi consistat. Abſit

Abſit à me Domine, ut lauta, vel ullo modo palato ſcavia quæram.

Vellem, dulciſſime DEUS, ut omnia, quæ ſumpturus ſum, abſinthium ſaperent, propter te.

Propono amantiſſime Domine, cor à menſa ſubtrahere, & lectioni ſacræ admove-
re.

Propono, Domine, corpus fame, ac ſiti, vexare, propter te.

Utinam, benigniſſime JESU Chriſte, felle quod guſtaſti, omnia mea prandia condiantur!

Nunquam, Domine JESU, cibum, & potum, ad conſervationem vitæ præſentis neceſſarium, & ad confortandum me in tuo ſervitio utilem ſumam, niſi te id velle judicaverò.

Quoties cibum, & potum aliquem ſumpſero, toties id facere volo, propter te: hoc eſt, quia vis, & gratum habes; ut ſic faciam.

Et ſecundùm te: id eſt, ſecundùm menſuram, & modum, tam in quantitate, quàm in qualitate tibi placita.

Et cum humilitate, me indignum hoc commo-
do exiſtimans.

Et cum gratiarum actione, pro eo quòd hæc mihi, ingrato homini, & infideli ſervo tuo tribuere dignatus es.

PRO DIE SABBATI.

Hac die pro DEI Præſentia eſt B. Virgo MARIA,
depoſitum de Cruce Chriſti Domini noſtri
Corpus Sacraſſimum tenens.

Hinc

Hinc haberi potest motivum ad Contritionem:
ad mortificationem sensuum, & Passionum,
præsertim Iræ: ad extirpandum vitium Iræ:
& Mansuetudinis virtutem exercendam.

Actus Contritionis.

O Dulcissima Virgo Dei-genitrix MARIA,
quæ in morte dilecti Filii tui, & ob ama-
ram passionem ejus, maximos dolores, an-
gustias, & tribulationes pertulisti, quorum dolo-
rum, & angustiarum tuarû, ego causa fui: quia &
morti crudelissimæ Unigeniti Filii tui, causa fui.

Sed & nunc regnans in cælis, si, per impossibi-
le, aliquem doloris sensum percipere posses, majore-
m vim dolorum, & afflictionum sentires, propter
tantam ingratitudinem meam erga Filium tuum,
& propter tam multa, & gravissima peccata, qui-
bus totâ vitâ meâ eum offendi, & adhuc offendo,
de quibus nunc multum doleo, ob amorem Filii
tui, veri DEI.

Et ut magis ac magis doleam, sitq; meus do-
lor intensior quovis dolore, rogo te, per tuos do-
lores, ora pro me: & tu tanquam Mater clemen-
tiæ, ex parte tua ignosce.

Ecce prostratus ad pedes tuos, ut loquar ad te
cum tuo servo Anselmo: Ecce, inquam, prostratus
ad pedes tuos, o Sanctissima Virgo MARIA, jacet
rebellis filius, qui tamen confidit in clementia tua
materna.

Onustus vinculis, & compedibus iniquitatum
mearum,

meorum, flecto genua, coram immensa tua pietate.

Pœccata mea detego coram te, ut remedium asferas, & abscondo propter fœditatem, ne offendam mundissimos oculos tuos. Nec curantur sine confessione, nec deteguntur sine pudore, & confessione. Si tegantur, incurata manent: si detegantur, detestabilia sunt. Exurunt me dolore, & terrent pavore. Sana me, ô Domina, ne feces corruptorum meorum scelerum causent nauseam, aut in te, aut in Filio tuo.

Mater Sanctæ spei! venit Filius tuus salvare, quod perierat: & tu Domina obliviscere peccatoris se humiliantis, & ad te maximo cum doloris sensu clamantis?

Quæsitivus tuus JESUS errantem oviculam, quæ pœnitentiam abjecerat: & tu poteris despiciere eum, qui cum amaritudine cordis deflet sua errata?

O Fili! ô Mater! si ambo injuriâ affecti estis; attamen adhuc in pectore vestro superest aliquid clementiæ, pro eo, qui confunditur propter scelera sua præterita.

Ambo offensi estis; ambo estis abyssus misericordiæ, & dulcedinis: hic reus, & vinctus pro tribunali Divinæ justitiæ, confugit ad iacrarium clementiæ Matris DEI, ad Filium cordis ejus.

Misericordissime JESU, parce servo Matris tuæ, misericordissima Mater MARIA, parce principio Filii tui. Projicio me in medio duarum tantarum misericordiarum, ut non incidam in duas justitias rigidissimas.

O Bone Fili! ô bona Mater! non sit irrita hæc confessio mea: non me confundat spes in vobis reposita.

Nuncia mihi, ô Mundi Judex, cui condonabis? dic Orbis Reparator, quis conciliabit, si tu damnas?

Et tu Domina, nunquid abijcies hunc vermiculum, decantantem tuam magnitudinem ex amore tui, & detestantem cum dolore peccata sua? Spero, ô Mater misericordiæ, quòd non abijcies: sed misericordiam DEI, & veniam peccatorum mihi impetrabis.

*Actus pro mortificandis sensibus exemplo
Beatissimæ Virginis MARIE.*

O Dulcissima Virgo MARIA, quæ in passione dulcissimi Filii tui, omnes sensus tuos affictos habuisti, & imprimis oculos tuos benedictos: dum Filium tuum dilectissimum ligatum, flagellatum, spinis coronatum, cruce onutū, & cruci ignominiosæ affixum vidisti.

Deinde aures tuas: dum crudeles illas voces: Tolle, Tolle, crucifige eum: & multas blasphemias, impropria, derisiones audisti.

Præterea gustum tuum: dum Filium tuum aceto cum felle mixto potatum conspexisti.

Odatum tuum: dum in loco sætenti montis Calvariæ, Filio tuo in Cruce pendenti asticisti.

Insuper tactus tui sensum: dum Filii tui acerbissimos dolores, cruciatus, & cuncta tormenta, in te sensisti.

E Quæ

Quæ omnia patientissimè pertulisti: Quia tu omnes sensus tuos DEO consecrasti, per quos in omnibus placere ei, illisque ad honorem DEI solummodò uti semper voluisti.

Ego quoq; firmiter statuo, ob DEI, tuumque honorem, quocunq; potero modo, sensus meos affligere, illisq; omnia oblectamenta subtrahere, & ad placitum DEI mei tantummodò eis uti.

Fateor, modestissima Virgo, quòd oculi tui fuerunt, sicut oculi columbarum: hoc est, pudicissimi, mundissimi, pleneq; custoditi, & nunquam inordinate aperti: nunquam in aliquem indecenter directi, aut fixi: nunquam ad vanitatem conversi: itaq; & ego, amore, & exemplo tuo, super oculos meos invigilare, diligenter eos custodire, & nunquam inordinate aperire volo.

O Purissima Virgo, cujus aures ad eloquia Domini, eloquia casta, ad verba Divina, salutaria & utilia patebant; non verò otiosa, mundana, noxia & vana: quòd, ut similiter à me fiat, ob honorem tuum curabo.

O quàm nimium mortificatum sensum gustus habebas, Virgo Sacratissima! quæ modo simplicissimo cibos conditos, & parcissimè, & tempore debito semper fumebas: & sæpè cibum per conterminatos jejuniò dies tibi subtrahebas: cujus cibus plerumq; obvius erat, qui mortem arceret, non delicias ministraret. Sic & ego, ob amorem tuum, mortificare sensum mei gustus, modis debitis & licitis propono: & libentiùs simpliciores, & communes,

Via Purgativa. 67

munes, & viliores, quàm exquisitos cibos, & extraordinarios, in debita quantitate, & horis designatis, sumere decerno.

Scio, ô Domina mea, etiam odoratum tuum te rectè gubernâsse, ut nunquam aliquos odores ad tuum usum adhiberes: quinimò graveolentiam stabuli, hilari vultu, & mente sustineres: absit à me, ô dulcissima Virgo, ut ego quoquè, ob honorem tuum, odoratus mei aliqua oblectamenta, per res boni & grati odoris, quæram, vel graviter olentes, ex immortificatione meâ fuglam.

O Piissima Virgo, tu nunquam sensui tactus tui blandiri voluisti, quem variis incommodis durissimè tractasti: ô utinam & ego, amoris, & honoris tui causâ, ita faciam, sicut vehementer desidero: & quàm maximâ, potero, curâ, sensum hunc immaculatum, semper servare, in animo constituo.

O Svavissima Virgo, sicut tu sensus externos rectè compositos habuisti, ita & internos: & idè nullam tibi imaginativa perturbationem, vanas rerum creaturarum imagines repræsentando, afferebat. Estimativa tua, nunquam in judicio suo, circa vera bona, & falsa, errabat: Memoria quodq; illa solum in mentem tibi revocabat, quæ tibi ad cogitationes, contemplationes, & affectiones tuas semper decentissimas, mundissimas, & ordinatissimas, necessaria fuerant.

O si & mihi, Sanctissima Virgo, ejusmodi sensuum meorum interiorum, adeò Sanctam & rectam compositionem impetrare velis. Nam ego to-

tum in me contrarium sentio, & inde magnam inquietudinem in anima experior.

Actus pro mortificandis passionibus per intercessionem Beatæ Virginis Mariæ.

O Mæstissima Virgo MARIA, quæ ob mortem crudelissimam, & passionem acerbissimam, prædilecti Filii tui, gravissimis doloribus, angustiis, mærore, & tristitiâ affecta fuisti: quæ omnia, fuerunt in te ordinatissima, & secundum regulam rectæ rationis, & nullo vituperio digna: utpote, quæ fuisti omnium passionum, & affectuum tuorum Domina prudentissima. Rogo te, per hanc sublimem DEI gratiam, per quam hoc dominium perfectum passionum tuarum obtinuisti, intercedere pro me digneris; ut etiam ego, sim Dominus affectuum, & passionum mearum: ne rationem meam, in suam servitutem pertrahant, sibiq; subijciant: ne me ad aliquid illicitum, & peccatum inducant: ne me in bonis actibus inchoandis impedian, vel continuandis perturbent.

O Benignissima Virgo MARIA, quia passiones feruntur ad illa, quæ ipsis per sensus externos, & internos repræsentantur: ideò te supplex obsecro; fac, ut tui amore, & imitatione, tuoq; merito, ab omnibus illis, quæ neq; propter DEUM, neq; secundum DEUM, sensibus meis occurrerint, sensus meos interiores & exteriores, affectus & passiones contineam, & abstraham: omniaq; naturæ, & sensualitatis solatia non necessaria, abijciam & fugiam.

O Purif-

O Purissima Domina mea, quam Dominus DEUS, ab omni peccato, & inordinatis passionibus præservavit; purifica, quæso, & præserva me, tua efficaci intercessione, ab omnibus passionibus, & affectibus inordinatis: & fac, ut illa sola, quæ placita DEO, & tibi cognovero, amem, desiderem, & sperem, & magnanimiter prosequar, & quæram: jam verò illa, quæ intellexero DEO meo, & tibi displicere, odio habeam, & fugiam: & si evenerint, ob hoc ex corde doleam.

Actus pro mortificanda passione Iræ.

O Mitissima Virgo MARIA, quæ ob necem dulcissimi Filii tui gravi injuriâ affecta, nullum appetitum vindictæ, seu passionem iræ in te sensisti: ideò & ego, ob amorem DEI, tuumquæ, propter injuriam ab aliquo mihi illatam, ab omni vindicta abstinere conabor.

O Mansuetissima Virgo, sentio quidem me primum esse ad iram, & facilè levi de causa excandescere: sed firmissimè propono, propter DEI, tuumquæ; honorem, invigilare super hanc passionem perniciosam animæ meæ, eamquæ; refrenare.

Quandoquidem alia est ira, quæ citò accenditur: alia, quæ diu manet in memoria: alia difficilis ad placandum, quæ nunquam quiescit, donec puniat, fumatquæ; vindictam: protestor, quòd, si aliquando irâ accensus ex fragilitate fuero, hanc illicò scintillam extinguere; nec iram diu fovere; nec ad vindictam progredi volo.

Talis est cæcitas humana! ut, licet nihil ex nobis simus, possimus, sciamus, & habeamus; nihilominus ex omnibus bonis nostris excellentiam quæramus: & ideo propter minimam parvipensionem apparentem, vel veram, facile indignamur. Verum ego, sicut omnem excellentiam fugere desidero: ita nunquam, ob contemptum, & parvam æstimationem mei irasci.

Nemini alteri, sed mihi ipsi indignari statuo, propter peccata mea, quibus DEUM meum summè bonum, & summè dilectum offendi: pro quibus etiam de me vindictam sumere decerno.

Quoties ab aliquo me, non adeò magnifici cognovero, vel quocunq; modo læsus, & ad indignationem provocatus fuero: toties ad cohibendâ iram appetitui meo persuadere enitar: quia non decet hominem rationis compotem, quasi belluam excandescere: multò magis non decet hominem Christianum, ob hanc ferinam passionem, perdere in paradiso mansionem, quæ mansuetis promittitur: Beati mites, quoniam ipsi possidebunt terram viventium. Sed præcipuè non decet Religiosum, & imitorem Christi, qui tanquam agnus, coram rudente se obmutuit: & quasi ovis, ad occisionem ductus est: cùm malediceretur, non maledicebat: cùm pateretur, non comminabatur: & tradebar iudicanti se injustè.

Actus pro extirpando vitio Iræ.

O Scavissima Virgo, quia ex actibus passionis iræ, generatur vitium Iræ: ideo sicut nullus actus

actus inordinatus passionis iræ in te fuit: ita nec vitium Iræ, locum in anima tua habere potuit: de quo ego gaudeo, tibiq; gratulor, & te supplex oro, ut ad extirpandum hoc vitium, animæ meæ perniciosum me adjuvare digneris.

O Dilectissima Virgo, contra cujus Filium dulcissimum adeò gravi irâ olim exarserant, & in illacouq; permanferant Judæi, donec crudelissima & ignominiosissima morte eum affecerint. Ex quo clare apparet, quanta sit malitia vitii iræ, quod ego, propter amorem DEI, tuumquè, abominor, & illud eradicare ex animo meo curabo.

Fateor, & culpam meam agnosco, quòd per immoderatum appetitum vindictæ sæpiùs Dominũ DEUM meum, infinitè bonum offenderim: quòd iram sinè justa causa diu foverim, & usq; ad ultionem non quieverim, de quo nunc, ob purum amorem DEI, intimè doleo.

Pænitet me modò graviter, propter DEUM summè dilectum, quòd aliquando ita excandui contra proximum, ut eum odio habuerim: aliquando in verba contumeliæ, & maledicta proruperim: nonnunquam ex indignatione ad proximum loqui, eiq; charitatis officia exhibere noluerim: & aliis variis modis, per hoc vitium iræ, Domino DEO meo displicuerim: propter quod, summo odio hoc vitium nunc habeo.

O quàm multoties excessi in modo, nimis ardentè irascendo, & inordinatè me habendo! dum ex zelo Divini honoris, & justitiæ iratus, vindi-

Etiam sumpsi de aliis: vel eos verbis asperioribus reprehendi: cujus rei causâ, mihi modò irascor, & vindictam sumere de me ipso, ob amorem DEI conabor.

Sicut vitium iræ, ita filias ejus execror, propter te DEUM meum: videlicet; Rixam: per quam, in multis, proximis nostris, tum verbo, tum facto nocemus.

Indignationem: per quam reputamus indignum, qui nobis hoc vel illud fecerit.

Tumorem mentis: ex quo cogitare solemus diversas vindictæ vias.

Clamorem: seu altam, inordinatam, & confusam locutionem, adversus eum, qui nos offendit.

Blasphemiam: seu injuriosa, contra DEUM, & Sanctos ejus verba.

Contumeliam, culpam exprimentem; vel Convitium: aut Improperium, exprobrans aliquem proximi defectum.

*Actus Mansuetudinis virtutis contrarie
vitio Iræ.*

O Mansuetissima Virgo MARIA, quæ, sicut dilectissimus Filius tuus, non solum vindictam de inimicis suis sumere voluit: sed etiam pro illis, in Cruce, Patrem suum æternum, ut illis ignosceret, oravit: ita & tu, pro inimicis tuis in corde orasti: nec de ulla vindicta cogitasti: quorum exemplum secutus, hanc virtutem mansuetudinis summo studio colere, firmiter propono.

Quan-

Quantum potero, omnes injurias meas, æquo animo tolerare, & oblivioni tradere curabo: ne ex recordatione illarum, iræ scintilla facile in animo meo accendatur.

Nolo considerare, nec ponderare, quam injustè, aut malignè me aliquis afflixerit: sed agnoscens, me graviora, pro peccatis meis, meruisse, credam illum, tanquam Divinæ justitiæ ministrum, ad purgationem peccatorum meorum: mihi à DEO missum, & ordinatum esse.

Nolo de injuria mihi ab aliquo illata, coram aliis unquam conqueri: nec eum accusare: nec de ejus malitia loqui.

Certissimè statuo, quotiescunq; læsus fuero, me, quasi agnum, coram tondente futurum.

Si pungar aliquando, & importunè tenter, Divinâ adjutus gratiâ, læsoribus arridebo.

Etiam si expolier, ac cædar ab inferiore quovis, amoris signa ei exhibebò.

Absit à me, ut ob ullum damnum, contra amabilissimos proximos meos excandescam.

Si quis me tentaverit; lætabor super exercitia illa, sicut qui invenit spolia multa.

Si quando vexatus à proximo fuero; obliviscar mei, & compatiar illi, ob amorem mansuetissimi Domini nostri JESU Christi, tuumq; honorem, dulcissima Virgo MARIA.



(S)(+)(S)

EXERCITIA PROFICIENTIUM SEU, VIÆ ILLUMINATIVÆ.

Hæc via requirit illuminationem, seu ornatum
Animæ.

Quod fit per acquisitas virtutes, quarum perfectissimum exemplar habemus in Christo, in quibus cum continuo imitari debemus: Et ideo hæc Viæ Illuminativæ exercitia, nihil aliud sunt, nisi Christi Domini nostri virtutum imitatio. Ut autem omnis hac in re evitetur confusio; per singulas Férias, omnium virtutum potest fieri distributio, ad Præsentiam DEI accommodata. Designantur autem hic eadem virtutes exercendæ, quæ jam sunt in via Purgativa positi: quia omnes virtutes exerceri debent in qualibet via, sed diverso fine & effectu. Nam in via Purgativa exercentur, ut per eas vitia eradicentur, & passionibus cohibeantur: in via Illuminativa, ut anima illuminetur & exornetur: in via unitiva, ut DEO uniatur.

PRO DIE DOMINICO.

Hac die potest fieri exercitium.

Imitationis Christi Domini nostri: Abnegationis: contemptus mundi: & Diligentia.

Ætus

Actus Imitationis Christi Domini nostri.

O Amantissime JESU, qui pro nobis homo fieri, & in stabulo nasci dignatus es, ut homines more pecudum viventes, benè & sanctè vivere, exemplo tuæ Sanctissimæ vitæ doceres: quod exemplum ego semper præ oculis habere, illudq; imitari percupio, & volo.

O Magister bone! qui viam DEI, quâ ad DEUM pervenire possemus, & sermone, & opere nos docuisti: hanc viam ego semper inquirere, & tenere decerno.

O Salvator hominum Christe JESU! cujus cognitio initium nostræ salutis est; cujus imitatio, tota perfectio est. Tu enim dixisti: Si vis perfectus esse, sequere me: hoc est, imitare me: quia beneficio tuo factus Religiosus, perfectus esse volo, ideò te Dominum meum semper sequi, tequè pro mea tenuitate imitari statuo.

O Bone JESU, ô sanctitatis exemplar! cum tota ratio vitæ spiritualis, & sanctæ conversationis nostræ sit te aspicere, & mores nostros ad tui similitudinem efformare: proinde ego te, tanquam exemplum, mihi ad sanctè vivendum datum, semper aspiciam, & ad imaginem tuam, meas omnes actiones instituam.

Dabo operam, ut cogitationes tuæ sanctissimæ sint regula cogitationum mearum; ut ea tantummodò cogitem, quæ tibi placent.

Assumam verba tua, verba vitæ, verba casta & pura, in exemplum verborum meorum; ut ea loquar, quæ tu vis, & servū tuū decent. Cona-

Conabor opera mea, ad similitudinem tuorum sanctissimorum operum præstare: atq; sic omnia agere, vitamq; meam ita instituire, ut à tua purissima vita non dissentiat; sed ei, pro mea possibilitate, similis existat.

Omnes facultates animæ meæ, appetitus, & sensus omnes, ad exemplum tuum, dulcissime JESU, componere desidero, & propono: ita, ut nihil aliud intendere, amare, recordari, velle, videre, & audire studeam, quam quæ tuis actibus ejusmodi sint conformia.

O Domine JESU, Domine virtutum! curram in odorem unguentorum tuorum: hoc est, virtutum tuarum, & in illis à te ediscendis, me tuum discipulum fidelem, & in exercendis, verum imitatore exhibere contendam.

O Dilectissime JESU, tu passus es pro nobis, nobis relinquens exemplum, ut sequamur vestigia tua: in quo etiam te, Dominum meum sequi, & pro te, cuncta adversa, & dura sustinere statuo.

Non solum amore tui, & imitatione, bona opera facere; sed etiam in illis debitum modum, fervorem, sedulitatem, & attentionem servare, & quantum potero, pro viribus meis infirmis, ab omnibus imperfectionibus cavere firmissimè propono.

Sed quia nihil sinè te possum: te supplex oro, favissime JESU, conforma me Sanctissimæ Humanitati tuæ: & da mihi liberam ad te introversionem.

Vias tuas demonstra mihi, & semitas tuas edoce me.

Deduc me, Domine, in justitia tua: propter inimicos meos, dirige, in conspectu tuo vitam meam.

Perfice gressus meos in semitis tuis, ut non moveantur vestigia mea.

Actus Abnegationis.

O Amabilissime JESU, qui veniens in hunc mundum, & tempus, & locum nativitatis tuæ, & mansionem incommodissimam elegisti: & statim ab initio vitæ tuæ, crucem mortificationis, seu abnegationis portare cæpisti: quàm crucē, & ego, exemplo tuo, jugiter portare volo.

Absit mihi gloriari, dulcissime JESU, nisi in hac cruce tua abnegationis, & mortificationis: aut aliquid aliud desiderare, vel quærere, vel de alia re gaudere, in hac vita, nisi de hac cruce tua.

Domine JESU Christe, tibi compati, tibi commori per mortificationem volo, ut tecum vivam in æternum.

Svavissime JESU, cujus tota vita crux fuit.

Et qui dixisti: Qui vult venire post me, abneget semetipsum, & tollat crucem suam, & sequatur me: desidero, amore tui, abnegare meipsum; & semper totâ vitâ crucem mortificationis portare; & sic te sequi, per imitationem tuæ sacratissimæ vitæ.

O Clementissime Domine, desidero semper, &
ubiquē,

ubiquè, tibi exhibere. myrrham odoriferam mortificationis, & abnegationis.

Opto dulcissime JESU, tibi meipsum hostiam, in holocaustum placationis, & laudis offerre, gladio mortificationis mactandam.

O utinam omnia mihi amarescant, amantissime JESU! ut tu solus, dulcis animæ meæ appareas, qui es dulcedo ineffabilis, per quam cuncta amara dulcorantur.

Tateor, Domine DEUS meus, quòd nemo potest hìc, & in futuro gaudere: & ideo renuit consolari in hac vita anima mea; ut digna habeatur tuis consolationibus æternis.

Quamvis, Domine DEUS meus, mortificatio mundanis hominibus stultitia reputetur: quia ipsis stultum esse videtur, si homo præsentia delectabilia despiciat; in nullo suas voluntates expleat; & propriis desideriis, ac sensibus contradicat: nihilo mirus ob amorem tuum, stultus potius fieri volo, quàm sapiens hujus mundi.

Volo semper corpus meum castigare, macerare, & confringere; sensus meos, & affectus cohibere; meæ voluntati jucunda denegare; idq; sola intentione placendi tibi.

Actus Contemptus mundi.

O Rex totius mundi potentissime! qui non in palatio aliquo ornatissimo, sed fordido stabulo nasci: non in lecto eburneo, sed in ligneo præsepio reponi: non cum mundanis hominibus,

nibus, sed cum jumentis vilissimis habitare dignatus es; ut nos hoc modo, mundum, & omnia, quæ sunt mundi, contemnere doceres. Proinde ego, exemplo tuo, & imitatione tui, omnibus vanitatibus mundi, & cunctis pompis sæculi, ob amorem tui, abrenuncio.

Quidquid homines sæculares æstimant, & amant, totum illud, ut nihil, præter te, amem, ego nihil æstimo.

Quidquid est auri, argenti, lapidum pretiosorum, atq; gemmarum in mundo, si mihi offerretur, quasi lutum, hoc totum, ex amore tui despicerem.

Bone JESU, si mihi nunc omnes divitiæ, honores, & voluptates mundi affluerent, propter te, nollem illis cor apponere.

Cuncta visibilia mundi, & omnia, quibus homines mundani, sensus suos oblectare solent, ob amorem tuum, Domine, averfor: omnia detrimentum facio, & arbitror, ut stercora.

Omnium rerum temporalium, præ tui amoris magnitudine, oblivisci: & omnem gloriam, omnemque consolationem mundanam aspernari volo.

Dulcissime JESU, desidero, propter te, mori penitus huic mundo, & nihil temporale diligere, præter te.

Scio, Domine mi, quia amicitia hujus mundi est tibi inimica: & quicumq; voluerit amicus esse hujus sæculi, tuus constituitur inimicus. Ideò valedico amicitiae hujus mundi, ut tecum strictissimam amicitiam contraham.

Firmis-

Firmissime constituo, sensuum meorum januas rebus mundanis occludere; ne me ad amorem suum pertrahant.

Profiteor, quod nihil est in mundo, nisi vanitas vanitatum, & omnia vanitas. Fateor, quia tu es sola veritas, sola bonitas, quam diligo super omnia, pro qua desero omnia.

Actus Diligentiae.

Hi habentur in exercitiis viae Purgativae: pro Dominica.

PRO FERIA SECUNDA.

Hac die potest fieri Exercitium.

*H*umilitatis: Contemptus sui: Puritatis: & Prudentiae.

Actus Humilitatis.

O Humillime JESU, qui pedes Discipulorum tuorum lavando, exemplum humilitatis nobis dedisti: quod exemplum, amore tui, imitari, & in humilitatis exercitio omnem operam collocare decerno.

Reliqui actus habentur, in exercitiis Viae Purgativae: pro Feria secunda.

Actus Contemptus sui.

O Creator altissime, qui tam vile, & contemptibile ministerium tuis creaturis fecisti, dum Discipulorum tuorum propriis manibus

nibus pedes lavisti, quo in opere, contemptum nostri nobis commendasti, quem contemptum mei, exnunc, amore tui, amplecti volo.

Verè, Domine mi, cognosco, & profiteor, justis de causis debere me ipsum despiciere: cum nihil in me boni advertam, præter innumera peccata mea gravissima. Quod si nihil tam sædum, & abominabile est, sicut peccatum: igitur propter sæditatem peccatorum meorum, meipsum abominor, & contemno; & ab aliis contemni desidero.

Meritò constituo me in infimo loco, infra omnem creaturam: quia homo peccator sum, & omnium indignissimus.

O Domine DEUS meus, non alium me reputo in conspectu tuo, nisi quendam canem mortuum, & cadaver sætidum, quod omnes fugere, omnes conspectum ejus horrere debent.

Domine DEUS meus, ex corde me despiciere desidero: & omnia, quæcunq; ex me habeo, nihili facio, & contemno.

Ab sit à me Domine, ut dona tua mihi audeam arrogare: sed omnia bona, si quæ sint in me aliena esse; jam verò mala, propria reputabo.

Profitetur, me tuis donis, & præteritis, & futuris indignissimum esse.

O Domine, pone me scabellum totius mundi: omnes videntes me derideant, moveant capita sua super me.

Domine JESU, nullo modo honorem requiro: sed peto à te instantissime, ut sim semper contem-

ptus, inhonoratus, humiliatus, & abjectus, tanquam vilissimus omnium, & pessimus.

Omnes longè sunt meliores, quàm ego, qui nihil facio omninò cum his, qui serviunt tibi DEO vero.

Domine, pati & contemni volo pro te: contemni, Domine, contemni: nullus sit, qui me non contemnat.

Domine, proijciant me, abijciant me à facie sua omnes. Ego sum ille, qui cum Lucifero locum in inferno promerui infimum ad delitescendū.

Obsecro Domine, nulla ratione permitte, ut me alii honorent, & de me aliquam opinionem bonitatis habeant: sed ut me cognoscant pessimam creaturam, & ita tractent, ut semper in contemptu, exemplo tui, vivam.

Dulcissime JESU, in mea dejectione, & confusione, & conculcatione à quocunque mihi illata, lætabor, propter te: & exultabo, cum apparuerit ignominia mea.

Actus puritatis cordis.

O Mundissime JESU, qui tametsi mundi Apostoli tui essent præter Judam, ut ipsemet dixisti: Et vos mundi estis, sed non omnes: tamen pedes eorum lavare voluisti, ut eis munditiam, & puritatem perfectissimam conferres: qualem munditiam, ac puritatem & ego habere desidero, & humiliter à te postulo.

O Purissime JESU, quantum tuâ Divinâ gratiâ
adjutus

adjutus potero, omnia peccata tam gravia, quàm levia, ex amore tui, puritatem cordis conservando, vitabo.

Volo, ò Sanctitatis Auctor! ad solum nomen ejusvis peccati contremiscere, & ab eo, quasi à facie colubri fugere.

Malo, dulcissime JESU, mori, quàm aliquo peccato fœdari, ut tibi placeam.

Utinam, Domine JESU, priùs hoc corpus meum vitâ destituatur, quàm anima letali culpâ maculetur, & in conspectu tuo fœda, & abominabilis appareat!

Amantissime JESU, firmissimè statuo, ab omnibus rebus illicitis cor meum abstrahere, ut fiat purum habitaculum tuum.

Vellem, suavissime JESU, omnes culpas, etiam levissimas, ob amorem tuum, vitare: quia tamen omnes simul non possum: itaq; sigillatim decerno nullam culpam levem, consultò, & sciens, ac volens admittere.

O Piissime JESU, omnes cogitationes meas à malis, & pravis apprehensionibus emundare, & ab aliis abstrahere; ne cor meum, in quo tu vis inhabitare, maculetur, semper sollicitus ero.

Fugiam omnes occasiones, quascunq; cognovero fuisse mihi, vel posse esse causa aliquorum, quantumvis minimorum delictorum, per quæ amitterem cordis mei puritatem.

Benignissime JESU, omnem amorem rerum visibilium, propter te, depono; & ne cor meum illis adhæreat, curabo.

Fa

Cle-

Clementissime JESU, affectu nimium erga me ipsum, & erga hanc vitam, & salutem, temporalem, ex amore tui, abjicere volo.

Conabor omnem mentis attentionem, in omnibus operibus meis adhibere, ut omnes defectus in illis effugiam.

Mundissime JESU, tibi soli vero DEO meo, & cælestibus, tota mente in hæerere cupio, & decerno.

Dabo operam, carissime JESU, in universis actibus meis, puram intentionē habere: videlicet, in omnibus tibi soli placere: tuam voluntatem facere; & omnia ad tuam gloriam, honoremq; tuum infinitum dirigere.

Actus Prudentia.

Sapientissime JESU, quia in superbia, est stultitia, & in humilitate, est sapientia, & prudentia: ideò tu, ô Sapientia æterna! volendo tuos discipulos esse prudentes, voluisti eos esse humiles, dicens: Estote prudentes, sicut serpentes: qui quò altius proflire volunt, tanto magis se terræ applicant, seu humiliant. Proinde & ego, ejusmodi prudentiam in humilitate fundatam quærere semper, & amplecti volo, ut tibi Domino DEO meo placeam.

Fateor, Dulcissime JESU; quòd prudentium est, finem rectum actionum suarum præfigere, & omnia ad tui solius gloriam, & honorem, & beneplacitum tuum, dirigere, quod soli humiles faciunt,

non verò superbi: propterea more humilium, in omnibus operibus meis idem facere propono.

Quandoquidem Prudentiæ virtus requirit, ut in omnibus medium teneamus: ne propter excessum, vel defectum, actus nostri sint vitiosi: quod verè humiles servant, de quorum numero, & ego esse desidero; ne aliter in actionibus meis me gerendo, te Dominum DEUM meum offendam.

Scio, amantissime JESU, superbos, & stultos, esse præcipites in agendo, nec ab aliis consilia recta inquirere, & petere, nec aliorum consiliis acquiescere velle: & ideò facilè ipsos errare: quæ vitia, humilium prudentia semper fugit: prout & ego omnia vitare eadem, amore tui, volo.

Verè stulti sunt superbi, qui nimis confidunt sibi, non autem omnem fiduciam in te solo ponunt: proinde, nimis audacter omnia operando, nec auxilium tuum divinum, per humilem, & ferventem orationem, implorando, multis periculis animas suas exponunt. At prudentes verè humiles, suis viribus diffidentes, nullum opus, nisi invocato tuo Divino auxilio aggrediuntur: quâ in re, eodem modo me semper gerere statuo.

Quia post inventa media, per rectum consilium, pertinet ad prudentiam judicare, quæ nam sint media meliora, & opportuniore, ad finem aliquem bonum propositum consequendum: ideò ne in hoc judicio me errare, & aliquod medium, quod tibi Domino DEO meo displicet, eligere me contingat, tuæ infinitæ bonitati supplico, ut me illumi-

nare semper, & in omnibus, juxta tuum beneplacitum, dirigere digneris.

Quidquid, Domine DEUS meus, mihi inspiraveris faciendum: quidquid boni consuluerint mihi alii: quidquid & ego cognovero, & judicavero, & proposuero, quod rectum erit, & tibi placens, sine mora, illud exequi conabor.

Dabo operam, benignissime JESU, omnem semper adhibere circumspeditionem, ut mala animæ meæ caveam; & nihil per incuriam tibi minus gratum, minusve acceptum efficiam.

Utar, Domine JESU, vigilantia discretionem, ut per eam vera à falsis, & bona à malis discernam, ac in operibus meis, & desideriis, modum, & mensuram virtutis teneam, ut tibi in omnibus placeam.

Fugiam, amore tui, benignissime JESU, illam pravam prudentiam, quæ tibi est inimica, & legi tuæ non est subiecta: quæ dicitur prudentia carnis, proprii commodi custos, congregandis opibus, auro, & argento dedita, deliciis, & voluptatibus intenta.

Odio habeo, & mundi prudentiam, quæ docet cor machinationibus tegere, multa per ostensionem fingere, sensum verbis velare, quæ falsa sunt, vera ostendere, quæ vera sunt, falsa demonstrare, honorum culmina quærere, irrogata ab aliis mala multiplicius reddere, nullis resistentibus cedere.

Placet mihi prudentia justorum, quæ præcipit nihil per ostensionem fingere, sensum verbis aperire,

Via Illuminativæ.

87

re, vera, ut sunt, diligere, falsa devitare, bona gratis exhibere, mala libentiùs tolerare, quàm facere, nullam injuriæ ultionem quærere, pro maledicentibus orare, contemptum amare, paupertatē quærere, possessa relinquere, rapienti non resistere, percutienti alteram maxillam præbere: quam doctrinam sequi, tenere, & adimplere, ob honorem & amorem tuum, svavissime JESU, omnino, totā vitā meā, curabo.

Absit à me, Domine mi altissime, fatuitas illa animabus nostris perniciofa fatuarum virginum, quæ acceptis lampadibus non sumpserunt secum oleum bonorum operum.

Fac me, Domine DEUS meus, prudentiam habere virginum prudentum, quæ non sunt contentæ nudo suæ vocationis ad fidem, & Religionem titulo, sed bonis actibus, & operibus ipsis, & proprii instituti exercitiis, satisfacere suæ vocationi desudant: quod & ego facere firmissimè propono.

PRO FERIA TERTIA.

Hac die possunt exerceri actus.

*Justitiæ, Observantiæ regularis, Obedientiæ,
& Timoris DEI.*

Actus Justitiæ.

Justissime JESU, qui ut Divinæ justitiæ pro homine satisfaceres, ad mortem crucis acerbissimam, & ignominiosissimam, in horto montis Oliveti te sponte obtulisti: pro quo sis infinites be-

nedictus: cujus exemplo, & imitatione, virtutem justitiæ diligenter colere volo.

Dulcissime JESU, quia tu justus es, & justitiam diligis, & quia hoc à me requiris, ut servem erga omnes justitiam; ideò, ob amorem tuum, singulis quibusq; quod suum est, tribuere gestio.

Et imprimis tibi DEO meo, ut primo omnium Principio, & supremo Domino, ob infinitam tuam in omni genere perfectionis excellentiam, cultum Patriæ, seu debitum honorem, cum omni submissione, & subjectione, omnem reverentiam, laudem, & gloriam, & gratiarum actionem exhibendo; & pro tua offensa debitam tibi satisfactionem, & dolorem, per Pœnitentiam reddendo.

Deinde proximis; videlicet, Parentibus, debitum pietatis cultum ipsis præstando, & per officia, spiritualia, maximè per Orationē eis opem ferendo.

Cunctis quoq; dignitate, doctrinā, ætate, vel virtute præcellentibus, Observantiæ honorem exhibendo.

Omnibus Sanctis specialem Observantiam, seu Dulciæ cultum & reverentiam: jam verò Sanctissimæ DEI genitrici Virgini Mariæ, debitam Hyperdulciæ venerationem, & honorem tribuendo.

Præterea Superioribus amorem, reverentiam, & obedientiam impendendo.

Benefactoribus Gratitude, pro salute illorum preces meas offerendo.

Aliis verò omnibus, Benevolentiam, Consilium, Auxilium, Affabilitatem, Ædificationem præstando;

do; neminiq; ullum malū & injuriam inferendo.

O Benignissime DEUS meus, quia tu es verus Pater noster amantissimus: Dominus noster excellentissimus: Benefactor noster summus: Superior omnium supremus; ideò sublimiori modo, erga tuam Divinam Majestatem, quàm erga creaturas, virtutem Pietatis, Observantiæ, Gratitude, & Obedientiæ ac Resignationis, quæ est perfectissima obedientia, exercere statuo.

Scio Domine, quòd nulla major injuria tibi inferatur, quàm cum tua Divina Majestas offenditur: unde omnem offensam tuam, & omnia peccata etiam minima vitare conabor: & de præteritis omnibus offensis tuis, ob amorem tuum, doleo.

Quia facere bonum, & declinare à malo, pertinet ad virtutem justitiæ, ita, ut sinè his duobus, non possit esse opus integrum justitiæ & perfectum: propterea conabor hæc fideliter servare: videlicet, facere bonum proximo debitum; hoc est, restituere illi injuriam, à me quocunq; modo ipsi factā: deinde declinare à malo proximi: hoc est, vitare malum proximo nocivum, ne ipsi ullo modo noceam: quod totum facere volo, ne te Dominum DEUM meum offendam.

Domine, qui dixisti: Beati qui esuriunt, & sitiunt justitiam; quoniam ipsi saturabuntur: ego quòque hanc justitiam esurio, & sitio: & ideò mandata tua, & vota mea, atq; omnia vocationis meæ opera implere: quod tibi displicet, fugere, & vitare: & unicuiq; quod suum est, reddere volo.

Quan-

Quandoquidem lex naturæ jubet: Quod tibi vis fieri ab aliis, hoc ipse fac aliis: & quod tibi non vis fieri, alteri ne feceris: propono, ut tibi per hoc quàm maximè placeam.

Actus Observantiae regularis.

Benignissime JESU, qui non venisti solvere legem, sed adimplere, & facere in omnibus voluntatem Patris æterni tui, quam implere voluisti, dum ad calicem amaræ passionis, ex voluntate DEI Patris bibendum te promptum exhibuisti: exemplo, & imitatione tui, non tantùm leges tuas Divinas, sed etiam humanas, in Religione sancta nostra, ex tua Divina inspiratione, & voluntate, conditas fidelissimè servare volo.

Quaecunq; sunt propria status religiosi, & vocationis, strenuè præstare, & nihil ab hoc statu alienum, eiq; dissonum facere conabor.

In omnibus actibus religionis, aliis me accommodare, & cæteris fratribus libenter associari: videlicet, cum orantibus orare, cum laborantibus laborare, cum pausantibus pausare; & tanquam membrum aliis charitate conjunctum, convenientem partem oneris portare statuo.

Domine DEUS meus, ob amorem tuum, exactissimè custodire, & adimplere omnes partes observantiæ Sanctæ religionis nostræ; videlicet, quidquid Regula, Constitutiones, Ordinarium, Instructiones, Ordinationes, & mandata Superiorum jubent, diligenter curabo.

Etiam si

Etiamsi solus separatus ab hominibus in aliquo loco viverem, ubi nullus videret, aut sciret, quid ibi agerem: nihilominus ex intentione sola placendi tibi, eadem spontè facere vellem, quæ solum in communitate observare deberem.

Quamvis ab aliis nulla regularis observantia servaretur: attamen nihil veritus aliorum murmuraciones, & irrisiones, immò & persecutiones, solus intemeratam observantiam servare firmissimè statuo.

Paratus sum libenter sanguinem, & vitam dare potius, quàm minimum regularis observantiæ punctum, aut ceremoniam velim culpâ meâ abrogari: & si quid per me jam est abrogatum, collapsum, & annihilatum, doleo, ob amorem tuum; & si scirem, quid nam est ejusmodi, toto procurarem conatu, illud corrigere.

Domine DEUS meus, singula, & minima regularis observantiæ præcepta, cum humilitate suscipere, & veluti à te solo dictata, & fundatoribus inspirata venerari, nec de eorum convenientia differere propono.

Hæc puncta Regulæ, in quibus est reformatio facta, per Sanctam Matrem Nostram Tereissiam: hoc est, Silentium strictum, Solitudinem, Abstemiam, Orationis exercitium, & alia superaddita, quantum potero exactissimè, perfectissimè, rigidissimè usq; ad ultimam vitæ meæ periodum, conservare, retinere, & adimplere desidero, decerno, & ex intimo corde volo.

Actus

Obedientissime JESU, qui factus es pro nobis obediens usq; ad mortem, mortem autem crucis, ad quam subeundam, obediendo Patri tuo æterno, te in horto obtulisti: amore, & imitatione tui, in omnibus, tibi DEO meo præcipienti, & Superioribus meis, propter te, obedire volo.

Faciamq; hoc velociter; sinè mora, & dilatione.

Libenter; prompta voluntate, voluntatem meam Superioris voluntati subijciendo.

Simpliciter; cæco intellectu, imperatum non discutiendo, & judicium meum Prælati judicio submittendo.

Hilariter; absq; tristitia, tædio, & quærela.

Fortiter; excelso animo, in rebus arduis, & difficilibus; etiam Superioribus parùm affectus, & malevolis.

Humiliter; absq; vanæ gloriæ & laudis appetitu, vel complacentia; rudibus quoq; Prælati & imperitis.

Perseveranter; usq; ad perfectam mandati Superiorum impletionem; & usq; ad finè vitæ meæ.

Clementissime DEUS, postquam per Superiorem tuum beneplacitum significas, firmissimè constituo ei, quasi tibi parere.

Profecto, sapientissime Domine, quamvis Superior homo agrestis, & ignarus esset; quidquid mihi diceret, quasi cælestia oracula fusciperem.

Profitcor Domine, Superiorem meum propter

te veneratione dignissimum esse; ac propterea me totum illi libentissimè subdo.

Sanè tametsi videretur carneis oculis meis Superior meus stultè loqui, verba vitæ me audire putarem.

Eo certè modo, fidelissime Domine, quo tibi obedirem, si te corporeis oculis cernerem, Superiori meo parebo.

Abfit à me, Domine, ut improbem, quod Superior meus probat.

Actus Timoris DEI.

CLementissime JESU, qui ut verus homo, propter proximam passionem, ac imminentem mortem dirissimam, & acerbissima tormenta, justum timorem in horto habuisti, ubi cæpisti vehementer pavere, & tædere: fac me quoq; justum timorem tui semper habere.

O Domine DEUS meus, qui dixisti per Prophetam: Qui timet DEUM, nihil negligit: & membra, & sensus, & linguam, ab omni actu illicito cohibet: ideò & ego sic te timere volo.

Quandoquidem qui timet DEUM, in mandatis ejus volet nimis: eodem modo te timebo semper, ut nunquam transgrediar mandata tua; sed illa adimplere, quàm perfectissimè conabor.

Si Sancti jubentur timere te Dominum, per Prophetam dicentem: Timete Dominum omnes Sancti ejus; quoniam nihil deest timentibus eum: quantò magis nos peccatores, timere te Dominum nostrum

nostrum debemus; ut nobis nihil desit timentibus te: ut non desit, nobis gratia tua, auxilium, praesidium tuum; & tu ipse, ut nunquam desis nobis, nec deseras nos, quod singulariter te rogo.

Scio, Domine mi, quod peccatum, est maximum malum tuum: ideo ad quodlibet exhorrescere statuo, illudq; magis timere, quam mortem, aut ignominiam, aut ipsam gehennam.

Unicum est, quod timere debeo; ne per peccatum te offendam, & debitum tibi obsequium subtraham: non tam propter aeternas poenas, quam potissimum, quia propter tuam infinitam Majestatem, Bonitatem, & Beneficentiam, superdignissimus es, cui à nobis ex puro amore serviatur; etiamsi nihil nobis accederet commodi ex servitio tibi impenso, aut incommodi ex omisso obsequio.

In omnibus temptationibus, scutum timoris tui hostibus meis opponam, ut à gravi lapsu in peccatum, eripiar: virtutum armis me muniam, ne superer: & assiduæ orationi insistam, ut à te gratiam ad vincendum consequar.

Considerando, quia multæ, & graves tentationes, & laquei, semper & ubiq; ad te offendendū nos alliciunt: igitur timere jugiter debeo te offendere, aliquid, quod tibi displicet committendo: vel aliquid, quod à nobis exigit, omittendo, vel minus diligenter, & alacriter tibi serviendo.

Abstet à me, Domine DEUS meus, ut sic te timeam, ut hic timor me nimium perturbet, aut deiciat: sed ita, ut me coërceat ab omni torpore,

& negligentia; & securitate; faciatq; in tuo servitio alacrem, vigilantem & devotum; deniq; expellat à me, & prohibeat omne peccatum, & ad omne bonum faciendum me impellat.

O Domine mi, te summum, & immensum DEUM agnosco: te primum Principem, & supremum omnium Dominum esse confiteor: propterea me tibi submitto; atq; prostratus corpore, & animo, te adoro, & cultum Latriæ, per supremam reverentiam tibi soli debitam exhibeo; & semper cum timore, & tremore stare coram te, firmissimè statuo.

O DEUS meus, timeo te: quia potens es me mittere in gehennam, & in æternum me à te exulem efficere: simul tamen protestor, quòd quamvis nulla esset mihi propter peccatum inferenda pæna, adhuc me ab illo abstinere: ne Divinam tuam Majestatem quomodocunq; offenderem.

Timeo te: quia tu Dominus meus es: & quia dixisti; Si ego Dominus, ubi est timor meus.

Timeo te: quia nescio, an odio, an amore dignus sim.

Timeo te: quia incomprehensibilia sunt judicia tua, & investigabiles viæ tuæ, ut nesciam, quid de me futurum sit?

Timeo te: non ut servus emptitius, ob pænam; sed ut filius charissimus; ne tuam Divinam offensam incurram.

Timeo te: ne à te separer, in quo omne bonum est; & ne à te separatus, omne malum, & omnem miseriam mihi accersam.

Timeo

Timeo te, timore reverentiali, & instar Beatorum revereor infinitam tuam Majestatem, ac Omnipotentiam, ex toto corde me tibi subdens, ac me velut nihilum in conspectu tuo agnoscens.

PRO FERIA QUARTA.

Hac die exerceri possunt actus.

*Fortitudinis, Patientiae, Mansuetudinis
& Castitatis.*

Actus Fortitudinis.

FORTISSIME JESU, qui corpus tuum sacratissimum flagellis virgis, & funibus dirissimè cædi, dilaniari, excruciaci permisisti, quæ flagella verbera & gravia tormenta, mortem deniq; ipsam, & ignominiosissimam, imperterrito, magnanimo, & forti animo sustinuisti: ego quoq; tuo exemplo, & amore tui, ad omnes cruces, verbera, etiam ad mortem acerbissimam pro te subeundam, confidens in tuo auxilio Divino, libenter me offero.

Quia virtutis fortitudinis est, cœercere timorem, & moderari audaciam, instantibus mortis periculis: ideò dabo operam, ut nec nimium audax immoderatè & imprudenter, ejusmodi pericula aggrediar; nec nimium illa timeam, etiam ipsam mortem, ex tua Divina permissione irruentem, quam propter Fidem, & virtutem sustinere paratus sum.

Domine DEUS meus, te solum timere volo:
quia

quia tu solus dignus es timeri: reliqua verò, ut imbecilla, contemno.

Non timebo eos, Domine, qui occidunt corpus: juxta mandatum tuum: tamen timebo te semper, qui potes animam meam mittere in gehennam.

Quælibet molesta, acerba, & terribilia quæ in hac vita mihi evenire possunt, propter acquirendam virtutem, forti animo tolerare statuo.

Quamvis multa obsistant actibus bonis, & virtuosus impedimenta: nihilominus roborare animū volo, ut semper exerceatur in bonis, & ne unquam vincatur in malis.

Conabor semper omnes tentationes, & insultus dæmonis sustinere, & reprimere: nec ullo modo, à mandatis tuis faciendis me retrahi permittam.

Quæcunq; fuerint tibi placita, quantumvis illa ardua, & difficilia fuerint, illa aggredi fortiter, & viriliter prosequi, & perficere desidero.

In omnibus adversis, & afflictionibus, vel persecutionibus, tranquillitatem conservare, & in mediis molestiis, ac tribulationibus, lætitiā, ac jucunditate perfundi curabo.

O Bone JESU, utinam, dono tuo, illam habeam fortitudinem, ut propter te, adversa & molesta animosè sustineam, & ardua ac difficilia, propter gloriam tuam, & honorem aggrediar!

Aufer à me, Domine DEUS meus, noxiam timiditatem; ne timeam, quæ non sunt timenda: temerariam quoq; audaciam in me comprime; ne aliquid supra vires meas adoriar: ut medium hu-

jus virtutis tenens, in virtuosis actibus, juxta beneplacitum tuum strenuè, & fortiter me geram.

Fac me, Domine, occurrentibus periculis, & difficultatibus, timere prout oportet, audere prout oportet, irasci ut oportet, sustinere, vel fugere secundum quod oportet, in quo consistit vera fortitudo.

Actus Patientiæ.

Patientissime JESU, qui in dirissima flagellatione tua, & in maximis doloribus tuis, nullum impatientiæ signum ostendisti: ego quocumque quidquid doloris, & afflictionis, mihi unquam in vita mea acciderit, amore & imitatione tui, patienter id totum feram.

Mitissime JESU Christe, si Religionis austeritas gravis fortasse videatur, æquanimiter eam tolerabo.

Clementissime DEUS, si tentationibus aliquando exercear, pectus firmum opponam.

Benignissime Domine, si tartarus contra me desæviat, constanter ictus excipiam.

Dulcissime DEUS, si quando mæror importunus ingruat, nulla ratione deijci feram.

Amantissime JESU Christe, si morbi nonnumquam subeant, omnia tædia, dolores, anxietates, propter te, fortiter hauriam.

Suavissime DEUS, si totius corporis contritio membrorum divisio, ignis, & quævis acria tormenta inferantur, invictè constabo.

Optatissime DEUS, si hominum mores adversi,

& fastidia molestissima contingant, pacata mente consistam.

Jucundissime JESU Christe, si me ariditate, diuturnâque repulsâ exerceas, libenter pœnam amplectar.

In omnibus, quæ ad rigorem, & strictam observantiam, & ad disciplinam statûs mei, & vocationis pertinent: in jejuniis, & abstinentiis; in vestium asperitate, & strati duritie; in vigiliis, & orationibus; in cellæ, & silentii custodia; in studiis, & meditationibus; in laboribus obedientiæ; in correptionibus, & disciplinis Ordinis; in voluntariis pœnitentiis; in studio mortificationis, & abnegationis: quascunq; austeritates Religionis nostræ, amare, & integrè amplecti, ac fideliter servare, firmissimè propono, & volo.

Actus Mansuetudinis.

Mansvetissime JESU, qui dirissimè flagellis cæsus, afflictus, & innocenter gravissimis injuriis affectus, nullas minas, nullam vindictam, contra inimicos tuos, ore tuo proferebas: sed omnia, quasi agnus mansvetus, cum incredibili mansuetudine tolerasti: cujus exemplû secutus, virtutem mansuetudinis summo studio colere, firmiter propono.

Reliqui actus Mansuetudinis habentur supra in via Purgativa pro die Sabbati.

Actus Castitatis.

Hi Actus habentur suprâ, in via Purgativa
pro Feria quarta.

PRO FERIA QUINTA.

Hac die possunt exerceri actus.

Constantiæ, Modestæ, Veritatis, & Charitatis.

Actus Constantiæ.

Constantissime JESU, qui ad majus tormentum, derisionem, & contemptum tuum, spinæ coronâ cinctus, & veste purpurea indutus, salutationibus derisoriiis illusus fuisti; propter quæ minimè commotus, nec ad perficiendum opus salutis nostræ impeditus fueras; in quo virtutis constantiæ admirabile nobis exemplum reliquisti: quod ego secutus, omnia impedimenta virtutis undecunq; provenientia superare, & in bonis operibus constanter permanere, ob amorem tuum, firmissimè statuo.

Conabor, Domine mi, Protoparentis nostri, qui in virtute ad finem non stetit, erratum corrigere, & damnum nobis illatum per constantiæ virtutem reparare, persequendo in gratia, per JESUM Christum Salvatorem nostrum nobis restituta, & universa impedimenta virtutis prosternendo.

Si cordis mei instabilitas me aliquando sollicitaverit, ad illud opus bonum, quod cæpi, deferendum; aut alia impedimenta, difficultatem insuperabilem mihi objecerint; statim expendam animo,

mo, te DEUM auxiliatorem esse nostrum, cujus auxilio, omnia impedimenta, & difficultates superare possum.

Nunquam, Domine mi benignissime, statum perfectionis, ad quem me ex tua benignitate, vocasti, & quem jam semel arripui, derelinquam.

In quocunq; loco, aut officio, obedientia me posuerit, sine ulla inquietudine, in illo semper permanebo.

Ab his, quæ tibi DEO nostro placent, ob nullam obortam difficultatem, cessare decerno.

Abfit à me, Domine JESU, ut crucem mortificationis, quam pro te semel portare cæpi, per ignaviam unquam deferam, vel in ea portanda tepescam.

Omnia bona proposita, & incepta studia, & exercitia, nunquam ex levitate, & inconstantia dimittam, vel mutabo: sed ea, propter te, secundum te, & per te, fideliter continuare volo.

Conabor, tuâ fretus gratiâ Divinâ, in tuo amore, & virtutibus, de die in diem proficere, & nunquam cessare, vel tepescere: sed semper ad anteriora me extendere, amore tui, & desiderio, perfectiûs tibi placendi, & obsequendi.

Actus Modestie.

MOdestissime JESU, qui gestans coronam de spinis, chlamyde coccinea vestitus, arundinem in manibus tenens, in conspectum populi productus à Pilato dicente: Ecce

Homo : summam modestiam, & verecundiam ostendisti : jure merito & ego, ob exemplum, & beneplacitum tuum, modestus, verecundus esse debeo, prout desidero, & propono.

Benignissime JESU, ob amorem tuum, semper oculis demissis incedam, nec illos sine justa causa & necessitate elevabo.

Reliqui Aëlus Modestie, habentur supra in via Purgativa, pro feria secunda, de mortificando visu.

Aëlus veritatis.

O Veracissime JESU, qui traditus à tuis inimicis Pilato judici, & ab eodem rogatus: Tu es Rex Judæorum: respondisti ei: Tu dicis, quia Rex sum ego. Ego in hoc natus sum, & ad hoc veni in mundum, ut testimonium perhibeam veritati, seu ut dicam veritatem. Quibus verbis declarasti te esse Veracem, & veritatis amatorem; ut & nos tales simus; qualis & ego esse percipio, & decerno.

Domine DEUS meus, curabo semper, ut verè concordent mens mea, & lingua, & opera; ut, quod sentiam in corde, hoc proferam ore, & perficiam opere.

Nolo Domine, docere linguam meam loqui mendacium, ut iniquè agam.

Scio, dilectissime Domine JESU, tam charam tibi esse veritatem, ut ab omnibus DEUS veritatis velis appellari: proinde & ego, amore, & imitati-

one tui, veritatem amare, dicere, & nunquam illam impugnare volo.

Procurabo, quando oportebit, & ubi, & quomodo, semper verum dicere.

Etiamsi mens mea aliquando repugnaverit; nihilominus, si id necessarium, & tibi Domino nostro placitum fuerit, veritatem non reticebo..

Nunquam verum obtegam, aut palliabo, nec pro favore alicujus, nec pro utilitate propria, nec pro aliquo detrimento, quando illud dicere tenebor.

Omnes ambiguitates verborum, & ambages, in conversatione vitabo; sed res, prout sunt, simpliciter proferam.

Conabor promissa fervare semper, nisi justa causa non servandi ea, aut in melius mutandi intercedat.

O Bone JESU, qui es ipsa veritas, & qui vera doces, & omnes homines veraces amas; mendaces verò odio habes: adjuva me, ut & ego sim homo verax, & vera semper loquar, vera sentiam; & ut vita mea, atq; opera cum corde, & verbis bene consentiant, ut sic Sanctissimæ vitæ tuæ, ubique sim conformis.

Actus Charitatis.

Hi habentur in via Purgativa: pro Feria quinta.

PRO FERIA SEXTA.

Hac die possunt exerceri actus.

Temperantiæ, Dilectionis inimicorum, Abstinentiæ & Compassionis.

Temperantissime JESU, qui dum tibi in monte Calvariæ datum esset vinum myrratum grati odoris, & saporis, ad te corroborandum, in acerbissimis tuis tormentis, illud non accepisti; in quo temperantiæ virtutem nobis commendasti; quam virtutem amplecti, honoris & amoris tui causâ, summopere desidero.

Scio Domine, quia Protoparentes nostri per intemperantiam, amiserunt innocentiam, & justitiâ, quàm innocentiam, o si modò per temperantiâ, quam colere volo, recuperare possem! multum exopto.

Ecce, Domine DEUS meus, Protoparentes nostros transgressio temperantiæ, quam ipsis servandam præcepisti, paradiso expulit, & immortalitatis exsortes fecit. Utinam nos filios, temperantiæ observantia ad paradysum introducat, nobisq; immortalitatem conferat!

Profiteor, dulcissime JESU, quòd homo temperans Angelicam ducit vitam, intemperans verò brutalem: ideò ego hanc execror; illam verò amare desidero.

Quoties appetitus concupiscibilis passiones, ad delectabilia sensuum, maxime gustus, & tactus me traxerint; toties, tuo adjutus auxilio, eas diligenter cohibere firmissimè decerno.

Nihil, bone JESU, unquam appetere pænitentium; in nullo moderationis legem excedere; sed sub iugo rationis, cupiditatem tenere, propter te, volo.

Statuo.

Statuo, benignissime DEUS meus, appetitum meum omnino coercere ab iis rebus, quæ turpiter, & cum offensa tua appetuntur.

Clementissime JESU, abstinere à carnalibus desideriiis, quæ militant adversus animam, ut tibi placeam, omnem curam impendam.

Quia temperantia nihil est aliud, nisi amor, quo se tibi DEO nostro, homo integrum, incorruptumquè servat: ideo talem amorem semper habere conabor.

Actus inimicorum Dilectionis.

O Dilectissime JESU, qui pro inimicis tuis, à quibus flagellis concisus, alapis cæsus, spinis compunctus, confusus, derisus, cruci affixus, & innumeris injuriis affectus fuisti, Patrem tuum æternum in cruce pendens orasti, dicens: Pater dimitte illis: quia nesciunt, quid faciunt: illudq; opere adimplevisti, quod ore tuo benedicto nos docuisti, inquiens: Diligite inimicos vestros: benefacite his, qui oderunt vos: quam doctrinam exequi, & exemplum tuum sequi, totis viribus, tuâ suffultus gratiâ, ex amore tui, conabor.

Cupio omnes inimicos amare, propter te, & secundum te; videlicet, quia tu vis illos à me amari: precor ipsis à te omne bonum, quò feliciores, tibi què gratiores fiant.

Rogo, clementissime DEUS meus, dimitte illis omnia sua peccata, & concede; ut arripiant mediam

dia necessaria ad vitam æternam consequendam.

Omnes injurias à quocunq; mihi illatas, omnibus adversariis meis, ob amorem tuum, condono: neq; de ulla vindicta ab hinc cogitabo.

Abstine à me, ut eos, qui me aliquando verbo, aut facto læserunt, contemnam, vilipendam, & quasi nullius æstimationis apud me sint, eos despiciam.

Excludo ex corde meo, omne odium contra illos: nec ampliùs amaro animo, & affectu, erga ipsos esse volo.

Nolo unquam optare, vel procurare eis aliquod malum: immò sicut potero, impediam semper.

Etiam nolo unquam gaudere de ipsorum aliquo malo, & damno, sed potiùs contristabor.

Mala inimicorum meorum, & vitia, ac defectus, nec ipse aliis libenter narrabo, (nisi salutis eorum causâ) nec ab aliis narrari gaudebo: sed nec citò mala de ipsis audita credam.

Non aggravabo, nec nimium ponderabo eorum vitia, sed potiùs excusabo, & supportabo; quantum (salvâ justitiâ, & veritate) potero.

Quod si aliquando eos à me corrigi, secundum te, benignissime DEUS meus, expedire putavero, ut id fraternè, & cum charitate fiat, curabo.

Orabo affectuosè pro eorum emendatione, & cunctis necessitatibus, sicut pro meis, vellem orare, & ab aliis orari.

Omni modo possibili, ac licito, pro malis ab eis avertendis, sicut pro meis; laborabo; paratus
pro

Via Illuminativæ.

107

pro ipsorum salute animam etiam ponere meam,
(si opus esset) ob tui amorem.

Actus Abſtinentiæ.

Hi habentur ſuperius in via Purgativa : pro
Feria ſexta.

Actus Compaſſionis.

O Afflictiſſime JESU, ô Chriſte vir dolorum
patientiſſime ! qui in maximis doloribus, à
ſacraſſima conceptione tua fuiſti: ſed præ-
cipuè, quando crudeliſſimè ligatus, alapis, & co-
laphis percuſſus, flagellis cæſus, ſpinis coronatus,
cruce onuſtus, cruci affixus fuiſti, in qua tribus
horis pependiſti: in cujus amara paſſione compati-
ebantur Tibi Creatori ſuo, à ratione, & ſenſu ali-
ena elementa ; obſcuratus eſt ſol ; petrae ſciſſæ
ſunt; mota eſt terra ; itaq; & ego compati-
or tibi, ex intimo corde, Domino & DEO meo, & con-
doleo: & recolendo tuos dolores, compaſſivum do-
lorem in animo meo ſemper concitare volo.

O Bone JESU, dum aſpicio, vel conſidero te
Dominum meum flagellatum, vel ſpinis corona-
tum, vel in cruce pendentem, video, & agnoſco,
quòd non eſt dolor, ſicut dolor tuus: proinde, ut
& ego aliquem verum ſentiam dolorem, ſuper
dolores tuos multùm deſidero.

O Mors, quàm amara tibi fuit, dulciſſime JE-
SU ! quam dum conſidero, mirum eſt, ſi præ ni-
mio dolore non deſiciam.

Verè,

Verè, Domine JESU, tu dolores nostros ipse portasti, & quas pœnas, quæ tormenta, quam mortem ego promerui, tu pro me sustinuisti: & quomodo ego sine dolore manere possum, dum hæc mente pertracto.

Qui es tu, Domine JESU, qui pro me ligari, flagellari, dilaniari, excruciaci, tandem morte atrocissima in cruce mori voluisti? credo, & profiteor, quia tu es DEUS noster, qui cælum, & terram tua imples Majestate.

Tu es Rex potentissimus, cui serviunt omnia, quæ sunt in cælo, & in terra.

Tu es Creator noster, in cujus conspectu omnis creatura contremiscit.

Tu Dominus altissimus, quem adorant supremæ invisibiles Dominationes, & Angelicæ Potestates.

Ergo tu tantus, & talis, tam indigna, & acerba pati pro me dignatus es; & ego tibi non compatiar? absit hoc à me, Domine: volo compati; volo condolere; volo contristari.

Doleo super te, Frater mi Jonatha, qui fuisti antè nimis decorus, nimis amabilis; nunc verò non est tibi species, nequè decor: factus es nunc despectus, & novissimus virorū, & quasi leprosus.

Doleo super te, Pater mi benignissime, à quo vitam, & omnem substantiam accepi, qui nunc pro me vitam, & animam tuam posuisti.

Doleo vehementer, Sponse animæ meæ amantissime, pro me amaritudine plene, cujus causâ, & ego pro te nunc mœrore, dolore, & tristitiâ consumor; vel saltem consumi percipio. O JE-

O JESU maxime dolens, consolatorem non habens, non est, qui te consoletur ex omnibus charis tuis: ego quidem te consolari vellem; sed quomodo possum, qui potius augeo, & addo dolorem, super dolorem tuum.

Ego sum causâ afflictionis tuæ, sum occasio tui doloris.

Ego te peccatis meis enormibus tristitiâ affeci.

Ego te inimicis tuis tradidi, in vincula conjeci, flagellis cecidi, spinis vulneravi, clavis perforavi, cruci affixi, deniq; crudelissimè occidi.

O me miserum! O me infelicem! qui tanta mala iniquitatibus meis tibi intuli Creatori meo, DEO meo, Redemptori & superamandissimo Patri meo.

Maledicta sint scelera mea, quibus tantorum tormentorum tuorum causam dedi.

Maledicta mea malitia, quæ dolorum tuorum istorum origo fuit.

Utinam nunquam peccâssem!

Utinam peccatis meis, passionis, & mortis tuæ particeps non essem!

O quis mihi det, ut tot lachrymas, quod tu sanguinis guttas, super te dolentem Dominum meum, nunc & semper effundam?

O quis mihi det, Domine mi, à te ut transeat ad me calix amaræ passionis tuæ?

Quis mihi det, dolores tuos ita sentire, afflictissime JESU, ut vel eorum cogitatio, sanguineum à me sudorem eliciat?

O si

O si possem nunc habere illum mærorem, quem habuit dulcissima Mater tua Virgo MARIA tempore passionis tuæ!

O si plorans plorarem, cum illis filiabus Jerusalem, quæ super te, quasi super unigenitum plauerunt!

O si passio tua amara ita penetret viscera mea, ut præ dolore tabescam, & deficiam!

Desidero, ut præ dolore scindatur cor meum; sicut petrae scissæ sunt, in passione tua.

Opto, ut omnia commoveantur intima pectoris mei super dolores tuos, sicut terra commota est, in morte tua.

Cupio, ut obscuretur nunc, præ afflictione mens mea; sicut obscuratus est sol, ob passionē tuam.

Utinam semper sentiam tantum dolorem in mente, quantum tu passus es, & sensisti multipliciter, in tuo sacratissimo corpore!

Utinam moriar pro te? utinā vulnerer pro te!

Utinam totum cruorē meum effundam pro te!

Ecce, benignissime JESU, offero me, ad omnia tormenta, cruciatus, etiam mortem crudelissimam, & ignominiosissimam pro te subeundam.

Offero corpus meum, ad dilaniandum, flagellandum, lacerandum.

Offero caput meum, ad vulnerandum spinis, & excruciantum.

Offero faciem meam, ad conspuendum.

Offero pedes meos, & manus meas, ad perforandum.

Offero

Offero cor meum, ad transverberandum, & compungendum.

Offero me, totamquē vitam meam, ad omnes tribulationes, afflictiones, pœnitentias, & mortificationes, amore tui, perferendas.

Statuo, in honorem passionis tuæ, corpus meum variis modis affligere, & tecum pro modulo meo, aliquantulum dolorem in corpore meo concitare, & sentire.

Curabo, ut tecum Domine JESU Christe, per mortificationem carnis, sim confixus cruci, ut in vita mea similitudo mortis tuæ resultet.

Fugiam omnia oblectamenta; jam verò quæcunq; carni molesta amplectar: & sic semper mortificationem tuam, ô JESU, in corpore meo circumferam; ut in illo manifestetur vita tua.

PRO DIE SABBATI.

Hac die Virgini Sanctissimæ dicata possunt exerceri Actus.

Silentii, Solitudinis, Paupertatis & Compassionis super dolores Beatissimæ Virginis.

Actus Silentii.

O Virgo patientissima, quæ in tuis doloribus, & angustiis maximis, in quibus tua anima benedicta fuit tempore mortis, & passionis dilecti Filii tui, ne ullum verbum lamentationis protulisti; sed in silentio, omnes afflictiones tuas sustinuisti: igitur exemplo tuo, exa-
ctum

Etum cultum silentii tenere, ex amore DEI, & tui, propono.

Mitissime Domine JESU Christe, imitatione Virginis Sanctissimæ, statuo ab omni verbo, quod necessitas, vel utilitas non exigat, abstinere.

Modestissime JESU Christe, pone custodiam ori meo, & ostium circumstantiæ labiis meis, ut non delinquam in lingua mea.

Si oportuerit mori, propter silentii cultum à Congregatione præscriptum, non te negabo.

Si exploratum mihi fuerit, verbum aliquod otiosum esse, etiamsi occidar, filebo.

Abfit à me, Clementissime Domine, ut conscientia renitente, loquar.

Si ad loquendum invitatus fuero, ubi rationes humanæ, ob personæ gravitatem, vel causas alias, verba suggererint, rationi Divinæ, Silentii amore, obtemperabo.

Utinam, benignissime DEUS, potius obmutescam, quàm vel uno verbo tibi non grato abutar!

Scio, Domine DEUS meus, multos incidisse in peccatum loquendo, vix quenquam tacendo: ideo ne peccem, & te offendam, tacere magis, & sæpius, quàm loqui decerno.

Quia cultus justitiæ silentium est? propterea, ut tibi Domino meo placeam, illud strictissime servabo.

Si quando ex necessitate loquar; cavebo, ne aliquid quod tibi displicet committam: propterea fugiam semper locutionem inconsideratam, præcipientem, superfluum, superbam, detractorem, con-

tentio-

tentiosam, asperiores, adulatoriam, mendacem, simulatoriam, curiosam, sæcularem, & otiosam.

Utinam, Domine DEUS meus, ex te clarè, & efficaciter intelligam semper, quid, quando, & quomodo, tacendum, vel loquendum, aut cessandum sit!

Tacebo sæpiùs, dulcissime JESU, propter te usquè ad interrogationem; & interrogatus breviter respondebo id, quod fuerit necessarium, vitando superflua addere, & colloquia sinè causa protrahere.

Libera me, Domine, à multiloquio, quod patior intùs in anima mea: non enim cogitationibus taceo, etiamsi vocibus taceam; multæ sunt cogitationes meæ; sed tu nosti cogitationes hominum, quoniam vanæ sunt; da mihi non immorari eis, ne me ab amore tuo impedian.

Actus Solitudinis.

O Dulcissima Virgo MARIA, quæ à morte dilecti Filii tui, magis solitariam vitam egisti, & in penetralibus domunculæ tuæ te continens rarò foras prodijsti: similiter & ego, ob amorem DEI, honoremquè tuum, & exemplum, solitariæ vitæ magis ac magis addictus esse decerno.

Domine DEUS meus, more solito Virginis Sanctissimæ, fugiens conversationem humanam, recessum cellæ semper tenebo.

Si quando inimicus meus, è cella exturbare me suis suggestionibus vellet, respondebo illi: Ego istos parietes cellæ, propter amorem Domini nostri JESU Christi, custodiam.

H. Sedere

Sedere solitarius in cella, quantum per obedientiam mihi licebit, sicut turtur, fugiendo turbas, etiam fratres meos, curabo.

Volo, ut anima mea sit sola, ut tibi soli omnium servet se, quem ex omnibus elegit sibi: fugiam igitur publicum, fugiam & ipsos domesticos, secedam ab amicis, & intimis.

Non tantum corpore, sed magis mente solitudinem colere conabor, vitando cogitationes terrenas, & mundanas vanas, ac minimè necessarias: sed tantummodò circa Spiritualia, & Divina, ac meae vocationi convenientia, manens in cella me occupare statuo.

Fugiam, ô Domine DEUS meus, hominum familiaritatem, ut tu me ad tuam admittas, qui dixisti per Prophetam: Ecce ego lactabo eam, & ducam eam in solitudinem, & loquar ad cor ejus.

Profiteor, Domine, quia nemo potest esse & tecum, & cum hominibus: idè ut tecum sim semper, hominum consortia non necessaria vitabo.

Scio, Domine, quòd cælum, & cella, adinvicè aliquam videntur habere cognationem; unde sicut post mortem in cælo manere desidero; ita & modò in cella, ob amorem tuum, permanere semper decerno.

Domine DEUS meus, ut facilius evitare valeam multas offensas tuæ Majestatis Divinæ, multas culpas, & imperfectiones; idè frequenter continere me in cella statuo.

Quia solitudo dicitur esse schola perfectionis, & virtutis.

Virtutis, ac puritatis officina, sine qua nemo tibi placere potest: propterea solitudini vacare volo; ut facilius perfectionem, & virtutem, atq; cordis puritatem acquiram, & sic tuæ Divinæ Majestati placeam.

Si aliquibus Sanctis Martyribus tuis, ob amorem tuum, carcer videbatur paradisus; qualis carceris, & martyrii, cum occasionem non habeam; itaq; in cella, veluti in quodam delizioso carcere, ex amore tui, libenter manebo.

Actus Paupertatis.

O Paupertatis amantissima Virgo MARIA, quæ adeo pauperrima fuisti, ut non haberes sindonem, in qua involveres corpus dulcissimi Filii tui mortui: ego quoque, ob amorem DEI, & tui, exactam paupertatem colere, summopere desidero, & propono.

Svavissime JESU, exemplum tuum, & Matris tuæ Sanctissimæ Virginis Mariæ secutus, omnes divitias, & opes mundi contemno: & sicut hæc in effectu reliqui, ita ne minimo affectu illis adhaerere volo.

Reliqui Actus Paupertatis habentur in via Purgativa pro Feria tertia.

Actus Compassionis super dolores Beatissimæ Virginis.

O MARIA Virgo purissima, Mater DEI Sanctissima, omni amaritudine, afflictionibus, angustiis & doloribus plena, quos totâ
Ha. vitâ

vitā tuā, ob acerbissimam passionem & ignominiosissimam, crudelemquē mortem dilectissimi Filii tui, pertulisti: Unigeniti Filii tui tibi verē compatiens, & condolentis, & omnium Angelorum, hominumq; tibi devotorum, tenerrimo affectu, compatio tibi, & condoleo: & sic ad singulos actus, & respirationes meas tibi compati & cōdolere, quamdiu vixero, volo.

Utinam, ô mæstissima Virgo MARIA gladio tuæ compassionis nunc & semper transfigatur cor meum, sicut & tuam ipsius animam transfixit gladius doloris, in passione dulcissimi Filii tui?

O verē singulare martyrium tuum fuit, afflictissima Virgo, quæ acrius torquebaris in corde, compatiendo Filio tuo, quā aliquis Martyr suspensus in equuleo: itaq; & ego istius Martyrii tui particeps esse, & semper, ob memoriam dolorum tuorum, in corde meo torqueri desidero.

Fateor, quòd nulla mater, tantam tristitiam, & intolerabilem dolorem in morte carnalis filii sui unquam habuit & pertulit, sicut tu, ô amantissima Mater, in passione prædilecti Filii tui, ex compassionem persensisti; quando juxta crucem ejus stetit, ac doloris gladio vulnerata, amarissime flestit: equidem & ego, juxta crucem tecum stare, te libenter sociare, in planctu desidero. Opto semper tecum flere; crucifixo Filio tuo, & tibi condolescere, ex intima mea compassione.

O quā flebile spectaculum illud fuit Virginis Matris lachrymantis, suspirantis, & præ dolore deficiens-

ficientis, & Filii ejus in cruce pendentis & exspirantis! à quo spectaculo, oculos meae mentis nunquam avertere: sed tecum, ô piissima Virgo, lachrymari, suspirare, & prae dolore maximo deficere cupio.

O verè magna fuit, velut mare, contritio, & dolor tuus, ô mare dolorum Beatissima Virgo MARIA! quos dolores pari modo, in corde tuo sensisti, sicut Filius tuus in corpore sustinuit in sua passione: ideò renuit consolari anima mea; & unicum erit mihi solatium, in hac praesenti vita, semper tecum pati, ô MARIA!

O Dulcissima Virgo MARIA, cupio immergi in immenso dolorum tuorum mari, ut in omnibus actibus animae, & corporis mei dolores tuos sentiam, & experiar.

Video, ô MARIA Virgo piissima, quòd satis superq; inundavit cor tuum svavissimum doloribus plurimis, & acerbissimis: Ecce, ô Domina mea, offero tibi cor meum, ad excipiendos dolores tuos, & liberandum ab eis cor tuum. O quàm felicem me arbitror, si me gratiâ tuorum dolorum sentiendorum donaveris!

Agnosco, & confiteor coram te, ô clementissima Regina, adversum me iniquitatem meam, quòd negligens, & tepidus sum in compatiendo tibi. Confundor, & erubesco, quòd te dolente, non doleam ego, te plangente, non plangam ego te mærore tabescente, absquè mærore, & compassione tui, vivam.

Doleo super te, ò MARIA Mater misericordiæ! doleo, quòd tantis cor tuum malis, usq; nunc infestetur ab inimicis Filii tui, & universis hominibus impiis, etiam à me miserrimo peccatore, sceleratissimo homine: sed rogo te, ut omnis gladius sive doloris, sive contemptûs, priùs in meam adigatur animam, quàm pertingat ad tuam.

O Afflictorum & dolentium Regina! in tuis, & pro tuis acutissimis doloribus mori exopto. Instans mortis meæ doloribus tuis, & doloribus Filii tui commendo, & communitio: animam meam, in hora mortis meæ, in manus tuas deponere, atquè per easdem coram Filio tuo, Judice meo, præsentari percipio & volo; atquè id à te, per dolores tuos, & per mortem, ac passionem dulcissimi Filii tui, humiliter, frequenter, & ferventer postulo.



EXERCITIA PERFECTORUM SEU, VIÆ UNITIVÆ.

HÆc Via dicitur Unitiva, ab unione intima cum DEO per Charitatem, quæ unio tantò fit major, quantò in homine ferventior fuerit amor: Amor verò excitatur in nobis ferventior, ex majore per fidem cognitione DEI, attributorum, & perfectionum ejus, & beneficiorum erga nos: Itaq; hic ponentur per Férias divisa exercitia varia Amoris DEI, Laudis, Grati- tudinis, & alia, quæ intimè disponunt ad amorē DEI, vel sunt signa, aut effectus ejus.

PRO DIE DOMINICO.

Hac die possunt exerceri Aëtus.

Fidei, Spei veniæ peccatorum, Spei salutis æternæ, & Desiderii Perfectionis.

Aëtus Fidei.

O Auctor Fidei, JESU Christe, firmissimè credo vera esse omnia, quæ te revelante, credit Sancta Mater nostra Ecclesia; & pro cujusquæ veritatis Catholicæ confessione, paratus sum millies mori.

Credo, Domine JESU, te esse ipsam veritatem: ac proinde impossibile est aliquid falsum Ecclesiæ tuæ à te revelari.

H₄

Credo,

Credo, & omninò verum esse profiteor, tres esse Sanctissimæ Trinitatis in una Divinitate Personas.

Credo in Patrem, in Filium, in Spiritum Sanctum, tres personas, unam substantiam.

Credo Patrem esse DEUM, Filium esse DEUM, Spiritum Sanctum esse DEUM, & non tres Deos, sed unum solùm DEUM.

Credo Dominum nostrum JESUM Christum unigenitum DEI Filium, propter nos homines, nostramq; salutem descendisse de cælis, qui incarnatus est de Spiritu Sancto ex MARIA Virgine, & Homo factus est.

Credo, quòd idem crucifixus est pro nobis sub Pontio Pilato, passus, mortuus, & sepultus est.

Credo, quòd resurrexit tertia die. Et ascendit in cælum in eadem carne, quam sumpsit ex Virgine, & sedet ad dexteram Patris.

Credo, quòd iterum venturus est cum gloria, judicare vivos, & mortuos, cujus regni non erit finis.

Credo, & confiteor, quòd æterno præmio donaturus sit justos, & æterno ignis supplicio injustos, & in peccatis mortuos.

Credo, quòd per ignem innovaturus sit mundū, & omnes mortuos resuscitaturus.

Credo unam esse veram solam Fidem, unum Baptisma, unam Ecclesiam Apostolicam, & universalem, quæ est Romana, in qua sola possunt dimitti peccata.

Credo, Domine JESU Christe, te Ecclesiæ
Sponsæ

Sponsæ tuæ septem Sacramenta instituisse, & horum maximum, & præcipuum, Eucharistiam esse, in quo tu verè & realiter DEUS & Homo peritus contineris.

Credo MARIAM Virginem DEI genitricem esse, quæ Virgo ante partum, Virgo in partu, Virgo post partum fuit.

Credo Sanctos unâ cum Christo regnantes venerandos & invocandos esse, eosq; orationes DEO pro nobis offerre, atque eorum reliquias esse venerandas.

Constanter credo, Imaginem Christi Domini nostri, Deiparæ semper Virginis Mariæ, necnō aliorum Sanctorum, colendas, & venerandas, atq; eis debitum honorem, & reverentiam esse imperiendam.

Firmiter credo purgatorium esse, animasq; ibi detentas fidelium suffragiis adjuvari.

Confiteor, & firmissimè protestor coram tua Divina Majestate, totaq; Curia cælesti, velle me in hujus veritatis Fidei confessione vivere, & mori.

Domine DEUS meus, auge in me fidem à te semel infusam, vitamq; fidei consonam concede; ut, quod mente credo, moribus exprimam.

Quia Fides finē operibus mortua est; da mihi, Domine JESU, ut Fidem meam, charitate, humilitate, patientiâ, aliisq; virtutibus, vivam in me esse ostendam.

Utinam Fides tua, integra semper & sincera conservetur, qualem tu Domine tradidisti, qualem Apostoli prædicaverunt!

O si

O si fidem possem in universo mundo annunciare, & omnes infideles ad te DEUM convertere : quàm libenter id facerem, etsi propterea omnia tormenta sustinere deberem.

Utinam possem, DEUS meus, omnium fidelium intellectibus in te credere, omnium cordibus te amare, omnium viribus tibi servire !

Cupio ex toto corde, totisq; viribus procurare, & per te, propono, ut totus mundus firmissimâ fide te cognoscat, & confiteatur : & summo opere doleo, quòd te non credat, adoret, veneretur, & amet sicut oportet.

Actus Doloris, & Spei venia peccatorum.

O Amantissime JESU, qui pro nobis incarnari, homo fieri, in stabulo nasci, tandem in cruce morte crudelissimâ mori dignatus es.

O admirandam bonitatem tuam ! ô verè bonus es. tu ! ô verè summo & infinito amore, & honore dignus es tu !

Cur tam bonum DEUM meum infinities offendi ?

Cur in te infinities peccavi, & malum coram te feci ?

Doleo nunc ex toto corde meo, ex puro amore tui, de omnibus peccatis meis.

Detestor illa abominor ; quia sunt offensa tua. Displicent mihi valdè ; quia tibi displicent.

Displicet mihi, quòd te offenderim ; quia tu es DEUS meus, & omnia, quem amo super omnia.

Vellem, Domine, te amare infinito amore : & desidero

desidero dolore quodam, velut infinito, ex illius amoris infiniti fonte profecto, dolere de meis, & totius mundi peccatis.

Nolo te amplius offendere: malo millies mori, quàm in te DEUM meum peccare.

Et quamvis centies millies amplius peccassem, quàm peccavi: tamen certissimè spero, quòd misericordiam, per bonitatem tuam infinitam, inveniam, & peccatorum meorum veniam consequar.

Nolo, Domine mi, addere peccatum novum, quod esset, si in te, & in tua misericordia non considerem.

Tamet si, Domine JESU, veniam non merear: sed sanguis tuus pretiosus, quem pro me effudisti, facit ut sperem.

Omnis spes mea, optime JESU, & totius fiduciae certitudo, in pretioso sanguine tuo mihi est: in ipso confisus, ad te pervenire desidero.

Magna valdè est misericordia tua, Domine, & in ea sola posita est spes, & consolatio mea.

Fateor, me gravissima peccata commisisse in te, liberalissime Domine: firmissimè tamen spero, quia proculdubio veniam indulgebis.

Quamvis ad horas singulas, in multas culpas deformiter labar, certè Christianam perfectionem, te juvante, assequar.

Etiam si libenter nimis graviora peccata perpetrarem, tu, mitissime JESU Christe, educeres me de lacu miseriae, & de luto faecis.

Misericordissime Domine, fac finem malis meis,

is, quibus ego nec finem, nec modum impono.

Fac mecum misericordiam, Domine mi, licet eam ego non merear! quia mereor potius mille infernos.

Sed quamvis reus essem omnium peccatorum mundi; tamen in te sperabo: major est enim misericordia tua, quàm iniquitas mea. Quis unquam speravit in te, & confusus est?

Quomodo potero diffidere, ô Bone JESU, de tua misericordia, dum recordor, quòd cum essem tuus inimicus, pro me mortuus es, & me D E O reconciliasti?

Si veniam offerebas, cùm eam non quærerem, modò cum eandem peto, libentiùs imperties?

Spero, spero, quòd & ego misericordias tuas in æternum cantabo.

Quamvis venirem in altitudinem maris; quamvis tempestas usquè in abyssum inferni mergeret me; tibi adhærebo, in te sperabo, ô Spes mea firmissima, DEUS meus!

Actus Spei vita eterna.

O JESU benignissime, qui venisti in hunc mundum, ut tuis meritis consequeremur vitam æternam: itaq; firmissimè spero me tandem ex auxilio tuo, & bonis operibus gratiã tuã præstitis, gloriã sempiternã fruiturum.

Spero certissimè, Domine JESU Christe, quòd cùm velis omnes salvos fieri, me quoq; salvabis, quem ad imaginem & similitudinem tuam, atq;

capa-

capacem æternæ beatitudinis creasti, & sanguine tuo pretioso redemisti.

Nullam omnino spem salutis æternæ, habeo nunc in vita, aut in morte meâ habere volo, præterquam in tuis meritis, in sacratissimis vulneribus, doloribusq; tuis, in tuo sanguine, tuâq; morte, & in tuis promissis.

In tuo dulcissimo Nomine, ô JESU, quod Salvatorem significat, firmam spem meæ salutis pono: igitur, ô JESU! sis mihi JESUS, dic animæ meæ: Salus tuâ ego sum.

O DEUS, in nomine tuo saluum me fac; pro-ut in te spero.

Si quidem, ô Domine, tam pretiosus fui in oculis tuis, ut pro me vitam poneret: spero, quod non ero ita vilis, & tam exilis pretii nunc, & in hora mortis, ut velis in me ferre sententiam æternæ damnationis.

O Svavissime JESU, gratulor mihi & exulto, quod per te solum possum beatus fieri. Neq; enim aliud nomen sub cælo datum est nobis, per quod salvi fiamus: unde nec placeret mihi beatitudo, nisi per te illam haberem: quandoquidem omnis spes mea, & fiducia in te posita est, eamquæ in te solo fixam ratamquæ volo.

Clementissime JESU, toto corde firmissi mē spero me à te, cum sis liberalissimus, consecuturum, & obtenturum omnia, quæcunq; mihi ad salutem necessaria fuerint.

Ac primò quidem veniam omnium peccatorum meorum,

meorum, quantumvis multorum & enormium, extinctionem vitiorum, mortificationem passionū, adeptionem virtutum, victoriam tentationum, ac intimam tecum familiaritatem & unionem: etiam vires ad superandas omnes difficultates, in hac vita occurrentes: tandem gratiam perveniendi, ad fruendum perpetuò felicissimo tuo aspectu.

Spero me, intercessione Beatissimæ Virginis *MARIÆ*, & Sanctorum Angelorum, Sancti *Joseph*, & Sanctæ Matris nostræ *Teressæ*, & omnium Sanctorum, gratiam tuam, Domine mi benignissime, à te consecuturum, quā tibi *DEO* meo placere, sanctē, & in gratia tua vivere, & mori valeam.

Quamquam cælum, terra, & omnes creaturæ contra me conjurarent, & ipse portis inferni appropinquare viderer: nihilominus, ô misericordissime *DEUS*, misericordiam tuam magnam expectabo: semper in te sperare volo, & confidere, dicendo: In te Domine speravi, non confundar in æternum. In Domino sperans non infirmabor.

Actus desiderii perfectionis.

O *JESU*, Magister & Doctor perfectionis, qui veniens in hunc mundum, exemplo tuo nos docuisti; pro quo exemplo sis infinites benedictus, quod ego semper sequi, & amplecti summo opere desidero.

Scio, Domine *JESU*, perfectionem esse finem & scopum status religiosi, ad quem quilibet Religiosus

giosus cuncta sua opera dirigere debet : itaque & ego omnes meas actiones, & cogitationes, omnia desideria & conatus, ad hunc finem ordinare volo.

O utinam hujus finis necessitatem, dignitatem, pulchritudinem bene perspectam, & clarè cognitam habeam : ut sciam illam magni aestimare, sedulò quærere, & aliquando, gratiâ tuâ Divinâ adjutus, comprehendere valeam.

Certè perfectio est tanti momenti, tanti pretii, tanti decoris, ut meritò vellem præponere illam regnis & sedibus : unde & divitias nihil esse duco in comparatione illius, nec comparo illi lapidem pretiosum: quoniam omne aurum, in comparatione illius, arena est exigua : & tanquam lutum aestimabitur argentum, in conspectu illius.

Perfectio, est illa pretiosa margarita, cujus negotiatores sunt Religiosi, qui omnes divitias & opes, omnes delicias & honores reliquerunt, ut hanc margaritam compararent : quia pretiosior est cunctis opibus : & omnia, quæ desiderantur, huic non valent comparari : propter hanc margaritam ad Religionem & ego veni. Sed ô quando obtinebo illam, prout multum desidero !

Perfectio, est thesaurus in agro status religiosi absconditus, quem qui invenit, præ gaudio illius vadit, & vendit universa, quæ habet, & emit agrum illum. Ecce, Domine mi, tuâ gratiâ, jam elegi statum religiosum, propter quem reliqui universa, quæ habui, & habere potui, & nondum hunc pretiosum perfectionis thesaurum possideo :

sed

sed abhinc ita quærere eum diligenter die nocteq;
propono, ut aliquando, ex tuo auxilio, illum
possideam.

Perfectio, est infinitus thesaurus hominibus,
quo qui usi sunt, participes facti sunt amicitiae
DEI: quia in hoc thesauro, DEUS infinitus inve-
nitur. Nam DEUS, charitas est; & perfectio ni-
hil est, nisi perfectio charitatis: ad hunc thesaurū
& ego aspiro, sicut, ad te DEUM meum. Inqui-
etum est enim cor meum, Domine, donec requi-
escat in te;

Perfectio, est regnum DEI: quia regnum DEI
illud dicitur per quod regnat in nobis; & nos Re-
ges verè sumus, si perfecti sumus: magno ergo ar-
dore ad hoc regnum tendere exopto, & vim mihi
inferre, ut illud capiam. Nam regnum DEI vim
patitur, & violenti rapiunt illud.

Quandoquidem perfectio consistit in charitate,
per quam unimur tibi DEO nostro, ut fini ultimo:
igitur te DEUM meum super omnia diligere vo-
lo, & proximum, propter te, sicut meipsum.

Sed quis, Domine, te perfectè diligit, nisi ille,
qui mandata tua servat: idem tecum vult & non
vult: qui de te semper cogitat, & loquitur: qui
nihil optat, nisi voluntatem tuam fieri in omni-
bus, & per omnia, & ab omnibus: & te, qui es
exemplar omnis perfectionis, imitatur. Sic, sic, &
ego te diligere propono & ejusmodi perfectionem
charitatis habere percipio.

Firmiter decerno vitare illa, quæ sunt contraria
chari-

charitatis perfectioni, ut sunt peccata gravia seu mortalia : etiam illa quæ minuunt charitatem, ut sunt peccata venialia : etiam illa, quæ impediunt, ne affectus noster in te DEUM nostrum totaliter feratur, ut sunt affectus erga res temporales, & inordinatæ passionēs.

Odio habeo, & abominor omnem tepiditatem, negligentiam, & socordiam, quæ est inimica perfectioni : & ideo fervorem & diligentiam in omnibus actibus meis adhibere statuo.

Semper proficere in bono incepto, in mortificatione mei ipsius, & studio virtutum conabor : immò singulis diebus, & horis dicam : Nunc cæpi : & utinam verè incipiam !

Curabo, quantum potero, nullum datâ operâ ; & deliberatâ mente defectum, & imperfectionem admittere, & omnes actiones meas modo perfectissimo peragere semper. cogitando, quod jam fortè est ultimum hoc opus meum, quo peracto, reddenda mihi est statim de eo ratio, in tuo iudicio, Domine DEUS meus.

Profitetur, Domine mi clementissime, ex vi vocationis meæ ad Religionem sanctam nostram Carmelitanam, me obligatum esse, tendere ad perfectionem, per exercitia vitæ Contemplativæ, & Activæ : hoc est, per exercitium orationis & mortificationis, atq; virtutum, per custodiam votorum meorum, per observantiam regularem, & omnium actuum communium ac particularium ab obedientia injunctorum : doleo, Domine DEUS meus, ex

amore tui, quia hucusq; non fui fidelis in his exercitiis: sed abhinc emendationem propono.

Dabo operam, ut in omnibus, & per omnia colligam illud, quod est perfectius: id est, quod existimavero magis bonum, & tibi Domino meo magis gratum, tuisq; actionibus sacratissimis, ac vitæ Sanctissimæ magis conforme, & meæ voluntati magis contrarium, meæq; sensualitati, & corpori meo magis durum & ignominiosum.

Quia nulla est compendiosior via, quâ ad perfectionem pervenitur, quàm per humilitatem: idcirco serio, & ex animo, hanc virtutem totâ vitâ colere volo, quam & tu, Domine JESU, tantopere nobis commendasti, dicens: Discite à me, quia mitis sum, & humilis corde.

O benignissime JESU, tu mandasti: Estote perfecti, sicut & Pater vester perfectus est. Da, Domine, quod jubes; nam finè te nihil possum. Ecce ego perfectus esse desidero; suscipe quæro, Domine, hoc desiderium meum, sicut incensum in conspectu tuo. Sacrificium hoc vespertinum & ferotinum obsecrationis meæ, ne despicias, pro infinita misericordia tua.

PRO FERIA SECUNDA.

Hac die possunt exerceri Actus.

Amoris proximi, Benignitatis, Zeli proximorum salutis, & æstherii amoris DEI.

Actus

Actus Amoris proximi.

O JESU amantissime, qui pedes discipulorū lavando, dedisti nobis exemplum humilitatis, & simul charitatis exhibendæ proximis; quod exemplum tuum secutus, volo semper charitatem proximis meis, in omni occasione, exhibere.

Amo omnes homines, propter te, DEUS meus, & in quantum sunt beatitudinis æternæ capaces, atq; ad imaginem tuam creati.

Quandoquidem, benignissime Domine DEUS meus, præcipis mihi, ut amem proximum meum, sicut me ipsum: ideo obediendo huic tuæ sanctissimæ voluntati, quantum possum, voluntatem meā ad ipsum amandum impellere conabor.

Cupio ipsum amare eo modo, prout tu vis, Domine DEUS meus, precorq; ipsi à te omne bonū, quo felicior, tibiq; gratior fiat.

Volo illi omnia vera bona; nempe justificationis donum, gratiam, virtutes, & omnem profectum, & gloriam.

Lætor de profectu spirituali proximorum, & de felicitate temporali: doleo de malis eorum, ac si mea forent: & mala quidem ab omnibus avertere, bona verò multiplicare efficaciter vellem, si possem.

Neminem temerè judicabo, neq; contempnam: immò cujusvis proximi actus omnes, in meliorem partem interpretari, & eum, juxta personæ qualitatem, magni ducere conabor.

Nolo obloqui alicui proximo meo, sed cum laude ejus defectus excusare, ac modeste dissimulare volo.

Rogo piissime Domine DEUS meus, dimitte proximis omnia sua peccata, & concede; ut arripiant remedia necessaria, ad vitam æternam consequendam. Quodsi noveris expedire, ut ego caream aliquo dono tuo, quod ipsis attribuas: ecce, Domine DEUS meus, nihil detrecto.

Magna me voluptate perfundit amor, quo illos prosequeris, & perfectio, quâ illos exornas, pro qua gratias tibi maximas habeo.

Quoties video, fratrem meum declinantem à via vitæ, conabor eum reducere, & pro hac reductione ipsius in viam salutis æternæ, omnes mundi divitias contemnerem, & morerer, si opus esset.

Quoties video aliquem proximum justum; gaudebo de tanto ipsius bono, & quod bene currit per viam Domini, teq; piissimum Dominum & Salvatorem nostrum orabo, ut concedas ipsi donum perseverantiæ, ut perveniat ad gloriam sibi præparatam.

Parco, Domine JESU, omnibus proximis meis, ut & tu parcere digneris mihi.

Misereor omnium, ut & tu miserearis mihi.

Trado me in obsequium, & in servum fratrum meorum, ut & tu inter fideles servos tuos, numerare me digneris.

Actus Benignitatis.

O Svavissime JESU, qui pedes Judæ traditoris tui lavan-

lavando, insignem benignitatem ei exhibuisti; quam & ego imitari, amoris tui causâ, firmissimè propono.

O Bone JESU, qui etiam erga inimicos tuos, & omnes peccatores suavissimus, clementissimus, & benignissimus semper fuisti, & es, quos benignè recipis, misericorditer foves, & tuis innumeris afficis beneficiis: itaq; & ego erga omnes proximos meos, etiam erga adversarios meos, & mihi non benè affectos, eo esse animo semper desidero, ut eis & vultum suavem ostendere, & beneficium, pro mea facultate, præstare valeam.

Absit à me, ut aliqua signa amaritudinis, aut malevolentiae, in necessitatibus proximorum meorum, etiam illorum, qui me aliquando læserunt, ostendam.

Quoties sese obtulerit occasio, subvenire necessitatibus, tam spiritualibus, quàm corporalibus proximorum meorum, nunquam illam patiar finè effectu transire. Itaq; quoties, & quando potero, volo ignorantes docere: peccantes opportunè & amanter corrigere: dubio aliquo hærentes, & quid facto opus sit in rebus, & negotiis occurrentibus nescientes consilio juvare: mæstos & afflictos, & tentationibus, aut adversitatibus pressos consolari: injurias patienter ferre: offensas promptè remittere: & pro persequentibus me, atq; aliis proximis orare.

Libenter etiam vellem, amore tui, ô clementissime JESU, si mihi facultas suppeteret, esurien-

tes pascere, sitientibus potum dare; hospites, ad-
venas & peregrinos hospitio recipere: vestibus
pauperum nuditatem operire; infirmos, & carcere
detentos visitare: captivos redimere: mortuos se-
pelire.

Nolo diligere fratres meos tantum verbo, sed
opere & veritate, opera charitatis erga illos exer-
cendo.

Argentum quidem, & aurum non est mihi,
quod dem proximis meis, ex benignitate mea er-
ga illos: sed ut tu, Domine DEUS meus, subve-
nias necessitatibus eorum, juxta beneplacitum tu-
um, pro eis tuam Divinam Bonitatem deprecor.

Si quid præstitero proximis meis, pro ipsorum
utilitate, id nunquam faciam, propter aliquam ja-
ctantiam, vel aliquod meum commodum, sed so-
lùm ob amorem, honoremq; tuum.

Quoties poterò obsequium aliquod exhibere
proximo, toties nullam opportunitatem, & occa-
sionem id faciendi prætermittam.

Profiteor, quòd nemini tantum beneficium pos-
sumus præstare, sicut animabus in Purgatorio de-
tentis, juvando illas orationibus, pænitentis, &
satisfactionibus nostris: ideo erga istas animas, me
benignum hac in parte ostendere conabor.

Actus Zeli proximorum salutis.

O Dulcissime Salvator, qui desiderando salu-
tem Judæ, ejus pedes lavare dignatus es,
ut ejusmodi obsequio tuo respuisset à malo
propo-

proposito: unde & ego simili modo, optando omnibus salutem, & procurando eandem, omne ipsis obsequium meum & laborem offero.

Utinam, clementissime DEUS, peccatores resipiscant, & requirant te!

Utinam omnes Hæretici, Schismatici, Infideles, Apostatae, & peccatores obstinati convertantur!

Utinam omnes homines te cognoscant, colant, diligant, & tibi uni serviant!

O si possem hoc efficere, ut nullus te offendat, & nullus pereat, libenter etiam vitam meam impenderem, & sanguinem profunderem!

Tabescere me facit Zelus salutis proximorum meorum.

Opto anathema esse à Christo, pro fratribus meis in Christo.

Desidero inferorum portas obturari ipso me, & per me, ne quisquam amplius in infernum, & damnationem æternam descendat.

Occlude, ô Bone JESU, si fieri potest, januas inferni, ut nemo eò descendat, ubi omnes te oderunt: aperi portas cæli, ut omnes eò conscendant, ubi omnes te diligunt.

Omnes orationes meas, lacrymas, pœnitentias, jejunia, vigiliæ, disciplinas, cunctas afflictiones corporis, & omnia bona opera totius vitæ meæ, unita meritis tuis, ô dilectissime JESU, pro lucrands animabus proximorum meorum libentissimè offero.

Omnia adversa undecunq; venerint, in unione

I4 tua

tuæ passionis, pro salute proximorum tolerare, & tibi, Domine DEUS meus, offerre volo, & sic iram tuam ab eis avertere, & impetrare eis tuam gratiam, illuminationem, justificationem, liberationem, confortationem, redemptionem, tuæq; Divinitatis æternam visionem & fruitionem.

Solicite præcavebo, ne ullo dicto, vel facto, alicui scandalum, vel peccandi occasionem præbeam: & quòd aliquando alios scandalizaverim, nunc summopere, ob amorem tuum, doleo.

Actus Desiderii amandi DEUM.

O Dilectissime JESU Christe, quem verum Filium DEI vivi esse credo, & confiteor, qui sic dilexisti nos homines, ut pro nobis factus homo, ad pedes discipulorum tuorum lavandos, te inclinare dignatus sis: an non meritò sic te amantem redamare debeo? sed quando istud fiet?

O quando diligam te Dominum DEUM meum toto corde, & tota mente, totâ animâ, & ex omnibus viribus meis?

Quando anima mea in omnibus viribus suis tibi unietur?

Quando anima mea totaliter, & perfecte in te mergetur, & absorbebitur?

O quando per omnia tibi placebo?

O quando gratum tibi ex puro amore obsequium semper præstabo?

Quando voluntatem tuam beneplacentem sollicitè

citè semper inquiram, veraciter agnoscam & amanter, fideliter, ac integrè perficiam?

Quando tui amore, sequar te quocunq; jers, & tuas virtutes perfectè imitabor?

Quando me totum tuo servitio impendam, & superimpendam?

Quando, tui amore, meipsum, & universum mundum contemnam?

Quando ex amore tibi serviam? & agam? & patiar quidquid volueris in tempore, & æternitate?

Quando, tui amore, meipsum prorsus abnegabo, proprium sensum, & voluntatem, vitioſaque desideria, & oblectamenta perfectè mortificabo?

Quando, tui amore, crucem omnem, quamcunquè inspiraveris, immiseris, aut permiseris, cum gaudio & gratitudine amplectar, & usquè in finem tolerabo?

Hæc sunt desideria mea, hæc vota, hæc suspiria: utinam, Domine JESU, in me, & à me quam perfectissimè adimpleantur, sicut ex intimo corde percipio!

Desidero Domine, & opto magis desiderare semper, ac magis amare te: atq; ideo, ut amare te magis possim, cupio dissolvi, & esse tecum, ubi perfectè amem te. Quia tamen adhuc manere me vis in corpore mortis hujus, volo & ego quamdiu sic tibi placeat.

Dulcissime Domine DEUS meus, à quo sunt sancta desideria, desidero habere desiderium amandi te tantum, quantum te amandi desiderium habuerunt,

buerunt, & habebunt omnes, qui tibi placuerunt, & placebunt, à primo homine Adam, usq; ad ultimum omnium mortalium tibi placentium.

Cupio, Domine DEUS meus, toto corde, pleno desiderio, sitienti animâ ad te suspirare, & in te dulcissimo ac suavissimo respirare, ac totum spiritum meum, & omnia interiora mea ad te, qui es vera beatitudo, anhelare.

Desidero, totum id quidquid amoris habent Seraphini omnes, & omnes dilecti ac electi tui, unâ cum Domino JESU Rege Regum, ac MARIA Virgine omnium electorum Regina. Et si hoc desiderium non habeo, habere illud desidero.

Fac me, dulcissime JESU Christe, amore & desiderio tui, deponere onus carnalium desideriorum, & terrenarum concupiscentiarum.

PRO FERIA TERTIA.

Hac die possunt exerceri Aëtus.

*Religionis, Pietatis, Devotionis, & Petitionis
Amoris DEI.*

Aëtus Religionis.

O Benignissime JESU, qui ut verus homo procidens in faciem, Patrem tuum æternū orasti, per quod debitum ei honorem & cultum Patriæ, ut DEO exhibuisti: cujus exemplo, & ego tibi, ut DEO vero cum Patre & Spiritu Sancto, cultum eundem reddere volo. Itaq; & nunc te adoro, glorifico, & superexalto, Latratuico cultu, tibi soli debito.

O Cle-

O Clementissime JESU, quem credo DEUM verum, genitum de DEO vero, profiteor, quòd propter singularem & infinitam excellentiam tuam, in omni genere perfectionis, ex qua tibi competit esse Principium, supremumq; omnium Dominum, debeatur tibi à creatura rationali, singularis cultus & honor, quo hanc tuam excellentiam, nostramq; subjectionem & perpetuam in omnibus, à te dependentiam protestetur: proinde & ego hunc singularissimum honorem & cultum Tibi DEO, & supremo Domino meo exhibere semper, & in æternum, omni temporis momento, ad singulas respiraciones, & corporis & animi motus firmissimè statuo.

O Dulcissime DEUS meus, ego te multum æstimo & appetio, atq; tam altè & excellenter de te sentio, & tam profundè me tibi submitto, quàm decet creaturam de suo Creatore sentire, & quàm debitum est vilissimum vermiculum infinitæ Majestati submitti: Cultum omnem, & abyssalem reverentiam tribuo tibi, quâ dignus es infinitæ Majestatis DEUS meus.

Domine DEUS meus, omnia illa; quæ ad cultum Divinum & obsequium tuum pertinent, cum omni promptitudine mentis, semper exequi statuo.

Ego ad te DEUM meum in omnibus necessitatibus meis recurrere volo: quia sinè te nihil sum, nihil possum, & nihil habeo, sed omnia à te: & ideo orationi diligenter incumbere conabor.

Ego me totum in sacrificium tuum offero: videlicet,

delicet, corpus, & animam, & omnes vires meas, sensusq; meos, & voluntatem meam, tanquam Creatori meo, & Principio beatitudinis nostræ.

Omnia vota, & proposita mea in honorem tuum aliquando à me facta, fideliter exequi curabo.

O Dulcissime amor mi JESU, quia tu es Principium omnium; propterea te, toto animo & corpore prostratus adoro: immò omnes omnium creaturarum affectus assumo, ijsq; te nunc colo, veneror, adoro, hancq; adorationem in æternum continuare desidero.

Adoro te, DEUS meus supreme Auctor animæ meæ, & piissime Redemptor, ac Protector salutis nostræ, in unione omnium adorationum, quæ tibi redduntur in cælo: & precor omnes cælestes beatos spiritus, maximè Sanctissimam Virginem Matrem tuam, ut suppleant impossibilitatis & ignorantiae meæ defectus.

O superamantissime JESU, ex affectu dulcissimæ Matris tuæ Virginis Mariæ, & omnium Sanctorum tuorum, ex mea, creaturarumq; omnium parte, ad gloriam tuam, meamq; & omnium salutem, per suavissimum Cor & Spiritum tuum, te cum Patre, & Spiritu Sancto, trinum & unum DEUM adoro, & reverenter glorifico, amo, tibi quæ pro omnibus, & singulis beneficiis tuis, quæ mihi, & proximis nostris impendis, gratias ago.

Actus Devotionis.

O Amantissime JESU, qui venisti in hunc mundum, ut faceres voluntatem æterni Patris tui,

&

& recessurus ex hoc mundo, voluntatem ejusdem Patris tui adimplere voluisti, quam adimplendo, promptissimè te morti in horro tradidisti, nobisque exemplum veræ devotionis dedisti: propterea & ego meam voluntatem promptissimā, ad faciendā tuam Sanctissimam voluntatem, & ad omnem famulatum tuum & obsequium, tibi, Domine JESU, offero.

Volo, Domine DEUS meus, promptissima voluntate tibi semper servire, tibiq; in omnibus obedire, & placere, tuaq; jussa, sive in prosperis, sive in adversis, fidelissimè exequi.

Devoveo me, quā possum devotissimè, omni voluntati tuæ, bonæ, beneplacitæ & perfectæ.

Fateor, quia devovere nihil aliud significat, nisi tradere se, & in obsequium alicujus se mancipare: idè sic me tibi, dulcissime JESU, devoveo, ut me in perpetuum obsequium tuum tradere, & mancipare velim.

Quæcunq; obsequia in tuum cultum & honorem fieri possunt ut jejunia, vigiliæ, genuflexiones, corporis afflictiones, sensuum & passionum mortificationes, visiorum extirpatio, virtutum exercitium, & omnis Oratio, cuncta hæc promptè exequi conabor.

Quamvis aliqua dura, & amara, atq; difficilia se se pro honore tuo, Domine mi perferenda obtulerint, hæc omnia libenter tolerabo.

Solicite vitabo, quæ veram devotionem impediunt: videlicet, curiositatem rerum, vel scientiā,
ad

ad honorem tuum, ad meam & proximorum salutem non pertinentium : sensuum, maximè visus & auditus, incontinentiam, negligentiam, acediam, inordinatam tristitiam, cæterasq; vitiosas passiones animum perturbantes, ut sic pura mente & tranquilla tibi adhæreā, & in te toto delectari studeam.

Ad omnia, quæ tibi placita sunt, perficienda, & quæ tibi displicent, fugienda, rationalem, & superiorem voluntatem meam promptam & paratam tibi, clementissime Domine-DEUS meus, offero, quantumvis sensualitas, & homo noster exterior recalcitret, & obmurmuret.

Etiam in summa ariditate, & devotionis sensibili subtractione, ex solo & puro amore tuo, firmissimè propono, facere omnia, quæ tu vis, & quæ tibi placent.

Quod si tibi Domino meo aliquando placuerit, infundere mihi sensibilem devotionem, alacritatem, & dulcem quandam affectionem erga omnia, quæ tibi sunt placita; da, ut eam humiliter de manu tua suscipiam, & eā cum timore utar, ad tuam gloriam, & juxta supremum beneplacitum tuum, cum plena resignatione, eā carendi quando, & quomodocunq; tibi placuerit: hoc solum à te requirens, ut à tua nuda & intima charitate, in qua verà devotio & prompta voluntas tibi serviendi consistit, me nunquam permittas separari.

Actus Pietatis in DEUM.

O Piissime JESU, qui sinceræ pietatis affectum in horto orando, erga DEUM Patrem tuum æternum

æternum ostendisti: itaq; & ego eundem DEUM
ut Patrem nostrum verum, omni devotissima pie-
tate semper prosequi decerno.

O sempiternæ DEUS, te verum Patrem nostrū
confiteor, & veneror: tibiq; omnem honorem de-
bitum, & amorem, & subjectionem, & submissio-
nem exhibere firmiter statuo.

Absit à me, ut mandata tua Patris mei, cæle-
stis, & DEI altissimi aliquando transgrediar, tibi
displiceam, & voluntatem tuam non adim-
pleam.

Dominè DEUS meus, verè tu es omnium cre-
aturarum Pater: quoniam es non solū esse, sed
& quandam similitudinem tuam impertiris, easq;
foves, & earum singularem providentiam habes,
eorumq; aspectu, quasi filiorum tenerrimè delecta-
ris. Et quia istæ creaturæ, ut rationis expertes, te
minimè agnoscunt: ideò ego te pro illis, ex totis
præcordiis laudo, & inter illas, me eadem benefi-
cia à te recepisse profiteor, & pro ijsdē gratias ago.

Iustè, Domine DEUS meus, semper dicere de-
beo: Abba, Pater, qui me ad imaginem & simili-
tudinem tuam creasti, & me capacem gratiæ tuæ
& gloriæ effecisti: te ergò solum Patrem agnosco,
amò, & omnibus præfero.

Laudo, & honorifico te Pater æternæ, qui
cū sis Dominus noster, nos autem mancipia tua
vilissima, Pater noster dici non refugis: immò &
Paternam erga nos providentiam habes, & ad hæ-
reditatem Filiorum admittis: fac semper immen-
sam

lam benignitatem tuam, ut veri Filii tui imitatione ac vitæ puritate fimus, & te, propter teipsū, amore filiorum perfectissimè diligamus.

Amans adoro, & revereor te, ô Pater superpi-
 issime, qui ab æterno Filium tuum generans, in
 eodem per Idæam nos quodammodo genuisti.

Qui es Parens patrum nostrorum.

Qui es animæ nostræ solus Creator, & corpo-
 ris nostri verus formator.

Qui credentes in nomine Filii tui adoptas in
 filios.

Qui diligentes te, hæredes tuos facis.

Qui plūs quàm Paterna pietate de nobis es
 semper sollicitus.

Qui filio prodigo ad te revertenti occurris,
 ipsumq; amplecteris, & oscularis, stolamq; pri-
 mam, annulum, & calceamenta ipsi restituis,
 ipsum reficis, gaudenq; cum eo epularis.

O Pater noster, qui habitas in cælis, veluti in
 throno gloriæ tuæ, sed alta à longe cognoscis, &
 nostra intima consideras: Da mihi, obsecro, quod
 jubes, ut amem te, & ambulem coram te, time-
 am quoq; te, non ut reus Judicem, sed ut filius
 Patrem: & studeam esse perfectus, sicut tu Pater
 meus perfectus es.

O Dilectissime Pater æterne DEUS, rogo te,
 per unigenitum Filium tuum Dominum nostrum
 JESUM Christum, qui homo factus admisit nos
 in fratres, & multos filios adoptivos, in gloriam
 æternam adduxit, ut me participem ejus gloriæ,
 quam ipse mihi promeruit, efficias

Peti-

Petitio Amoris DEI.

O Bone JESU, qui propter nimiam charitatem, quā dilexisti nos, ad mortem acerbissimam pro salute nostra subeundam, te in horto obtulisti: da, ut te tanto amore nos prosequentem verē semper amem, & nunquam in amore tuo deficiam.

O amor, qui semper ardes, & nunquam extingveris, accende me totum igne amoris tui.

Infunde, quæso, dilectissime JESU, cordi meo tui amoris affectum, ut te in omnibus & super omnia diligam semper. Nam perdit, quod vivit, si te DEUM non diligit.

O Charitas, DEUS meus, me in flamma igne tuo, reple suavitate & dulcedine tua, ut totus dulcedine amoris tui plenus, totus flammā tuæ charitatis succensus, diligam te DEUM meum ex toto corde meo, totisque medullis præcordiorum meorum.

Dulcissime JESU, quia tui valida est, ut mors dilectio; absorbeat, quæso, mentem meam ab omnibus, quæ sub cælo sunt, ignita & melliflua vis amoris tui, ut tibi soli inhæream, solāq; tuæ suavitatis memoriā pascam.

O Amantissime JESU, vulnera animam meam jaculo amoris tui: imple omnia desideria mea, ut nihil me extra te delectet, nihil afficiat: te solum in omni creatura diligam: ad te æstuantissimis desideriis semper anhelem, & castissimo amore, te solum omni momento cogitem.

O Speciosissime JESU, da mihi continuum amoris tui incendium : trahe me post te ; curram ad te, & non deficiam.

O Amabilissime JESU, fac me castissimo ardentissimoq; tui amore igniri, in te rapi, ac absorberi, ac omnium, quæ extra te sunt, oblivisci.

O Svavissime JESU, accende cor meum tam valido amoris tui incendio, ut ex toto corde meo, hoc est pleno desiderio, & perfecta voluntate diligam te, te solum in omnibus, & super omnia quæram.

Diligam te, Domine DEUS meus, ex tota anima mea, ut omnes sensus meos in te convertam, & tibi soli intendam.

Diligam te ex tota mente, ut intellectum, & memoriam meam in te solo, & ad gloriam tuam occupem; tibi quæ soli inhæream.

Diligam te, ex omnibus viribus meis, ut illas omnes, tam animæ, quàm corporis, in tui laudem, amorem, ac beneplacitum tuum impendam.

Accende, ô DEUS meus, vivam flammam beati amoris tui, in medio cordis mei.

Absorbeat me profundum tuæ Charitatis.

Demergar in abyssum maris tuæ indulgentissimæ Pietatis.

Peream in tui vivi amoris diluvio, sicut perit stilla maris in suæ plenitudinis profundo.

Moriar, moriar, in tuæ immensæ miserationis profluvio; sicut moritur scintilla ignis in fluminis impetu validissimo.

Ibi,

Ibi, ibi, amittam vitam meam in te, ubi tu vivis in æternum, ô amor meus DEUS vitæ meæ!

O summa bonitas! da mihi summum amorem mihi possibilem, ut toto illo, te summè amabilem amem.

Deberem sanè infinito amore te prosequi, quia infinitè bonus es, sed quia incapax infiniti amoris sum, opto saltem te amare, summo conatu mihi possibili.

Heu me, quia non diligo te, vita animæ meæ! nam si verè te diligerem, semper te in corde haberem: scriptum est enim: Ubi est thesaurus tuus, ibi est cor tuum.

Ardeat semper ignis amoris tui in altari cordis mei, & in tantum crescat incendium, ut non solum sacrificium, sed & ipsum altare comburat, & consumet.

PRO FERIA QUARTA.

Hac die possunt exerceri Actus.

Magnanimitatis, Recte Intentionis, Perseverantiæ, & Amoris DEI.

Actus Magnanimitatis.

O Magnanime JESU, qui in illa crudeli Flagellatione tua, multos heroicos, & excellentissimos actus virtutum, videlicet, Charitatis, Humilitatis, Obedientiæ, Patientiæ, Mansuetudinis, Modestiæ & aliarum ostendisti: ego quoq; ob amorem tuum, nolo esse contentus

Ka quibus

quibuscunq; actibus virtutum; sed ad eminentissimos, & heroicos aspirare, & contendere semper conabor.

Magno, & virili animo, absq; ulla pusillanimitate, vel diffidentia aggredi, & amplecti, quæcunq; tibi placita fuerint, firmissimè decerno.

Cupio Apostolicas virtutes comparare.

Cupio magna, & constanti fide in te credere.

Magna de te sperare: & magnificè in te confidere.

Continuè, ardentè, & summè te desiderare & amare.

Desidero obedire tibi, & tuis, propter te, heroicè in rebus etiam difficillimis.

Opto magna, pro tui amore, dimittere: omnia visibilia contemnere; omnibus propter te, renuntiare.

Desidero magna, propter te, operari, & pati.

Despicio, altissime Domine, omnes mundi honores, & fastus calco, ut supra mundum extollar ad te.

Utinam, potentissime DEUS, universam mundi claritatem, & famā nunc haberem, non ut possiderem, sed ut relinquerem propter te!

Opto, Domine, Job patientiam assequi.

Utinam te amore Pauli diligerem!

Utinam me, sicut Magdalenam, peccatorum meorum pæniteret!

Certè clementissime DEUS, daturus sum operam, ut Angelico more in terris vivam.

Conabor, Domine, occasionem pro te Martyrium subeundi perquirere.

Volo

Volo quoscunq; Sanctos,, in omni mortificationis genere, & pœnitentia, & in cultu heroicarum virtutum imitari; nec desistere, donec ipsis in his virtutibus sim æqualis: vel donec supremum gradum in illis attingam.

Quoties quid arduum in cultu virtutum occurreret, ego, dulcissime DEUS, me offeram pugnaturum pro te.

Abfit à me, Domine, ut amore vitæ, vel timore mortis, à virtutis proposito desistam.

Abfit à me, ut animum despondeam à Christiana perfectione comparanda: omnes enim difficultates, te duce, me superaturum spero.

Volo heroico exemplo S.M.N. Terefiæ, quidquid est perfectius semper facere.

In mandatis tuis excellenter exercebor, & considerabo vias tuas: in justificationibus tuis intensissimo corde meditabor: non obliviscar sermones tuos, quos servare, & quam perfectissime adimplere volo.

Actus rectæ Intentionis.

O Piissime JESU, qui in tuis maximis tormentis, quæ pertulisti, quando dirissime flagellis cæsus fuisti, elevans oculos tuos ad cælum, omnes cruciatus, plagas, & dolores tuos Patri tuo æterno, in honorem, & gloriam ipsius obtulisti: itaq; & ego, quidquid totâ vitâ meâ, fecero, cogitavero, locutus fuero, totum id in honorem, & gloriam tuam offero.

Credo certissimè & confiteor, quia tu DEUS Optimus Maximus es Finis supremus, perfectissimus, & super omnia intendendus, & quærendus. Tu enim in te continens, & superinfinite, ac super eminenter, superexcedis omne aliud bonum, quod possit desiderari, & intendi: Igitur da, ut sciam, velim, & possim, purè propter te, & ex tui amore, omnia desiderare, quærere, petere, agere, dimittere, pati, vel refugere, nihil attendendo ad meum commodum procurandum, vel damnum vitandum.

Volo, & per te propono, te in omnibus, & ante omnia purè intendere; nullumq; opus internum aut externum aggredi, nisi propter amorem, & beneplacitum tuum: videlicet, ut tibi, propter te ipsum (quia es superdignissimus, & quia vis, & sicut vis) ex puro amore tui, exhibeam gratissimum obsequium, non autem propter meum commodum, & bonum, quod inde mihi provenire posset.

Serviat tibi, Domine DEUS meus, & ad infinities, infinities, infinities, majorem gloriam honoremq; tuum cedat, quidquid ago, quidquid loquor, quidquid cogito: & quidquid totâ vitâ meâ agam, loquar, & cogitabo: omne opus meum à te incipiat, & in te finiatur.

Utinam, benignissime DEUS meus, omnia, quæ cogitavi, quæ sum locutus, & operatus, ex puro tui amore semper fuissent, sicut jam in posterum desidero!

Utinam

Utinam possim, DEUS meus hoc momento, & quoad vixero, omnibus momentis facere aliquid, quod summè tibi placet!

Si quando comedere, dormire, videre, confabulari, deambulare, & omnia alia necessaria oblectamenta sumere voluero cuncta hæc propter te, secundum te, hoc est, quia tu vis, & sicut vis, facere volo.

Tibi, Domine mi, hoc corpus meum nutrio: tibi hanc vitam conservo: largire mihi vires, ut soli serviam tibi.

Omne quodcunq; fecero, in verbo, aut in opere, omnia in nomine tuo, Domine JESU Christe, facere decerno.

Si scirem me annihilandum, aut æternis flammis justo tuo judicio deputandum, adhuc tibi omni studio servirem, & placere in omnibus vellem. Non enim servire tibi volo propter me, meumq; commodum, sed propter te, amorem, honoremquè tuum.

Actus Perseverantiæ.

O Patientissime JESU, qui tormenta illa, in quibus fuisti, in flagellatione tua, tamdiu perseveranter tolerasti quam diu tortores tui volebant: cujus imitatione, & ego in omnibus laboribus, & quibuscunq; tribulationibus, afflictionibus, & adversitatibus, propter te, perferendis usq; ad articulum mortis, seu quamdiu tibi Domino meo placuerit, perseverabo.

Quacūq; ratione duriore me tractare volueris in hac vita; tamen semper immotus ad fidem in tuo servitio perdurabo.

Etiam si mihi videaris minimè benignum vultum exhibere tuum; nihilominus erit mihi semper ille amabilis: & ideò à te nunquam me avertere, nunquam recedere volo.

Dulcissime IESU, quis me separabit à Charitate tua, & ab incepto famulatu tuo, & à bonis propositis & desideriis meis? confido in misericordia tua, quòd neq; mors, neq; tribulatio, neq; angustia, nec periculum, nec persecutio, neq; gladius, neq; creatura aliqua me unquam separabit.

Clementissime DEUS, firmissimè statuo, me usq; ad mortem tibi famulaturum.

Fidelissime Domine, si per annos mille in hac vita molestissima laborandum esset, à proposito tibi vacandi non desisterem.

Misericordissime DEUS absit à me, ut ob ullam adversitatem consilium mutem.

Potius, amantissime Domine, uri me finam, quàm ab instituto desistam.

Et si oporteret, benignissime DEUS, universis mundi miseriis obrui, nunquam de alio statu cogitarem.

Utinam desideratissime Domine moriar potius, quàm à te recedam!

Mihi certè adhærere tibi, Domine, bonum est, propterea perenniter adhærebo.

Actus

Ætus Amoris DEI.

Quam immensa fuit charitas tua benignissime JESU! qui nudus ad columnam alligari, & dirissime propter scelera mea flagellari voluisti: itaq; & ego charitatis vinculis tibi alligari volo: nec unquam à te avelli patiar, licet deberem dirissimis flagellis, propter te, cædi.

Amabilissime JESU, utinam vero, & perpetuo amplexu cordis constringere te merear!

Utinam cor meum, perfectissima ardentissima, fidelissima & perpetua charitate te semper colat, sitiat, quærat, & diligat!

Amo te DEUS meus, magisque semper amare cupio: quia tu es revera omni melle dulcior, & omni luce clarius! idcirco super omne aurum, & argentum, & lapidem pretiosum es mihi carior.

Optatissimum bonum meum, absit, ut aliquid amem præter te.

Dulcissime DEUS, oro te, ut cordis mei principatum geras.

Amantissime Domine, sacrifico tibi præcordia mea.

Speciosissime supra omnem mundi pulchritudinem, ure me incendio decoris tui.

Serenissime Princeps cordis mei, trahe me post te.

Nolo, Rex formâ præstantissime, aliam hæreditatem, nisi te.

Discedant à me, splendor illustrissime animæ meæ, affectus omnes peregrini, ut totis visceribus requiram te.

Vive,

Vive, potentissime Imperator cordis mei, & dominare sicut decet te.

Sede excelsissime Domine, in æterna sede Majestatis tuæ.

Benè est, opulentissime DEUS viscerum meorum, ut sis felicissimus intra te.

Placet mihi certè sempiternæ Rex, ut regnes in æternum, & ultra.

Utinam, purissime splendor cordis mei, possem subdere tibi, omnia corda filiorum Adæ ut requirerent solam pulchritudinem tuam!

Utinam innumera millia cordium, quotquot tibi placuere, vel placere possunt, ipse possiderem, ut immensis tui desideriis æstuarem!

Amo te, DEUS meus; quia DEUS es. Amo te, æternitas mea; quia æternus es. Amo te, immensitas mea; quia immensus es.

In amoris signum, gratulor tibi DEUS meus Divinitatem tuam, Simplicitatem tuam, Æternitatem tuam, omnesq; tuas perfectiones, quæ ita sunt in te, ut idem sint, quod tu.

Diligam te, Domine, pro dono tuo, & pro modo meo, exiguo quidem, & minùs justo; sed non possum ultra quàm possum: potero autem plùs, cum plùs donare dignaberis, nunquam tamen prout dignus haberis.

Ad te summum bonum, toto cordis affectu feror; in immensa bonitate tua exulto: gaudeo quòd omnes Angeli, & Sancti ament, adorent & laudent, amabunt, adorabunt, & laudabunt te in æternum.

Utinam,

Utinam, favissime JESU, eâ flammâ arderem amoris tui, quâ ardent Seraphim, quâ ardet Virgo Mater tua Sanctissima, quâ ardes tu!

O si possem ab omnium cordibus amorem, qui non est tuus, avellere, & tuum inferere, ut amore tuo omnes arderent, & langverent!

Quâm pœnitet me, quòd alia extra te dilexi!
O si possem, DEUS meus, transactos revocare annos meos, & peractæ ætatis spatia amoris tui ardentissimi actibus infinitis replere!

Reple, DEUS meus, animam meam amore tuo; ut amore totus ardeam, & amore æstuans, amore tuo moriar.

PRO FERIA QUINTA.

Hac die exerceri possunt Actus.

*Fiduciæ, Resignationis, Longanimitatis, &
Actus ad Cor Piissimum JESU.*

Actus Fiduciæ.

O Amantissime JESU, quem credo esse verum DEUM & hominem perfectum, qui, ut verus homo, in summis doloribus tuis, quos habuisti in crudeli coronatione, & passione tua fiduciam in DEO habuisti, te non deferendum ab eo: sic & ego exemplo tuo, licet aliquando multis laboribus, tribulationibus, tam internis, quàm externis pressus fuero, in tuo auxilio mihi præsentissimo semper sperabo.

Si consistant adversum me castra inferni, non timebit

timebit cor meum: si exurgat adversum me praelium hostium animæ meæ, ego in te sperabo: quia tu es Dominus illuminatio mea, quem igitur timebo? tu es, fidelis protector vitæ meæ, à quo trepidabo?

O dulcissime DEUS, qui Daniele de lacu leonum, Josephum de carcere, Nòè de diluvio, tres pueros Hæbreos de camino ignis ardentis eripuisti: confido & ego, quòd & me ex omnibus necessitatibus, & periculis liberabis.

Habeo pro certo, Domine DEUS meus, quòd vita mea si in probatione fuerit, coronabitur; ut me rectus servus tuus B. Job certum reddit

Firmissimè spero, quòd orationes meas, si quando justum & expediens postulabunt, tu benignissime Domine exaudies.

Domine DEUS meus, si aliquando auxilium distuleris nunquam desperabo; sed viriliter agam, & sustinebo te Dominum meum.

O misericordissime DEUS, qui es amicus noster, & nos verè diligis, cum magna fiducia audebo semper postulare à te, quidquid mihi opus erit; videlicet, ut sanctè & perfectè vivam; & tibi virtutum possessione placeam; & procul dubio nihil mihi denegabis.

O Dilectissime JESU, dum te video in cruce pendentem, & caput tuum inclinatum ad osculandum, brachia extensa ad amplexandum, manus perforatas ad largiendum, latus apertum ad diligendum, totius corporis extensionem ad se totum impen-

impendendum, rapitur anima mea ad spem firmissimam, & ad fiduciam impetrandi omnia, à tua infinita clementia.

Dulcissime Domine DEUS meus, cum optimè noverim, in te ritè speranti auxilium gratiæ tuæ nunquam defuturum; idcirco tibi fiducialissimè semper adhærebo.

Tibi in universis meis necessitatibus & anxietatibus simpliciter semper confidere volo: quia tu solus fortitudo, vita mea, salus mea es in æternū.

O JESU, quomodo tibi hanc injuriam irroga-
bo, ut de te diffidam? absit à me tantum scelus,
dulcissime JESU, immò verò in te omnem spem,
& fiduciam meam reponam, teq; cum Propheta
his verbis alloquar; Tu es refugium meum à tri-
bulatione, quæ circumdedit me. Tu eruisti ani-
mam meam, ut non periret: projecisti post ter-
gum tuum omnia peccata mea.

Actus. Resignationis

O Dulcissime JESU, qui in acerbissima Co-
ronatione & Passione tua, resignatus fuisti
in omnem voluntatem Patris æterni: sic
& ergo imitatione tui, resigno me totum sanctis-
simæ voluntati tuæ, quæ mihi in omnibus, nunc
& æternaliter charior est potestate, quæcunque
vellem eligendi.

Piissime DEUS, vitam & voluntatem meam in
manus tuas configno.

Operare in me, Domine, & utere me, pro tuo
beneplacito, in tempore, & æternitate. Fide-

Fidelissime Domine DEUS meus, sicut ab æterno, & priusquam ego essem, mecum agere decrevisti: ita, quæso, age, non juxta meam, sed secundum acceptissimam mihi voluntatem tuam.

Fiat, Domine, in me, & de me, non quod ego volo, sed quod tu vis, & quod honori tuo magis congruit.

Domine, si tibi videtur, ut caream hac vel illa gratiâ, ego pro tua voluntate, eâ carere potius volo, quàm ex propria possidere.

Domine DEUS meus, si in tui vergeret laudem ut post obitum meum annis quinquaginta flammis purgatorii cruciarer, illico sub pedes tuos me abicerem, & in tui honorem, pœnas illas animo paratissimo exciperem.

Fac, Domine, de anima & corpore meo, de amicis & de rebus meis, deque cunctis negotiis, quod tibi placitum est, nunc & in ævum sempiternum.

Da mihi, DEUS meus, quidquid vis, quando vis, & quantum vis.

Paratum cor meum, DEUS, ad amandum & dimittendum, ad agendum & patiendum, non juxta meam, sed tuam voluntatem.

Paratus sum ad tolerandum, per gratiam tuam, pro gloria nominis tui, quamlibet ignominiam & injuriam, quemlibet mei contemptum, quodlibet opprobrium, quamlibet tribulationem, quemlibet dolorem.

Paratus sum carere quavis consolatione sensibili;

bili; & non recuso vivere, ô Amabilissime JESU, si ita velis, in eadem paupertate & afflictione, in qua tu vixisti.

Resigno me, Domine, ita integrè voluntati tuæ sanctissimæ, sicut aliquis unquam fecit homo, aut facere debuit.

Desideratissime Domine JESU Christe, ego ex hac hora, & deinceps in omne ævum, nihil unquam aliter, aut plùs, vel minùs, in corpore & anima mea, in vita, & morte, in habendo, carendo, patiando, & agendo, ac dimittendo, volo, atquè appeto, quàm tibi gratissimum est.

Ecce in manu tua sum, sicut scis, & vis, sic fac mecum, Domine.

Domine DEUS meus, nullum locum ad habitandum in hoc vel illo Conventu mihi volo eligere, neq; hoc vel illud ministerium, vel occupationem: sed prout de me obedientia disposuerit, omne ministerium, licet meæ sensualitati repugnans fuerit, acceptabo.

Domine DEUS meus, etiamsi velles in perpetuum in inferno me collocare, ad sustinendas illas acerbissimas pœnas dummodò à tua gratia non excidam, paratus sum pro gloria tua id perferre.

O Domine, in manibus tuis sortes meæ, vita & mors mea in manibus tuis, salva, damna, prout placet; & quod cum tua majori gloria est, facias, etiamsi sit cum mea pœna.

Nolo ire in cælum, mi JESU, si tu non vis; eligo potius infernum, si tibi ita complacuit; illū

tamen nollem habere in pœnam meorum peccatorum, sed in præmium mei erga te amoris.

O si totius vitæ meæ omnes dies præteritos, omnes horas & momenta, juxta tuam voluntatem & beneplacitum impendissem!

O Dulcissime DEUS animæ meæ, restituo me tibi, totumq; trado; ut de me disponas in tempore & æternitate, prout tibi placet.

Dispone, Domine, de me liberè ut de tuo proprio jumento, pro gloria tua, & Sanctissimæ Virginis Matris tuæ, Dominae meæ, honore.

Actus Longanimitatis.

Patientissime JESU, qui per longum tempus, cruciatus coronæ spinæ propter nos sustinisti: ita & ego amore tui, si per longum tempus, injurias, molestias corporis, & animæ afflictiones sustinere me oportebit, æquo animo hæc omnia tolerabo, ac firma spe solatium diu dilatum, à te Domino meo sperabo.

Quamvis per multos dies, menses, & annos omnia mala mihi sustinenda erunt; nihilominus ego expectabo Dominum, viriliter agam, & confortabitur cor meum, & sustinebo te Dominum.

Omnes persecutiones injurias, afflictiones, & quæcunq; alia mala usq; ad mortem si oportuerit me tolerare, patientissime, propter te Dominum meum, tolerabo.

Mentis ariditates, consolationum Divinarum subtractiones, & te DEUM meum te abscondentem,

tem, & quasi in mediis fluctibus, quibus submergimur, dormientem, animo quieto sustinebo.

Si hæc, quæ dixi, supervenerint mihi; nunquam tamen in rebus consolationem, quærere, nunquam à studio sanctæ orationis separari, nunquam in exercitio virtutis tepescere conabor.

In quacunq; gratiæ subtractione, illam mentem induere volo, quam habebat S. Job, quando dicebat: Etiam si occiderit me, in ipso sperabo. Verumtamen vias meas in conspectu ejus arguam, & ipse erit Salvator meus.

O Salvator noster, si tu longissimo tempore non morantes, & tuis obedire mandatis detrectantes expectas, & nostram ingratitude, segnitiam, ac stultitiam, mirabili longanimitate supportas; quare ego vilis homuncio, & inutilis servus, te Dominum meum non expectabo? quare à te sapientissimo Magistro longo tempore adversa tolerare non discam? quare tibi fidelissimo Patri omnia prospicienti, & levare cupienti non fidam?

O DEUS Sanctissime quàm magnam longanimitatem erga nos ostendis! quando nos ad te vocas, pulsas ad cor nostrum inspirationibus tuis, invitas præmiis, provocas aliorum exemplis, & diu nos expectas, ut aliquando respondeamus vocationi nostræ.

Unde & ego discam ex te sustinere te, quando vocatus statim non aderis: sed illud præcipuè contendam, ut tuæ longanimitati gratus existam, &

ea malè non utar, sed in ea patientiam, ad vitæ meæ puritatem exercebo.

Bonus es Domine, sperantibus in te & animæ quærenti te: proinde & ego in te semper sperabo, & sustinebo, ac præstolabor, & sedulo, puro, ac sincero corde quæram te.

Domine, si tu vis, ut nullum solatium percipiam à te in hac vita, & ego id volo: hoc tantummodò solatium sit meum, ut tua Sanctissima voluntas adimpleatur in me. Præterea pati & contemni pro te desidero; sed ad hæc patientiam, & veram humilitatem à te posulo.

Actus ad Cor piissimum Domini JESU.

O Dulcissime JESU, qui portans spineam coronam productus à Pilato in conspectum Judæorum, audiens illas crudeles voces: Tolle, Tolle: Crucifige eum: benedictum Cor tuum graviter illis vocibus vulneratum habuisti: vulnera, quæso, cor meum, ignito jaculo amoris tui, ut te ex toto corde meo diligam, te intendā, te quæram in omnibus, & super omnia.

O Cor nobilissimum, piissimum, atque suavissimum fidelissimi Amatoris mei JESU Christi, DEI & Domini mei, trane atq; absorbe, quæso, cor meum, omnes cogitatus ac affectus meos, omnes deniq; vires animæ & corporis mei, & quidquid in me est, quicquid sum, aut possum in te, ad gloriam & sanctissimum beneplacitum tuum.

O Misericordissime Domine JESU Christe, tibi
meipsum

meipsum totum in cor tuum commendo, atque resigno. Benignissime JESU, aufer à me cor meum pravam, impium ac ingratum; & da mihi Deificum cor tuum; aut fac cor meum secundum cor tuum, & secundum perfectissimum beneplacitum tuum.

Domine DEUS, Salvator, & Redemptor meus, infunde mihi ex Sanctissimo Corde tuo, quidquid tibi placet: & aufer à me omnia peccata mea, & quidquid tibi displicet in me.

Dilectissime JESU, fac, ut uniatur cor meum Cordi tuo, voluntas mea voluntati tuæ, ut nunquam aliud velim, nunquam aliter velle possim, quàm quæ tu vis, & tibi placent.

O JESU, include me in medio Cordis tui, ut ibi permaneam in æternum.

Largire mihi, ô JESU, Cor tuum, & assume tibi meum. Utinam cor meum, dulcissime JESU, jugi incendio amoris tui in te conflatur, ut omnis amor alius peregrinus in me extingvatur.

Commoda mihi, Domine JESU, Cor tuum & amorem tuum, ut amore amoris tui amem te in æternum.

O Piissime JESU, me totum in anima & corpore trahe, intra vulnus Sanctissimi Lateris tui, & juxta Cor tuum me colloca, ut sim ab omnibus hostibus meis securus!

Benignissime JESU, sit benedictum piissimum Cor tuum lanceâ in cruce transfixum, & amore amoris nostri vulneratum, pro cunctis miserationi-

Laus tua, Deus, bus,

bus, ac beneficiis ad nos inde manantibus: tibi sit laus, honor, gloria, & gratiarum actio à me, & à singulis creaturis tuis, pro tua immensa erga nos charitate, fac ut diligam te ex toto corde meo, atq; ut placeam inhæreamq; tibi totus perpetuò, & inaverrubiler. Ah Domine DEUS meus, utinam ego sim verè totus tuus, & tu totus meus!

PRO FERIA SEXTA.

Hac die possunt exerceri Aëtus.

Recta voluntatis, Vigilantiæ, Zeli honoris DEI, & Desiderii patiendi pro Christo.

Aëtus Rectæ Voluntatis.

O Rectissime JESU, qui cum esses semper ejusdem voluntatis, cum voluntate æterni Patris tui, semper fuisti rectæ voluntatis: & ideò quia Pater æternus voluit te in cruce pro salute generis humani mori, & tu hoc idem voluisti: itaq; & ego, ut habeam semper rectam voluntatem, volo semper tecum esse ejusdem voluntatis.

Abfit à me, Domine, ut ego aliquid aliud aliquando velim, præter id, quod tu vis.

Dilectissime JESU, opto ut omne meum velle, facere, dicere, non sit aliud, quàm quod voluntas tua Sanctissima & rectissima vult me velle, facere, dicere: & meum non velle, non facere, non dicere, sit itidem tuum non velle, tuum non facere, tuum non dicere; fiatq; purè solùm quando, quomodo, quantum tibi placet à me fieri, non aliter.

Succen-

Succensus igne amoris tui. Dulcissime JESU, summè desidero, tuam beneplacentem, perfectam voluntatem semper & in omnibus intelligere, amare, & perficere; & cum eam perfecero, summè gaudere, ex eo, quòd tuo desiderio satisfeci, & gratum tibi obsequium, quo es superdignissimus, exhibui: Cum autem eam fuero transgressus vehementer dolere, ex eo quòd te offendi, nec gratum tibi obsequium, quo dignus eras, præstiti.

Domine DEUS meus, ante omnes actiones meas elevabo cor meum ad te dicens: Domine, quid me vis facere; jube quod vis; & da velle quod jubes. Doce me facere voluntatem tuam; quia DEUS meus es tu.

Volo Domine, & ad hoc auxilium tuum ex voluntate mea deliberata à te peto, facere, & pati omnem voluntatem tuam omni modo possibili.

Clementissime Pater, sicut tu ab omni æternitate voluisti, antequam ego essem, ita per me, & in me fiat. Charior enim est mihi tua gratissima voluntas, quàm operandi libertas.

Quod tuus infinitus amor, nunc & in omni æternitate à me, & quibuscunq; aliis, factum esse vellet, id ego totum, nunc & in omni æternitate, ob amorem, honoremq; tuum, facere vellem.

O Svavissime DEUS, de omni voluntatis tuæ impletione, summè gaudeo, & exulto.

O jucundissima vita mea, desidero, ut nihil jam præter gratissimam voluntatem tuam, nihil præter te vivat in me.

O utinam quàm ocyùs ita per tuam Sanctissimam voluntatem, & amorem tuum, sim unum tecum, ut possim dicere: Vivo ego, jam non ego, vivit verò in me Christus.

Fac, Domine JESU, ut signum, & perpetui amoris tui exercitium in me, sit voluntatis meae cum tua consensio, & cordis mei cum tuo velut conjunctio.

Adeò placet mihi tua voluntas Divina, ut si nossem velle tuum esse ut in aeternum torquerer in inferno, memetipsum statim spontè in illas flamas præcipitarem, solummodò ut tuae Divinae satisfacerem voluntati: dummodò gratiae tuae, & amoris tui expers non essem.

Ab hoc momento usq; ad mortem, DEUS meus, hæc erit meditatio mea, Sanctissima voluntas tua, ut eam intelligam: hæc cura & studium meum, ut eam faciam: hæc vita mea, ut sine ea vivere non valeam: quoniam cibus meus est facere voluntatem tuam, quo deficiente, deficere necesse est vitam meam.

Actus Vigilantie.

O Vigilantissime JESU, qui diligenter observasti à sæculo à Patre aeterno designatum tempus, ad operandum salutem nostram in medio terræ, & ad mortem pro nobis subeundam: proinde & ego, exemplo tuo, semper invigilabo, ad faciendum ea debito tempore, quæcunq; volueris à me fieri, pro honore & gloria tua.

Firmissi-

Firmissimè statuo,, Domine DEUS meus, ex amore tui, opportuno, & convenienti temporis puncto, & momento, omnia peragere opera obligationis, devotionis, regularis observantiæ, & tuæ sanctissimæ voluntatis.

Excusiam omnem somnolentiam & teporem in iis, ad quæ vocatus sum; videlicet, in mortificandis sensibus, passionibus, & amore proprio, in vitiis extirpandis, in cultu virtutum, & in exercitio Orationis.

Scio tempus breve esse: igitur non patiar dies vitæ meæ, immò neq; horas & momenta, sine fructu præterire: verùm dum tempus habeo, operari bonum conabor.

Quæram primum regnum DEI, & iustitiam ejus: postmodum vitæ hujus necessaria.

Etiam in minimis statuo esse fidelis, ad quæ implenda, facienda, & servanda invigilabo.

Domine, quinq; talenta tradidisti mihi: itaque vigilantem negotiari, & diligenter operari volo, ut alia quinq; valeam superlucrari: non ut me excludas ab æterno gaudio tuo: sed ut per hoc placeam tibi, tuam sanctissimam voluntatem faciendo.

Volò, Domine JESU, fidelissimè servare mandatum illud tuum, quod nobis dedisti, dicens: Vigilate; quia nescitis diem neq; horam. Et iterum: Vigilate; quia nescitis, quâ horâ Dominus vester venturus sit.

Igitur vigilaro semper, ut custodiam legem tuam & mandata tua. Vigilaro ad omnes inspirati-

ones tuas, quinimò ad minimum nutum voluntatis tuæ Divinæ, ut ei obediam.

Vigilabo super sensus meos, illos custodiendo ab omni vanitate, ne in vana & inania se effundant: ab omni superfluitate, ne inutilia percipiant: ab omni otiositate, ne in rebus nihili tempus terant.

Vigilabo super cogitationes meas, ut tantummodò utiles & necessarias, ad tuum honorem & gloriam, & animæ meæ salutem, admittam: jam verò inanes & otiosas effugiam.

Vigilabo super verba mea, ne in illis quidquam sit, quod proximum offendat, aut quod tibi minùs gratum appareat.

Vigilabo super cor meum, ut nihil desideret, quod à limitibus virtutis exorbitet.

Vigilabo super opera mea, ne scilicet malum faciam, & ut bonū benè, & diligenter perficiam.

Vigilabo super bona proposita mea, ut ea fideliter exequar, & adimpleam.

Vigilabo ad quævis, quamvis dura & difficillima, à Superioribus & Vicariis tuis imperata, & injuncta perficienda.

Vigilabo, ut non tantum gravibus, verum etiam ut ne levissimis peccatis, voluntate deliberata tuam infinitam bonitatem offendam.

Etiā cum aliquando dormiero, volo ut cor meum ad te, per amorem, vigilet: & cum è somno evigilavero, ad te cor meum semper elevare propono.

Abfit

Abſit à me Domine, ut corde dormiam & corpore vigilem: quemadmodum faciunt illi, qui torpent in ſpiritualibus, ſolliciti nimium de terrenis & temporalibus.

O Bone JESU, qui dixiſti Apoſtoliſ ſomno gravatiſ: Non potuiſtiſ unâ horâ vigilare mecum. Fac ut poſſim ſemper tecum vigilare tum orando, tum benè operando, quod tu viſ, & juſ.

Utinam ſim, benigniſſime JESU, ſicut deſidero, & te rogo, de numero illorum fidelium fervorum tuorum, quos tu laudas: Beati ſunt ſervi illi, quos cùm venerit Dominus, invenerit vigilantes, laborantes, benè operantes, non otiantes.

Actus Zeli honoris DEI.

O Dilectiſſime JESU, qui tanto fervore, honorem Patris tui æterni ſitiviſti ut pro reſarciendo illo contemptu, quem primi Parentes noſtri in Paradifo, per prævaricationem mandati ejus, ipſi fecerunt, mortem ſubire in cruce acerbiffimam, ignominioſiſſimam volueriſ: igitur & ego, imitatione tui, & exemplo, zelo ferventiſſimo ſemper quaeram honorem DEI.

O ſuperamandiſſime DEUS, amo te ſuper omnia tibi omne bonum potiùs, quàm mihi appeto, cupio & faveo: tuumq; cultum Divinum, & tui beneplaciti impletionem, totis viribus procurare volo, & per te, propono.

De tuo honore, & omni bono tuo, & pleno dominio, ac beatitudine, ac voluntatiſ tuæ impleti-
one,

one, magis gaudeo, tibiq; congratulor, quàm de quocunq; bono meo.

O Dilectissime DEUS, doleo ex toto corde propter amorem tuum, quòd huc usq; non talem, ac tantum honorem tuæ Divinæ Majestati exhibui, prout debui; sed abhinc emendationē propono.

Mori millies, ac occidi crudeliter sum paratus, quàm aliquid contra honorem tuum committere.

Utinam te DEUM meum tanta laude, honore, & amore prosequi possem, quo te Sancti, & Angeli omnes immò & ipsa Beatissima Virgo MARIA, ac Sacratissima Humanitas tua prosequuntur; & cum id non possim, tu desiderium hoc meum acceptare digneris.

Volo, & desidero, & millies, ac millies opto, tetisq; viribus procurare, per te, propono, ut omnes ac singulæ creaturæ rationales te cognoscant, adorent, glorificent, & ament, atquè honore debito prosequantur.

O si possem pro tuo honore & gloria, vitam & sanguinem profunderè, ac perferre universa Martyria, quæ Sancti Martyres pertulerunt; ac omnes labores ac curas subire, quas alii pro tuo promovendo cultu subierunt.

Ecce me ad hæc omnia offero, confidens in tua bonitate, quod hanc voluntatem meam non despicias, qui tantum industriæ in promovendo honore tuo collocare statuo, quantum sufficere vires nostræ tuâ gratiâ Divinâ adjuræ, possunt.

Semper alacriter, pro tua gloria, Domine DEUS

US meus, laborare volo, & ex hac alacritate, fervidè & perseveranter ad labores perferendos proficere decerno. Præterea, tanti facio honorem & gloriam tuam, ut eligam potius manere in inferno, & pati omnia tormenta, quàm ut tu vel unico momento priveris tuo honore; cùm tibi omnes honores debeantur, mihi autem omnes pœnæ & anxietates; & ne defrauderis tuo debito honore, veniant obsecro, super me omnia opprobria, anxietates, & miseriæ.

Et si hoc non sufficiat ad te honorandum, veniant super me omnia mala animæ & corporis absquè peccato, eaq; talia & tanta, qualia & quanta tu scis posse inveniri, sive in inferno, sive in terreno hoc mundo, sive in purgatorio, & si quæ fieri possunt iis adhuc majora, gravioraq;: Sed tu interim, ô amor meus, ne obliviscaris mei, sed des mihi gratiam & fortitudinem ad sustinendum illa, sicut ego libenter, pro amore & honore tuo, paratus sum illa acceptare.

Actus Desiderii patiendi pro Christo.

O Patientissime JESU, qui dignatus es pro me ligari, conpui, alapis percuti, colaphis cædi, flagellari, spinis coronari, & variis modis affligi, atq; multa acerbissima tormēta pati: deniq; morte crudelissima in Cruce mori, quæ omnia amore mei sustinuisti. Quid igitur & ego faciam tibi? ô bonitas immensa! ô misericordia infinita! ô dulcis amator hominum! an non meritò
&

& ego, amore tui, pati, & affligi, & morte acerbissima, mori desiderare debeam?

Tu DEUS, tu Rex, & Dominus, passus es mei amore tanta pro me; pro me! an hoc capio, & credo, & sentio?

Sensit hoc Orbis & ingemuit: sensit terra & contremuit: & ego non sentiam? Verè si hoc parum sentio, parum te amo, omni amore dignissimum.

Ecce paratum cor meum DEUS, paratum cor meum, ire extra castra, & improperium tuum portare, ferre crucem tuam, & sequi te.

O invictissime Vir dolorum, & sciens infirmitatem! ecce cor meum tibi, ad tolerandū probra, injurias, & omnia mala, in corpore & anima.

Omnes, per quos hoc mihi miseris, tanquam amabilissima vasa gratiæ tuæ amabo, beneficiis rependere curabo, & tibi laudes & gratias referre.

Omni consolatione indignissimus, nullam quæram consolationem, de nulla creatura querar, non me multa pati cuipiam indicabo, nisi ubi tua voluntas fuerit. Quæ enim mihi flagella injusta, qui infernum promerui?

Non reputo, ô JESU, non reputo quidquam majus, quo te glorificare debeam, quàm si cum gaudio durissima & asperrima quæq; pro te patiar.

O Amor meus crucifixus, si non licet mihi in cælis assistere tibi in gloria; liceat mihi in terris pondere crucis onusto, sequi tua vestigia.

Non tot, ô fortitudo & vita mea! non tot patiar,

patiar, quin plura pati optem, pro amore tuo.

Ignis, crux, bestiae, confractio ossium, & totius corporis contritio, & cuncta tormenta diaboli veniant in me, tantummodò te Christo Domino meo fruar.

Nullum, ô vita jucundissima cordis mei, nullum laborem, molestiam, difficultatem, persecutionem, pro te, & pro justitia, recusabo.

Per infamiam & bonam famam, per adversa & prospera, à dextris & à sinistris propter magnum amorem tuum, dimicabo.

O utinam, qui cum sanctis tuis te aeternum amare & laudare volo; etiam nunc cum illis fortiter pugnem, & magna operer, propter te usque ad mortem!

Utinam exemplo Martyrum dura pro te patiar; & constantiam Confessorum perseveranter adhæream tibi, donec venias & assumes me ad te ipsum!

Infirmus sum, fateor, & dura horreo: sed pone me, ô fortissime JESU, juxta te, & cujusvis manus pugnet contra me, nihil timebo, nihil detestabo.

Nihil me posse sine te scio; sed in te, & propter te, transgrediar murum.

Pudet me ignaviae meae antiquae; sed ex nunc ego imbecillis servus tuus, opto, maximos quoque sanctos in patiando, & faciendo omnia, propter te, imitari amore tui.

PRO DIE SABBATI.

Hac die possunt exerceri Actus.

*Simplicitatis, Gratitude Præsentia DEI,
Petitionis Amoris DEI à Virgine
Sanctissima.*

Actus Simplitatis.

O Purissima Virgo, quæ mortis & passionis dilectissimi Filii tui tempore, nullam simulationem in doloribus tuis ostendisti: quia nec majores, nec minores te habere, quam in rei veritate essent, indicasti, servans in omnibus decetissimam simplicitatem, in cujus simplicitatis exemplo, te imitari, firmissimè propono.

O Dulcissime JESU, sicut tua dilectissima Mater Virgo MARIA, talem se exterius verbis & factis exhibuit semper, qualis interius fuit: sic & ego, ob amorem honoremq; tuum, & ipsius, me semper gerere, totius vitæ decursu volo.

Servavit, Benignissime JESU, tua dulcissima Mater Virgo MARIA simplicitatem vitæ, operum suorum, & intentionis: servavit in conversatione, in vestitu, in incessu, & in sermone; ita & ego servare conabor.

Absit à me, ut aliquam virtutem, sanctitatem vitæ, & bonitatem, quam non habeo, fictam ostendam.

Vitabo semper omnem hypocrisim, simulationem, duplicitatem, & multiplicitatem, quæ tibi displicet;

displicet; & amplectar simplicitatem, quæ tibi placet: Nam cum simplicibus est sermocinatio tua.

Fugiam semper astutiam, fraudem, & dolum: verum cum simplicitate, sinceritate, & veritate, cum omnibus proximis agam.

Si de rebus sublimibus, & difficillimis, vel aliis, quarum ignarus sum, loquendum mihi erit aliquando, sincerè meum defectum, & ignorantiam meam in his fatebor.

Semper de te Domino meo, & de servis tuis, in bonitate, seu simplicitate sentire, & coram aliis loqui statuo.

O Bone JESU, tu docuisti nos dicens: Si oculus tuus simplex fuerit, totum corpus tuum lucidum erit: hoc est, si recta & bona intentio tua, in quocunq; opere tuo fuerit, totum opus tuum bonum erit: idcò hanc tuam salutarem doctrinam semper tenebo; ac in omnibus operibus meis hoc unum intendam, videlicet, gloriam, honorem, & beneplacitum tuum.

Scio, Domine, quia tibi placent, qui ambulant coram te in simplicitate cordis, seu rectâ intentione, in omnibus quærendo tibi placere, & proximum non lædere, nec eum per simulationem decipere: sic Domine DEUS meus, sic & ego ambulare coram te volo, ut tibi placeam.

Opto, Domine, de numero esse parvulorum: hoc est, simplicium & humilium, quos tu benignè recipis, ut olim dixisti: Sinite parvulos venire ad me; talium enim est regnum cælorum. Rogo, ut

me quoque in regnum cælorum, cum his parvulis recipias, in quo cum omnibus Sanctis tuis te laudare & amare in æternum desidero.

Actus Gratitude.

O Dulcissima Virgo, quæ sciens, quia fecit tibi Dominus magna qui potens est, semper eum laudasti, benedixisti, magnificasti, sæpius ac sæpius dicens: Deo gratias: Deo gratias: quibus verbis tuam singularem erga DEUM, summum Benefactorem tuum, gratitudinem manifestabas: itaque & ego tuum exemplum secutus, semper Domino DEO gratias agam, pro magnis beneficiis, ab eo mihi collatis, ut sic ei debitum gratitudinis persolvam.

O utinam, benignissime JESU, ita devotum erga te habeam gratitudinis affectum, pro tuis in me maximis beneficiis, sicut Beatissima Virgo MARIA vivens in terris habuit.

O Dilectissime JESU, ex affectu ipsius sanctissimæ DEI genitricis Virginis Mariæ, & omnium Beatorum Angelorum, & Sanctorum, habeo tibi gratiam, pro immensis tum naturalibus, tum supernaturalibus bonis, quibus me semper cumulas.

Misericordissime Domine, pro beneficio creationis, conservationis, redemptionis, justificationis, præservationis, pro auxiliis tuis, inspirationibus, & cunctis beneficiis reddo tibi, Domine, cor meum: offero viscera mea: sacrifico tibi in hostiam laudis præcordia mea: te in me, & me in te,

JESU

JESU mi charissime, in holocaustum laudis tibi offero.

Immo ô DEUS meus, misericordia mea, per-
solve pro me tibi-metipsi pro omnibus bonis tuis,
quæ fecisti, facis, & facturus es mihi, laudes æ-
ternas immensas, quales tu potes, laudans te in
te, in me, & pro me.

Laudet te omnium misericordiarum tuarum
immensum pondus.

Jubilet tibi pro me gloriosissimæ Virginis Ma-
tris MARIE dignissimum Cor, & Anima, admi-
rabile tabernaculum gloriæ tuæ.

JESU bone, laudo te, & quidquid minus est
in me, rogo, ut suppleas pro me. JESU bone,
amo te, & quidquid minus est in me, rogo, ut
cordis tui amorem DEO Patri offeras pro me.

Utinam amabilissime DEUS universa Angelo-
rum & Sanctorum, & quotquot in universo mun-
do tibi placent, Filii præsertim tui unigeniti, ac
Matris ejus possiderem corda, quæ tibi gratissimo
affectu consecrarem.

Quo pacto possum, dulcissime Domine, JESUM
Christum Redemptorem meum, ac Beatissimam
Virginem MARIAM, & omnes Angelorum Hie-
rarchias, & Beatorum reliquorum, justorumquæ
animas, quas rogo mihi ad gratitudinem sociari,
tibi pro beneficiis reddo.

Actus Præsentie DEI.

O MARIA DEI genitrix Virgo, quæ omnium
tormentorum, dolorum, & passionis unigeniti

M

Filii

Filii tui Domini nostri JESU Christi, nunquam immemor fuisti; sed hæc omnia præsentissima præ oculis mentis tuæ habuisti; & cui semper DEUS dilectissimus præ oculis in corde præsentissimus fuit: curabo & ego, exemplo tuo, universa illa, quæ pro nobis passus est JESUS Christus Dominus noster Filius tuus, in memoria perenni habere, de iis cogitare, pro his omnibus gratias agere: curabo & DEI præsentiam semper in corde & anima fovere.

Credo, Domine DEUS meus, te mihi semper & ubiq; esse præsentissimum, intentissimum, & ad succurrendum promptissimum: ideò volo, propter te, & per te, firmiter propono, te DEUM omnipotentem, & supremum Dominum, cum profunda, intima, ac humillima submissione adorare, re-vereri, meq; totum tibi subijcere.

Volo, atq; decerno, ô Pater mi Cælestis superpiissime, ob venerandam præsentiam tuam, filiali & casto timore te timere, & sollicitè in omnibus præcavere, ne in aliquo te offendam, & beneplacentem voluntatem tuam, omissione aliqua, vel commissione transgrediar.

Præterea, memor præsentiae tuæ Divinæ, volo, & per te propono, te in omnibus, & ante omnia purè intendere: nullumq; opus internum, aut externum aggredi, nisi propter amorem & beneplacitum tuum.

Tecum dulcissime DEUS meus semper commorabor, qui mihi es præsentissimus: de te cogitabo:

tabo: nihil extra te quæram: nihil desiderabo. Tu in quo omnia, sis mihi omnia, & supra omnia, DEUS cordis mei, & pars mea DEUS in æternū.

Largire quæso, Domine, ut in omni loco & tempore, te præsentem sentiam, te diligam, & quod acceptum tibi sit faciam.

O Domine, scribe quæso, in tabulis cordis mei dulcem tui memoriam, nulla unquam oblivione delendam. Scribe voluntatem tuam, & justificationes tuas, ut te immensæ dulcedinis Dominum, & præcepta tua, semper & ubiquè habeam præ oculis meis.

Adhæreat, Domine DEUS meus, lingua mea faucibus meis, si non meminero tui, in principio lætitiæ meæ & sermonis mei: oblivioni detur dextera mea, ne quid ei prosperè deinde eveniat, si oblitus fuero tui.

Si dederò somnum oculis meis, & palpebris meis dormitationē, sinè te dulcissima & unica requie mea; & requiem temporibus meis, donec faciam locum tibi in corde meo, vertatur somnus meus in pœnam oculis meis.

Auferatur prius, ô dilecte cordis mei DEUS mens, lumen ab oculis meis, & anima à corpore meo, quàm tu à corde, & præcordiis meis.

Nomen tuum, & memoriale tuum, Domine mi, in desiderio animæ meæ. Anima mea desideravit te in nocte: sed & spiritu meo de mane vigilabo ad te.

Veni gaudium spiritus mei in me: videam te

Ma

lætitia

lætitia cordis mei. Ecce memor fui DEI mei,
& delectatus sum.

Petitio amoris DEI à Virgine Sanctissima.

O DEI amantissima Virgo DEI genitrix MARIA, quæ sicut ipsa ferventissimi amoris DEI ignibus semper æstuabas; ita, ut hoc idem, omnes creaturæ rationales facerent, ardentissimè desiderabas: ecce ego nunc idem à te postulo, ut mihi id impetrare velis, ut DEUM meum, Creatorem meum, Patrem meum, super omnia diligam semper.

O Virgo superbenedicta, cujus anima tota semper ferebatur in DEUM, Divini amoris vulnere sauciata clamans: Dilectus meus mihi, & ego illi: effice, ut animæ meæ quoquē solus DEUS sit semper dilectus.

O Virgo Sanctissima, cujus Filius speciosus formâ præ filiis hominum, cujus specie & pulchritudine, oculorum mentis & corporis intuitus tuus mirum in modum semper oblectabatur, excitans in te summum erga eum amorem: fac, ut hanc speciem & pulchritudinem Filii tui, tota mentis intentione contempler semper, dicens: Ecce tu pulcher es, dilecte mi, & decorus, quem amo ex totis visceribus cordis mei.

O Ardentissima Virgo, quam velut ignis ferrū Spiritus Sanctus totam decoxit, incanduit, & ignivit; ita, ut in te Spiritus S. flamma tantum videretur, nec sentiatur, nisi tantum ignis amoris DEI:
supplex

supplex rogo intercede pro me, ut idem Spiritus Sanctus ignem sui amoris accendat in corde meo, ut ardeat semper, & nunquam per aliquod peccatum extingvatur.

O Vigilantissima Virgo, cujus cor vigilabat, dum tuum corpus dormiebat; vigilabat autem ideò, quia cor, mentemq; tuam semper urebat DEI amor. Ita enim per diem mens tua sanctissimis meditationibus, affectibus, & amoribus DEI se occupabat, ut dormiens eosdem iteraret.

O si & ego, per tuam intercessionem ita amem DEUM meum semper, quantum volo, quantum debeo, ut ipse solus sit sola intentio, & omnis meditatio mea; ut ipsum solum m. diter sinè cessatione in die: ipsum solum sentiam per soporem in nocte: ut dicere possim: Ego dormio, & cor meum vigilat ad te DEUS meus.

O Beatissima Virgo MARIA & Mater DEI, utinam exemplo tuo & modo, solum DEUM præ omnibus desiderem, quæram, & amem, & nihil amplius, illiq; soli in omnibus placeam! Adjuva me in hoc desiderio meo, Domina mea clemētissima.

O Dilectissima Virgo, cujus totus vitæ cursus, perpetua quædam fuit fax Divinæ dilectionis inextincta: succende quoq; in corde meo hanc faciem continui amoris DEI, & præsta, ut semper concremet viscera mea.

O Dulcissima Virgo, quæ Divino amore semper exardescens, & tantum ignem intra te retinere non valens, dicebas: Fulcite me floribus; quia

amore langveo: hoc est, quia præ amoris magnitudine penè morior: tribue mihi frigescenti vel modicam scintillam, de igne immenso erga DEUM amoris tui, ut langveat semper præ amore DEI anima mea.

O Piissima Virgo, rogo te per dilectionem, quâ diligis Filium tuum, ut sicut diligis & diligis vis eum: ita mihi impetres, ut verè diligam eum.

Sentio me debilem ad diligendum Filium tuum, cum tam ardenti charitate, ut deberem: ideo rogo te, Mater Misericordiæ, ut ligare digneris charitatem ejus super cor meum: & attrahe illud ad Filium tuum, toto conatu separatum ab omni dilectione carnali.

Fac, ô mater mea dulcissima, ut dilectissimi Filii tui, timorem, pariter & amorem semper in corde meo habeam, atque me in tua & ejus dilectione morientem, in viam salvationis & salutis dirige.

Oro te, Domina mea, per fervorem quo anima tua in DEUM, velut scintilla in ignem suum revolavit, ejusque Divino cordi adhæsit, ut etiam

anima mea tam ferventi amore succendatur, ut in hora mortis, ab omni impedimen-

to libera, feliciter in DEUM

valeat evolare.



ALIA

ALIA EXERCITIA VIÆ UNITIVÆ

Et Actus, ad Viam unitivam propriè pertinentes,

Videlicet :

Actus Amoris DEI, Gaudii, Laudis, Gratiarum
actionis, & Desiderii videndi DEUM.

PRO DIE DOMINICO

*Actus Amoris erga Sanctissimam
TRINITATEM.*

O Sanctissima, & individua Trinitas, unus
DEUS, credo te trinum in personis, &
unum in essentia, DEUM, & Dominum
universorum, Creatorem, & Conservatorem, &
Remuneratorem nostrum, Patrem, & Filium, &
Spiritus Sanctum.

Credo tibi, tanquam infallibili veritati; & ideò
credo vera esse omnia, quæcunque à te revelata
credit Sancta Mater Ecclesia.

Credo in te, amando te, & omnia in honorem,
amorem, tuumq; beneplacitum dirigendo.

Spero Domine te, & à te; confido in te, & in
tua misericordia, in auxiliis, & promissis tuis, &
in meritis Christi.

Amo te, DEUS meus, summum bonum super
omnia: amo te amore, fervore, & zelo omni
possibilitate ignitæ charitatis.

Amo me ipsum propter te: amo omnem homi-

nem, etiam inimicum, ingratum, inutilem, & ignotum, sicut meipsum propter te.

Amo omnem creaturam in te, & pro omni creatura amo te.

Omnes omnium creaturarum substantias, potentias, efficacias, actus, affectus, circumstantias bonas mihi, ô Sanctissima Trinitas, approprio, atque assumo, & meipsum unum cum illis, quoad fas efficio: atque ita me cum omnibus, & omnes mecum pro me, & pro omnibus, in tuum omnimodum amorem, honoremque sacrifico.

Omnibus poris, corporis mei, omni capacitate mea, utramque substantiam meam, quam à te, Sanctissima Trinitas DEUS meus, habeo, in te, & in amorem tui, ignitissime concremo, atque holocaustifico: ad omnem quidem gustum tuum, sed nominatim ad supplendas omnes meas, & omnis creaturae omissiones, imperfectionesque in te glorificando commissas, ut quantum ex me, sit tibi DEO meo, laus plenissima, charitas perfectissima, exaltatio omnimoda, ab omni creatura, & à me, semel pro semper.

Sanctissima Trinitas, DEUS omnium, & meus naturalis Dominus, supernaturalisque finis, te agnosco, amo, desidero, laudo, adoro, tibi obedio, te timeo, veneror, dignifico, & exalto super omnia, dignitati; tuæ me devoveo, ac devotum facio, quia verè dignissimus, & ipsa dignitas es, & quia ego omni ratione servus, mancipium, jumentumque sum tuum.

Quod

Quod totum facio affectu tuo, affectu Sanctissimæ Verbi æterni JESU Christi Humanitatis; affectu gloriosissimæ Virginis Mariæ Matris DEI: affectu omnium beatorum spirituum: affectu omnium Sanctorum & Sanctarum: affectu omnium deniquè Creaturarum.

Amo te DEUS meus, & vellem te amare atq; laudare, ipso corde JESU DEI & Hominis. Per illum te amo, per illum te laudo, ideo, quia amas sic à nobis amari, atq; laudari.

Utinam possem te infinitè ipso Spiritu tuo diligere: sed quia id non possum, da mihi Spiritum Sanctum tuum, amoris veri Magistrum unicum & optimum. Quia enim tu DEUS dilexisti nos, ut à nobis diligereris, Spiritum Sanctum dedisti nobis, ut per eum charitatem tuam, in cordibus nostris effunderes, ut anima nostra tibi vicem rependeret in amore.

Da igitur, ut amem te vicissim DEUS meus, à quo video me amari, & quem stupeo tanto amore circa me occupari, quasi omnium aliarum creaturarum sis oblitus. Fac ut obliviscat, tui amore, omnium creaturarum, quæ me à te amando posunt abducere.

Cum tu DEUS meus, animam amas meam, tunc æternitas ipsa me amat, immensitas amat: necesse est ergo animam meam te DEUM immensè & æternaliter reamare, si debet in te DEO perfecte quiescere.

O Sanctissima Trinitas DEUS meus, da, ut è
converso

converso amoris tuo, cum omnibus viribus meis, penitus me immergam, nunc velut in amoris perfecti tyrocinio, postea plenè in cælo; ubi implebo illud tuum beatissimum dilectionis præceptum, quod in hac vita impossibile est undequaquæ implere.

Actus Admirationis.

O Beata Trinitas, te unum in substantia, Trinitatem in Personis confiteor.

Te semper idem esse, vivere & intelligere profiteor.

Te DEUM verum, unum in Trinitate, & Trinitatem in unitate adoro & laudo.

O Domine DEUS noster, quàm admirabile est nomen tuum in universa terra?

Magnus es Domine & laudabilis nimis, & magnitudinis tuæ non est finis.

Generatio & generatio laudabit opera tua, & potentiam tuam pronuntiabunt.

Magnificentiam gloriæ sanctitatis tuæ loquentur, & mirabilia tua narrabunt.

Et virtutem tuorum mirabilium dicent, & magnitudinem tuam narrabunt.

Memoriam abundantiae suavitatis tuæ cruetabunt, & iustitia tua exultabunt.

O Domine DEUS meus verè magnificus es vehementer.

O Pelagus omnis essentiae & existentiae! Tu es ipsummet Esse continens omne esse, à te omnia pendent & effluunt, & in te resluunt, & eatenus sunt,

Via Unitiva. 137

sunt, quatenus aliquid tui esse participant.

Quàm immensa & incomprehensibilis est perfectio tua, Domine, cui nihil deest, & à quo omnia perfectionem accipiunt!

Confitebor ergo tibi, Domine, quia terribiliter magnificatus es.

Mirabilia opera tua, & anima mea cognoscit ea.

Tui enim sunt Coeli, & tua est terra, orbem terræ, & plenitudinem ejus tu fundasti Aquilonem, & mare tu creasti.

Tu fundasti terram super stabilitatem suam, non inclinabitur in sæculum sæculi.

Tuus est dies, & tua est nox: tu fabricatus es auroram, & solem, & ordinatione tua perseverat dies, quoniam omnia serviunt tibi.

Sed quis vestigia tua comprehendet? excelsior cælo es, quid faciam? profundior inferno, & unde cognoscam? longior terra mensura tua, & latior mari?

Qui extendis Aquilonem super vacuum, & appendis terram super nihilum.

Qui ligas aquas in nubibus suis, ut erumpant pariter deorsum.

Qui tenes vultum solii tui, & expandis super illud nebulam suam.

Terminum circumdedisti aquis, usq; dum finiantur lux & tenebræ, columnæ cæli contremiscunt, & pavent ad nutum tuum.

In fortitudine tua maria congregata sunt, & prudentia tua percussit superbum.

Spiri-

Spiritus tuus ornavit cœlos, & obstetricante manu tua, eductus est coluber tortuosus.

Ecce hæc, ex parte, dicta sunt viarum tuarū, & cum vix parvam stillam sermonis tui audierimus, quis poterit tonitru magnitudinis tuæ intueri?

Verè mirabilis es, Domine, in te ipso, mirabilis in operibus tuis. Tu facis mirabilia magna solus.

Utinam intellectus meus, rerum novarum & mirabilium indagator, te solum consideret!

Utinam nihil admirer, nisi te unum!

Quidquid hic mortale sese ingerit oculis meis, contemno illud, præter te, vita mea DEUS.

Tu enim sapientissimus es, & attingis à fine ad finem fortiter, & omnia in numero, pondere, & mensura disponis, & tribus digitis appendis molem terræ.

Tu omnium Artifex, ô æterna Sapiencia! tua igitur consilia, tuam viam sequar, & non ambulabo in tenebris. Tu enim mihi lux es: tu illuminator meus; tu revelas profunda: tu deniq; diligis omnia quæ sunt, & nihil odisti eorū, quæ fecisti.

Quomodo igitur non diligam te DEUS meus fortitudo mea? quando sponsabis me tibi in justitia, & iudicio, & misericordia?

Utinam magne DEUS Zelotes, DEUS æmulator, nullius alterius rei amor occupet cor meum, sed toto corde tibi adhæream, & in pace in idipsum (quoniam tu princeps es & auctor pacis) dormiam & requiescam.

Actus

O DEUS meus, & omnia, summè gaudeo, & congratulor tibi, quòd solus tu es, qui es.

Gaudeo de omni bono tuo, quod es, quod habes, & operaris, & de pleno dominio, ac beatitudine, deq; tuo honore, & voluntatis tuæ implementatione; & semper magis gaudere volo, & per te, propono, quàm de quocunq; bono meo.

Gaudeo de tuis infinitis perfectionibus, & attributis Divinis, & de illis communicationibus, quas vos tres Divinæ Personæ inter vos habetis.

Si per impossibile ego haberem, quod tu non haberes, hoc tibi libentissimè darem: immò si possem esse DEUS, nollem tantummodò ideò, ut tu solus esses is, qui es.

Immò quamvis nihil esse deberem, ut tu esses, amore tui, vellem illud nihil esse inter omnia, ut hoc saltem momento, amarem te, ut debeo, supra me, & super omnia.

In summo, tuum esse, tuam gloriam, tuam beatitudinem, tuum omne bonum in te ipso, & propter te ipsum, tibi cupio & opto.

Te super omnia appetio, præeligo, appeto & quæro; paratus cæteris omnibus, propter te abrenuntiare, quotiescunq; & quomodocunq; volueris.

Et quia tu es omnia in omnibus: in quo supereminenter sunt omnia, & qui es infinitè super omnia excellens: ideò te solum in omnibus, & omnia in te solo, & propter te solum, teq; super omnia amo & amplector, & sic semper amare volo.

Tuum

Tuum quoq; honorem, & tui beneplaciti impletionem, magis quàm quodlibet bonum meum, amo, appeto, & totis viribus procurare volo, & per te, propono.

Cum igitur tibi, quod me cupere vis, & do tibi; quod quia quantum ex me, minutulum est, peto, ut tu expleas, saties, fagines te, amore, honore, laudēq; tui tantum, quantum capax es, quantum dignus es, quantum potens es.

Actus Desiderii videndi DEUM.

O Superbenedicta Trinitas DEUS meus, in cujus visione consistit perennis nostra beatitudo, felicitas, & vita æterna: quando veniet hoc tempus videndi te?

Nam ad tuæ Divinitatis claram visionem, & continuam laudem, perfectamq; dilectionem & fruitionem: ac æternam & securam possessionem, absorptionem, transformationem, & inseparabilem unionem; quia vis, & sicut vis, tandem pervenire volo, cupio, & in te confidenter expecto: atq; ad hoc tendere, & conari semper totis viribus, & convenientibus mediis, ac studiis te donāte, & operante, propono.

Idq; non propter meum bonum & commodū, quod inde mihi provenit, sed purè propter te: ut sic gratissimum tibi, & perfectissimum obsequium exhibeam, & gaudium tuum in me sit, & sicut vis, impleatur.

Sed quando veniam, & apparebo ante rutilantē, & gratiosam faciem tuam?

Quan-

Quando Divini vultus tui præsentia, plenè satiabis desiderium meum?

O Amor cordis mei DEUS meus! quando perfectè possidebo te?

Quando adjunges me tibi viciniùs, ut clarè videam te?

Quemadmodum desiderat cervus ad fontes aquarum? ita desiderat anima mea ad te videndum DEUM meum.

Anima mea sicut terra sinè aqua tibi: sitit ad te DEUM fontem vivum, quando inebriabis eam incessabili amore tuo?

Cœli enarrate gloriam DEI: Cœli cœlorum laudate DEUM.

O quando aperiemini mihi, & inveniam eum, quem diligit anima mea?

O Angeli, qui semper videtis faciem Patris mei, quando veniam, & satiabor cum apparuerit gloria ejus?

Attollite portas Principes vestras, & elevamini portæ æternales, ut gustem, & videam, quàm suavis sit Dominus.

Da mihi, Domine, ardentissimum hîc moriendi, & ibi in amoris æterni patria, tecum vivendi desiderium, ut ibi coram, anima mea glorificata amet te: ut gaudium tuum in me sit: gaudium autem tuum est amare & amari: & tunc amore tui, saturetur famelica hæc anima mea, ita gaudio tuo illi unita, ut ipsa in hoc gaudio, & gaudium hoc in ipsa sit; & ejus gaudium sic impleatur,
cum

cum tibi DEO, te illamque amanti, & amato, ita unita fuerit, ut se in illa felicissima unione amare sentiat & amari.

PRO FERIA SECUNDA.

Aëlus Amoris DEI ob ejus infinitā Bonitatem

O Domine DEUS meus, infinitum bonum, qui es ipsa plenitudo, & universitas boni. Tu enim bonus es sine modo, sine limitatione, sine mensura, sine principio & fine: cui omnis creatura, omne suum bonum acceptum referre debet: Tu simplicissimā essentiā tuā omnem excellentiam, omnem perfectionem, omnem beatitudinem, & omne bonum possides.

A te omnia dulcia trahunt suam dulcedinem, omnia pulchra suam pulchritudinem, omnia lucida suum splendorem, omnia, quæ vivunt suam vitam, omnia quæ sentiunt suam sensationem, omnia, quæ moventur suum vigorem, omnia intelligentia suam lætitiā, omnia perfecta suam perfectionem: omnia demum qualicunq; modo bona hauriunt suam voluptatem.

Tu centrum universi, ad quod naturali pondere res omnes referuntur, in quo omnia conquiescunt: à quo omnia suscitantur: in te sunt illecebræ omnis amoris, consumatio omnis desiderii, terminus omnis motionis, satietas omnis appetitus.

Quanta est hæc vis tuæ illius summæ bonitatis, ad cujus radii splendorem, tanto impetu currit omnis

omnis creatura: dum unaquæq; illarum appetit particulare suum bonum, & ad aliud totis viribus connititur, quod bonum nihil aliud est, quam leve vestigium, & signum tuæ bonitatis.

Hoc bonum, omnem creaturam tam potenter trahit: hoc in mundo omnes motus excitat: quidquid enim in rebus creatis se movet, agitatur, operatur, intuitu boni movetur, & agitur.

Si levis umbra boni tanto impetu trahit, quantum magis trahit ipsa veritas? illa inquam bonitas infinita, id est, tu ipse, Domine, dulcissimum & summum bonum.

Ardentissimo ideo desiderio, sine intermissione desidero, tibi Domino DEO meo, absq; ullo medio uniri, & tanto bono divino satiari.

Cupio in te dulcissimum DEUM meum, quantum tu ipse largiri dignaberis, tam profunde me immergere, abscondere, & transferre, ut nihil amplius, nisi divinissimum illum, & mellissimum amorem perpetuò me amantem, sentire, ac sapere videar.

O super admirabile bonum, quando me totum transformabis, & abscondes in te, & in me! Quod enim est mari absorbere unam guttam, hoc tibi est absorbere me infirmum & vilem creaturam tuam.

Equidem desidero tibi multum dulciter unitus, a te summo bono medullitus absorberi, & in te transformari, quo quidem nihil sublimius, nihil profundius, & præstabilius mihi in hac vita con-

stituto potest obtingere: cum tu, ô dulcissime DEUS, solus sis bonum illud incommutabile, in quo latet abyssus quædam immensa, æterni & infiniti amoris, fonsq; & scaturigo excellentissimæ bonitatis.

Trahe mentem meam ad te, ô immensa bonitas, eamq; ad te, super omnes res creatas, vinculo indissolubili, & ligamento æterni amoris adstringe.

Quid quæram, & desiderabo extra te qui es plenitudo omnis boni: fons, finis, suavitas, vis, & medulla omnis boni.

Valeant res omnes aliæ, te semper cogitem, amem, ad te contendam: tibi uni adhæream: in te commorer: te laudem, benedicam, & omnibus viribus animæ meæ, tota vitâ meâ uni tibi serviã.

Actus Desideriorum erga DEUM. summè bonum.

O Superoptime DEUS meus, desidero te summum & omne bonum meum, desideriis omnibus meis, quæcunque ego juxta omne placitum tuum, elicere tota substantiæ meæ capacitate possum, tam in genere, quàm in specie; quàm in numero desideriorum. Intelligendo desiderii nomine omnem alium pium affectum in te Dominum meum, Fidei, Spei, Charitatis, Æstimationis, Adorationis, Laudis, Gaudii, Orationis, Devotionis, Subjectionis, Resignationis, & reliquorum omnium quotcunq; à nobis fieri possunt.

Neq; solum Te his desideriis meis desidero, sed etiam

etiam omnium, singularumq; creaturarum, etiam possibilem, omnibus genere, specie, numero, possibilitate, distinctis desideriis: præcipuè verò Omnium Sanctorum tuorum, tam hominum, quàm Angelorum, tam Beatissimæ DEI Genitricis Virginis MARIÆ, quàm Sanctissimæ JESU Christi Domini nostri Humanitatis, omnibus absolute erga te Dominum DEUM nostrum desideriis, præteritis, præsentibus, & futuris.

Idquè in omni istorum omnium desideriorum intentione, in omnibus intentionis gradibus, & ab omni, & singula creatura, etiam atomicè sumpta, etiam ab ipsa Beatissima Virgine MARIA, JESU-què Christi Humanitate elici possibilem, tanquam actu, defacto, in præsentem, nunc, pro omni temporis momento, semel pro semper elicitis, in milles, millies infinities majori, possibili, omnimoda proportionem.

Neq; intentione solum, sed etiam extensione desideriorum omnium & singulorum: extensione, inquam, per omnia & singula subiecta desideriorum, perq; atomos, & indivisibilia spiritalia, & corporalia: tum verò extensione ad omnia loca, & spatia etiam imaginaria, ad circumstantias, & atomos spatiorum, locorum, reliquarumq; circumstantiarum DEO possibilem: extensione quoq; ad omnia tempora, & ad omnia omnium temporum instantia: ad omnia quoq; momenta æternitatis, tam ante, quàm post.

Præterea intentione, & activo, & objecto, &

ratione desiderationis, omni quidem possibili tibi DEO meo atq; complaciâ: sed nominatim illâ omni, propter quam tu, ô superdignissime Domine DEUS es desiderabilis, & desideranda in te, & per quam nos sumus, aut esse quovis recto modo possumus desiderativi tui, & desiderantes te: sive illa ratio, ac intentionis motio sit aliquid ad intra in te, & ipse tu, sive sit, aut esse possit aliquid ad extra diversum à te: sed tamen profectum à te & propter te.

Et cupio hunc actum à me, & ab omni eo, quodcunq; tu non es, mihi voluntate charitatis meae insubstantiato, in omni atomo sui, & in omni circumstantia, spectato replicari & repeti.

Immo quantum in me, replico, repeto, & repeti gaudeo, mihiq; ex hoc propter te complaceo omni possibiliter in singula, per omnem æternitatem, momenta, tantum, quantum tu, ô DEUS meus, & nos omnes creaturæ tuæ desiderare volumus, debemus, possumus, quia tu dignus es, & quia nos debemus, & quia nos adjuvante, immò dante & faciente te nobiscum, & per nos possumus.

Communicando hunc actum imprimis JESU Christi Domini nostri, omnibus meritis & gratis, unaq; Beatissimæ Virginis, & Sanctorum Omnium, ad JESUM Christum incarnatum, increatamque sapientiam, VERBUM DEI Filium tanquam ad caput pertinentium, intercessionibus.

Deinde universæ Divinitatis tuæ, ô DEUS meus, bonitati, & bonitatis Divinitati, atq; dignissimæ & substantissimæ dignitati.

Ad

Ad gloriam omnimodam & omnipossibilem, & omniparem Patris æterni ingeni: Verbi, Filii increati, incarnati & unigeniti; Spiritus Sancti, ex Patre Filioq; procedentis, & ab omni æternitate, & in omnem æternitatem, & ultra.

Actus Laudis Divine.

AH quantum pœnitet me modò, ô dulcissime DEUS meus, quòd tuam infinitam bonitatem toties inhonoravi, læsi, contempsi, quoties in te, & in oculis tuis peccavi, quoties legem tuam, & voluntatem tuam transgressus sum, quoties mandata tua fregi.

O si exitus aquarum deducant oculi mei, quia aliquando te non amavi, & quia te infinitè bonum offendi; de quo nunc ex toto corde meo, ob amorem tuum doleo: & quantum honori tuo per mea peccata detraxi, tantum nunc honoris, & amoris, & laudis tibi DEO meo tribuo.

Et ideò nunc ego magno applausu, & toto pectore te laudo, exalto, magnifico, veneror: atquè utinam hoc possim absq; cessatione præstare semper, & in omni loco terrarum, tantum; quantum exaltant te, magnificant, honorant, honorabunt, honorarunt & honorare poterunt simul omnes creaturæ, & omnes qui fuerunt, sunt, & futuri sunt.

Immò cupio simul reddere tibi, omnes illas laudes, quas potuissent, possunt, poteruntvè deferre, Beata Virgo, & Sanctissima Humanitas Christi.

Et tantum, quantum possunt adferre innumeri

N³ mundi,

mundi, & infinitæ creaturæ, tam visibiles, quàm invisibiles, quas omnipotens manus tua creare potest.

Et tantas laudes, tantos honores, desidero tibi exhibere, quantos nosti exhiberi posse, & quantos mereris.

Quia verò mea facultas istud præstandi deficit, opto saltem, tribuere tibi omnes illos honores, & laudes, quas tuo adjutus auxilio, offerre possum, & quantis tu teipsum amoris viribus amas: quibus nunc istum, qualemcunq; meum affectum laudis, velut exilem appendicem adjungo.

Toto corde desidero, quòd omnes creaturæ mecum te agnoscant, laudent, colant, ament, ob solam bonitatem tuam infinitam, ita, sicut Divinæ tuæ Majestatis amplitudo deposcit.

Congratulor autem tibi, condelector, & lætor, quòd tu DEUS meus, tam sis magnus, tamq; laudabilis, ut neq; vires omnis creaturæ, vel in terra, vel in Cælo, sufficiant ad te dignè laudandum, & magnificandum: sed interim gaudeo, teipsum, laudabilissime Domine, id in supplementum illarum omnium, abunde præstare.

O si possem omnes arenas, atomos, folia, & maris ac pluviarum guttas, atq; nivium grana, in Cælos, & Angelorum Choros, te amantium & laudantium convertere, ô quàm libentissimè id facerem!

Certè si omnes homines essent in mea potestate, libenter eos inducerem, & cogerem amare te solū
super

super omnia, adorare, glorificare, & ex puro amore tibi obedire, ac servire; quia tu solus omni amore, adoratione, laude, & obsequio superdignissimus es.

O si possem ex qualibet creatura facere animā, & ex qualibet anima facere Regnum Cœlorum, in quo tantam gloriam, laudem & gaudium haberes, quantum ab initio habuisti, habes, & in æternum habiturus es, in Beatis Angelis & Sanctis tuis: omnia ista, ex toto corde, quā libentissimè tibi offerrem & darem: & adhuc centies millies, immò infinities majora, si mihi suppeterent.

Si haberem omnium Angelorum & hominum vires, eas libenter in tui solius cultum & servitium expenderem.

Si haberem omnium creaturarum affectum & amorem, illum ad te solum libenter converterem, & in te transfunderem.

Utinam possem ego solus omnes omnium miserrorum poenas & afflictiones, omnium Martyrum cruciatus & tormenta, singulis momentis, amore tui sufferre, equidem prompto animo, universa hæc propter te, tua adjuvante gratia perferrem.

Utinam efficere possem, ut à singulis creaturis, singulis momentis, tantum laudis & amoris tibi tribueretur, quantum ab initio à Beatis Angelis & Sanctis tuis tributum est, tribuitur, & in sempiternum tribuetur: profectò omnes vires meas ad hoc superimpenderem.

Actus desiderii videndi DEUM.

O Svavissime DEUS meus, quia hîc in terris, neq; te amare, neq; laudare sinè cessatione possum; ideo desiderans desidero, & idem te ardentissimè rogo, ad illam Cœlestem Hierusalem quàm ocyùs deduci, ubi omnes Sancti te facie ad faciem vident, videndo semper amore tuo ardent, & sine cessatione & sine laudant.

O quàm felix ego, nimiùmq; beatus, si & ego merüero laudare te, & cantare tibi DEO meo, illa quæ cantantur ad laudem tuam ab illis superne Patriæ civibus.

O Sanctissima Trinitas, tua dulcissima unitas, influat, obsecro, in me, & in omnes creaturas te laudare valentes, ut amore tui inebriatus, svavissimas concinam laudes tuas in æternum.

Quàm Beati, qui habitant in Domo tua, Domine, in sæcula sæculorum laudabunt te!

O Domine DEUS meus, ostende mihi teipsum, & sufficet mihi.

O Dulcissime DEUS, infunde mihi citò lumen vultus tui; accende cor meum mellifluo amore tuo, ut illo, æterna per sæcula, ardeam.

O quando, quando, te facie ad faciem intuebor? quando te feliciter inveniam, tenebo, & tuâ intima unione fruam?

Quando, quando, quando me totum absorbebis?

O DEUS meus & omnia! ô abyssus summæ svavis & summæ amabilis! O simplicissimum & jucundissimum, verum, & incommutabile bonum, imple me te ipso.

Eja

Eja dulcissime DEUS, intra in nudum animæ meæ fundum, & transfer in te originem meam, ut delicias tuas in me habeas.

Remove, quæso, misericorditer omnia impedimenta, & tecum unum spiritum effice, ad gloriam nominis tui. Exaudi Domine mi, exaudi me, non pro mea voluntate. Et interea dum in terris vivo, docè, illumina, dirige & adjuva me in omnibus, ut nihil agam, nihil loquar, nihil cogitem, nihil velim, nisi quod tibi sit acceptum.

PRO FERIA TERTIA.

Actus amoris DEI ob ejus infinitam pulchritudinem.

O Immensa pulchritudo, Domine DEUS meus! ô Abyssus summè suaviss & summè amabilis, ob tuam infinitam puritatem & sanctitatem essentialem & universalem! Nam tua essentia est prima origo omnis sanctitatis & puritatis. Tu es principium efficiens forma, exemplar, & finis omnis splendoris sanctitatis, qui reperitur in creaturis. Tu per te ipsum Sanctus es, cujus sanctitas, est fons essentialis omnis pulchritudinis & puritatis.

Gaudeo, & complaceo mihi, de ista tua Sanctitate, puritate, & pulchritudine infinita, quam ego admiror, veneror, honoro & amo: utpotè cui omnis reverentia, honor & amor debetur.

O pulchritudo Majestàte plena, quàm amabilis
es,

es, & cur non amem te? te, inquam, super omnem cogitationem, nobilissime & suavissime DEUS.

Tibi dixit cor meum, exquisivit te facies mea, faciem tuam, & pulchritudinem tuam, Domine, requiram.

Domine, omnibus optimi amoris titulis, nominibusq; dignissime, da ut omni amore, dilectione, charitate complectar te.

Amem te, ô pulchrum! ô supremum bonum! & inter omnia, quæ amari possunt, te pluris faciam, te diligam præ omnibus.

Amor meus æstimet te super omnia: dilectio mea diligat te præ omnibus: & charitas mea te corde, quàm potest amantissimo revereatur, & complectatur.

Amet te cor meum totum, & voluntas mea, & omnes cogitationes meæ: amet te mens mea; id est, intellectus & memoria mea: amet te anima mea; id est, vita mea, atq; vis mea interior appetitiva: amet te fortitudo mea, sive vires ac virtus mea, atq; vis mea exterior executiva.

Doleo, quòd te non semper tanti fecerim, quanti fieri debes: doleo, quòd te aliquando ulli unquam creaturæ, quocunque modo postposuerim. Da, ut nunc eo ardentius diligam te, Domine, fortitudo mea.

O Pulchrum meum! ô pulchrum tuum DEUS: sicut in te bono tranquillatur & quiescit appetitus, ita in tui aspectu, seu cognitione, quiescit cor cognoscens te, vel audiens de te: At nec bonum,

num, nec pulchrum est objectum appetitus, nisi apprehensum, da igitur obsecro, ut ita te cognoscam, ut contemplatio spiritualis tuæ pulchritudinis & bonitatis, sit principium in me amoris erga te mei.

Volo te amare, te solum, te unicè, & nihil aliud nisi te, aut propter te, ne me ipsum quidē.

Odi, Domine, odi omnem amorem, quo hactenus aliud amavi, quàm te.

Actus delectationis de DEO.

O Quantas, jucundissime Domine, causas habeo jubilandi & exultandi: quandoquidem tu es DEUS ille, qui es: nimirum, infinitæ Potentiæ, Sapientiæ, Bonitatis, Sanctitatis, Puritatis, Pulchritudinis, & innumerabilium aliorum attributorum, tanquam Principium & Finis omnis boni.

Ecce pulchritudo Beatorum Angelorum, pulchritudo Sanctarum Animarū, pulchritudo corporū humanorū, pulchritudo animalium brutorū, pulchritudo Cælorū, fiderum, Solis, lunæ, ignis, æeris, maris, terræ, planetarū, florum, gemmarum, metallorum, sive vitasq; sonorum; à te solo est.

Quidquid decoris, gratiæ, amœnitatis, elegantiae, dulcedinis, virtutis, dignitatis & opulentiæ est in creaturis, hoc totum à te profluxit: hoc totum in te abundantissime, excellentissime, & immarcescibiliter consistit.

Verè tu es summè pulcher, summè deliciosus, summè amabilis, summèq; desiderabilis. Tu

Tu exuberantissimè in te continēs omnem venustatem atquē jucunditatem, semper vernantem atquē florentem, quæ tantò præstantior est illâ, quam in rebus creatis cernere, aut experiri possunt homines, quantò tu Creator præstantior es quâcunquē creaturâ tuâ.

Tu es omnium, quæ delectabilia esse queunt superefficiens plenitudo. Tu puræ lætitiæ, sanctæquē voluptatis pelagus immensum.

Ideo avidè, Domine mi, desidero, & volo in posterum adjuvante gratia tua, omnem animi delectationem esse in te, ac de te solo, deque rebus, quæ tuæ sunt, meq; ad te pelliciunt, sicut de te benè dixit, qui dixit: DEUS meus & omnia.

Contrà verò fastidio, prorsusquē averfor hunc mundum, & omnia, quæ illius sunt: omnia enim, præter te, Domine, arbitror, ut stercore; abominor ut rem contagiosam.

Incredibilem percipio in anima mea voluptatē, de illa voluptate tua, quam tu percipis de te ipso, in te ipso, & quam omnes Angeli, Sanctiq; omnes percipiunt ex te ipso.

Exulto præ gaudio, quod habeo de te: sicut exultant iusti in conspectu tuo, & delectantur in lætitia, qui te vident sicuti es, & qui mellifluam faciem tuam clarissimè contemplantur, qui abyssoperennium deliciarum feliciter immersi, tibi perfectissimè uniuntur: quos deliciosissima tui fruitione tranquillas, lætificas, reficis & satias.

Utinam efficere possem, dulcissime DEUS, ut
omni a

omnia gaudia, quæ sunt & erunt in mundo, non sint nisi de te: in te enim verum gaudium, in te vera consolatio.

Absorbe, Domine, concupiscentiam meam dulcedine tua, quam abscondisti timentibus te; ne interior gustus vanis illectus & deceptus, ponat amarum dulce, & dulce amarum.

Cupio tuæ solius dulcedinis gustu affici, tantumq; tuis è rebus gaudium & voluptatem capere semper, omnes verò res mundanas, & quæcunque cor meum à te avertunt, respuere, abhorrere, detestari.

Ad hoc præstandum, adjuva me, Domine, tua pietate, ut serviendo tibi cum gaudio & perfectione in hac vita, possim te cum Beatis videre, & frui æternum in altera.

Aetus desiderii ut alii omnes ament DEUM.

BEnignissime Domine, magnam capio voluptatem, non solum ex omni illo amore, quo te prosequuntur omnes Sancti, & iusti, qui sunt in hac vita; sed multò magis ex illo, quo te longè sincerius complectuntur: tum illi, qui corpore liberati, adhuc in aditu regni cælestis commorantes, avidissimè faciem tuam expectant: tum illi, qui in penetralia felicitatis admissi, clarissimo tui conspectu, & tua jucundissima pulchritudine fruuntur, homines & Angeli: ac præcipuè Sanctissima Humanitas JESU Christi, Domini & Redemptoris nostri, & Beatissima Virgo MARIA.

O Si

O Si ego possem te amare, omnibus illis affectibus, quibus illi omnes te amant! quàm id libenter & hilariter præstarem! sed quia non possum, gaudeo saltē de ipsis, qui melius possunt, id facere: optoq; ut semper magis magisq; id faciant, & in amore eodem perseverent in æternum, secundum beneplacitum tuum.

Ex altera parte, Domine, vehementer displicet mihi, ac doleo: plurimos alios ē servis tuis, negligentius te amare: plerosq; etiam pro amore injurias tibi referre, tuamq; infinitam bonitatem, & superamabilissimam pulchritudinem contemnere.

Obsecro, Domine, ignosce illis, & largire gratiam tuam, quā se emendent, & te jam incipiant amare super omnia, & in omnibus exequi tuam Sanctissimam voluntatem.

Sed quid dicam de illis, qui à te ad imaginem & similitudinem tuam formati, & innumerabilibus beneficiis donati, te, quem super omnia amare deberent, ne agnoscunt quidem infideles & improbi? quantum hoc, amabilissime Domine, mihi dolorem creare debet, quas excutere lacrymas?

Utinam omnium illorum corda, & voluntatem in potestate haberem, ut possem illos tuo amore inflammare!

Ecce, Domine, saltem cogitatione mea purgatos ab omnibus peccatis, quales ego esse desidero, & tu facere potes, omnes illos puros, & sanctos tibi offero, ad honorem & gloriam tuam.

O Quanta mihi felicitas eveniret, si possem ego
supple-

supplere defectum ipsorum, prosequendo te actibus illis amoris, quibus ipsi te prosequi deberent: & non solum ipsorum defectum, sed etiam pravorum Angelorum, & hominum damnatorum, qui pro amore & laudibus, execrabili contra te odio irâq; flagrant, longè pejùs, quàm flammis inferni.

Sed quia ne pro mea quidem parte, satis amare ac laudare te sufficio, omnem & meum & aliorum defectum, desiderio saltem, quo possum, & quantum possum suppleo.

Interea magnum mihi solatium est, quòd sciam tuam Divinam Majestatem infinito suæ voluntatis affectu satisfacere pro omnibus, & omnes amandi partes explere; cùm infinito amore amas teipsum.

Quare summopere gaudeo, & hunc amorem nunc tibi humiliter exhibeo, & pro me offero, in supplementum etiam omnium illorum, qui omitunt hoc facere, ô DEUS amor meus, summum & unicum bonum meum!

Actus desiderii videndi DEUM.

O DEUS meus dulcissime, ecce infinitè amabilis tua pulchritudo, excitat in intimis meis ardentissima desideria, quibus te videre expetam, & ad beatam illam æternæ Patriæ mansionem jugiter aspirem, ut ibi anima mea, dulcedine tui illecta penitus charitate collique scat: & secedens à seipsa, atq; tota transiens in te, degustet micæ ineffabilium epularum, guttulasquè incomprehensibilium deliciarum, quas præparasti diligentibus te.

O DE-

O DEUS meus & omnia, nihil præter te requirit anima mea, nihil aliud desiderat, quàm ut sancto fervore extra se rapta, in te feliciter soporata obdormiat, tibiq; nuda charitate uniatur.

O Dulcissime, amantissime, benignissime, amabilissime, pulcherrime, quando te videbo?

Quando apparebo ante faciem tuam?

Quando satiabor de pulchritudine tua?

Quando educes me de hoc carcere tenebroso, ut confitear nomini tuo, ita, ut deinceps non confundar?

Quando transibo in illam admirabilem, & pulcherrimam domum tuam, ubi personat vox lætitiæ & exultationis in tabernaculis iustorum? Beati qui habitant in domo tua Domine, in sæcula sæculorum laudabunt te.

Beati & verè beati, quos elegisti & assumpisti in illam cœlestem hæreditatem.

O Quàm mira, quàm pulchra, quàm acceptabilia sunt domus tuæ habitacula, Domine virtutum, concupiscit intrare in ea hæc peccatrix anima mea.

Domine dilexi decorem domus tuæ, & locum habitationis gloriæ tuæ.

Unam rem petii à Domino, & hanc requiram, ut inhabitem in domo Domini omnibus diebus vitæ meæ.

Quis dabit mihi pennas sicut columbæ, & volabo & requiescam? nihil mihi tam dulce, quàm cum Domino meo esse.

Mihi autem adhærere DEO bonum est.

Da mihi, Domine, donec his fragilibus consistam membris, Tibi adhærere, sicut scriptum est: Qui adhæret Domino, unus spiritus est cum eo.

Præbe mihi, rogo, contemplationis pennas, quibus indutus ad te volitem sursum.

Sed volitanti ad te animæ, multa sunt quæ obstrepunt, jussu tuo, Domine, conticescant mihi omnia.

Ipsa sibi anima mea fileat, omnia pertranseat, quæ creata sunt, transcendat à se, & perveniat ad te, atque in te solo Creatore omnium oculos Fidei figat.

Tibi inhiet, tibi intendat, te meditetur, te sibi ante oculos ponat, te in suo corde revolvat verum & summum bonum, & gaudium sine fine mansurum.

PRO FERIA QUARTA.

Actus amoris DEI ob beneficium Creationis.

O Domine DEUS meus, qui ex tua infinita bonitate & benignitate, naturalem habes propensionem, tua bona communicandi, cum rebus inferioribus & creatis, pro cujusque capacitate: & ideo cum nullius indigeres, tibi quæ ipsi sufficientissimus esses, nihilominus ex nihilo res omnes creasti, & ex tua nihilitatis abyssu eduxisti: quando eis essentiam, formam, pulchritudinem, appetitum boni, fugam mali, vires, functiones, impetum, motum, situm, modum, ordinem,

O

perie-

perfectionem, & terminum : & hoc, non ob tuam aliquam commoditatem, vel utilitatem, sed ut ipsis bene esset, & pro sua quæquæ capacitate participarent, de tuis bonis, gustarentquæ fructum tuæ benignitatis.

Sed præcipuè erga nos homines, excellentissimè resplendet tua benignitas : tu enim ad imaginem, & similitudinem tuam nos creasti, & charactere vultus tui signasti, intellectum, memoriam & voluntatem nobis dedisti, quibus Divinæ gloriæ, & beatitudinis tuæ capaces efficimur, Divinis insuper nos auxiliis, & ornamentis instruxisti, ut mereremur, & consequeremur tam præstantia bona: Angelos etiam nobis custodes, & rectores assignasti; tandem totum mundum creasti, & plurimis bonis instructum pro habitatione, & solatio nobis donasti. Quid majus his beneficiis? quid ista benignitate mirabilius fingi & excogitari potest?

Quorum omnium beneficiorum, me quoq; indignum participem fecisti. Ecce, Domine mi benignissime, ex tot millibus, quos oblivioni dedisti, & nescisti, elegisti me, ut essem.

Erant, & sunt in conspectu tuo in abyssu potentiae tuæ, quotquot esse possunt, & esse nequeunt, nisi jusseris, ut prodeant; ego verò cum essem inter hos innumerabiles meliores futuros, jussus sum exire in hanc lucem.

Et quid, quæso, invenisti in me, quòd præ cæteris ante mundi constitutionem sic diligeres me?

Quid enim egeram qui non eram? Quid actum videbas, qui toties sprevi te? Quid

Quid ergo impulit te, Domine, ut meminisses mei? sola bonitas. Bonorum enim meorum non indiges. Et quid, quæso, possum extra te amare, aut quærere, qui me sic amasti?

O DEUS meus, propter illum immensum amorem, quo me prosequeris, da ut ego sic redamem te sicut mereris, & debes amari.

O Amor meus! ô amor meus! Tu solus unicus esto, totus amor meus.

O Svavissima vita cordis mei, DEUS meus, quam desidero honorificare te, & amare te super omnia?

Diligam te, Domine, quoniam tu prior dilexisti me; ô si te solus ita amarem, sicut te amant omnes iusti in terra, & Sancti in cœlo.

O Ignis, qui semper ardes, & nunquam extingveris! O amor, qui semper ferves, & nunquam tepescis! accende me, accendar, inquam, totus à te, minus enim te amat, qui tecum aliquid amat, quod non propter te amat.

Gaudeo de illo amore infinito, quo temetipsum ab æterno amas, amasti, & amabis in æternum. Offero tibi hunc eundem amorē pro amore meo.

Actus Adorationis.

O Adoranda tremenda, & veneranda omnipotentia tua, Domine, per quam omnia de nihilo creasti, & sustentaculo tui influxus eadem conservas.

Ecce ego omni illa, qua possum submissione, &
Oz humili-

humilitate, positus coram tua Divina Majestate;
DEUS meus, agnosco me creaturam, & opus ma-
 anum tuarum, à te per omnia dependens: Te
 universorum absolutum Dominum dignissimum,
 qui pro tali ab omnibus habearis, & honoreris,
 infima cordiali submissione humi prostratus, & ex
 profundo abyssu mei nihil; te adoro, adoratione
 Latriæ; & tantæ Majestati in infinitum me sub-
 mitto, omnemquæ reverentiam & honorem, quem
 possum, exhibeo.

Contentus etiam sum, immò contentissimus,
 me nihil esse, nihil posse, nisi à te proveniret: im-
 mò nollem esse, nec aliquid posse, nisi dependen-
 ter à te.

Ideo invito, & invoco Sanctissimam Virginem
MARIAM, beatos Spiritus, & totam Curiam cœ-
 lestem, immò creaturas universas, ut mecum ado-
 rent, venerentur, & agnoscant tantam Majestatem:
 & jam nunc unâ cum illis te adoro, & agnosco:
 immò isto meo actu, omnes alias adorationes, a-
 lios cultus, quibus hætenus affectus es, & quibus
 affici te conveniebat, & quibus tota labente æter-
 nitate afficiendus es, omnes, inquam, eos cultus
 uno fasciculo comprehensos & colligatos tibi offe-
 ro, & dedico.

Complaceo mihi, & gaudeo, Domine, de tanta
 Majestate, & potentia, per quam me creasti: ideo
 ego misera & indigna creatura tua, firmo & con-
 stanti proposito, me totum hodie in Sanctissimam
 & justissimam voluntatem tuam projicio, & abne-
 gando

gando meipsum, ex toto corde pronuncio, ac protestor, quod totus velim esse tuus, & nec habeam quidquam, nec habere velim unquam aliud, quam te solum. Te solum volo quaerere, te solum amare, idque sincerè, simpliciter, ac purè sine meo commodo.

Et firmiter nunc propono, deinceps tuæ Majestati supremæ servire, & eandem amare, non tam ut fugiam pœnas, carcerem, aut infernum evitem, neq; ut mihi des consolationes, aut beatitudinem in altera, aut aliquid quidquam desiderabile in vita præsentis: sed præcipuè ut quaeram te solum, amem te solum: Et certè solus mihi sufficis, qui es verum, unicuq; complementum omnium.

Quare uni tibi me do, & dedico in æternum, idq; tam firmo & inviolabili proposito, tam sincero cordis affectu, ut totâ animâ meâ te amare, tibiq; servire, supradicta intentione velim, etiam si viverem sæculis infinitis. Hoc, inquam, est consilium, hoc decretum, hæc enixa voluntas mea.

Actus Laudis.

O Sapientia, quæ aperis os mutorum! ò Verbum, per quod facta sunt omnia: aperi os meum, da mihi vocem laudis, ut enarrem omnia beneficia tua, quæ mihi, Domine, à principio contulisti.

hec enim sum: quia tu creasti me, & ut me creares, & in numero creaturarum tuarum numerares, ab æterno tu præordinasti, antequam quid-

quam faceres a principio, antequam extenderes coelos, necdum erant abyssi, adhuc terram non feceras, nec montes fundaveras, necdum fontes eruperant.

Antequam hæc omnia, quæ fecisti per Verbum, faceres, me creaturam tuam fore certissimâ veritatis tuæ Providentiâ prævidisti, & esse me creaturam tuam voluisti.

Miser ego, DEUS meus, quantum teneor diligere te, ostende mihi. Quantum debeo laudare te, demonstra mihi. Quantum debeo placere tibi, innotesce mihi.

Unde hoc mihi, Domine, unde mihi laudes ad laudandum te? sicut enim fecisti me sinè me, sicut complacuit ante te; ita laus tibi est sinè me, sicut complacet ante te.

Ante te, Domine, laus tua, tu ipse es. Non valeo laudare te sinè te: habeam te, & laudabo te.

Quid enim ego sum, Domine, per me, ut laudem te? Pulvis & cinis ego sum; canis mortuus & fætens ego sum.

Quis ego sum, ut laudem te, Domine DEUS fortissimè, Spiritus universæ carnis, qui habitas æternitatem?

Nunquid tenebræ laudabunt lucem, aut mors vitam?

Tu lux, ego tenebræ: Tu vita, ego mors. Nunquid vanitas veritatem laudabit? Tu es veritas, ego homo, qui similis factus sum vanitati.

Quid ergo, Domine, laudabo te? Nunquid
misericordia

miseria mea laudabit te? Nunquid factor laudabit odorem. Nunquid mortalitas hominis, quæ hodie est, & cras tollitur, laudabit te?

Nunquid laudabit te homo putredo, & filius hominis vermis?

Nunquid laudabit te, Domine, qui in peccatis conceptus est, & natus, & nutritus? non est enim speciosa laus in ore peccatoris.

Laudet te, Domine DEUS meus, incomprehensibilis Potentia tua, incircumscriptibilis Sapientia tua, & ineffabilis Bonitas tua.

Laudet te supereminens Clementia tua, superabundans Misericordia tua, sempiterna quoq; virtus & Divinitas tua.

Laudet te omnipotentissima Fortitudo tua, summa quoq; Benignitas tua & Charitas tua, per quam creasti nos, Domine DEUS, vita animæ meæ.

Ætus desiderii videndi DEUM.

O Æterna veritas, & vera charitas, & æternitas! Tu es DEUS meus: ad te suspiro nocte ac die, tibi inhio, tibi intendo, ad te pervenire desidero.

Et ego parvulus inter parvulos familiæ tuæ, DEUS Pater, & virtus mea, quando veniam & apparebo ante faciem tuam, & qui nunc tibi confiteor ad tempus, extunc confitear tibi in æternū?

Beatus ero, si fuero admissus ad videndum Claritatem tuam. Quis mihi hoc tribuat, ut ad hoc venire me permittas?

Scio, Domine, & confiteor me indignum, ut intrem sub tectum tuum: sed fac propter honorem tuum, nequē confundas in te sperantem servum tuum.

Et quis intrabit in Sanctuarium tuum, ad considerandas potentias tuas, nisi tu aperiās? Quis autem aperiet, si tu clauderis? si enim destruxeris? nemo est, qui ædificet; & si includeris hominem, nemo est, qui aperiat.

Tu nos creasti, ne spernas nos, quia opera tu sumus.

Equidem Domine DEUS noster, nos lutum & vermiculi, non valemus in tuas æternitates intrare, nisi tu duxeris, qui de nihilo cuncta creasti.

Ecce concupiscit, & deficit anima mea diligēs te.

Eja, DEUS meus, miserere mei.

Attende gemitus meos multiplices, & concede; ut ubi carne exutus fuero, mox perveniam ad te, & glorificem te in æternum: quia ad hoc creasti me; pro quo sis benedictus in æternum.

PRO FERIA QUINTA.

Actus amoris DEI ob beneficium Redemptionis.

O Immensa pietas! ô Inæstimabilis Charitas tua, DEUS meus! qui sic dilexisti mundum, ut unigenitum tuum dares; ut omnis qui credit in eum, non pereat, sed habeat vitam æternam.

Qui nos miseros & indignos, adeo mirabili bonitate

bonitatē amare dignatus es, ut Filium tuum in mortem traderes, & nos servos tuos, filios perditionis à morte liberares.

Quā benignissimus amator hominum est Filius tuus, DEUS noster, qui factus est Homo, ut de potestate dæmonum erueretur perditus homo.

Venit piissimus DEUS: venit pro pietate & bonitate sua: venit quærere, & salvum facere quod perierat.

Quæsit ovem perditam, quæsit & invenit, & humeris suis reportavit ad caulas gregis pius Dominus, & verè multum pius Pastor.

O Charitas! ô Pietas! Quis audit talia? Quis super tanta misericordiæ viscera non obstupescat? Quis non miretur? Quis non collætetur, propter nimiam Charitatem tuam, quā nos dilexisti?

O Quot sunt, quæ me urgent ad te amandam, dilectissime JESU, dulcissime Salvator & Redemptor noster! Quanta tua erga me Charitas! Quanta Misericordia & Benignitas, per quam me redemisti!

Certè non tam facilè refectus sum à te, quā factus: omnia enim de nihilo fecisti, ô DEUS meus, sed non de nihilo me redemisti.

In creatione mundi, dixisti, & facta sunt; mandasti, & creata sunt: at in opere Redemptionis meæ triginta annis laborasti sustinens, sustinuisse patiens.

Plūs plūs contulisti mihi redimendo me, quā creando me. Nam creando, me mihi dedisti. Redimendo

dimendo autem me, te mihi dedisti. Animam tuam in morte mei causâ perdidisti, meam autem perditam mihi reddidisti.

O JESU prædilecte, charior tibi mea, ut sic dicam, quàm tua vita: tuam enim pro mea dedisti, & ut ego viverem, tu mortuus pro me.

Ecce tu prior: Tu, inquam, tantus tantillum, gratis ingratum, & talem sic diligis! Et ego qui non gratuitò, sed ex debito amare te debeo, quantum amare debeo?

Quis finis, quis modus amoris mei?

Amat immensitas, amat supereminens charitas, amat DEUS infinitus, & ego vicem rependam cum mensura?

Sed, ô Domine, non possum amare te, nisi tu juves me, ut amem te: vellem certè, mi JESU, vellem tandem amare te.

Da mihi toto corde amare te, totâ animâ tibi adhærere, omnes vires meas, in tuo amore & servitio expendere, secundum cor tuum vivere.

Da, ut quidquid sum, totus amem te; sicut tu, qui, quod es, amas me.

Ecce jam, ô amor meus! ita me deinceps amoris tuo devoveo, ut licet mihi nolles unquam bene velle, aut facere, sive in hac, sive in altera vita: immò licet me hic omnibus malis affligere, atquè post hac inferni ignibus dare velles; amabo te tamen toto corde, serviam tibi ex corde, & fidelissimè faciam voluntatem tuam.

Actus

Actus Laudis.

O Dulcissime JESU, quid retribuam tibi, pro tam excellenti beneficio Redemptionis; hoc est, pro his omnibus, quæ pati, & facere dignatus es pro salute nostra?

Ecce, Amantissime JESU, totum me debeo tibi pro me facto, & quid dabo pro me refecto?

Nonne tu, dilectissime Domine mi, poteras me redimere unâ sanguinis guttâ, totum tamen pro me fudisti.

Propter me, venisti in altitudinem maris magni, & tempestas tribulationum demersit te.

Propter me homo factus, jejunasti, laborasti, orasti; propter me ignominias, flagella, spinas, clavos, & mortem pertulisti.

Quid ergo retribuere possum, Domine DEUS noster, pro tantis beneficiis misericordiae tuæ, quas laudes, quas gratiarum actiones?

Etiamsi illa Beatorum Angelorum scientia & potentia nobis foret; nihil tamen dignum tantæ pietati, & bonitati tuæ recompensare valeremus.

Si certè omnia membra nostra verterentur in linguas, ad repetendum tibi debitas laudes, nequam sufficeret exiguitas nostra.

Supereminet enim omnem scientiam tuam inæstimabilis Charitas, quàm ostendisti nobis indignis, pro sola bonitate & pietate tua.

Tu scis, Domine, quia si possem, omnem tibi laudem, gloriam & honorem tribuerem, quibus
te lau-

te laudent, glorificent, & honorant omnes Angeli
& electi tui: sed quia impotens ad hoc sum, susci-
pe saltem desiderium meum, & bonam voluntatem.

Maior es omni laude, DEUS meus; & ob id
gaudeo: quia cuiuslibet obsequii omnes puræ crea-
turæ præbere tibi quocumq; modo conantur, lon-
gissime impar est Dignitati, & Magnitudini tuæ,
Bonitati & Misericordiæ tuæ.

Desidero, Domine, ut laus tua semper sit in oro
meo. Lingua autem deficiente, omnis respiratio
mea, sit laudis tuæ significatio: corpore vero ex-
tincto, & in pulverem redacto, laudes tibi infini-
tas dicant, minutissima quæque pulveris grana,
unquæ ad extremum Iudicii diem.

Añus Oblationis.

O Quantum sumus tibi debitores, Domine
DEUS noster, tanto redempti pretio, tanto
salvati dono, & tam glorioso adiuti beneficio?

O quantum à nobis miseris es amandus, bene-
dicendus, laudandus, honorandus, & glorificandus,
qui sic nos creasti, sic salvasti, sic sublimasti?

Tibi tempore debemus, omne quod possumus,
omne quod volumus, omne quod sapimus.

O si aliquid haberem in toto mundo, quod da-
rem tibi, & gratum foret oculis tuis?

Quid vis habere, celeste mi Domine? Bono-
rum inordinatam vim; non egro. Nemo diuor te, &
adhuc aliquid postulas à me?

Volo, inquit, totum habere: Da te mihi, &
totum dediti.

Totus,

Totus, quantulus sum, totus tui solius juris esse volo: nec habere me, nec velle alium Dominum, præter te unicum, protestor.

Cui enim fructuosius, cui iucundius, & honorabilius me, & cor meum dare possum, quam tibi, qui solus sufficis mihi, qui totum te impendisti mihi?

Tibi, tibi, dilectissime DEUS meus, tibi corpus & animam meam, tibi cor & omnes potentias, ac sensus meos, tibi quidquid sum, quidquid possum, cum omnibus, quæ quomodocumq; ad me, sive in præsentem, sive in tota æternitate pertinere possunt, quanto possum affectu, dono & resigno.

Certè, si universa, quæ in cælis, & quæ in terra sunt, non tua, sed mea essent, hæc darem tibi. Sed præcipuè, ô Rex cordium optatissime, qui dicis: Fili præbe mihi cor tuum: devoveo tibi, & nunc trado tibi cor meum, ut nunquam mihi illud reddas: sed tu pro corde in me recondaris, ut motu, & calore tuo vivam.

Excludo à corde meo, quidquid tu non es: in te solo omnia gaudia, & desideria cordis mei repono: tu solus potes satiare cor meum.

Illabere precor te, illabere in penetralia cordis mei: irrumpè in cor meum, & vim facias potentissimè, ut amem te. O quando hanc vim patiar! Tu solus dominare cordi meo; tibi soli, tibi cor meum pateat.

Tu ductor, tu sis custos cordis mei, ut exardescat siti solius Bonitatis tuæ, & ut repellat omne, quod adversatur sincerissimo amoris tuo. O

O Spes firmissima cordis mei! certè adhærere tibi omni bono meo, bonum est mihi, & ponere in corde tuo fidelissimo omnem spem meam.

Actus desiderii videndi DEUM.

O Benignissime JESU, qui pro immensa pietate, & misericordia tua, pretioso sanguine tuo, vitaliq; morte tua, comparasti mihi cœlestem illam hæreditatem; nè me, quæso, excludas ab ipsa, digneris me perducere ad te ipsum, qui es summum & incommutabile bonum meum.

Dulcissime DEUS, ego tecum esse, amabilemq; faciem tuam intueri vehementer exopto. Et quando id mihi continget?

Quando ab hoc exilio, in cœlestem illam & veram Patriam meam revertar?

Credo, Domine, quod non video. Credo opes, delicias, & jucunditates cœli esse immensas, atque æternas.

Credo, te summam increatamq; pulchritudinē, ac dulcedinem esse, à qua omnis pulchritudo, & dulcedo creata profluit; sed te nondum video.

Præsta Domine, ut permanendo in eo, quod credo, & non intueor, merear aliquando intueri, quod credo.

O JESU mi chare, quando quæso, corpus meum (te perimente) revertetur in pulverem, & anima mea refluat in te suam originem?

Quando in te, ô Pax mea dulcissima! obdormiam

miam & requiescam, ut apertè contempler tuam ineffabilem gloriam?

Quando plene aspirabit mihi mellifluæ tuæ Divinitatis flagrantia, & exorietur tuæ manifestæ visionis dies sempiterna?

O quàm bonum est dilecte mi, te clarè videre, te habere, te in æternum possidere!

Eja tu mihi concede, ut miseram hanc vitam in tua gratia, atq; amicitia feliciter finiam.

Dulcis JESU, in hora exitus mei, benedic animæ meæ, & mortem meam involve vitali morte tua, quæ est charissimum sædus, firmissimumquè pactum reconciliationis tuæ.

Tunc mitte ad me fidelem adjutricem MARIAM Virginem, Matrem tuam amabilem, & stellam maris inclytam: ut conspectâ hîc præclarâ rutilantiq; aurorâ, cognoscam te solem justitiæ mihi jam propinquum esse.

Dic tunc animæ meæ: Ego Creator, Redemptor & Amator tuus, per angustias mortis quæfivi & acquisivi te: semper mecum eris, noli timere.

Eja præcellens gemma Divinæ nobilitatis, & elegans flos dignitatis humanæ, JESU svavissime, tu me hinc migrantem, benignè recipe in beatam domum æternæ pacis, & claritatis tuæ.

Ibi, ô Salus mea unica! visu mellifluæ præsentiae tuæ consolare me.

Ibi in spiramento svavissui spiritus tui, attrahere & imbibere me.

Ibi gustu charæ acquisitionis, quâ me redemisti, recrea me. Ibi

Ibi per osculum perfectæ unionis, in perpetuam tui fruitionem immerge me ut vivam de te, & exultem in te, tibi quæ hostiam laudis reddam sine fine, Amen.

PRO FERIA SEXTA.

Actus amoris DEI ob beneficium Sanctificationis, seu justificationis.

O Amabilissime DEUS, quantum dilexisti me? testantur ineffabilia & innumera, quæ mihi largitus es.

Ecce ex tot millibus, quos oblivioni dedisti, elegisti me ut essem: & ideo creasti me.

Ecce per unigenitum Filium tuum Redemptorem nostrum, à servitute diaboli, ab æterna damnatione à peccatis & ab omnibus malis liberaisti me.

Ecce ut redemptio, & mors unigeniti Filii tui, efficaciter mihi prodesset, ad Ecclesiam tuam, & veram fidem, & Religionem me vocare dignatus es.

Ecce per Spiritum Sanctum ob merita dilecti Filii tui, in Baptismo sanctificasti me: hoc est, à peccato originali purificasti, & mundasti me, & in filium tuum adoptasti: hæredem regni cœlestis, participem gratiæ tuæ, & amicitiae fecisti.

Ecce, qui postquam usum rationis attigi, multis & infinitis, gratiam Baptismi, & sanctitatem, & iustitiam peccando amisi; tu pro magnitudine misericordiæ tuæ, quotidie peccantem, & te multipliciter offendentem tolerasti, à damnatione præfer-

præservasti, ad te sæpius revocasti, illuminasti, compunxisti, attraxisti, & redeuntem ad te benignè recepisti, justificasti, & gratiam amissam restituisisti.

O Dignatio! ô Misericordia!

O quomodo cor meum non est ardens in me, dum hæc cogito!

O Amabilissime DEUS meus, ostende mihi, quantum teneor diligere te, quantum laudare, quantum placere tibi, innotesce mihi.

Aperi mihi ostium luminis tui, ut videam, & cognoscam, & confitear tibi in toto corde meo; quia misericordia tua magna est super me.

O quomodo non capior amore tuo? quomodo aliquid cogitare possum, nedum amare, præter te?

Amo, amo, & coram cælo, & terra, & omni creatura, te amare æternum volo, & nihil desidero, præter te, nihil volo extra te.

O Si te solus ita amarem, sicut te amant omnes iusti in terra, & Sancti in cælo!

Gratulor infinitæ bonitati tuæ Divinæ, ô DEUS meus dilectissime, quod adæquatè amari tantum, quantum amabilis es, nonnisi à te ipso possis.

Et gaudeo, quòd ameris à te amore infinito Divino.

Gaudeo, quod ames te, quantum amari dignus es; quòd ames te, quantum amari potes, & quantum amare potes. Offero tibi hunc eundem amorem tuum, pro amore meo.

Doleo, quòd, cum tantum amare te non possum,
P quantum

quantum amari dignus es, ne quidem tantum te amem, quantum amare te possum, si serio vellem.

Da mihi, Domine, ut id valde velim: da, ut charitate perfecta te diligam, o bonitas infinita! tunc autem ex parte mea perfecta charitate te diligam, si te tantum dilexero, quantum id mihi possibile est.

Non possum te tam perfecte diligere, quantum diligi potes, qui infinite bonus es; da saltem, ut tantum diligam, quantum possum; da, ut beatos illos cives imitatus, quam frequentissime, & quam ardentissime possum, cor meum ad te elevem, & ferar in te, amando te.

Actus Laudis, seu Gratitudeis.

O Amantissime DEUS meus, quid retribuet tibi anima mea, insignita tua imagine, redempta Christi sanguine, desponsata fide, dotata Spiritu Sancto, & ab eodem Sanctificata, quid, inquam, retribuet tibi, pro tot beneficiis misericordiae tuae?

Benedicat te tota substantia animae meae, & corporis mei.

Glorificent te omnia interiora mea.

Conjubilent tibi omnia desideria mea: Tu laudabilis: Tu gloriosus in saecula.

Benedicant, glorificent, & magnificent te pro me omnia mirabilia opera tua.

Benedicant te magnae miserationes, & misericordiae tuae, infinita beneficia tua, mihi a te, o

DEUS

DEUS cordis mei, impensa, & uniuersæ creaturæ.

Tu ipse DEUS, & misericordia mea: tu pro omnibus bonis, quæ fecisti, facis, & facturus es mihi, persolve pro me tibi metipsi laudes æternas, quales potes, & seis congruere gloriæ tuæ, & honori Maiestatis tuæ.

Nulla sufficit dignè laudare te creatura: Tu solus tibi sufficis.

Tu solus magnus, & laudabilis. Tu solus dulcis, & amabilis.

Benedicat te igitur pro me, gloriosum & admirabile Nomen tuum DEUS meus, & laudet te Maiestatis tuæ imperiale decus.

Benedicat te immensa gloria tua, & laudet te infinita Potentia tua.

Benedicat te justorum iudiciorum tuorum, & æternæ Sapientiæ tuæ inscrutabilis abyssus.

Benedicat te multarum miserationum tuarum infinitus numerus; & laudet te omnium misericordiarum tuarum immensum pondus.

Jubilent tibi omnia pietatis & bonitatis tuæ viscera.

Jubilet tibi tua immensa charitas.

Jubilet tibi, totius tuæ beatitudinis incomprehensibilis magnitudo.

*Actus desiderii in æternum laudandi &
videndi DEUM.*

O Dulcissime DEUS meus, quando annectar illis Sanctorum laudibus, qui tibi incessanter proclamant illud ineffabile Sanctus,

P2 Sanctus,

Sanctus, Sanctus: ut cordis mei jubilus consonet in idipsum laudationis genus.

O quanta & qualis jubilatio, ubi uni & Trino DEO, ab una & Trina Deitate, consonat summa & æterna vox laudis, & gratiarum actionis!

O DEUS cordis mei, ibi, ibi, etiam nunc satisfaciat pro me tuæ jubilationis organum, pro omni bono quod fecisti mihi, in creatione, redemptione, & sanctificatione.

Adjunge me illi laudationis choro, ut medulla cordis mei, indefessè jubilet tibi.

Fac, ut in aspectu Divinissimi vultus tui, repletur gaudio cor meum, & lingua mea perpetua jubilatione.

O quàm gloriosus locus habitationis tuæ, ubi tu DEUS altissimus, super omnia præsides in tua Majestate.

Concupiscit, & deficit virtus animæ meæ super introitu gloriæ tuæ.

DEUS, DEUS meus, cordis mei amor, & jubilus, refugium, & virtus, gloria mea, & laus mea, DEUS, ô quando laudabit te anima mea in Ecclesia Sanctorum?

O quando oculi mei videbunt te DEUM meum?

O quando tribues mihi desiderium animæ meæ in manifestatione gloriæ tuæ?

O quando contrito laqueo mortis hujus, sinè medio, videbit te & laudabit unica mea?

Tunc ô anima mea, tunc videbis & affluet & mirabitur, & dilatabitur cor tuum, quando operiet

riet te inundatio misericordiæ & charitatis Divinæ, omnipotentia, bonitatis & Sapientia, tunc torrente Divinæ potentia seu voluptatis potaberis, tunc calice visionis Divinæ inebriaberis.

Petitio lacrymarum in signum Amoris DEI.

O Dulcissime DEUS meus, dum interea in terris vitam hanc mortalem duco, sicut desidero, sic tota mente mea peto: da mihi amorem tui Sanctum & castum, qui me repleat, teneat, totumq; possideat.

Da mihi evidens signum amoris tui, irriguum lacrymarum fontem jugiter emanantem; ut ipsæ quoq; lacrymæ, in me testentur tui amorem; ipsæ prodant, ipsæ loquantur, quantum te diligit anima mea: dum præ nimia dulcedine amoris tui, nequit se à lacrymis continere.

O quomodo gemere, & flere debet talis anima, quæ te toto corde diligit, tequè toto desiderio, videre concupiscit?

O unica spes miserorum, præsta mihi hanc gratiam propter te, & propter Nomen Sanctum tuum: ut quoties de te cogito, de te loquor, de te scribo, de te lego, de te confero: quoties tui reminiscor, tibi assisto, laudes, & preces, ac sacrificium offero: toties obortis lacrymis in conspectu tuo copiosè & dulciter fleam: ita, ut efficiantur mihi lacrymæ meæ panes die ac nocte.

Tu Rex gloriæ, & omnium virtutum Magister, docuisti nos verbo & exemplo gemere, & flere

dicens: Beati, qui lugent: quoniam ipsi consolabuntur.

Tu flevisi defunctum amicum, & lacrymatus es valde super perituram civitatem.

Rogo te, bone JESU, per illas pretiosissimas lacrymas tuas, quibus mirabiliter nobis perditis subvenire dignatus es, da mihi gratiam lacrymarum, quam multum desiderat, & appetit anima mea: quia sine dono tuo, non possum habere eam, sed per Spiritum Sanctum tuum, qui dura corda peccatorum mollit, & ad fletum compungit.

Da mihi gratiam lacrymarum, sicut dedisti Patribus nostris, quorum vestigia debeo imitari; ut plangam me in omni vita mea, sicut ipsi se plangerunt nocte ac die.

Licet me totum tibi obtulerim, opitulante gratia tua: in multis tamen quotidie offendo, propter nimiam fragilitatem meam.

Da ergo mihi gratiam lacrymarum, benedicto & amabili DEUS, præcipue ex multa dulcedine amoris tui, & commemoratione misericordiarum tuarum, præpara hanc mensam famulo tuo in conspectu tuo, & da mihi in potestatem, ut quoties volo, satietur ex ea,

Tribue, pro pietate, & bonitate tua, ut iste calix inebrians, & præclarus, satiet sitim meam, ut inhiat tibi spiritus meus, & ardeat mens mea in amore tui, oblita vanitatis & miseriæ.

Audi, DEUS meus; audi, lumen oculorum meorum: audi quæ peto, & da, ut petam, quod audias.

Pie & exorabilis Domine, nè efficiar mihi inexorabilis propter peccata mea: sed propter bonitatem tuam, suscipe preces servi tui, & da mihi effectum petitionis meæ, & desiderii mei, precibus & meritis, gloriosæ Virginis MARIE, Dominae meæ, & Omnium Sanctorum.

PRO DIE SABBATI.

Actus amoris DEI, ut finis nostri ultimi.

O Bone DEUS, qui es principium, & finis ultimus noster. Tu enim per omnipotentiam tuam creasti, & fecisti nos, & non ipsi nos. Tu propter teipsum, & gloriam tuam creasti me, ut te in hac vita laudarem, amarem, tibi quæ, mandata tua servando, & voluntatem tuam faciendo, servirem, & ut in cœlo æternam beatitudinem, quæ in clara visione tui consistit, obtinerem; te possiderem, & te fruerer in æternum.

Ideo, igitur me ad imaginem, & similitudinem tuam, videlicet, hominem rationalem, capacem æternæ beatitudinis, & gloriæ tuæ condidisti: media quoque necessaria ad illam consequendam providisti.

O Benignissime DEUS meus, quis sum ego, ut præstares mihi talia? qui me à te in æternum non abiecisti, quin potius mei misertus, ac me tenerissime diligens ad eum finem, cujus gratiâ Angelos condidisti, nempe ad te, per omnem æternitatem possidendum, & fruendum, creasti.

P4. O quan-

O quantum beneficium hoc est, quod mihi præstitisti! O quam magni æstimandum!

Ego autem ingratiſſimus hucusq; fui, qui non conſideravi, non diligenter in animo expendi, hanc tuam ſpecialem gratiam, & amorem erga me tuum, ex quo me ad tam ſublime faſtigium gloriæ æternæ, ut in miſericordia tua, & in meritis Chriſti Domini noſtri ſpero, prædeſtinasti.

Et ideo minus curavi, ut ad felicem illum, & ultimum meum ſinem pervenirem; propter quem tu me creaſti, qui es verum, unicum, & ſummum bonum meum.

O quanta hæc cordis mei veſania! quanta ingratitudo.

O DEUS meus, omni amore, honore, & reverentiâ digniſſime, doleo ex toto corde, ex amore tui ob hanc meam ingratitudinem: exnunc emendationem propono.

Ne deſpicias me, quæſo, benigniſſime DEUS; propter amorem tuum; nec proiicias me unquam à facie tua.

Da, Domine mi, ut ſic te amantem, prout vis, redamare poſſim.

Ecce Domine, coram te eſt cor meum, deſiderat te amare ſuper omnia, ſed per ſe non poteſt.

Admitte me intra cubiculum amoris tui, peto, quæro, pulſo.

Langvet anima mea fame amoris tui, refocilla eam: Satiety dilectio tua, impingvet eam affectus tuus, impleat eam amor tuus: occupet me totum, & poſſideat me totum.

Hæc

Hæc sunt suspiria, quæ sacrifico tibi, hæc desideria cordis mei, quæ offero tibi.

Accende, quæso, cor meum vehementer in amorem tui, ut diligam te, ex penitissimis medullis animæ meæ.

Da, Domine mi, ut ego totus, dulcedine amoris tui plenus, totus flammâ sanctæ charitatis succensus, diligam te ex toto corde meo, & ex intimis præcordiorum meorum.

Diligam te, ô suavissimus amator: diligam te ô unica salus animæ meæ: diligam te, quia prior dilexisti me.

Præsta, ô dulcissime DEUS meus, ut magis, magisque te amem: valida vis amoris tui, funditus à me excutiat pondus omnium terrenorum desideriorum, & indefinenter currere me faciat, ad te desiderabilissimum finem ultimum meum.

Vilescant mihi omnia transitoria & terrena. Tu solus placeas: te solum desidero, ad te anhele; concede, ut te inveniam, inventumque teneam, & brachiis suavissimi amoris tui arctissime constringam.

Utinam te mihi dones, & me tibi intimè unias!

Utinam te unicum bonum meum, post hanc vitam, possideam, & te fruam in æternum!

*Actus gratitudinis pro beneficio vocationis
ad statum Religiosum.*

ET quoniam inter alia media salutis, vocasti me, Domine DEUS meus, ad statum Religiosum, ut in eo tibi serviens facilius perveni-

venirem ad finem illum, ad quem me creasti, ideo mille laudibus te extollo, & immensas tibi gratias refero.

O Charitatem! O Infinitam bonitatem!

Et quid unquam oculis Majestatis tuæ placuit in me?

Quid boni ego feci? quid merui? nihil. Sed vox sanguinis tui, ô JESU, ô JESU, clamavit ad DEUM Patrem, & inveni gratiam in oculis ejus.

Et nunquid sunt, qui dicunt? Quare hic eligitur & nos derelinquimur?

Nec habeo, quid dicam? Misericordias Domini in æternum cantabo.

Quantum enim illud beneficium fuit, quando me bonitas tua, de vana mea conversatione, ad tuam cœlestem, de sæculo nequam, ad hanc sacram Religionem vocavit?

DEUS meus tu, & confitebor tibi: DEUS meus tu, & exaltabo te.

Tradendus eram inferno, non istud fecisti: potius magis post tot injurias, exaltasti.

Quot sunt, quos oppressit mors, in fervore peccatorum suorum?

Quot sunt, qui nunc in flammis infernalibus cruciantur?

Quid & de me factum fuisset, si me sic ad tremendum tuum judicium vocasses?

O Altitudo judiciorum tuorum! O magnitudo misericordiæ tuæ?

O Misericordia! ô Redemptio mea! Video me tantum

tantum tibi debere, quantum deberem, si me jam in infernum præcipitatum ex inferno liberâsses.

Benedicta illa hora, quâ me sic de tabernaculis peccatorum tulisti, & annumerasti me cum generatione quærentium faciem tuam.

Benedicta illa hora, quâ sic ab inferno eduxisti animam meam: salvasti à descendantibus in lacum animam meam.

Benedicta illa hora, quâ me sic in filium tuum, & in Templum tuum consecrasti.

Verè locus iste Sanctus est. Verè DEUS in loco isto. Hic enim sub eodem tecto, in Sanctissimo Sacramento cohabitas mihi, & ego tibi: habeo hic pignus vitæ æternæ: habitas mecum in terris dans mihi teipsum in arrham, quod tecum habitabo in cœlis.

Beati & ter quaterq; beati, qui habitant in domo tua Domine, in sæcula sæculorū laudabunt te.

Actus Laudis.

Sis benedictus & tu infinites, Domine DEUS meus, in æternum, qui me ex innumeris mundi periculis liberaſti, & ad hanc Sanctā Religionem Sanctissimæ DEI genitricis Virginis Mariæ vocâſti.

Sis benedictus, qui me ad illam ineffabilem gloriam æternam, & ad te fruendum in æternum creasti.

Pro quibus, & pro omnibus aliis beneficiis tuis, cuperem Domine te nunc laudare, benedicere
&

& glorificare, tali ac tanta laude, sicut te decet, sicut tibi placet, & sicut tu laudari maximè delectaris: sed quia ad hoc præstandum infirmus sum.

Laudet igitur te, & benedicat pro me, ô DEUS vitæ meæ, tuæ imperialis Trinitatis Divinitas, essentialis unitas, personalis proprietas, dulcis societas, mutua & intima familiaritas.

Laudet te, & benedicat, tuæ incomprehensibilis dignitatis sublimitas, gloriosa & perfecta felicitas, incontaminabilis puritas, & fontalis sanctitas.

Laudet te: & benedicat tua incommutabilis æternitas; infallibilis veritas, & inæstimabilis charitas.

Laudet te, & benedicat tua æterna securitas, mira serenitas, & plena suavitas.

Laudet te, & benedicat Sanctissimæ Humanitatis Domini nostri JESU Christi caro mundissima, ipsius anima præclarissima, ejusq; cor dulcissimū.

Laudet te, & benedicat pro me gloriosissimæ Virginis DEI genitricis Mariæ dignissimum cor, & anima.

Laudent te, & benedicant pro me, septem Spiritus beati, qui tibi adsunt, ante conspectum throni tui.

Laudent te, & benedicant, infinita Sanctorum Angelorum castra, omnes Patriarchæ & Prophetæ, gloriosus Apostolorum chorus, candidatus Martyrum exercitus, laudabilis Confessorum numerus, Sancta & immaculata Virginum turba, & omnis electorum tuorum, cohors.

Laudent

Laudent te, & benedicant omnia cœli sidera, & universa mirabilia opera tua, quæcunq; cœli, terræ, & abyssi complectitur circumferentia.

Laudet te, & benedicat cor meum, & anima, cum tota carnis & spiritus mei substantia, ex totius universitatis efficacia.

Tibi ergo fit benedictio, & claritas, & Sapientia, & gratiarum actio, honor, virtus, & fortitudo DEO nostro in sæcula sæculorum, Amen.

Actus desiderii videndi DEUM, & intensissimi amoris DEI in morte.

O Domine DEUS meus, ut tanto beneficio, tantæq; dignationi & charitati tuæ non sim ingratus: sed contendam assequi finem, propter quem me, tam nobiliter creasti, volo ex puro amore tibi servire, te amare, tuæq; mandata quàm perfectissimè observare.

Et ex hoc momentò temporis, dirigo omnes meas cogitationes, opera, & desideria, ad hunc finem, nequè fatigabor, aut desistam, donec ad eundem perveniam.

Unde nihil magis mihi curæ, aut cordi erit, quàm ut jungar tibi visione, amore, gaudio, in qua unione consistit, & meum summum bonum, & summa tui gloria.

Tu, Domine, fecisti nos ad te, & inquietum est cor nostrum, donec perveniamus ad te.

Tua sola majestas cor nostrum potest implere, tua bonitas, & dulcedo satiare.

Capaci-

Capacitatem nostram, nec dignitates, nec divitiæ, nec voluptates neq; universa bona creata replent, sed unum tantum bonum infinitum & increatum, quod tu ipse es, replere potest, & felicem efficere.

Cum igitur, te meum ultimum finem possidero, tunc beatus ero.

O Si contingat mihi, quod cupio!

O DEUS meus, tu es mea optatissima possessio, sine qua aliud quidquam in coelo, & in terra nec spero, nec volo.

O Pater misericordiarum, fac ut maneam tecum in Regnum tuum, tibi unitus intimè in æternum: fac ut inuicem faciem tuam, & laudem dicam Nomini tuo, in sæculum & in sæculum sæculi.

O Quando lætificabis me tuâ præsentia?

O Quando dicetur mihi: Convertere in requiem tuam, quia Dominus benè fecit tibi?

Utinam audiam vocem illam jucundissimam:

Euge serve bone, & fidelis, intra in gaudium Domini tui!

O Utinam intrem in gaudium Domini mei, non ut gaudeam de felicitate mea, sed de te, tuâque gloria, propter te, qui es omne bonum, & diligam te toto corde meo, & anima mea!

O Utinam hora mea consummationis signetur, sigillo tuæ dilectionis, caractere tuæ æternæ propitiationis, ubertate tuæ benedictionis!

Utinam perveniat anima mea ad te summum bonum, sempiternæ tuæ fruitionis & possessionis?

Tunc

Tunc satiabor, tunc adimplebor de torrente illius voluptatis, cum videbo DEUM meum, amorem meum, in quem tunc deficit cor meum.

O Amor dulcissime DEUS meus, quis mihi det in ultimo vitæ meæ puncto ardere immensis ignibus amoris tui, ut qui aliquando remissus in amore tuo fui, tunc Seraphico amore tui compensem?

O Si tantum in puncto resolutionis meæ conciperem tui amorem, qui solus sufficeret separare animam meam à corpore meo!

Da, clementissime DEUS, da, ut non tam corporalis acerbitate doloris, quam ardentissimi amoris tui actu expirem.

O Misericordissime ac liberalissime DEUS, rogo te, ut des mihi ad extremum vitæ meæ instans usum rationis, quin & sensuum, ut te etiam in extremo vitæ puncto super omnia diligam, super omnia æstimem, super omnia cupiam, tanquam supernaturale bonum, ultimumquæ finem meum; & ex iisdem motivis, dolendo de peccatis meis, in manus tuas, & Sanctissimæ DEI genitricis Virginis Mariæ, & Angelorum, atq; Patronorum Sanctorum meorum, spiritum meum tradam.

Fac in hora mortis meæ, benignissime DEUS meus, ut amor & sitis te videndi & laudandi fortis, superet in me vim mortis. Tu ipse in illa angustia, sis mihi porta & patria, quousquæ me perducas, ad intima cœli tua gaudia.


O Pax mea, DEUS meus, quando obdormiā in te? Obdormiā, obdormiā, oro, in corde tuo, & ibi requie-

requiescam, ut non commovear in æternum.

O Svavissima requies cordis mei, Dulcissime JESU, illa tua oratio ad Patrem: In manus tuas commendo spiritum meum: prosit mihi in hora mortis meæ, comitetur me, extremum spiritum meum agentem.

Pateant mihi tunc viscera misericordiæ piissimi cordis tui.

Patens cor tuum benignissimum, sit mihi locus refugii: ibi vivere, ibi mori desidero.



EXERCITIUM VARIORUM AFFECTUUM ET ACTUUM VIRTUTUM,

Compendiosè cum magno merito nostro faciendorum in quacunq; Perfectionis via, quod vocatur

Pactum cum DEO factum.

Quia non debemus esse contenti aliquot actus certarum virtutum in die elicere, sed necesse est conari, ad singulas respirationes, innumerabiles actus variarum virtutum exercere, ut magis Domino DEO placeamus, & plura merita lucrari valeamus. Verùm quia hoc est factu difficilè: ideò aliqui spirituales & devoti viri invenerunt modum facilem, quo possemus hoc consequi. Svadent, videlicet, facere cum Domino DEO certum Pactum, in quo intentionem & desiderium nostrum declaramus, & protestamur nos velle

velle tot actus, tot virtutum, toties ejus Majestati Divinae offerre. Quod exercitium dici satis non potest; quàm admirabile continet in se arcanum, quo mereri multum, modico tempore, & parvo labore possumus.

Ad hunc igitur finem aliquot pacta hîc posita sunt, quibus uti, vel omnibus, vel aliquibus, unicuiq; juxta suum beneplacitum licebit.

P A C T U M I.

O Sanctissima Trinitas unus DEUS, Pater, Fili, & Spiritus Sancte, qui me propter te ipsum creasti, profiteor titulis infinitis, me esse & velle esse servum tuum: & ideò tibi placere semper desidero; atq; te amare, laudare, adorare, de te cogitare & loqui, & omnes possibiles tuæ Divinae Majestati gratos affectus, erga te exercere continuos, & sinè cessatione percipio. Verùm quia præsentis vitæ ratio id me perficere non permittit: ideò non ex aliqua præsumptione, sed ex sola dignatione tua & bonitate, cui confido, hanc meam voluntatem te acceptaturum, neq; ex affectu meo tepido, sed ex ardentissimo affectu Beatissimæ Virginis MARIÆ, & omnium Angelorum, atq; Sãctorum, justorum quoq; Universorum: tale pactum meum tecum in eo pro tota vita mea, & statuo, in quo intentionem & desiderium meum declaro, quòd ad omnes cogitationes, verba, & opera mea, ad omnes cordis, corporis, & animi mei actus & motus, ad omnes respirationes & in-

Q

spirati-

spirationes meas, etiam ad singula temporis momenta, millies, millies, millies, immò milliones, milliones milliones immò infinities, infinities, infinities hos erga te Dominum ac DEUM meum affectus, & ex puro amore tui, atque ex solo desiderio placendi tibi, hos virtutum actus exercere volo: videlicet.

Toties credo te esse qui es: credo te unum in essentia & trinum in Personis, Patrem, Filium, & Spiritum Sanctum, credo te infinite Potentem, Sapientem, Bonum, Amabilem, Immensum, Æternum, & infinitas perfectiones habentem.

Credo tibi, ut infallibili veritati: & ideò credo omnia & singula quæcunque à te revelata credit Sancta Mater nostra Ecclesia Catholica.

Credo in te amando te, & omnia ad infinitam gloriam, honorem, tuumque beneplacitum dirigendo. Et paratus sum millies mortem atrocissimam pro qualibet Fidei veritate perferre.

Præterea sic omnia à te revelata credo, ut in hac fidei professione multos milliones actuum fidei, ad omnes respirationes & inspirationes meas, cuperem ejusmodi elicere, quales MARIA Virgo Sanctissima, & alii Sancti ac iusti unquam elicerunt, & elicient ad finem mundi.

Amo te DEUS meus ex toto corde, ex tota anima, ex totis viribus, ex tota mente mea; & desidero te amare quantum possum, & quantum debeo.

Amo te plusquam me: quia tu dilexisti me plusquam te: mori enim voluisti pro me.

Amo

Amo te, & consecro tibi cor meum, omnesque affectus illius, eo fine, ut nunquā cesset amare te.

Amo te plus his omnibus; quæ in mundo sunt, plus commodis & deliciis: plus gemmis & divitiis: plus omnibus honoribus: plus charis omnibus.

Utinam collectos habere possem amores omnium creaturarum, quæ amoris capaces sunt, quæ fuerunt, sunt, & erunt, & omnium possibilem, & hisce omnibus amoribus te amare!

Amo te, dulcissime DEUS meus, & paratus sum pro te omnes morbos & dolores, omnes crucces & tormenta, famem & sitim, æstum & frigus; dæmonum tentationes, & desolationes, insuper pro te pati, & mori millies, millies, millies.

Utinam amem te ut Sanctissima Humanitas Domini nostri IESU Christi, & Mater ejus Deigenitrix Virgo MARIA, & omnes Cœlites justique omnes!

O Si amem te, prout vis, & prout amabilis es, & prout tu teipsum amas!

Amo te, ô dilectissime Domine mi, super omnia, nec quidquam committam, quod sit contrarium amoris tuo, nec quod displicere oculis tuis posset; & ideo ex amore tui doleo de omnibus peccatis meis tam magnis quàm minimis.

Doleo quod unquam offenderim te summo honore & amore superdignissimum.

Detestor & abominor omnia & singula scelera mea, quia sunt offensa tua.

Q2 Utinam

Utinam te nunquam offendissem, utinam prius occubuisssem, quàm in te peccassem!

Nolo te ampliùs offendere. Paratus sum millies mori, quàm illud, quod tibi displicet committere.

Sed quoniam infinitè bonus es, ideò veniam omnium peccatorum meorum à te spero.

Præterea firmissimè spero, me tandem auxilio tuo, & bonis operibus gratià tuà præstitis, glorià sempiternà fruturum.

Nullam omninò spem salutis æternæ habere nunc in vita, aut in morte volo, præterquam in meritis Domini nostri JESU Christi, ejusquè Passionis Sacratissima.

Clementissime DEUS meus, cum sis liberalissimus & benignissimus, spero me à te obtenturum omnia ad salutem meam necessaria: videlicet, veniam omnium peccatorum meorum, quantumvis multorum & enormium, extinctionem vitiorum, victoriam tentationum, mortificationem passionum, adeptionem virtutum, ac intimam tecum familiaritatem ac unionem, in formidabili mortis adventu tuam assistentiam, contra hostes animæ meæ protectionem, finalem in gratia tua perseverantiam, deniq; cum tuis prædestinatis cœlestem gloriam, ut ibi cum omnibus Beatis amem te, & laudem in æternum.

Et quoniam præcipis mihi, Domine mi piissime, ut amem etiam proximum meum; ideò quantum possum, cupio, & volo eum amare sicut me ipsum; precorq; ipsi à te omne bonum, quò felicior atq;
tibi

tibi gratior fiat: præsertim justificationis donum, gratiam, virtutes, omnem profectum, & vitam æternam.

Parco ob amorem tuum omnibus proximis meis, qui me aliquando vel facto, vel verbo læserunt; amo illos propter te, & secundum te, & pro eis te supplex oro, da illis veniam, vitam bonam & sanctam, & gloriam.

O Domine DEUS meus, te adoro, & simul adorare te volo, & intendo omnibus Angelorum & Sanctorum adorationibus, quibus usq; modò te adoraverunt, & adorabunt in æternum: & centum millenis adorationum millionibus, quas omnes Sancti & iusti Ecclesiæ militantis faciunt; & omnibus adorationibus, quæ fieri possunt per totam æternitatem.

O Superbenedicta Trinitas DEUS meus, infinities benedico tibi: & singulis momentis dicere intendo: Benedictus DEUS in æternum.

Ultrà hoc, cupio tibi tantas reddere benedictiones, quantas mereris tu; & quantas Angeli, hominesq; omnes tibi possunt desiderare,

Immò opto in actionibus singulis, in dictis, & cogitationibus meis, quas unquam habeo, ut ego, & quotquot in orbe vivunt, tantis te benedictionibus prosequamur, quantis te unquam prosecuti sunt, & prosequentur aliquando omnes Angeli, & homines; & quantis per totam æternitatem possent te prosequi omnes creaturæ rationales, quas tu in mundis infinitis creare posses.

O inæstimabilis DEUS meus, te super omnia pretiosa mundi appetio, & tanti æstimo, quanti omnes Angeli Sancti, & Beati, ac universæ simul creaturæ te nunc æstimant, æstimavêre, & semper æstimabunt: idq; modis illis omnibus, quibus mereris æstimari, & in pretio infinito haberi.

Volo, desidero, & milies ac milies opto, totisquè viribus procurare per te propono, ut omnes ac singulæ rationales creaturæ te cognoscant, adorent, glorificent, ament, & ex puro amore tibi serviant, ac perfectè obediant.

Gaudeo, DEUS meus, de eo quod es, quod operaris, & de omni bono tuo, & pleno Domino ac Beatitudine, deq; tuo honore & voluntatis tuæ impletionem, & semper gaudere volo.

Gaudeo, & pro mea beatitudine ducō, & reputo, quod tu habeas infinitam gloriam, opulentiam, potentiam, sapientiam, & omnium bonorum cumulum cum æterna securitate.

Gaudeo, quod tu Sanctis & Electis omnibus in æternis amoribus es, & quod tu infinito amore temetipsum prosequeris.

Gaudeo & de honoribus illis, qui tibi ab omnibus Sanctis in cælo, & per universum orbem terrarum, à cuncto populo Christiano exhibentur, & æternum exhibebuntur.

Gaudeo etiam, Domine, propter opera bona, quæ unquam facta sunt, hodie fiunt, fientq; deinceps, propter amorem tui, aliq; omnia quæ fieri possunt ab ijs quos creasti & creare potuisses, idq; eâ, quâ possibile est, perfectione. Gaudeo

Gaudeo ob ea, quæ Dominus noster JESUS Christus, Virgo MARIA, Sancti Angeli, Patriarchæ, Prophetæ, Apostoli, Martyres, Confessores, Virgines, omnesq; Sancti & fideles omnes egerunt, ad gloriam tuam, necnon ob amorem, quo te æternum prosequuntur, & laudes quas tibi in perpetuum dicent.

Protestor coram te DEUS meus totaque curia cœlesti, quod in omnibus actionibus meis, cogitationibus & verbis, nihil aliud intendere, totâ vitâ meâ volo, nisi solum purum honorem, gloriam, amorem & beneplacitum tuum.

Purè propter te esse & vivere, & ex tui amore, atq; ut tibi soli dem gustum, tibiq; placeam, omnia desiderare, quærere, petere, agere, dimittere, pati vel refugere, nihil attendendo ad meum commodum procurandum, vel damnum vitandum, decerno.

Opto quoque ut haberem millies mille vitas, quas omnes in augmentum gloriæ tuæ impenderem; & ut res mundi omnes verterentur in voces & lingvas, quæ te possent glorificare.

Cupio præterea omnes actiones meas exercere, eo studio gloriæ tuæ, quo in te feruntur modò, ferenturque in æternum Beati in Cœlo & fideles in terra.

Et quoniam ob actiones meas imperfectionibus plenas, indignum me duco, qui aliquid in commune conferam ad gloriam tuam, humillimè tibi supplico, ut tu te glorificare in me velis, omni

modo quo fieri possit ad gloriam tuam.

Insuper cum sim indignus neq; ad modum Angelorum, & Beatorum, neq; aliorum insignium tuorum fervorem te glorificare, illud saltem in votis habeo, ut te glorificem cum omnibus terræ vermiculis, & vilissimis aliis creaturis, quæ & ipsæ suo quo possunt modo, te glorificant.

Complaceo mihi, dulcissime DEUS meus, in omnibus perfectionibus tuis, in excellentiis universis, in illa quoq; divinissima communicatione, quæ inter tres Personas Divinas intercedit: in illa præterea complacentia, quam tu, Domine DEUS meus, de te ipso habes; & gloria illa, quam Sancti omnes reddunt tibi, reddentque in cælo, & in terra.

Et his complacentiis infinito quodam modo, magis acquiescere volo, quam aliis omnibus oblectamentis, quibus frui possem, modo etiam perfectiori, quam sive sensus, sive animus meus, in hac vita desiderare possent.

Displicent mihi quoque omnia quæ tuæ displicent Divinæ Majestati, sive in me, sive in aliis, sive in tempore hoc, sive in æternitate, usq; adeo, ut si quidpiam nosses in me, aut proveniens à me, sive cogitatio illa foret, sive verbum, sive actio, sive motus quicunq; etiam levissimus, qui ad gustum tuum non esset, eum nihil cunctarer quam primum rejicere à me, prout & nunc jam rejicio.

Desidero, ô Desiderium cordis mei DEUS meus! quantumvis maxima facere amore tui, sciens
quia

quia tu pro factis desiderata accipias, cum impotentias nostras intueris, quæ efficere ea nos vetât.

Desidero ex toto corde meo propagari ubique imperium tuum: & vellem omnes potentiae animae meae, omnia membra corporis cum omnibus operationibus ejus, totidem essent ora ac tubæ, quæ prædicarent ubique locorum, solum te unice dignum esse omni amore & honore, & cui ab omnibus serviat.

O si tam essem. eloquens, & in persuadendo potens, quemadmodum vellem, omnes continuo monitis meis sanctos efficere, & ad eum amoris tui gradum proveherem, ut cordibus singulorum, tui amoris tantum inesset, quantum unquam inerat cordi Sanctissimæ Humanitatis Christi Domini nostri, & Beatissimæ Virginis MARIE Matris ejus, Beatorumq; omnium atq; iustorum.

Opto habere tot corda, quot in aëre atomi volitant; quot arenæ per maris littora jacent, ut amare te valerem cordibus his universis, vel, ut dicam rectius, corde unico, quod omnibus istis æquivaleret.

Desidero habere desiderium amandi te tantum, quantum te amandi desiderium habuerunt, & habebunt omnes, qui tibi placuerunt, & placebunt ab Adamo usq; ad ultimum omnium mortalium, tibi placentium. Desidero quidquid habent Seraphini omnes, & omnes dilecti ac electi tui una cum JESU Domino ac Rege nostro, & MARIA Virgine omnium Electorum Regina.

Quòd

Quòd si aliquando hæc desideria non habuero ardentissima, opto tamen illa habere quàm maxima, & tanta quanta omnes Sancti in cœlis, & iusti in terris habuere unquam, & habebunt, & quanta vis me habere, & alios omnes.

O Clementissime DEUS meus, memor beneficiorum tuorum, quæ in me totâ vitâ contulisti, tibi pro cunctis gratias ago immortales cum omni efficacia, quam tu maximè concipere potes.

Et imprimis, gratias tibi ago, quòd me ad imaginem & similitudinem tuam creaveris; quòd me hæcenus conservaveris: quòd me per unigeniti Filii tui mortem Sacratissimam & Passionem redemeris: quòd me lavacro Baptismatis regeneraveris; ac vivum Templum, & Filium adoptivum sinè ullo meo merito, immò cum multis demeritis meis effeceris: quòd me tam multis bonis inspirationibus, cogitationibus, & desideriis benè agendi præveneris: quòd à Diaboli potestate, morte, & inferno toties eripueris: quòd è tenebris peccati in quibus diutissimè hæsi extraxeris, cum tanta suavitate & patientia præstolando poenitentiam meam, nec præcipitem in infernum agendo, sicut merebantur scelera mea: quòd deniq; cum tanta vi, & efficacia me vocaveris: quòd deniq; per tuam misericordiam & clementiam me tanquam Filium susceperis, atquè gravissima peccata mea uti piè confido dimiseris: quòd eâ salutis causâ salutaria Sacramenta institueris: quòd me, ut in bonitate tua spero, ad æternam vitam prædestinaveris:

veris: quòd me à multis malis & periculis sæpè liberaveris & præservaveris: insuper, quòd me innumeris particularibus beneficiis, quæ aliis non contulisti, affeceris, pro quibus omnibus tum naturæ, tum gratiæ, tum occultis tum manifestis, tum cognitis tum incognitis generatim & specialitè, mihi, immò & aliis omnibus creaturis, quæ sunt, fuerunt, vel erunt, concessis & concedendis donis; specialitè pro his universis, quæ hucusquè copiosissimè largitus es Sanctis Angelis, & hominibus, Beatissimæ Virgini, & Sanctissimæ Humanitati Filii tui Domini nostri; tota contentione cordis mei, totisq; viribus, infinitas tibi gratias ago, sicut infinitus est amor tuus & bonitas tua, ex qua illis nos affecisti.

Immò nesciens, neq; valens referre tibi gratias, quantas deberem & cuperem, invoco JESUM Christum Dominum nostrum, Beatissimam Virginem MARIAM, & omnes creaturas tam visibiles quàm invisibiles, ad agendas tibi pro me gratias; & illas, quas ipsæ quocunq; gratitudinis genere modoq; tibi reddiderunt, reddunt & in æternum reddituræ sunt, ego illas pro me nunc omnes tibi offero, & unâ cum illis eodem affectu, & gratiarum actione tibi gratias ago.

O Laudabilissime DEUS meus, ob tua immensa beneficia, quæ mihi, & cunctis creaturis præstitisti, & præstiturus es; & ob inæstimabilem Magnitudinem, Excellentiam, Magnificentiam, & infinitas Perfectiones tuas, toto pectore te laudo,
exalto,

exalto, magnifico, & veneror: atq; utinam hoc possim absq; cessatione præstare, semper, & in omni loco terrarum, tantum, quantum te exaltant, magnificant, honorant, honorabunt, honorarunt, & honorare potuerunt simul omnes creaturæ, & omnes, qui fuerunt, sunt, & futuri sunt.

Immò cupio simul reddere tibi omnes illas laudes, quas potuissent, possunt, poteruntvè deferre Beatissima Virgo, Sanctissima Humanitas Christi, & omnes Sancti, & tantum, quantum possunt innumeri mundi, & infinitæ creaturæ, tam visibiles, quàm invisibiles, quas omnipotens manus tua creare potest: & tantas laudes, tantos honores, desidero tibi exhibere, quantos nosti exhiberi posse, & quantos mereris.

O Dignissime DEUS meus, pro universis beneficiis tuis paulò ante recensitis, si millies me tibi singulis horis impenderem, nihilominus infinitè obstrictus ac debitor manerem.

Quare ego tam talis, qualis sum, liberè & maxima qua possum efficaciam, me tibi consacro, & per omnia in plenissimum holocaustum offero: nimirum corpus & animam: omnes vires & potentias illius; omnem capacitatem voluntatis ad te amandū, intellectus ad te cognoscendū & ad te glorificandū; omnes sensus meos, & illorū vim, functiones, & usum, oculos meos, & omnes aspectus, auditum, odoratū gustū, & tactū; omnes appetitus & operationes illorum; omnes deniq; arterias, venas, membra, & ossa corporis mei, omnes illorum facultates,

cultates, & motus vel actus; sicuti etiam omnes meas cogitationes, verba, & opera, studia, occupationes, & actus totius vitæ meæ, vitam quoque meam, tempus meum, æternitatem meam, totumque esse meum, in natura, & gratia, me denique, tanquam vilissimum & indignissimum mancipium tuæ omnipotentiae & bonitatis, & à misericordia tua totaliter dependens: atq; ex vi huius meæ donationis, nunquam per tuam gratiam revocandæ, omnia mea in perpetuum tua esse intendo, & illo cordis affectu, quo nosti fieri posse flagrantissimo, desidero.

Præcipue verò offero tibi vitam, pretiosum sanguinem, & Passionem, ac infinita merita Domini mei JESU Christi, Beatæ Virginis, & omnium Sanctorum.

Offero præterea omnia Sancta Missæ Sacrificia, quæ vel hætenus in Ecclesia peracta, vel deinceps usq; ad consumationem sæculi peragenda sunt.

Offero tibi, omnia bona spiritualia, cogitationes, verba, & opera bona, quæ fecerunt, faciunt, & facturi sunt omnes homines, qui fuerunt, sunt, futurivè sunt unquam in hoc mundo; immò omnes istas cogitationes, verba, & opera bona, quæ possent habere infiniti homines, quotq; creari possunt à tua Omnipotentia: ita ut, si possem, ex amore tuo eadem facere vellem; illâ efficaciam, quâ tu scis maximâ fieri posse, & illo modo, qui esset Majestati tuæ gratissimus.

Offero quoq; tibi, omnes pœnas, dolores, martyria,

tyria, & omnia mala pœnosa animæ & corporis, quæ passi sunt, patiuntur, & passuri sunt omnes homines, sive in mundo, sive in purgatorio, sive in inferno, secundum beneplacitum tuum; & omnia, quæ scis ab omnibus & singulis tolerari posse, non solum in hoc orbe, sed etiam in centum milibus & infinitis mundis, purgatoriis, & flammis infernalibus: ita ut, si tibi placeret, cum gratia tua, omnia talia libenter, propter amorem tuum, salutem meam,, & proximi, vellem perpeti.

Ô DEUS omnipotens, quem unum ego Dominum agnosco, tibi soli fideliter æternum servire volo: & idcirco omnes curæ meæ, eò nitentur, & voluntates tuas, ea mente exquiram, quatenus illas, cum quantâ fieri potest perfectione adimpleam.

Et nunc submitto me, ex toto corde omnibus legibus sacratissimæ servitutis tuæ, quàm ex debito tibi deferunt creaturæ omnes.

Unde exulto, quod à te uni supremo Domino servus tuus dependeam, usq; adeò ut, si fieri posset, quod ego minimè à te dependerem, vel ex hoc momento, omni illi juri talis independentiæ renuntiarem. Non enim aliud volo, quàm esse per omnem æternitatem mancipium tuum.

Quo in proposito, volo esse tibi fidelis, & mori in servitiis tuis, in ijsq; perdurare, quacunque deum ratione me tractare volueris, & ideò si fiat, ut vultum quandoque mihi minimè benignum visceris exhibere, erit mihi ille nihilominus semper amabilis.

Ô Domi-

O Domine piissime, omni affectu cordis mei abnegato, per omnia tibi me totum resigno, & quantum per me fieri potest, perfectissime voluntatem meam in tuum divinum beneplacitum transfundo: in quo solo cupio mihi complacere, & quiescere.

Quare te rogo, velis de me, meisq; rebus omnibus disponere, quomodo, & quantum tibi placet, & videtur conducere ad maiorem tuam gloriam.

Projicio me in sinum divinæ tuæ providentiæ, abjectâ de me omni curâ, amantissime suscepturus quidquid à divina manu tua submittetur.

Unde si me vis vivere aut mori: si vis me sanū vel infirmum; si honoratum vel contemptum ab omnibus, si vis me habere consolationem vel desolationem: si felicitatem vel calamitatem, hæc omnia gratanter acceptare volo, illud semper dicendo: Domine DEUS meus, fiat voluntas tua. Ita enim submitto tuæ Divinæ meam voluntatem, sicut fecit Beatissima Virgo MARIA, & omnes fideles servi tui. Ideò nihil aliud volo nisi quod est tuæ voluntatis, quā ubi reperero, dulcia mihi erūt omnia ipse adeò infernus acceptabilis esset si ex adorandæ tuæ voluntatis decreto subire illum necesse foret.

O Bone DEUS meus, infinities amore tui renuntio omaibus hujus mundi bonis, omnibus voluptatibus, honoribus, excellentiis, & vanitatibus.

Abdico omnes creaturas, omnemq; sensualitatem, affectionem erga propinquos, omnes quoque
commo-

commoditates, curas corporis inutiles, amorem hujus vitæ & sanitatis, sensuum illecebras, omnia solatia è rebus exterioribus & naturalibus hausta; deniq; omnes hominum favores, opiniones, judicia, sermones, ac sensus; & ita vivere statuo, ac si præter DEUM atque me, nemo præterea in orbe hoc esset.

Abnego & me, ipsum, ô amantissime DEUS, propter te, & denudo me omnibus, quæ mihi intima sunt: odi animam meam, amorem proprium, omnia placita mea, judicia, & animi mei decreta, commoditates, & universa oblectamenta: fugiam æstimationem meam, & omnia illa, quæ mihi honorem conciliare possunt. Nolo unquam magnificè de me sentire, aliis præferre, hominum laudes, aut illorum favores, vel honoris delationes expectere: illud potius desidero, ut obscurus & inglorius delitescam; nec oculis aliis, quàm DEI appareâ.

Quoniam, ô Sanctissime DEUS meus, sanctitas nostra, gloria, & omnis perfectio nostra, consistit in sequela & imitatione unigeniti Filii tui Domini nostri JESU Christi, qui pro nobis factus homo, vitæ Sanctissimæ, charitatis, humilitatis, obedientiæ, paupertatis, modestiæ, mansuetudinis, patientiæ, temperantiæ, pietatis, omniumque virtutum exemplum nobis dedit, & post se, suumque ascensum in cælum, exemplar pulcherrimum illarum nobis reliquit, ut sequamur vestigia vitæ ejus Sanctissimæ: ideo firmissimè constituo tradere me hinc ejus in omnibus virtutibus imitationi, quam

quàm possum perfectissimè, conformando, & assimiliando me ipsi, quantum fieri potest.

Et quia præcipuè humilitatis virtutem nobis commendavit, dicens: Discite à me, quia mitis sum, & humilis corde: id circò amore tui, ejusq; sicut oportet humiliare me volo, & locum inter creaturas tuas capere, quem meretur, ex omnibus miserrima atquè vilissima creatura.

Affirmo me nihil esse, nihil posse, nihil scire, Quod si fateri necesse est me esse aliquid: sum equidem verissimè vermis terræ; mortuo deterior cane, sæx hominum & labes; ingratissimus & sceleratissimus omnium; indignus qui suspiciam cœlos, dignissimus autem, qui post mortem meam, vel in olido fimeto, aut sordium receptaculo defodiar.

Miror, quòd me terra sustineat, quòd cœlum fulmina in caput meum jaculari, ad puniendâ scelera meâ, desinat.

Omnibus notum facio, quòd ego sim infidelissima & ex omnibus malitiosissima creatura tua, quæ cum sit pulvis & cinis, & scelerum tetra quædam compago, digna non est aperire os suum ad alloquendum te; quæq; si ex meritò suo standanda esset, jam tu illam centies & millies, in ima inferni præcipitem dare debuisses, ut ibi violatarum legum, & præceptorum, ac voluntatis tuæ Divinæ transgressionem pœnas exolveret.

Palam profiteor me misericordiæ tuæ præ hominibus omnibus obstrictissimum esse, eò quòd

R

nullum

nullum fuisset omnino genus criminum, quamvis enormium, quo non & corpus, & animam inquinassem: quin Dæmone ipso fuisset nequior, & plura gravioraq; peccata, quàm modo sunt & fuerunt, tanta insuper, cum obstinatione, ac malitia perpetrassem, nisi me tuâ gratiâ Divinâ prævenisses, & peculiaribus tuis auxiliis adjuvisses.

Compatior dilecto Filio tuo, Domino nostro JESU Christo in terris nostræ salutis causâ passio.

Habeo intimam commiserationem super dolores ejus, afflictiones, calamitates, opprobria, contemptus, cæterasq; indignitates, quas tempore Passionis suæ pertulit; & optarem ut ambo oculi mei binis lacrymarum rivis sinè cessatione effluerent, quibus ad extremum usq; halitum palàm orbi testificarer, quantum cor meum affligit mors illius & passio: nec committam, ut in lacrymis, dolorisq; & compassionis actibus, me superent alii, qui ob tormenta, quæ passus est, ejus commiseratione tanguntur.

Renovo, ô JESU DEUS meus, omnes bonas ac pias serviendi tibi voluntates meas, & si fieri posset, in singula momenta id facere vellem, sicut tu beneficia tua, & favores erga nos tuos quotidie, immò omni momento innovas.

Renovo laudabilia animi mei decreta, itemque vota mea, piaq; desideria omnia, cum omnibus sanctis amoris actibus erga te, erga Virginem Genitricem tuam, erga Angelos & Sanctos tuos, quorum mihi conciliare favores, ut pote amico-

rum tuorum conatus sum, ut ipse acceptior tibi redderet. Insuper, cogitata mea omnia, verba omnia, omnes directas à me actiones in honorem tuum repeto, eoquē, qui mihi possibilis est modo ratifico, & innovo. Et quidquid per universam vitam meam, studio placendi tibi DEO meo, agere conatus sum, innovari in me volo.

O Pater misericordiarum, miserere mei, & omnium pro quibus me orare vis. Te supplex rogo, ut mihi peccatorum meorum veniam largiaris, meq; ab omni peccato non tantum mortifero, sed etiam minimo veniali præservare digneris.

Oro, ut elargiri mihi velis, quæcunq; oratio Dominica, quam tu nos edocuisti, comprehendit. Oro, ut dones mihi cognitionem tui ac mei. Oro donum perseverantiæ finalis. Oro dona Spiritus Sancti, & omnes virtutes, præcipuè autem oro humilitatem, charitatem: obedientiam, castitatem, cordis puritatem, patientiam, mansuetudinem, & alias omnes, quæ tibi sunt acceptissimæ.

Oro etiam, non solum pro me, verum etiam pro Religiosis omnibus, ut nos facias pertingere ad altissimum perfectionis gradum, utq; contingat nobis id omne, quod est ad maiorem tuam gloriam. Deniquè ut post periculosa ærumnosæ hujus vitæ certamina, læti victoriâ ex hostibus reportatâ, templum gloriæ ingredi valeamus.

Obsecro Domine DEUS meus, per infinitam bonitatem tuam, fac ut, qui ad hoc usq; momentum non amavi te, incipiam deinceps sic diligere,

ut fieri in hac vita mortali potest, quo præteritas jacturas omnes, vel hac ratione resarciam.

Commendo tibi omnia negotia mea, sanitatem meam, cognatos & amicos meos, benefactores & inimicos, & omnes, qui molestiâ qualicunq; me affecerunt, & qui aversionem à me habent, eos denique, qui se precibus meis commendarunt, & pro quibus orare aliquando proposui.

Præterea omnes hujus terræ mortales tibi commendo, nominatim verò illos, qui in gratia tua sunt, ut in ea perseverent; miseros quoq; peccatores, qui illâ sceleribus suis excidere meruerunt.

Insuper commendo tibi universam Ecclesiam, ejusq; Prælatos, & Superiores nostros, ac omnes Religiosos, Reges & Principes, nobiles & judices, divites, atq; pauperes, afflictos, captivos, carceri mancipatos, ægros, atq; in extremis positos, animas piacularibus flammis addictas, & potissimum eas, quæ jam per multos annos cruciatibus illis emendantur.

O DEUS vita animæ meæ, unionem tuam ardentissimam, & tecum unum quid semper fieri desidero; & ut actiones meæ, cum tuis unitæ sint, & anima mea cum gratia tua, cor meum cum beneplacitis tuis, omnes deniq; affectiones meæ cum ijs rebus, quas tu amas, amor meus frigidus & imperfectus cum tuo perfectissimo, exopto.

O si centies millies quotidie unirer Sanctissimo Corpori Christi Domini nostri in Sacramento altaris abscondito; & in momenta vitæ singula spiritaliter

tualiter communicarem ut ita in perpetua & intima cum Divina tua Majestate unione forem, dum beatificam illam exspecto in cœlesti gloria, quæ nos in omnem æternitatem inseparabiliter uniet.

Cupio, ô unica voluptas mea DEUS meus, recordari tui semper, & quamdiu vixero, etiã dormiens singulis momentis cogitare de te, & tanquã præsentem actionibus meis venerari: & quoties vel hauriam, vel expirabo hanc auram, quã vivo, toties desidero totis te præcordiis haurire, unã cum perfectionibus omnibus tuis, obsequia quoq; tibi accepta deferre, quæ omnes creaturæ tibi exhiberent, quas tu producere posses.

O Dulcissime DEUS meus, langveo amore tui, ex desiderio quod habeo videndi te, fastidio mihi est omne id, quod in mundo est: nulla in re hujus vitæ perfectam quietem reperio; vitam duco planè mortualem; dum felicitate visionis tuæ privatum me video, & possessione illius, quod unicè charum habeo: & propterea sæpissimè hæc ardentissima suspiria, ad te Amorem meum unicum edere, & diu noctuq; ad omnes respirationes, & inspirationes geminare volo: ô quando, quando videbo DEUM meum, Creatorem meum; & Patrem, qui est in cœlis, meum! Hi sunt igitur affectus mei erga te Dominum meum amabilissimum, quos millies millies, & infinities ad eum modum, quo hic sunt descripti, ad omnes cogitationes, verba & actus meos, & oculorum ictus, ad omnes cordis, corporis, & animi motus, & respirationes meas, atque

ad singula totius vitæ meæ momenta; multiplicare & renovare desidero: præsertim quoties corde, vel ore dixerò: ô DEUS meus credo, amo te, & proximòs, & adversarios, doleo, spero, adoro, benedico, æstimo, gaudeo, intendo, glorifico, complaço, desidero, gratias ago, laudo, offero, resigno, abdicò, abnego, tibi servire, me humiliare, Christum Dominum imitari, & eidem compati volo, renovo, oro, obsecro, commendo, tibi uniri, tui recordari, te citò videre desidero.

Ego autem coram tua Divina Majestate prostratus, cum profundissima animi submissione eidem supplico, ut pro tua infinita Bonitate & Misericordia hoc pactum meum benignè suscipias, mihi què, tantum gratiæ largiaris, ut illud sæpè usurpando proficiam, & hâc ratione efficiar talis, qualem vis me esse.

Hoc Pactum, quia est paulò longius potest dividi in partes aliquot, & in principio cujuslibet partis dicendum. O Domine DEUS meus, secundum Pactum meum, quod cum tua Divina Majestate feci, toties, quoties jam statui.

P A C T U M II.

In forma breviori.

SANCTISSIMA Trinitas unus DEUS, in adiutorium meum intende, & dum tempus est, fac me semper operari bonum.

O utinam id continuo, & exercitio nunquam interrupto, diu noctuquè, vigilando & dormiendo faciam!

faciam! Quòd cum sit secundùm conditionem vitæ præsentis impossibile: ideò saltem desiderium meum ejusmodi, tuæ Divinæ Majestati offero, nimirum, quòd ad omnes cogitationes meas, verba, & opera, ad omnes animi & corporis mei motus, ad omnes respirationes, immò ad singula temporis momenta totâ vitâ, hos actus virtutum exercere summopere cùpiam, sicut nunc pro tunc facio.

Credo te Domine: credo in te: de te, omnia per Ecclesiam revelata à te, ô Prima Veritas! toto me.

Spero Domine te, & à te, confido in te, & in tua misericordia, in auxiliis, & promissis tuis, & in Christi meritis, toto me.

Amo te summum bonum super omnia toto te, toto me. Amo meipsum propter te, amo omnem hominem etiam inimicum & ingratum, inutilem & ignotum, sicut ipsum me, propter te. Amo omnem creaturam in te, & pro omni creatura, amo te, toto me.

Adoro te, & glorifico, & superexalto latreutico cultu soli tibi debito, toto me.

Gaudeo, & gratulor tibi, totum te, & omnia tua toto me, toto te.

Laudo, & exalto te, toto te, pro te, & pro me, toto me. Subdo me tibi æternaliter, & ad omnia toto me.

Devoveo me, quàm possum devotissimè omni voluntati tuæ, bonæ, beneplacitæ & perfectæ, exteriori, internæ, substantialiquè toto me.

Timeo te, Domine, percussus abyssali justitiâ

tuâ. Timeo te timore filiali, sponsali, Beatorum.
Timeo te, toto me.

Gratias tibi ago æternas, pro omnibus & singulis beneficiis, & gratiis tuis, naturæ, gratiæ supernaturalis, & gloriæ, toto me.

Vilifico, & annihilo me coram te, & coram omni creatura, propter te, toto me.

Confiteor, doleo, detestor omnem iniquitatem meam, coram te, propter te, toto me.

Diffido mihi per omnia, & soli tibi confido, omniaq; bona tibi, & attribuo, & restituo, mihi meum nihil reservo, toto me.

In lumine vultus tui, & ob prudentiæ tuæ rationes æternas, omnia & agere, & pati volo, toto me.

Volo, Domine, ad normam justitiæ, reddere unicuiq; quod suum est, propter te, toto me.

Cultum omnem, & abyssalem reverentiam tribuo tibi, quâ digna es Majestas DEI mei, toto me.

Fortitudo mea, & laus mea tu es Domine, tu me consorta in hac & omni hora, & in te DEO meo transgrediar murum, toto me.

Dominari sensibus, & concupiscentiis meis per tuam gratiam, volo semper, toto me.

O Castitas, ô cordis & corporis puritas! amo, desidero te, tu Domine, cor mundum, & corpus castum, crea & conserva in me, toto me.

Omnia quæ mundus immundus habet, ac æstimat, arbitror & abijcio, propter Christum pauperem, ut stercora & detrimenta toto me.

Obedire,

Obedire, & subdi volo omni creaturæ proposi-
tæ mihi à te, propter te, toto me.

Humilio me sub potenti manu tua, & sub ma-
nu omnis creaturæ, propter te, Domine, toto me.

Gaudens gaudeo in JESU meo crucifixo &
mortuo pro me, & in unione meritorum ejus, &
pretiosissimæ Matris ejus, ac Electorum ejus,
agam, & patiar universa semper, toto me.

O Domine, utinam te homines nossent, utinam
te norint, ament, æstiment, revereantur, deside-
rent, laudent, atq; voluntatem tuam, sicut in cœ-
lo & in terra faciant, toto me, toto te.

Tabescere me fecit & facit, zelus tuus, zelus
gloriæ tuæ, zelus salutis nostræ, toto me.

Opto anathema esse à Christo, pro fratribus me-
is in Christo, opto inferorum portam obturari ipso
me, & per me, ne quisquam amplius descendat in
damnationem.

Cupio dissolvi, & esse cum Christo, quemadmo-
dum desiderat cervus ad fontes aquarum, toto me.

Sanctissima Trinitas, JESUS Christus, MARIA
Mater DEI, & omnes Electi ejus, mei dulcissimi
amores: patiar, ego, moriar ego amore vestri, to-
tus sim vester, nullus meus, toto me.

Toto me, Gloria Patri, & Filio, & Spiritui
Sancto. Gloria Deigenitrici Virgini MARIE, &
JOSEPHO Sancto, & omnibus Sanctis.

Toto me, semper & ubiquè sit laudatum San-
ctissimum Sacramentum, quod ego semper & ubi-
què laeuiticè adoro, desidero, recipio, toto me;
deq;

deq; ejus dignitate & dignatione exulto, toto me: atq; ad ejus consecrationem & sumptionem, per omnes actiones & passionem meas, meritis & sanguini JESU Christi conjunctas, desidero, peto, propono, toto me.

Confusio, & abjectio, & supplicium inferni mihi vilissimo peccatori. Sancta Trinitas miserere mei, sicut potes, scis, & vis, propter te. Da peccatoribus veniam, justis perseverantiam, fidelibus defunctis requiem æternam.

P A C T U M III.

Brevissimum.

O Dulcissime Domine DEUS meus, cognosco te esse unicum bonum meum, summam meam felicitatem & beatitudinem: ideo maxime mihi curandum est omni studio, ut tibi semper arctissime conjunctus permaneam.

Et ut hoc assequi possim, cupio nunc quā possum reverentiā, & humilitate, cum tua Divina Majestate inire Pactum, & perpetuò fœdere sancire, ut, quemadmodum, quoad vixero, nunquam cessabo respirare, ita nunquam cessem in te credere, te amare, te laudare, gratias tibi agere, me offerre, me tibi resignare, in te sperare, gaudere de te, & abhorrere à mundo velut à peste, habere zelum honoris tui & salutis animarum, te timere, me humiliare, poenitentiam agere, sancta proponere, & amare proximum meum. Humilitatem, Castitatem, Paupertatem, Obedientiam, &
alias

cum DEO facta. 267

alias virtutes tibi gratas colere; & petere à te, quæ tu vis, & quæ ad salutem meam, vitamq; æternam consequendam, sunt mihi necessaria.

Præterea te cognoscere, adorare, tequæ DEUM Infinitum, Immenſum, Immutabilem, Æternum, Omnipotentem, Sapientem, Bonum, Sanctum, Benignum, Providum, Miſericordem, Juſtum, & ultimum noſtrum finem cōfiteri.

Atquæ hanc prorsus eſſe nunc mentem meam ſumma cum animi demiffione, coram Divina tuâ Majestate, & tota cœleſti curia proteſtor, quòd cupiam toto corde tota illa virtute, puritate intentionis & effiçaciâ, quâ maxima poſſum, omnia illa obſervare, quæ dixi. Idq; quoties reſpiravero, & quoties aliquid dixerò, vel aliquid cogitavero, & fecero, quoties aliquos æctus animi & corporis mei edidero, immò ad ſingula vitæ meæ momenta.

Accipe Domine hunc æctum præſentem, nunc & pro illo, & pro omni tempore. Atq; hoc animi mei deſiderium ratum confirmatumq; ſit gratiſſimo beneplacito tuo in æternum.

P A C T U M . IV.

V. P. F Joannis à JESU MARIA,
Ex libello de arte amandi DEUM.

Quod Pactum vocat exercitium de reſpiratione & inſpiratione.

O Dulciſſime Domine JESU Chriſte, cui me totum & omnia debeo, & quem continuo amare, laudare,

laudare, & de eo semper cogitare, loqui, & propter quem omnia pati & facere, & continuo uniri desidero; sed quia multa me impediunt; ideo non ex aliqua præsumptione, sed ex sola dignatione tua & bonitate, cui confido hanc meam voluntatem te acceptaturum; neq; ex affectu meo tepido, sed ex ardentissimo affectu amantissimæ Matris tuæ Virginis MARIE, Beatorum Angelorum, & omnium Sanctorum, tale pactum meum tecum pro tota vita mea, in eo, & statuo: nimirum, quoties respiravero, toties ad singulas respiraciones, hæc tibi offero, & offerre volo semper.

Primò. Offero tibi omnes divitias & thesauros totius mundi, omnes gemmas, & lapides pretiosos, omne aurum & argentum, omnia regna mundi, redditus, principatus; quæ si haberem, propter honorem tuum, & amorem, hæc omnia pauperibus erogarem, donec ad tam extremam pauperiæ redigerer, ut e manibus tuis, & hominum sipe victitarem.

Secundò. Offero omnem infamiam, contemptum, contumelias, detractiones, irrisiones, adeo, ut mihi pergratum esset, si me omnes, ut vilissimam & infamissimam creaturam haberent, & ut talem te ipsa tractarent.

Tertiò. Offero omnes afflictiones, dolores pœnas, atq; diversa Martyria, quibus ita me obijcio, & expono, ut ipse tamen dolorum, infirmitatis & mortis delectus à te Domino meo veniat; ipsa verò eorum passio, per gratiam tuam, sit mea, cui nunquam contradicere volo.

Quartò.

Quartò. Offero omnes animas æternæ beatitudinis capaces, tam infidelium, hæreticorum, & peccatorum; quàm hominum in gratia existentium, quibus ab infidelitate, vel hæresi, vel peccato, ad te DEUM nostrum convertendis, ita, ut omnes omninò ad altissimum quendam gloriæ gradum perveniant, me libentissimè, meamquè operam dedico.

Quintò. Offero omnia corda, quæ tam in cœlo, quàm in terra te ardentissimè amant, & cum illis cor tuum svavissimum, atq; Beatissimæ Virginis Matris tuæ, ita quidem, ut ea omnia simul habere, & immensum quoddam purissimi amoris tui incendium ex illis facere vellem, in quo affluè, incessanterq; consumar. Simul etiam vehementissimum quendam de omnibus peccatis, adversus tuam Divinam Majestatem commissis, dolorem habeam.

Et hoc facio, non ob aliquod gloriæ meum emolumentum, quamvis honestissimum, sed solùm Divini tui palati gultum, atq; tuæ Divinæ voluntatis beneplacitum, ut, scilicet, cordis mei tributum tibi persolvam.

Quæ omnia recensita, & simul omnes cogitationes meas, verba & opera, etiam ipsum divinissimum Eucharistiæ Sacramentum, quatuor titulis tuæ Divinæ Majestati debita, summo cum affectu, tibi, dulcissime Domine JESU, pendere volo.

Primò. In hostiam laudis, pro gratiarum actione, pro omnibus beneficiis tam naturalibus, quàm

quàm supernaturalibus, tam communibus, quàm particularibus.

Secundò. In hostiam pro peccato, seu in satisfactionem pro peccatis meis, quibus sicut ad iram te Dominum meum sæpissimè provocavi, & inhonoravi: ita nunc per hæc omnia supradicta, te placare, & honorare volo, & pro peccatis quantum possibile est satisfacere, uniendo satisfactiones nostras, cum satisfactionibus tuis, & meritis Beatissimæ Virginis.

Tertiò. In hostiam pacificam ex voto, pro impetrandis beneficiis, tum naturalibus, tum supernaturalibus, quibus opus habemus, donec ad beatitudinem cœlestem perveniamus, quæ ut consequar beneficia, omnes cogitationes, verba, & opera mea, in unione operum, verborum & cogitationum tuarum, ac Divæ Virginis offero.

Quartò. In holocaustum, eò, quòd tu es, qui es: scilicet, ob tuam Majestatem infinitam Bonitatem, Pulchritudinem, aliq; attributa, me ipsum totum, & omnia mea, nihil mihi, vel in usum meum reservando, offero.

Quoties igitur respiravero, ad singulas respiraciones, hæc omnia, modis prædictis, tibi amantissime JESU, offero, & volo, ut quælibet respiratio, per totam vitam meam, sit signum istius pacti, & oblationis.

Volo præterea, ut quævis respiratio, sit exercitium omnium virtutum, ut sit, videlicet, velut fides dei meæ professio: certa in te Spes: amor tuus ardentissi-

dentissimus: cordialis peccatorum meorum abominatio: contemptus omnium bonorum terrenorum, & voluptatum, ac oblectationum: perfecta mei abnegatio: meæ vilitatis ostensio: & omnium aliarum virtutum actus quàm perfectissimi.

Quæ omnia supradicta, & illorum singula, quoad ejus potest fieri, etiam ad Beatissimam Virginem Matrem tuam dirigo, & in augmentum gloriæ, gaudiorumquæ ipsius continuum offero: Præterea volo, ut hæc prædicta sint aliis communia: nimirum, ut istorum sint participes illi, qui jam cœlesti gloriâ donati sunt: quibus est velut hostia laudis pro gratiarum actione; omnes quoq; peccatores terræ, quibus hostia pro peccato, universi quoq; iusti in mundo viventes, quibus est hostia pacifica ex voto, intercedendo pro eorum perseverantia: necnon animæ in purgatorio detentæ, ipsis saltem mediam mearum satisfactionum partem applicando; adeò, ut ne quidem in materia spiritali aliquid proprii possideam, quod non commune aliis faciam.

Deinde quoties inspiravero, seu ærem externum intra me attraxero, pactum ejusmodi tecum, dulcissime JESU, statuo. Videlicet cupio, ut, quoties ad me ærem attraho, toties cordiali quodam affectu, te Dominum meum JESUM Christum, & purissimam Virginem Matrem tuam intra me attraham: Filium simul & Matrem mihi quàm affectuosissimè unire, & complecti desiderans: id est, tui ipsius personam, cogitationes, verba & opera

opera tua & Virginis Matris tuæ, necnon omnium iustorum, qui cœlo, terrâq; continentur, eaq; meis cogitationibus, verbis & operibus, unire, ut sic ego, quantum ad personam, cogitationes, verba & opera, in hac unitate tibi Domino meo quam maximè placeam: atq; sicut per inspirationem illa intra me attraho; ita per respirationem in quinto modo tibi rursus reddo.

Cujus pacti præsentis, erit signum, per totam vitam meam, quælibet inspiratio mea, per quam te Dominum meum, cordi meo imprimere satago, & volo; & ab hac hora, propono me nihil aliud velle, cogitare, loqui, aut bonum mihi aliud procurare, quam te dulcissimum & amabilissimum Dominum nostrum JESUM Christum, & immaculatam Virginem MARIAM Matrem tuam.

Imprime, ô dulcissime Domine, pulcherrimum vultum centro cordis mei: intra suavissime animæ meæ Sponse in intimum medullarum mearum, & præsta, ut de spiritu & fortitudine tua vivam; quia tu es fortitudo, virtus, & vigor meus.

Mihi mori desidero, ut in te sine fine vivam, in ardentissimo amoris tui delicatissimi igne consumptus. Quis mihi det, Sponse gratissime, ut ego moriar pro te, & omnes illæ infamiæ improperia, & dirissima tormenta, quæ mundus, & infernus adversum te excogitarunt, super me irruant, & pro his, præmium aliud non habeam, quam, ut dulcissimo, & tenerrimo cordi tuo placeam.

PACTUM

P A C T U M V.

Pactum cum Sanctissima Virgine DEI-Genitricē MARIA.

O Purissima DEI genitrix Virgo MARIA, & mea centies millies amabilis Mater & Domina, cuperem sine cessatione, cor & cogitationes meas ad te attollere: sed cū spiritus mei infirmitas, & ipsa miserabilis hujus vitæ conditio, quæ nos mille occupationibus & distractionibus implicat, id non permittat, en paratum me, supplere defectus istos, per pacta & conventa mea, quibus testificari meum, in te Dominam meam augustissimam, amorem volo.

Igitur ad omnes meas cogitationes, verba, & opera, & omnes animi & corporis motus, ad omnes respiraciones, & inspirationes, immò ad singula temporis totius vitæ meæ momenta, & quotiescunq; mentem ad te meam elevavero & corde, vel ore aliquid dixerò :

Amo te, Adoro, Æstimo, Laudo, Saluto, Desidero, Gaudeo, Gratias tibi ago. Tibi offero, in te spem & fiduciam habeo, Tibi condoleo, te oro; toties intendo dicere.

Amo te post DEUM ex toto corde meo, ex tota anima mea, ex omnibus viribus meis. Amo te, & si millies, millies millena corda haberem, omnibus his cordibus te amarem. Amo, amo te, & in amore tui mori volo. Amo ampliùs, quàm conjunctissimos amicos, & propinquos meos; quàm

honores divitias,, vitam, sanitatē, mundum totum, & omnia, quæ infra lunam sunt: magis etiam, quàm omne, quod creatum est, sivè in cœlo, sivè in terra; atq; ita plùs, quàm Angelos universos, plusquàm alios omnes Cœlites Sanctos, & post JESUM, plùs quàm alia omnia.

Te adoro, & cum profundissima reverentia, tibi, ut veræ Genitrici DEI cultum Hyperdulix reddo: & cum quanta possum cordis mei submissione, te honorare semper, prout omnes beati Spiritus, & Sancti omnes, atq; homines tibi devoti, honorant, honorârunt, & honorabunt te æternùm, desidero.

Æstimo te super aurum, & argentum, super gemmas & lapides pretiosos, super omne id, quod æstimant homines universi in terris: æstimo te post DEUM supra omnia: Nam te esse pretiosorem cunëtis, infra DEUM censeo.

Laudo te, benedico tibi, & te glorifico; & cupio, omnes si fieri posset laudationes, omnes honores, omnes benedictiones, glorias omnes in te conferre, quas Angeli, quas omnes orbis nationes, quinimò, quas ipsæ tres Personæ Sanctissimæ Trinitatis, in te unquam vel contulêre, vel conferût, aut etiam collaturæ sunt, tum in tempore, tum per omnem æternitatem.

Te saluto, idq; in unione amoris, & per cor dilectissimi Filii tui, & ex affectu Gabrielis Archangeli, & omnium Beatorum Spirituum, ac Electorum, servorumq; tuorum te amantium.

Deside-

Desidero, ut te omnes homines ament, colant, tibiq; serviant: desidero immensum gloriæ tuæ, gaudiorum tuorum semper fieri augmentum in æternum: desidero & volo, omnem cultum, honorem, & gloriam tuam procurare semper, etiam cum ipso vitæ meæ dispendio.

Gaudeo ob excellentias & perfectiones tuas, ita, ut si omnium tibi addictorum servorum collecta habere possem gaudia, quæ aut senserunt in animo, aut palàm etiam prodiderunt, propter illa, quibus tu affluis, affluebas, & afflues æternum, id facerem sanè ex toto corde; & nunc quantum possum, & licet, ita gaudeo & exulto.

Gratias tibi ago, & exopto habere gratas Angelorum mentes, omnium amicorum DEI benignas affectiones, fecundissimorum ingeniorum calamos, atq; lingvas, quin ipsius dilectissimi Filii tui cor atq; sermonem, ut ita in omne ævum dignas, augustissimâ simulq; amabilissimâ Majestate tua, gratias referre possem, cum infinitas agnoscam obligationes meas erga te, præ creaturis reliquis universis.

Tibi offero cor meum, & corpus, & animam, vitam insuper, & sanitatem, & quæcunq; demùm in amoribus mihi sunt. Sum enim, & esse omnino volo post DEUM, ex toto tuus. Unde trado me tibi in servum perpetuam, & mancipium, in filium, in hæreditatem, te autem mihi eligo, & assumo in Dominam, Reginam, Matrem, & Hæredem pro omni æternitate.

In te Spem, & fiduciam habeo meam post dilectissimum Filium tuum; nec alterius opem, ante tuam implorabo: quia tu refugium meum es, & praesidium, & omnia mea post DEUM.

Compatior & condoleo intimè tibi, ob amarissimos dolores tuos: siq; in mea foret potestate sentire ut possem amaritudines cordis universas, quas ex consideratione dolorum & afflictionum ob mortem Filii tui crudelissimam toleratorum à te, ferri tui unquam perceperunt, paratus essem sufferre eas universas, & opto mihi ad hoc ipsum, cor dilectissimi Filii tui, qui verè illas in se pertulit, aut tuum ipsius, ut eodè modo sentire eas valerem.

Supplex te rogo, & obtestor, per pretiosissimum sanguinem dulcissimi Filii tui, ut me in servum, mancipium, & filium tuum recipere: præterea peccatorum omnium veram detestationem & remissionem, vitæ seriam emendationem, & à peccatis præservationem, vitiorum extirpationem, mortificationem passionum, perfectamq; mei abnegationem, atq; heroicarum virtutum tuarum usque ad mortem imitationem: deniq; in gratia DEI perseverantiæ donum mihi impetrare digneris.

Accipe itaque, ô Beatissima DEI genitrix Virgo, quoscunq; exiles, quoscunq; meritis tuis impares erga te nostros affectus: & cum susceperis vota, culpas nostras orando excusa. Admitte nostras preces intra sacrarium exauditionis, & reporta nobis antidotum reconciliationis. Sit per te excusabile, quod per te ingerimus: fiat impetrabile, quod


cum V. Sanctissima factum.

277

quod fidâ mente poscimus: accipe, quod offerimus, redona, quod rogamus, excusa quod timemus; quia tu es spes unica peccatorum. Per te speramus veniam delictorum, & in Te, ô Beatissima, nostrorum est expectatio præmiorum.

Hoc pactum cum Virgine Sanctissima factum, non solum diebus Sabbati, sed & aliis, præsertim in festivitibus ejus potest sæpius renovari, sive quo ad omnes affectus, dicendo: O Virgo Sanctissima te amo, adoro, æstimo &c sive quo ad aliquos tantum repetendo illos, vel decies, vel quinquagesies, vel ut alicui placebit.

Notandum de singulis Pactis, quod possunt sæpius renovari breviter dicendo: Domine DEUS meus pactum meum, quod hodie, vel aliquando feci, confirmo, & renovo, ad eum modum, quo illud feci.



ACTUS VARIORUM AFFECTUUM

Erga Virginem Sanctissimam.

Actus Imitationis Beatissimæ V. Mariæ.

O MARIA Virgo purissima, Mater DEI Sanctissima! ô Angelorum Imperatrix gloriosissima! ô Sanctorum Omnium Regina altissima. O Domina mundi potentissima! cui omnes Angeli inserviunt, Omnes Sancti obediunt; quam omnes creaturæ venerantur; cui me pro
S3 perpe-

perpetuo servo & mancipio trado, & devoveo, tibiq; fidelissimè servire, tibi in omnibus placere, tuamq; Sanctissimam vitam, actiones, & virtutes imitari, pro mea infirmitate desidero & volo.

O duo Luminaria magna huic mundo visibili data, JESUS & MARIA, ad illuminandum nos, lucidissimis virtutum radiis, & Sanctitatis exemplo. Et quoniam Luminare majus videlicet, Dominum nostrum JESUM Christum jam proposui mihi ob oculos mentis ad imitandum: ideò aliud Luminare minus, videlicet, Virginem MARIAM, dulcissimam Matrem ejus nunc mihi propono.

O MARIA, erit mihi tua vita Sanctissima tanquam in imagine descripta, ad quam semper convertam oculos meos, ut ad normam ipsius meam efformem vitam. Volo conari exprimere vitam, moresque tuos in meo mortali corpore, ut in me vita manifestetur tua.

Hic Cibus erit animæ meæ quotidianus, meditatio tuæ innocentissimæ vitæ, ô MARIA Virgo, & Mater DEI, quam DEUS perfectissimū exemplar omnis Sanctitatis, & universarum virtutum nobis ad imitandum proposuit, de quo exemplari die ac nocte meditabor.

O Virgo Sanctissima, cujus vita inclyta cunctas illustrat Ecclesias; cujus vita gloriosa lucem dedit sæculo; per quam illuminari desidero, ut sciam, quomodo absque reprehensione vivere, & DEO meo, tibi que placere debeo.

Certissimè credo, tuam vitam Sanctissimam, ad
similitu-

similitudinem vitæ dulcissimi Filii tui fuisse ex
activa & contemplativa compositam, ut omnes sta-
tus Ecclesiæ erudies, & universis hominibus vitæ
exemplo præluceres, quod exemplum sequi, & hu-
jus vitæ utriusquæ exercitiis fideliter & diligenter,
incumbere sollicitus ero.

O Speculum, omnium virtutum! quod cū
homines intuerentur, in admirationem rapiebantur,
& ad desiderium Sanctitatis & perfectionis attra-
hebantur, hoc ego speculum intueri decerno, ut
ad perfectionem citius consequendam obtineam
incitamentum.

O Domina, Sanctitatis & perfectionis tuæ ac
sublimissimarum virtutum tuarum non tantū ad-
mirator, verū & amator, immò sedulus & con-
stans imitator esse conabor: ut per imitationem
illarum possim assimilari tibi, in charitate, inno-
centia, cordis puritate, humilitate, obedientia, mo-
destia, mansuetudine, patientia, paupertate, resi-
gnatione, & aliis virtutibus, quibus tu Divinæ
Majestati placuisti.

O Magistra sapientissima! libenter audiam ver-
ba tua, quia sunt verba vitæ; illa, inquam, verba,
quæ dicis ad nos: Nunc ergo filii audite me. Be-
ati qui custodiunt vias meas. Audite disciplinam,
& estote sapientes, & nolite abijcere eam. Itaque
audire te, & tuis consiliis monitisq; obedire, atq;
custodire vias tuas, virtutumque tuarum vestigia
assiduè sectari volo.

Pudet me hæcenus degenerem fuisse filium tuum, torpentem servum tuum.

Jam dixi; nunc cæpi: jam firmum propositum edidi, custodiam vias tuas, & ferventiùs solito, te auxiliante, virtutes tuas imitabor.

Aëtus Laudis.

D Ignare me laudare te, ô MARIA Virgo purissima, Mater DEI Sanctissima & gloriosissima, sed quia hoc dignè præstare non possum: Tu ipsa, ô Domina mea, da mihi virtutem, adjuvando infirmas vires meas.

Verùm quibus ego te laudibus efferam nescio. Digna es, ô Domina nostra, accipere laudem, & honorem, & gloriam, & benedictionem à me, & ab omnibus creaturis, ut Regina cœlestium, terrestrium, & infernorum.

O Si possem omnes arenas, atomos, folia, guttas, in cœlos, & choros te laudantium, & amantium Angelorum, hominumvè convertere; ô quàm libentissime id facerem!

Igitur cum omnibus Sanctis jam ex nunc canto, & in omnem æternitatem cantare opto ex cordiali amore, quo possum, canticum hoc tibi: Benedictio, & claritas, honor, gloria DEI genitrici Virgini MARIE, in sæcula sæculorum, Amen.

Toto pectore, toto cordis mei gaudio, laudo, magnifico, exalto, colo, ac veneror te, ô MARIA Virgo Beatissima, tantum quantum te laudant, magnificant, exaltant, colunt, & venerabuntur,

omnes Beati Spiritus, & omnes Sancti in cœlis, & homines tibi devoti in terris.

Tibi Regina sæculorum, Tibi Virgini Matri DEI, honor, & gloria in æternum.

Gloriam tuam volo, ô Domina mea, gloriam, tuam volo, & honorem; glorificeris tu in æternum in cœlis, & in terris.

Gloria MARIE Virgini Filiae DEI Patris.

Gloria MARIE Virgini Matri Filii DEI.

Gloria MARIE Virgini Sponsæ Spiritus Sæcti.

Gloria MARIE Virgini, Templo Sanctissimæ Trinitatis nunc & semper & in sæcula sæculorum.

O Quis mihi daret, ut omnia membra mea verterentur in lingvas, tunc non aliud prædicarẽ, & laudarem, nisi JESUM & MARIAM!

Declinate à me maligni, & totus impendar, & super impendar: in MARIE laudes, & honorem: quia ipsa est omni laude dignissima.

O Domina, non est mihi curæ in mundo aliquid, nisi ut super omnia infra DEUM per me glorificeris, & exalteris.

O Quis te dignè possit celebrare, cujus dignitatem perfectè solus DEUS capere potest?

Quis valeat laudes tuas comprehendere, in tuus visceribus incomprehensibilis comprehensus est?

Veniant ad te, ô Domina, omnes gentes & insulæ: reddant tibi tributum laudis, Tibi, quæ es Regina totius mundi.

Si lingvis hominum & Angelorum loquar, & omnem scientiam habeam, adhuc celsitudinis tuæ dignita-

dignitatem, ô Virgo pulcherrima, ne adumbrare quidem, ne dum effari poterô.

Summè cupio, ut ex singulis cogitationibus, verbis, actionibus, motibus, respirationibus meis, resultet laus tua, & gloria, ô MARIA.

Nihil deinceps, nihil cogitare, loqui, & agere volo, nisi ad honorem, laudem, & gloriam tuam.

Laudo te, ô Mater dulcissimi JESU, sicut didicit à Christo Filio tuo prædilecto te laudare Sancta Mechtildis.

Laudo te, inquam, in ea fidelitate, quâ illi præ omnibus in vita tua fidelissima extitisti, in omnibus actibus tuis, semper voluntatem illius tuæ præferens voluntati.

Laudo, & extollo fidelitatem tuam, quâ illi in omnibus necessitatibus illius fidelissimè astitisti, ita, ut omnia, quæ ille passus est in corpore, tu sustinueris in mente.

Magnifico illam tuam fidelitatem, quâ adhuc in cælo Christo fidelissima es, acquirendo illi peccatores, ut convertantur, & animas, ut à pœnis liberentur: quia tuis interventionibus, innumeri peccatores sunt conversi, & animæ à purgatorii igne liberatæ.

Actus Salutationis.

Dignare me, salutare te, Virgo Sacrata DEI genitrix MARIA: confido enim de bonitate tua, quòd quamvis indignus sim, tamen non verear te salutare tuo inflammatus amore. Sed

re. Sed dic mihi, obsecro, ô Domina mea clementissima, quâ salutatione utar tibi magis gratâ.

Equidem, ô Cœli Regina, si te dulcissimâ aliquâ salutatione, quâ unquam cor humanum excogitare potuit, salutare possem, libentissimè salutarẽ. Et quoniam Beatæ Mechtildi sic oranti apparuisti, habens in pectore scriptam aureis literis Angelicam salutationem, dicens: Ad hanc salutationem nunquam homo pervenit.

Ideò hac salutatione, ex affectu Gabrielis Archangeli, atquè omnium Angelorum, omniumquè Beatorum ac hominum tibi devotorum te saluto: & ad omnes cogitationes, verba, & opera, respirationesq; meas, & ad omnes actus, & motus corporis, & animæ, etiam ad singula momenta, salutare desidero, devotè & reverenter dicens.

Ave MARIA, gratiâ plena, Dominus tecum: benedicta tu in mulieribus, & benedictus fructus ventris tui JESUS.

Quot maris sunt guttæ, cœli stellæ, quot Beatorum Spirituum agmina, quot arborum folia, & terræ gramina, toties ex intimo cordis mei te saluto, ô gloriosissima atq; dignissima Mater DEI, cœli Regina præclarissima, amabilissima atq; dulcissima Domina, Virgo MARIA!

Saluto autem te, in unionem amoris, & per cor dilecti Filii tui, atq; omnium te amantium, dicens cum Sancta Mechtilde: Ave ex Omnipotentia Patris: ex Sapientia Filii: ex Clementia Spiritus Sancti, dulcissima Virgo MARIA cœlum & terram illuminans.

Gratiâ

Gratiā plena, infundens & replens omnes te diligentes. Dominus tecum, DEI Patris unigenitus, amicus & Sponsus dulcissimus.

Benedicta tu in mulieribus, quæ Evæ fugasti maledictionem, & æternam impetrasti benedictionem. Et benedictus fructus ventris tui JESUS Christus, omnium Creator, & Dominus vivificans, & locupletans omnia.

Utinam omnium Creaturarum corda haberem, ut ex affectu, & viribus omnium, te dulcissima Virgo, salutarem inquires: Ave Filia DEI Patris. Ave Mater Filii DEI. Ave Sponsa Spiritus Sancti. Ave templum Sanctissimæ Trinitatis.

Præterea te saluto cum Ecclesia Sancta Catholica: Ave Maris stella, DEI Mater alma, atquæ semper Virgo, felix cœli porta.

Salve Regina Cœlorum, Ave Domina Angelorum, salve radix, salve porta, ex qua mundo lux est orta.

Te saluto cum devoto servo tuo Divo Bonaventura: Ave Domina mea, Mater mea, immò cor meum, & anima mea, Virgo MARIA, & Maria mea.

Te saluto cum Sancto Chrysostomo: Ave animatum DEI templum. Ave cœli, terræq; pariter domicilium. Ave naturæ illius, quæ comprehendendi non potest, amplissimum habitaculum.

Te saluto cum Beato Cyrillo Alexandrino: Salve Sancta Deipara, eximium totius Orbis decus & ornamentum. Salve lampas inextingvibilis, Corona Vir-

na Virginitatis. Salve Mater & Virgo, per quam
is benedictus in Evangeliiis prædicatur, qui venit
in nomine Domini.

Te saluto cum Beato Andrea Cretensi: Salve
Prophetarum & Patriarcharum decus, & clarissi-
ma arcanæ præcognitionis humanæ tuba.

Te saluto cum Sancto Francisco: Ave Domina,
Sancta Regina, Sancta DEI genitrix MARIA,
quam consecravit Pater, cum Sanctissimo dilecto
Filio suo, & Spiritu sancto Paraclito; in quo fuit,
& est omnis pulchritudo gratiæ, & omne bonum.
Ave Palatium ejus; ave tabernaculum ejus: ave
domus ejus: ave ancilla ejus: ave Mater ejus.

Saluto te cum Beato Andrea Hierosolymitano:
Salve lætitiæ organum, per quod delicti nostri
condemnatio expiata est; ac veri gaudii plena fa-
cta commendatio est. Salve verè benedicta. Salve
illuminata. Salve magnificum Divinæ gloriæ
templum.

Salve consecratum Regis palatium. Salve tha-
lame in quo Christi Humanitas desponsata est. Sal-
ve electa DEO, antequam nata fueris. Salve Di-
vina cum hominibus reconciliatio. Salve thesau-
re vitæ immarcescibilis. Salve cælum, Solis glo-
riæ cæleste tabernaculum.

Te saluto cum Divo Ephrem Syro: Ave
præclarum, & electum vas DEI. Ave Domina
MARIA gratiâ plena. Ave inter mulieres Virgo
beatissima. Ave stella fulgidissima, ex qua Chri-
stus processit. Ave Lux splendidissima, Mater &
Virgo.

Virgo. Ave quæ venerabiliter Regē omnium peperisti. Ave Regina & Domina cunctis sublimior. Ave per quam clarissimus Sol Justitiæ nobis illuxit. Ave Mater alma Christi Filii DEI vivi.

Saluto te cum Sancta Gertrude. Ave candidum lilium fulgidæ semperquæ tranquillæ Trinitatis, totaq; præfulgida cœlicæ amœnitatis, de qua nasci, & de cujus lacte pasci Rex cœlorum voluit: divinis influxionibus animas nostras pascere.

Laudo & saluto te, Mater beatitudinum, dignissimum Spiritus sancti sacrarium; per dulcissimum cor JESU Christi, DEI Patris, tuiquæ amantissimi Filii, orans, ut in omnibus indigentis & in hora mortis nobis succurras.

Salve MARIA, Regina clementiæ, oliva misericordiæ, per quam nobis venit vitæ medicina: Virgo Mater Divini germinis. Eja, sicut per Filium tuum facta es omnium vera Mater, quorum ipse unicus tuus, non est dedignatus fieri frater; sic nunc pro ejus amore, me indignum in curam tuæ Maternitatis, in vita, & in mortis hora suscipe.

Te saluto cum Sancta Mechtilde: Salve Virgineum cor Matris JESU, cor purissimum, humillimum, devotissimum, ferventissimum, conservantissimum, patientissimum, fidelissimum, in contemplatione & oratione sedulum atq; sollicitum.

Salve Virgo excellentissima, in stillicidio dulcissimo, quod de corde Beatissimæ Trinitatis ab æterno fluxit in te, de tua felicissima prædestinatione.

Salve

erga V. Sanctissimam.

287

Salve Virgo Sanctissima, in stillicidio dulcissimo, quod de Beatissima Trinitate fluxit in te de Filii tui dulcissima doctrina, & prædicatione.

Salve Virgo amantissima in stillicidio dulcissimo, quod de Beatissima Trinitate fluxit in te, in tui unigeniti Filii passione, & amarissima morte.

Salve Virgo dignissima, in stillicidio dulcissimo, quod de Beatissima Trinitate fluxit in te, in omni gloria & jucunditate, quâ nunc gaudes, & in æternum gaudebis super omnes creaturas in cœlo, & in terra, præelecta ante mundi constitutionem.

Te saluto cum eadem Sancta Mechtilde, ancilla tibi devota illa salutatione, quam tu ipsam docuisti.

Salve in illo ineffabili gaudio, quod habuisti, cum incessabile lumen Beatissimæ Trinitatis primò aspexisti, & ex quanto amore, te præ cunctis in Sponsam sibi & Matrem elegit.

Salve in plenitudine illius gaudii, quod aures tuæ susceperunt, ex dulcissima salutatione amantissimi Filii tui, Patris, & Sponsi, cum te amantissimè suscepit secundum immensitatem sui delicati amoris, decantans tibi altissimum & suavissimum amoris canticum suavissimæ vocis suæ.

Salve in plenitudine illius gaudii, quod anima tua suscepit, in osculo illo prædulci, quod tibi Divinitas infligit, in quo suæ Divinæ dulcedinis gustum tam affluenter tibi infudit, ut ex redundantia tui gaudii, mellisui facti sunt cœli, ita ut in terris tam miser aut malus non sit, quin ei ex tua
plenitu-

plenitudine (si tamen desideret) valeas imperire.

Salve in illo ineffabili gaudio, quod habuisti, cum anima tua succensa est igne Divini amoris, & cor tuum liquefactum est, ex dulcedine Divini cordis; atq; ex tuo ardore, novo quodam modo Sanctorum multitudo incanduit amoris favore.

Salve in illo ineffabili gaudio, quod habuisti, cum splendor Divinitatis omnia tua clarissimo lumine ita penetravit, ut cælum à tua gloria nova luce illustretur, & omnium Sanctorum gaudium de tua præsentia augmentetur.

Actus Benedictionis.

PEr singulos dies, benedicam tibi, ô MARIA, Virgo & Mater DEI Sanctissima, & laudabo nomen tuum in sæculum.

Benedic anima mea Dominæ nostræ Virgini DEI-genitrici MARIE, & omnia quæ intra me sunt, nomini Sancto ejus.

Benedicta & venerabilis es, Virgo MARIA, quæ sine tactu pudoris, inventa es Mater Salvatoris, Virgo DEI-genitrix, quem totus non capit orbis, in tua se clausit viscera factus Homo.

Benedicta tu in mulieribus; id est, supra omnes mulieres, quia Virgo DEUM peperisti, Patrem tuum genuisti, portantem te portasti, nutrientem lactasti.

Benedicta tu in mulieribus, una, scilicet, præ cunctis mulieribus: quia quem cæli capere non poterant, tuo gremio contulisti.

Benedi-

Benedicta tu in mulieribus : id est, præ omnibus amplius benedicta: quia magis electa, majoribus gratiæ donis referta, & quodam modo quasi infinita dignitate in Filii DEI conceptione sublimata.

O verè benedicta : quia Virgo es & Mater, supra Sanctos Sanctissima, super Angelos purissima, super omnes creaturas DEO dilectissima.

Benedicta sis, ô beatissima Virgo MARIA, in qua DEUS magnus, factus est puer parvus; æternus Dominus, factus est pusillus Filius; Creator invisibilis, creatura visibilis.

Benedicta sis tu æterna benedictione, ô MARIA dulcissima: quia Virgo ante partum, Virgo in partu, Virgo post partum, Virgo cum Sponso, Virgo etiam indubitata, dubitante Joseph sponso tuo, fuisti.

Benedicta sis tu, ô Domina mea Virgo MARIA, quia omnis creatura fidelis, pro te Sanctam collaudat Trinitatem, eò quòd tu ejus creatura es dignissima, quæ pro miseris animabus, veniam impetras pròptissima; & pro omnibus peccatoribus existis Advocata fidelissima.

Benedicta sis tu tota, ô Domina dulcissima, in corpore tuo purissimo, & anima Sanctissima.

Benedico beatissimum uterum tuum, in quo, Dominum cœli & terræ portasti.

Benedico beatissimos pedes tuos, quibus ipsum super terram bajulasti.

Benedico beatissimum cor tuum, unde in eum

T firmiter

firmiter credidisti : & ferventer eum dilexisti.

Benedico beatissima ubera tua, quibus eum lactasti.

Benedico beatissimas manus tuas quibus eum nutriti.

Benedico os & labia tua, quibus ei dulcissima oscula dedisti.

Benedico beatissimam linguam tuam, quâ ad ipsum sæpius locuta fuisti.

Benedico beatissimas aures tuas, quibus dulcia ejus eloquia delectabiliter auscultasti.

Benedico beatissimas nares tuas, quibus suavolentem fragrantiam Humanitatis ejus sensisti.

Benedico beatissimos oculos tuos, quibus ipsum devotè respexisti.

Benedico beatissimum corpus & animam tuam, quæ Christus in te omni benedictione consecravit.

Benedico te, ô superbenedicta Virgo & Mater DEI, cui benedixit Dominus; Pater & Filius & Spiritus Sanctus; cujus benedictionis, & nos servos tuos participes facere digneris.

Actus Æstimationis.

Æstimo te, ô pretiosissima DEI Mater & Virgo MARIA, super omne aurum & argentum, super gemmas & lapides pretiosos, supra omne id, quod æstimant homines universi in terris.

Æstimo te, supra cor & animam meam, supra vitam & sanitatem, supra omne bonum utile, delectabile, & honestum.

Æstimo

Æstimo te supra parentes, & consanguineos meos, supra omnes amicos & benefactores meos supra omnes delicias & honores.

Æstimo te super omnia solo DEO minora, & cum hac tui æstimatione perseverabit anima mea usq; ad extremum halitum vitæ meæ.

Nam tu es inæstimabilis omnium virtutū thesaurus, immensum totius perfectionis pelagus, cunctarum gratiarum Divinarum profundissima abyssus, ut de te Sancti Patres dicunt.

Tu es honos totius creaturæ, & præcipuè generis nostri, quæ nec primam similem visa es, nec habere sequentem, ut ait Sanctus Bernardus.

Tu es, quæ omnes beatorum Spirituum Hierarchias, & Sanctorum Ordines supergressa, meritum verticem, ad ipsum Deitatis solium erexisti, ut Sanctus Gregorius.

Tu es, quâ minus est quidquid sub DEO magnum est; ut Sanctus Anselmus.

Tu es, quæ digna fuisti, ex qua Filius DEI nasceretur; ut Sanctus Ambrosius.

Tu es pretiosa Margarita Orbis terrarum, Templum indissolubile, continens eum, qui nusquam contineri potest: Mater & Virgo, per quam benedictus, qui venit in Nomine Domini: ut Sanctus Cyrillus Alexandrinus.

Tu es dignissima Mater DEI, de qua nihil excellentius, nihil sublimius dici potest; quia ad quandam infinitam dignitatem sublimata.

Tu es gratiâ plena, mare spiritale, habens gem-

Tu *Sanctissima*

nam cœlestem Christum. Tu solo DEO excepto, cunctis superior: naturâ formosior es ipsis Cherubim, Seraphim, & omni exercitu Angelico, cui prædicandæ cœlestis ac terrestris creatura minime sufficit; ut Divus Epiphanius.

Tu verè admirandum, pariterq; adorandum ob tantam gratiam, tantaquè merita, cœli terræquè prodigium. Tu Imperatrix Angelorum & hominum; Tu cœli terræq; Regina, omniumq; creaturarum Domina: & ideo ego maximus peccator prostratus ante thronum gratiæ & misericordiæ tuæ, adoro te cum profundissima reverentia, & quanta possum cordis mei submissione.

Actus Desideriorum.

O Sanctissima Deigenitrix Virgo MARIA, tu es finis post DEUM omnium desideriorum meorum.

Te semper in corde & ore habere; tui ambulando, loquendo, & quidvis agendo recordari; sine te nihil incipere, & nihil finire volo; cultum tuum ubiq; promovere, in omnibus honorem tuum quærere desidero, & firmissimè propono.

O Beatissima Virgo, si ego essem DEUS, te, non verò aliam creaturam assumerè mihi in Sponsam. Si essem Pater, te, non aliam eligerem in Filii Matrem. Si essem Spiritus Sanctus, in te, non in alia Mytterium Incarnationis operarer.

Si essem Christus, in te, non in aliam flumina gratiarum derivarem. Si essem MARIA, relinquerem

querem esse Maria, ut tu sola esses MARIA. Si essem supremus Angelus, te, non aliam nomine omnium Angelorum optarem Reginam.

Si in me voluntates omnium hominum positæ essent, te, non aliam Mediaticem redemptionis precarer.

Si cordibus & lingvis omnium creaturarum loquerer, te, non aliam Dominam mundi vocarem.

Protestor coram DEO, quod gloriæ tuæ integritatem redimere, augmentumq; illius procurare cupiam, etiam cum mei ipsius, etiam cum totius creaturæ (excepta JESU Christi Humanitate) jacturâ, in quantum id gustui Divino conforme est, aut esset.

O MARIA Virgo & Mater DEI admirabilis, est quidem id per præsentem rerum ordinem impossibile, ut ego te in gratiæ, & gloriæ Divinæ donis excedam. Si tamen id possibile, & in mea manu esset, nollem protestor id esse, sed cuperem, & quantum ex me, facerẽ te, tam me ipso, quàm omni purâ creaturâ digniorem, gratiosorem, juxta DEI placitum, Maternitatisq; Divinæ condignū.

O utinam in te, super omnem creaturam requiescat anima mea, super omnem pulchritudinem, super omnem gloriam & honorem, super omnem scientiam & subtilitatem, super omnem lætitiā & exultationem, quia tu es super omnia desideratissima.

O inæstimabilis thesaurus cordis mei, ad quem semper tendit mens mea, ut ibi requiescat.

Desiderium meum non est mecum, sed est tecum, ô MARIA Virgo dulcissima, ubi enim est thesaurus meus, ibi est & cor meum.

O quando ad plenum dabitur vacare, & videre, quam suavis est Domina nostra Virgo MARIA.

O MARIA lætabor & exultabo in te, etiam si nullam haberem occasionem lætitiæ, nisi te, nihil aliud desiderarem, quod me consolari valeret: nec quidquam fugerem, quod me contristare posset: nam tu es causa nostræ lætitiæ.

Maledicta sit omnis cogitatio, quæ me avertit à te, omni veneratione dignissima, & omnis intentio cordis, quæ non est ad te, Anathema sit.

O utinam, utinam, anima mea tota absorbeat in devotione tui, ut pingvescat, & producat honorum operum fructum, eò quòd est arida & sterilis!

Utinam, ô Virgo Deipara, in tuo ardeamus amore, te impensè colamus, & totis præcordiorum affectibus veneremur, ad te contuendam assiduè studiis, bonisq; operibus contendamus, ut tecum in Christo Filio tuo perpetuò jucundemur.

*Affectus petitionis amoris erga Christum Dominum,
& Virginem Sanctissimam.*

O Beata fiducia! ô tutum refugium! Mater DEI, est Mater nostra (ut verbi Divi Anselmi loquar) Mater ejus, in quo solo speramus, & quem solum timemus, est Mater nostra; Mater, inquam, ejus, qui solus salvat, & solus damnat, est Mater nostra.

Si tu,

Si tu, ô Domina es Mater ejus, nonnè & alii filii tui sunt fratres ejus? Ergo Judex noster, est frater noster: Salvator mundi, est frater noster: Deniquè DEUS noster, est factus per MARIAM frater noster.

Qua igitur certitudine debemus sperare? qua desolatione possumus timere, quorum sive salus, sive damnatio de boni fratris, & de piæ Matris pendet arbitrio? quo etiam affectu hunc Fratrem, & hanc Matrem amare debemus?

Bone Tu JESU, & bona tu MARIA, dulcis tu Frater, & dulcis tu Mater, dicite, & date animæ meæ, quo affectu vos memorando ex vobis delectetur, delectando jucundetur, jucundando impingvetur.

Impinguate, & succendite vestri dilectione, vestri continuo amore langveat cor meum, liquefiat anima mea, deficiat caro mea.

Date piissimi, date obsecro, supplicanti animæ meæ non propter meritum meum, sed propter meritum vestrum, date illi, quantum digni estis, amorem vestrum.

O Bone Fili, rogo te per dilectionem, quâ diligis Matrem tuam, ut sicut Tu verè diligis, & diligere vis eam; ita mihi des, ut verè diligam eam.

O Bona Mater, rogo te per dilectionem, quâ diligis Filium tuum, ut sicut tu diligis, & diligere vis eum; ita mihi impetres, ut verè diligam eum.

Amator & miserator hominum, Tu potuisti reos tuos usq; ad mortem amare, & poteris te ro-

ganti amorem tui, & Matris tuæ negare?

Veneretur igitur mens mea vos, sicut digni estis: sicut æquum est, cor meum diligat vos: sicut sibi expedit, anima mea serviat vobis, & in hoc consumetur vita mea, ut in æternum psallat tota substantia mea: Benedictus Dominus in æternum, fiat, fiat.

Actus petitionis amoris erga Virginem Sanctissimam, ab eadem Virgine Sanctissima.

A More, & desiderio ad Te piissima Virgo MARIA suspiro, & tanquam parvulus, ad tua ubera vehementer anbelo, da mihi tui amorem dulcissima Domina: doce me, quā reverentiā te debeam cogitare, quo affectu ex te delectari, tibi quē servire.

Utinam sic viscera animæ meæ, dulci fervore tuæ dilectionis exardescant, ut viscera carnis meæ exarescant.

Utinam sic intima spiritus mei, dulcedine tui affectus impingentur, ut medullæ corporis mei exsiccentur.

O Domina mea, da mihi amore tui impingvari, succendi, beatificari.

Non deneges mihi id petenti, quo me confiteor indignum; sed da amorem tuum supplicanti animæ, & reddam tibi, quod justissimè debeo.

Impende mihi tuam, o Virgo, gratiam, & fac cum servo tuo misericordiam, ut diligens te, diligar à te, & ut sicut tu verè diligis me, ita & ego verè diligam te.

Unum

Unum peto, unum flagito ferveat in me amor tui, occupet interiora mea, affluentia perfectæ charitatis, ut cor meum tibi moduletur canticum svave.

Ineffabilis virtus amoris tui penetret, & rapiat omnia viscera animæ meæ.

Veni millies desiderata, & ex plenitudine gratiarum tuarum, aliquid cordi meo infunde, ut intimè te diligam.

O Domina, converte me ad te, & adstringe me tibi vinculis amoris tui fortiter, ut nunquam à te avelli, & separari queam.

Utinam implear, & superimplear dilectione tui
ô MARIA cordis mei Imperatrix augustissima!

Unum peto, unum flagito, ô dulcissima Virgo MARIA, ferveat in me amor tui, occupet interiora mea affluentia perfectæ charitatis tuæ.

Accende me tuo amore, ô Sacratissima Virgo MARIA omni amore & honore dignissima; quia tu es Dei-Genitrix gloriosissima, & nostra Mater purissima.

Aëtus Amoris erga Virginem Sanctissimam.

O Mater amabilis, & Virgo dulcissima, quam desidero amare te, prout omnes te amant, amarunt & amabunt, in cælo & in terra! Suscipe hoc desiderium pauperis servi tui.

Toto cordis mei affectu, & quantum possum, amo te, amabilissima Virgo MARIA, super omnia amabilia creata.

Amo

Amo te, benignissima Virgo MARIA, & desidero te amare, quantum tu ipsa amabilis es.

Amo te, clementissima Virgo MARIA, & desidero amare, quantum te amant omnes animæ in Ecclesia militante.

Amo te dulcissima Virgo MARIA, & desidero amare, quantum te amant omnes beatæ animæ in cælo.

Amo te, fidelissima Virgo MARIA, & desidero amare, quantum te amant omnes novem Chori Angelorum.

Amo te, humillima Virgo MARIA, super omnia amabilia creata, & desidero amare, quantum te amat dilectissimus Sponsus tuus, Sanctus Pater JOSEPH, Patronus meus optimus.

Amo te, innocentissima Virgo MARIA, & desidero amare, quantum te amat ipsum cor, & anima Unigeniti Filii tui.

Amo te, nobilissima Virgo MARIA ex toto corde meo, & propter amorem tuum, desidero tuam ac Filii tui voluntatem, in omnibus perfectissime adimplere.

Amo te, purissima Virgo MARIA super omnia amabilia creata, & cupio mortem subire potius, quam aliquid agere, quod tibi displicet.

Amo te Sanctissimam Virginem MARIAM, unicum post DEUM animæ meæ bonum, & desidero in amore tuo constantissime perseverare, & continuo ad mortem usque proficere.

Amo te, Mater pietatis, & totius Trinitatis nobile triclinium.

Amo

Amo te , tantæ dignitatis , ut sis confors DEI Patris potens ad auxilium.

Amo te , tui Creatoris , Mater nostri Redemptoris , Virgo prudentissima.

Amo te , Sponsa delicata , Paraclito consecrata , dulcis , clementissima.

Amo te , semper DEO grata , omni à vae præservata , cuiusvis peccaminis.

Amo te , bonis illustrata , virtutibus adornata , cunctis quoque gratiis.

Amo te , Virgo peractiva , summèque contemplativa , omnium sanctissima.

Amo te , nostra consolatrix , Filii cooperatrix , Martyr constantissima.

Amo te , jam glorificata , supra cunctos exaltata , corpore & animâ.

Amo te sceptris & coronis , fulgens cunctis DEI donis , Christo sedens proxima.

Amo te , decus Angelorum , honor gaudium Sanctorum , universis imperans.

Amo te , nostra mediatrix , afflictorum consolatrix , nostri semper miserans.

*Aëtus amoris erga Virginem Sanctissimam
ut DEI Matrem.*

O MARIA Virgo purissima , Mater DEI Sanctissima & gloriosissima , amo te toto corde meo , infra DEUM super omnia , propter id solum , quia digna es , ut vera Mater DEI , de quo ego multum gaudeo.

Utinam

Utinam te universi homines, ut veram DEI Matrem agnoscant, & revereantur.

O Si possem omnes arenas, atomos, guttas maris, in tot corda commutare, ut omnibus illis te ardentissime amarem, libenter id facerem.

Benedicta Mater, per quam Christus factus est noster Frater: Benedictus Frater, per quem MARIA facta est nostra Mater.

O MARIA Dei-genitrix Virgo superdignissima, summè desidero te amare, amore omnium in cœlo & in terra te amantium; in eamquē rem, ipsum amorem, quo te omnes in cœlis & in terris amant, tibi offero.

Dignissima Mater DEI, amo te propter te, & non propter ullum bonum meum: etiamsi nihil boni, à te accepissem, & nihil à te sperarem; nihilominus amarem te, bonitas mea. Nam licet ex me ipso nihil sim, & nihil possim: tamen tua bona, atq; dona, mea esse gaudere possum.

Tantum te diligo, dulcissima DEI Mater, ut si ego solus possiderem omnium Electorum gratissima corda, libenter illa omnia amoris tuo impenderem: quanto magis hanc exiguum cordis mei partem, nunc tibi totaliter tradam?

Utinam sim totus Virgineus, totus divinus, ut cor meum totū, sit amor Virgineus, amor divinus.

O Pretiosissima Dei-genitrix Virgo, amo te post DEUM super omnia: quia DEUS super omnem puram Creaturam amavit, & amat te: quia omnes Cives cœli amaverunt, & amant te: quorum amore amo te.

Amo

Amo te, & si mille corda haberem, mille cordibus amarem.

Amo, amo, te, & in amore tui mori volo, ô Mater DEI, centies, millies, millionies, & ultra amanda.

O Millies beata Filia Sion! ô mellitissima DEI Mater MARIA! exultat in te Spiritus meus, te collaudant præcordia mea, & sancta tui dilectione colliquescit anima mea.

Sicut nulla res poterit me separare à Charitate DEI (ut per DEI gratiam spero) sic nemo poterit me separare à charitate tua, ô MARIA Mater DEI, neq; tribulatio, neq; angustia, nec fames, nec nuditas, nec periculum, nec persecutio, neq; gladius, neq; mors, neq; vita, neq; Angeli, neq; Principatus, neq; virtutes, neq; creatura alia poterit me separare à charitate tua.

Dum spiro, dum possum, & quantum possum, amo te, ô Domina cœli & terræ potentissima, ô Mater DEI & Virgo Sanctissima, & amare te toto affectu totius curiæ triumphantis in cœlo, cupio.

Piissime JESU, dulcissimæ Matris tuæ Virginis amorem volo: da mihi amorem ejus, propter amorem ejus, majorem omni amore ejus.

*Actus Amoris erga Virginem Sanctissimam
ut Matrem nostram.*

O MARIA Virgo Mater, quæ occasione mei peccatoris, facta es Mater DEI, & quæ à Filio tuo prædilecto data es mihi in Matrem,

trem, & solatium, ideo ad te, tanquam ad Matrem dulcissimam confugio, totus à te, tanquam infantulus à Matre pendeo.

Utinam me, ô Mater charissima, sinu tuo Materno foveas, & consoleris! utinam sim unus ex ijs quibus maternum declaras affectum! nihil amplius desiderat anima mea.

Sicut filius suspirat ad sinum matris, ita suspirat ad te anima mea: ne despicias me ô MARIA Mater mea.

Suscipe me, ô Virgo piissima Mater, ad te confugientem: gubernam me toto vitæ meæ tempore, ut te Duce cuncta pericula evadam: provide mihi in omnibus, tanquam bona Mater filio; & fac, ut te toto corde diligam, tanquam Matrem meam dulcissimam.

O Mater DEI, Mater nostra, cui ab ipso tuo Filio dati sumus, & commendati etiam in filios tuos, quomodo de salute nostra jam desperemus, tam piam Matrem & Advocatam pro nobis habentes apud Filium?

O quo te affectu amare debemus? qua tibi nos familiaritate committere? qua securitate ad te confugere? & qua dulcedine confugientes suscipi à te sperare debemus?

Monstra, ô MARIA, te veram esse mihi matrem, ama me usquē in finem, & fac, ut te redamare totis visceribus cordis mei contendam.

O Mater dilectissima, de filiis tuis semper sollicita, accende nostrum in te affectum, ut te Matrem

trem nostram ex corde veneremur, diligamus, & colamus.

Quis mihi det, ut sim sugens ubera matris meæ, & jam nemo me despiciat?

Quemadmodum desiderat cervus ad fontes aquarum, ita desiderat anima mea ad te, ô Domina & Mater mea, ut satier ab uberibus consolationis tuæ.

O MARIA, tu es dulcissima Mater mea revoca me errantem, ingratum, & prodigum filium tuum; pascere me ab uberibus tuis.

Utinam sim quasi infans modò genitus, ut merear lactari, purissimo & dulcissimo lacte tuo, & ubere de cœlo pleno.

Quia filius tuus licet indignus sum; ideo totus sum, ô MARIA, & tu tota es mea: ego tecum, tu mecum, ad te conversio mea: & à te expectatio mea.

O Gloriosissima Regina, & Mater mea! absit mihi gloriari nisi in te: Tu es vera gloria mea: Tu lætitiâ cordis mei. Exultabit cor meum in te gaudens, de protectione tua.

Quot Stellæ, quot arenæ maris, tot ego corda, indicibili amore tui flagrantia mihi uniri opto, ut Te superamabilissimam Matrem meam unicè diligere queam.

O Felix Mater! Tu Mater DEI, tu Mater rei: tu Mater Judicis, tu Mater exulis: cum sis Mater utriusq; filii, ne finas filium reum damnari per Filium DEUM: sed materna pietate procura, ut filius reus, reconcilietur Filio, qui est DEUS: & per filium Judicem, recipe in patriam filium exulem.

O MARIA,

O MARIA, Tu es Mater pulchræ dilectionis; quia tota es amor erga nos, quos recipis in filios: igitur & ego volo, ut totus amor meus, sit erga te post DEUM meum.

O Regina cœli, decus & Mater Carmeli! quæ quasi vitis fructificasti, in hoc monte Virgineo suavitatem odoris. Et qui nunc flores tui? Nonne illi filii tui, qui extendunt & multiplicant fructus honoris tui, & honestatis, per circuitum hujus montis.

Ave clarissima stella cœli: Ave Mater nostra, & Mater DEI, & suavissimus flos Carmeli, odor tuus, sicut odor agri pleni, cui benedixit Dominus, trahe me post te, ut curram in odorem tam pulcherrimi & desideratissimi floris, usq; ad verticem montis Carmeli, in quo beneplacitum est tibi.

*Affectus Amoris erga Virginem Sanctissimam
ob ejus pulchritudinem.*

O Super omnem cogitationem nobilissima, suavissima, & pulcherrima Virgo MARIA, quàm amabilis es, & cur non amem te? Te, inquam, quæ tota pulchra es, tota pulchra es, & macula non est in te. Verè pulchra es & decora Filia Hierusalem: pulchra es in corpore, pulchra in anima, pulchra in hac vita per gratiam, pulchra in altera per gloriam, in omnibus & per omnia amabilissima, & ideo ardentissimè amare te desidero.

Fateor, quòd quidquid alibi bonum, quidquid amabile

amabile in singulas dispersum est creaturas, id omne simul unitum reperitur in Te, ô MARIA. Præsta, ut ego te diligam, te sequar, desiderem tui præsentiam, & omnia transitoria prorsus despiciam.

O MARIA, Tu vivens in terris fuisti Virgo amantissima, Virgo sole Serenior, astris lucidior; Virgo melle dulcior, & balsamo suavior; Virgo rosis pulchrior, & liliis candidior; ultrâ omnem pulchritudinem decora, ultrâ omnem honestatem gratiosa: proinde castissimo affectu te semper diligere volo.

Multæ filiæ congregaverunt sibi divitias, verum tu, ô Sancta Dei-genitrix Virgo MARIA, supergressa es universas: Tu Patriarchas excellis fide, Prophetas scientiâ, Apostolos Sanctos zelô, Martyres patientiâ, Confessores humilitate, Virgines innocentia.

Tu ineffabilibus monilibus ornata omnes superni palatii Cives, in admirationem, & amorem rapis.

Heu me, quod tam exiguo amore hætenus te prosecutus sum.

O si jam amarem te, quantum amabilis es!

O si saltem amarè te, quantum possum & debeo!

O Utinam anima mea amore tui liquefiat!

Utinam implear, & superimplear dilectione tui ô MARIA cordis mei Imperatrix Augustissima!

Nihil est pulchrum, nihil delectabile, nihil utile, quod non præponam pulchritudini, deliciis, & divitiis

divitiis tuis, ô MARIA. Nam tu mihi es super omnia, ô MARIA.

Quam pulchra es, quæ ipsam pulchritudinem genuisti; nihil enim pulchrius Matre pulchritudinis, quam diligere totis cordis visceribus debemus.

O si possem omnes filios Adæ convertere ad te, ut respicerent dulcissimam formam tuam, & jam relinquerent vanitates, quibus eorum viscera depascuntur.

Speciosa facta es in deliciis tuis Sancta Dei-gematrix, quis non diligit te? ô Regina cordium, & Mater sancti amoris; quis non diligit te? Utinam omnes creaturæ tibi serviant, & in amore tuo vivant, & moriantur.

O MARIA tota pulchra, immò tota pulchritudo, cui assimiliabo te? aut cui comparabo te? certè omne pulchrum turpe, & omne mundum immundum ad te comparatum.

Sola es sine macula, sola sine labe, pulchritudo pulchritudinum, candor candorum, splendor splendorum, & quidquid est eminentiæ, & virtutis, tu sola his plena es.

O MARIA, oculi tui columbarum, spirantes candorem, & simplicitatem; quam pulchra es amica mea, columba mea, quæ pura & simplicia corda trahis. Conijce, obsecro, dulcissimum intuitum in me tuum, & dicat tibi anima mea: vulnerasti cor meum Soror mea Sponsa, in uno oculorum tuorum: en charitate tua vulnerata sum.

O Dulcissima Virgo Antesignana omnium sub
cruce

erga V. Sanctissimam.

307

cruce militantium ! Te amo super omnia post DE-
UM, & desidero contendere cum omnibus crea-
turis, cum omnibus Beatis, cum omnibus Angelis,
etiam ardentissimis Seraphim in amando tuam pul-
chritudinem, & tuam bonitatem.

Utinam sit fortis sicut mors dilectio mea erga
te, dura sicut inferaus æmulatio pro honore tuo.

Certè paterer me superari ab omnibus in omnibus, sed in hoc, quòd aliquis plùs diligit te, quàm ego, nequaquam patiar me superari.

*Actus Amoris erga Virginem Sanctissimam, ob
ejus beneficia erga nos, & misericordiam.*

O Regina & Mater misericordiae, misericordias tuas in æternum cantabo, quas ego recepi in vita mea.

O quam pridem perissem, si tu me infinitis
à perditione non liberaffes.

Nullus est, qui salvus fiat, ô Sanctissima Virgo,
nisi per te: nemo est, qui liberetur à malis, nisi
per te, ô purissima.

Nemo est, cui donum aliquod concedatur, nisi per te, ô DEO dilectissima. Nemo est cujus misereatur gratia, ô Virgo Deipara castissima.

Quis, post tuum Filium, ita generis humani curam gerit, sicut tu? quis ita nos defendit in nostris afflictionibus? quis tam citò præveniens nos ab irruentibus liberat temptationibus? quis in supplicationibus adeò pugnat pro peccatoribus? quis

U₂ ca, quae

ea, quæ corrigi non possunt, ad correctionem reducit? nisi tu ô misericordiæ Mater.

Mundus, & terra jam dudum ruissent, si non tuis, ô MARIA, precibus ea sustentasses. Per te igitur, ô Domina, vivit orbis terrarum. Per te nos omnes in vita conservamur. Igitur, quis te non amet? quis te non honoret? quis te non colat? quæ benignissima es, & nos amore invincibili amas.

O MARIA, citius aliquis numeraret guttas aquæ, & arenam maris, quàm beneficia, quæ tu confers nobis.

Nihil est in mundo, quod non sentiat misericordiam tuam, ô MARIA: ideò omnis creatura, te creatoris sui Matrem, amat, veneratur, & agnoscit.

Exultant præcordia mea ad te, ô Mater misericordiæ! quia inops, & pauper sum ego, tu verò expectas, ut miserearis mei.

Utinam liquecant omnia viscera amore tui, ô Mater misericordissima! & nullum sit cor durum, & lapideum, sed omnia fluant sicut cera à facie ignis amoris tui.

Quis mihi det, ut continuo in hæream tibi? sine te enim fragilitas mea, ne ad unicum momentum consistere potest.

O MARIA, tota bona, tota dulcis, tota mitis atq; suavis es; quis se potest abscondere à calore amoris tui? Tu sicut sol facis oriri bonitatem tuam super bonos, & malos, nec pauperem despicias, nec ingratum repellis.

Tu

Tu Mater omnium viventium; & sicut terebinthus ramos dulcedinis tuæ extendis; omnes sub umbra tua proteguntur, sub qua etiam viles bestiolæ securæ quiescunt.

Currite ad MARIAM, ô vos omnes orphani atq; pupilli, & à generationibus ejus implemini: Currite; quia Mater pulchræ dilectionis est, Mater gratiæ plena, & misericordiæ.

Quàm bona, & misericors es Domina mea! Ecce ego sum, qui errabam in sæculo nequam, per devia & inaquosa, & tu me dulcissima, oculis tuis huc & illuc vagantem prosequeris.

Aspiciebas me frequenter, ut alioquin erubescens maternum aspectum tuum, converterem me ad te.

Sed heu me! elongavi fugiens, & mansi in solitudine iniquitatis, sinè te.

Verùm tamen non poterat esse inanis aspectus tuus, quando me traxisti etiam renuentem, & in numero filiorum tuorum collocasti.

Quid retribuam tibi pro his, ô misericordissima Mater? Certè si omnia, quæ sub cælo sunt tibi tradidero, parùm est.

Scio quid faciam, & dubitare non possum, quòd tu magis de me, quàm de meis gratitudinem requiris. Ergo sicut totus fui servus peccati; ita modò fiam per gratiam totus servus tuus, & mancipium sempiternum.

Non est, quid mentem meam peccatorum pondere pressam æquè recreet, ac recordatio tui, ô

MARIA. Quid enim misero dulcius, quam memoria Matris misericordiae?

O Misericordissima atque dulcissima Domina mea, Sancta MARIA! ô Mater suavissima, pietate affluentissima, miserationibusq; exuberantissima, fac, ut tuarum in me misericordiarum, & beneficiorum sine cessatione memor sim, Tibiq; aliquam fidelitatis & amoris vicissitudinem, pro omnibus, quæ hæcenus mihi tribuisti, rependere non cessem: quatenus à tua & Filii tui, Domini mei JESU Christi gratia non excidam.

Miserere Domina, animæ meæ post te anhelantis, & secundum ipsam gratiam, qua te voluit DEUS esse plenam, fac mecum misericordiam tuam: fac, ut amor tui semper sit mecum, & cura mei semper sit tecum: fac, ut clamor necessitatis meæ, quamdiu ipsa persistit sit tecum, & respectus pietatis tuæ, quamdiu ego subsisto, sit mecum: fac, ut congratulatio beatitudinis tuæ semper sit mecum, & compassio miseriæ meæ, quantum mihi expedit, sit tecum.

O Quam beati, quos respexerint illi tui misericordes oculi, ô MARIA! hos ergo oculos ad me converte, & Filio tuo benignè me reconcilia, & in æternum conjunge, ô clemens, ô pia, ô dulcis Virgo MARIA.

Rogamus te, clementissima ipsius pietatis & misericordiae Mater, ut qui tuæ laudis insignia frequentare gaudemus in terris, tuæ miserationis auxilium habere mereamur in cœlis: quatenus sicut

per

per te DEI Filius dignatus est ad nostra descendere, ita & nos per te, ad ejus valeamus consortium pervenire.

Actus affectus erga Nomen Virginis Sanctissime.

O MARIA sis benedicta, cui dedit tota super sancta Trinitas Nomen, quod post Nomen superbenedicti Filii tui, est super omne nomen, ut in Nomine tuo omne genu flectatur, cœlestium, terrestrium, & infernorum.

O MARIA nomen tuum dulce, Nomen tuum amabile; Felix qui in ipsa nominatione Nominis tui experitur, & noscitur cujus filius sit. Affectus enim erga te tribuit ei maximam fiduciam in te.

Adhæreat lingua mea faucibus meis, si non proposuero te, ô MARIA, in principio lætitiæ meæ: si non meminero tui, obliviscatur mei dextera tua.

Utinam distendantur omnes nervi mei, velut calamus scribæ velociter scribentis, & sanguis meus velut atramentum diffuset, ut possim manifestare Sanctissimum Nomen tuum, Serenissima Regina cœlorum, & enarrare cunctis gentibus gloriam magnificentiae tuæ.

Magnificate omnes Dominam mecum, & exaltemus Nomen MARIE in æternum, nam Nomē MARIE, Nomen dulcissimum, Nomen Sanctissimum, Nomen dignissimum, Nomen potentissimū, Nomen desideratissimum.

Protege me, dulcissima Virgo MARIA, sub

umbra alarum tuarum : & non recedat in æternū mellissimum Nomen tuum ab ore, & à corde meo.

Tuum Nomen, ô MARIA, est scutum, & protectio mea ab inimicis meis : Tu igitur virtute nominis tui protege me, & eripe animam meam, de manibus quærentium eam.

O Quàm suave est Nomen MARIA ! ô quanta animum explet dulcedine, cum nuncupatur !

O Domina, in virtute tua lætabitur cor nostrum, & in dulcedine Nominis tui consolabitur anima nostra.

Scio, quod tam pia, & suavis es, ô MARIA, ut nec nominari possis, quin accendas, nec cogitari, quin recrees affectum diligentium te.

O MARIA, cum sacrum Nomen tuum auditur, adeò fervet fidelium devotio, ut omnium corda effervescent, oculi lacrymas emittant, gemitus ex intimis præcordiis emanent, & veluti cum æquor ebullit, & ad littora erumpit, ita Christianæ plebis affectus, & voces.

O MARIA, tu Divina dispensatione hoc Sanctum Nomen accepisti, quod interpretatur, Domina, Exaltata, Stella maris, Illuminata, Illuminatrix & Spes.

O Quæ spirituales divitiæ, quæ gratiarum multitudo, quis beneficiorum cumulus, quæ DEI beneficia, in Nomine MARIE, non clauduntur ? quis enim hoc Nomen, ex corde intimo invocavit, & auxilium non invenit ?

Tuum Nomen, ô MARIA, super omnia Sanctorum

torum nomina, reficit lassos, sanat languidos, illuminat cæcos, penetrat duros, ungit agonistas, jugum diaboli extrudit.

Gloriosum, ô MARIA, & admirabile est Nomen tuum: qui illud retinent, & invocant, non expavescent in puncto mortis.

Invocabo & ego semper Nomen tuum, ô MARIA, semper dicam: ô MARIA, esto mihi MARIA: ô Domina, rege me; tuere me à rugientibus præparatis ad escam; illumina me; me conforta: Stella maris, deduc me ad portum salutis.

Aëtus Gaudii nostri.

O MARIA Dei-Genitrix Virgo Sanctissima, gaudeo de omnibus bonis tuis, de tua gloria & honore, de tua excellētia & dignitate.

O quam exulto de illo amore, quo te amat DEUS Pater, DEUS Filius, DEUS Spiritus Sanctus! & de illo amore & honore, quo te amant & colunt omnes Angeli, & omnes Beati in cœlo, & omnes iusti in universa terra!

Omnis gaudiorum meorum sensus, in hoc uno, ô MARIA Virgo, quòd sola sis, ac tanta sis, quæ & quanta es: quòdq; gloria & honor tuus, in cœlis & in terris sit tantus, quantus est.

Gaudeo, quod sis Sponsa DEI, Mater Verbi, Ministra incarnationis, omnium gratiarum Mare, verè illuminata MARIA, Angelorum Regina, Mediatrix nostra, & omnium Domina. Et in tantum gaudeo, ut gaudium istud non permutarem
omni-

omnibus deliciis, & voluptatibus totius mundi simul sumptis.

Si possibile esset minui aliquem gradum gloriæ tuæ, quòd vellem omnia tormenta etiam infinitorum infernorum perpeti, quàm tu minimum detrimentum dignitatis & beatitudinis subires.

O quantum gaudeo ô MARIA, de omni affectu, quem habent erga te omnes devoti. Et si haberem omnium Sanctorum merita pro quibus gloriam correspondentem accepturus essem, libenter illa priverer, ut tuis devotis à Divina Majestate conferretur.

Gaudeo & exulto, ô Beatissima Virgo, quòd DEUS te amet super omnia opera sua, & de hac re super omnia delector.

Summè gaudeo de eo, quod es, quia es ab originali culpa præservata: quia es Virgo & Mater DEI, Regina cœli, Domina mundi, & super choros Angelorum exaltata.

Gaudeo, tibiq; congratulor in toto corde meo, quia cùm esses parvula placuisti Altissimo, & de tuis visceribus genuisti DEUM & hominem.

O Mater DEI mei, quibus tibi affectibus gratulabor Maternitatem tuam Divinam! ô si omnium mihi corda essent! ô si omnium potens essem voluntatum, potentiarum, & operationum! ô si cor ipse totus essem, non quantus sum, sed quantum est totum universum, vellem tibi sic gratulari; gratulari, inquam, Te DEO, & DEUM tibi, Te illi ancillam, illum tibi Filium.

O An-

O Ancilla Domini, Te, toto me, gratulor æterno DEO! ô Mater DEI, tibi, toto me, gratulor Filium DEUM!

Sed quantum est hoc, quòd toto me gratulor tibi? Te potius, ô Virgo, ancillam DEO, & DEUM Filium tibi, gratulor illo ipso DEO, cujus Mater es. Sit ergo ille gratulatio tua, qui factus est generatio tua, gratia tua.

Actus Gaudiorum Virginis Sanctissimæ.

O MARIA Virgo Sanctissima & Mater nostra dulcissima, sicut ego gaudeo de omni bono tuo, ita desidero, ut & tu semper gaudeas magis ac magis, & ut semper gaudia tua crescant, & augeantur, atquè renoventur omnia illa, quæ habuisti in terris, & quæ nunc habes in cœlis: ac propterea nonnulla tibi nunc commemoro. & imprimis quibus abundè perfusa fuisti in terris.

Gaude MARIA Virgo Mater Christi, quæ per aurem concepisti. Gabriele nuntio.

Gaude, quia DEO plena, peperisti sine pœna, cum pudoris liliò.

Gaude, quia oblatio Magorum, & devotio exhibetur Filio.

Gaude, quia tui Nati, quem videbas mortem pati, fulget Resurrectio.

Gaude, Christo ascendente, qui in cœlum, te vidente, motu fertur proprio.

Gaude, quia Paraclytus demissus fuit cœlitus, in tuo Collegio.

Gaude,

Gaude, quæ post Christum scandis, & est honor tibi grandis, in cœli palatio.

Præterea commemoro tibi, ô Domina mea benignissima, illa gaudia, quibus nunc perfrueris in cœlis.

Gaude MARIA Virgo, quia omnes Sanctos superas tuo honore.

Gaude, quia totum Cœlum & Orbem, illuminas tuo splendore.

Gaude, quia ad tuum nutum tota tibi obedit cœlestis Curia.

Gaude, quia ad tuum votum à DEO impetras omnia.

Gaude, quia sola es Sanctissimæ Trinitati proxima.

Gaude, quia tua gaudia non cessabunt, nec decrescent, sed durabunt, & florescent per æterna sæcula.

Commemoro & illa, quibus dum sæpius te salutaret quidam tibi devotus Religiosus, multum placuit tibi.

Gaude DEI genitrix Virgo immaculata. Gaude, quia gaudium ab Angelo suscepisti. Gaude Mater.

Gaude Sancta DEI genitrix Virgo. Tu sola Mater innupta: Te laudat omnis factura: Genitrix Lucis intercede pro nobis.

Deniq; commemoro tibi tua gaudia, sicut à Te edocta fecit Sancta Mechtildis.

Memento Domina gaudii, quod habuisti, cum
Filius

Filius DEI, tanquam Sponsus procedens de corde Patris, in uterum tuum venit, exultans ut gigas ad currendam viam.

Memento gaudii, quod habuisti, cum de Virginali utero tuo prodiens, factus est tibi Filius dulcedinis, & gaudii.

Memento gaudii, quod habuisti, in Magorum oblatione, ubi factus est tibi Filius honoris.

Memento gaudii, quod habuisti, cum Filium tuum in templo obtulisti, ubi factus est tibi Filius munditiæ & sanctitatis.

Memento, quod idem tibi extiterit in Passione Filius mæstitiæ, & doloris.

Memento, quod idem in Resurrectione, factus est tibi Filius lætitiæ, & exultationis.

Memento, quod in Ascensione, factus sit tibi Filius Regiæ dignitatis.

Actus Gratiarum actionis.

ADoro, laudo & benedico te, ô piissime Domine DEUS meus, pro omnibus donis, gratiis ac beneficiis, quæ Sanctissimæ Virgini MARIE in hac vita mortali olim, & nunc in gloria tecum permanenti contulisti.

Benedictus sit Pater de cælis DEUS, qui MARIAM Virginem in suam Filiam adoptavit.

Benedictus sit Filius Redemptor mundi DEUS, qui MARIAM Virginem in Matrem suam elegit.

Benedictus sit Spiritus Sæctus DEUS, qui MARIAM Virginem in Sponsam sibi assumpsit.

Benedi-

Benedicta sit Sancta Trinitas unus DEUS, eò quòd MARIAM Virginem in suum tabernaculum consecravìt.

O Domine DEUS meus, sit tibi perpetuus honor, perennis laus, & gloria, qui tam dignissimā Virginem creasti. Sit tibi benedictio, & infinita gratia, pro infinitis gratis, quibus eam cumulasti.

Laudetur DEUS summus, & summus Imperator & Dominus, qui MARIAM Virginem ad tantum honorem creavit & exaltavit, ut Imperatrix & Domina fieret perenniter in Regno cœlorum, cum ipso æternum regnatura in sæcula sæculorum.

O Benignissime JESU, sis tu benedictus in æternum, qui hanc singularissimam Virginem ab æterno tibi in Matrem elegisti, ab omni peccato immaculatam præservasti, ac omnium virtutum & gratiarum plenitudine exornasti; in ea concipi, ex ea nasci, & ejus lacte pasci voluisti, prædicationi, passioni, ac morti tuæ ipsam adesse, & nostræ Redemptioni cooperari tribuisti, atq; hanc in cœlum cum corpore & anima assumptam, gloriosissimèq; coronatam, eandem nobis in Advocatam, misericordiæ Reginam, atq; Matrem dedisti.

Pro his, sit tibi laus, honor, & gloria sempiterna, dulcissime JESU, ejus cor & merita pro me, & universa Ecclesia nunc offero, & per eandem nos, in cor tuum piissimum commendo.

Benedictus sis tu DEUS Creator omnium, qui in uterum MARIE Virginis descendere dignatus es.

Benedi-

Benedictus sis tu DEUS, qui cum MARIA Virgine esse sine gravamine voluisti, & de ea immaculatam carnē sine peccato sumere dignatus es.

Benedictus sis tu DEUS, qui ad MARIAM Virginem cum maximo gaudio animæ ejus venisti, & cum gaudio maximo ejus, sine peccato, de ea processisti.

Benedictus sis tu DEUS, qui MARIAM Virginem Matrem tuam, post Ascensionem tuam, crebris consolationibus lætificasti, & per te ipsum eam consolando visitasti.

Benedictus sis tu DEUS, qui corpus & animam MARIE Virginis Matris tuæ in cælum assumpsisti, & super omnes Angelos, juxta Deitatem tuam honorificè collocasti. Miserere mei propter preces ejus.

Actus Oblationis in servū Virgini Sanctissimæ.

O Pretiosissima DEI-Genitrix universorum Domina, cui serviunt Angeli & Archangeli, Cherubim quoque ac Seraphim, & universi beatorum Spirituum Ordines, cum tota curia cœlesti; ego quoque hominum creaturarumque vilissimus, motu proprio, me tibi totum in servum perpetuum, dedo, trado, & devoveo.

Expolio me omni meo, si quod habeo, jure, libertate, arbitrio, illud totum in manibus tuis æternaliter depono.

Posside me, ô Domina, utere me, & tanquam servum tuum tracta, & exerce.

O Domina

O Domina, sic fiat, oro, & ne digneris aspernari, qualecunq; obsequium famuli tui.

Sis tu Domina mea æterna; sim ego servus tuus æternum, dum DEUS erit DEUS, cui honor in sæcula.

Ut tibi serviam, tibi vivere, non mihi cupio.

Tibi, tuoq; servitio, omne tempus, quantum possum dedico: & opto momenta singula illius converti in æternitates, quibus tibi inserviam.

Doleo, quòd hætenus non servivi tibi, ut debui.

Pœnitet me, quòd tibi aliquando ingratus fui, ò Dulcissima Domina mea, confundor, quòd nihil dignum hucusque honore tuo feci.

Utinam, utinam omnia momenta vitæ meæ pro maxima gloria tua impendissem, & servivissem tibi corde perfecto!

Abhinc tibi corpus & animam meam, tibi cor, & omnes potentias, & sensus meos; tibi quidquid sum, quidquid possum, cum omnibus, quæ quomodocunq; ad me, sive in præsentem, sive in totam æternitatem pertinere possunt, quanto possum amore & affectu, in obsequium tuum dono, & offero.

Accipe, ò Serenissima Regina, & Domina nostra, accipe jam ex hac hora possessionem absolutam, & perpetuam mei, & omnium horum in æternum.

Verum & tu, ò Domina mea Sanctissima, adjuva me, ut sim servus tuus in æternum & ultra. O utinam ut jumentum fiam apud te, ut sim semper tecum!

Fac me semper adhærere tibi, & consurgant adversum me castra inferni, utiq; non timebo mala, quoniam tu mecum es.

O Gloriosissima Domina mea, etiamsi tenebrae tentationum obruant me, & procellae adversitatum insurgant contra me, non recedam à te. Immò si ignis, crux, bestiae, confractio ossium, membrorum divisio, & totius corporis contritio in me veniant, tamen serviam tibi.

*Actus Commendationis Virgini Sanctissimæ,
ut Matri Nostræ.*

O Dilecte votorum meorum! Ô JESU Charissime omnium Charissimorum! commenda me Matri tuæ, quæ pro tuo amore sit mihi in perpetuum Dux, & Custos. Configna me illius manibus. Eja, eja, dicito de me illi: Suscipe hunc in curam tuæ Maternitatis; ego eum tibi commendo in tota virtute meæ Charitatis.

Vide, Mater, quomodo mihi eum immaculatum repræsentes, & secundum cor meum educatum reconfignes.

Verùm & ego ad tuæ sanctitatis pedes prostratus, vitam meam totam, & mortem, tibi ut Matri misericordiæ, filiali confidentiâ & devotione voveo & commendo.

Tibi me trado regendum: Tibi mea omnia præsentio & committo; totum me sub tua prædulci protectione constituo.

Absint à me mundi hujus vanissimi honores, &
V tituli,

tituli, hoc solum, quod omnibus illis majus est, ambio & affecto, ut *MARIÆ* servus & Filius dici, & esse, & talis ab ea agnosci merear: hoc solum me lætificare, hoc solum consolari & satiare potest.

Honorabile enim mihi nimis est, & cordi meo dulce nimis, tam potentem sortiri mihi Dominam, tam fidelem nancisci Advocatam, tam benignam & misericordem habere Matrem.

Quandoquidem ergo hoc solum in votis mihi est, ut te, ô *MARIA*, in Dominam & Matrem mihi de cætero habeam: suscipe igitur me licet indignum, secundum meum desiderium, in tuum fidelissimum servum, veneratorem devotissimum, & filium charissimum.

O *MARIA*, monstra mihi Te esse Matrem: suscipe me in Maternam tuam custodiam & disciplinam: in gratiam & amorem, in patrocinium & tutelam Materni cordis tui, tanquam filium, quamvis indignissimum.

Adscribe me in eorum numero, quos singulari gratia in corde tuo habes prædilectos & impignoratos: quos jugiter foves, protegis, & in omnibus juxta beneplacitum Filii tui dirigis, honestas, & perficis: & qui Te vicissim singulariter amant, & colunt, qui te imitantur, & tibi in spiritu & veritate serviunt & famulantur.

Suppliciter postulo, benignissima Mater, ut me dirigas, serves, promoveas in omnibus viis & actibus meis.

Etenim

Etenim sine te, quàm pauper, & inops & egens sum auxilio tuo!

Serva, igitur, ô Sanctissima Virgo, ô piissima Mater, corpus & animam meam, ab omnibus malis & periculis.

Fac me participem bonorum tuorum, gratiarum atq; virtutum; præsertim profundissimæ humilitatis, eximiæ puritatis.

Accende in me filialem in te affectum, ô benignissima, ut te Matrem meam ex corde diligam & colam: reconcilia me Filio tuo, ejusquæ mihi amorem & favorem semper conserva & auge: sis mihi, ô MARIA, pia semper Mediatrix apud Filium: sis de me tanquam de tuo filio sollicita: succurre erranti; deduc me in semitas justitiæ: misericordes tuos oculos ad me semper converte; & mihi in morte ut pia Mater occurre: ab hostibus me defende; & tecum ad cœlestē paradisū assume.

*Actus Oblationis cordis nostri Virgini
Sanctissimæ.*

O Domina mea Sancta MARIA DEI-Genitrix Virgo, quamvis jam totum me tibi dedicaverim & obtulerim: præcipuè tamen offero tibi cor meum, non despicias, quæso, hoc munus exiguum, ô clemens, & Mater misericordiæ.

Suscipe ergo cor meum, recipe te in illud, immò verò tu, ô Regina, dominare in corde meo, tene illud, posside illud, apud te sit semper, ô requies mea, desideratissima.

O MARIA, ad te est cor meum, nec requiescit, donec fruatur plenè pulchritudine tua.

Tu sola post DEUM, ô Domina mea, tene cordis mei principatum, etiam nulla ei creatura misceatur.

Si ego solus omnium electorum gratissima corda possiderem, libenter illa omnia tibi, Virgo Sanctissima, præberem, quantò magis hanc exiguam cordis mei partem, nunc tibi totaliter tradam?

O Utinam dulcissima Virgo auferas cor meum, & des mihi tuum, ut cor tuum vivat in me, & cor meum vivat in te.

O Quàm felix essem, si universa corda, & vota omnium diligentium te haberem, ut ijs te ad quamlibet respirationem meam glorificarem.

O Si cor meum esset tanquam lampas ignis atq; flammarum, libenter funderem sanguinem meum pro liquore limpidissimo, & ossa mea pro lichno ferventissimo, ut essem lampas accensa coram te, ô MARIA.

Accipe tibi, ô clementissima Virgo, cor meum & colloca illud juxta tuum, nequè illud unquam mihi reddas, nisi Filii tui vulneribus vulneratum, & sanguine rubricatum: nisi amore tui vehementi succensum, & odore suavissimo variarum virtutum delibutum.

Certè affectum meum totum in te traxisti, ô MARIA, & cor meum totum rapuisti, gubernare illud, quæso, tanquam cor tuum, & in sanguine Agni immaculatum illud conserva, & in latere

Filii

Filii tanquam in refugio tutissimo colloca; vel, si tibi ita placet, fove illud, & me in visceribus tuis; nunquam me dimittas, nequē à te separari permittas.

O Mater DEI benignissima, rogo te, ut sic extrahas à corde meo dilectionem omnium rerum temporalium, ut tu sola, & Filius tuus sit mihi super omnia charissimus usquē ad mortem.

Suscipe cor meum, dilectissima Mater mea, & offer illud purissimis manibus tuis, purissimo Filio tuo.

Adorna, ô MARIA, cor meum, ut unâ cum tuo corde possim illud offerre Sanctissimæ Trinitati, ut cor meum nihil cogitet, loquatur, operetur, quod non sit in honorē Divinæ suæ Majestatis.

Actus Spei in Virgine Sanctissima.

O Mater misericordiæ, unica Spes & solatium peccatorum, ad te confugio, nullum aliud reperiens refugium.

Desperare possem præ multitudine & gravitate peccatorum meorum, nisi tu esses misericordiæ Mater: tu enim propter miseros peccatores genuisti Misericordiam; atq; ita quoties te aspicio, toties mihi finem misericordiæ apertum esse video. Cur ergo spe non gaudebo, dum me Mariæ misericordiâ protectum videbo.

Fateor me quidem indignum gratiâ dilecti Filii tui, quem sæpè offendi, cui tam ingratus extiti: attamen veniam & misericordiam spero per te, ô

gloriosa Mater & Virgo, quæ instar solis, qui super bonos & malos oritur, indifferenter omnibus te exorabilem, omnibus clementissimam præbes, omnium necessitates amplissimo quodam miserearis affectu: respice me oculis misericordiæ; monstra te mihi in negotio æternæ salutis meæ misericordissimam Matrem.

O Gloriosa Regina mundi, unica Spes nostra, & Advocata gentis nostræ: loquere tu sæculorum immortalis Filio tuo dulcissimo pro nobis, & libera nos de morte æternæ damnationis.

Data est tibi, ô MARIA Virgo, cœli terræque Regina, omnis potestas, in cœlo & in terra, & in manu tua est vita & salus nostra, & nihil tibi impossibile, cui possibile est, desperatos in spem beatitudinis relevare.

Tu es Spes unica peccatorum; quia per te speramus veniam omnium delictorum, & in te nostrorum est expectatio præmiorum.

Non nobis est alia, quàm in te fiducia, ô Virgo sincerrima. Tu enim es omne auxilium, armatura, exultatio, spes, & robur nostrum.

In te sperant, qui noverunt Nomen tuum; quoniam non derelinquis sperantes in te.

Quis, ô Domina mea, speravit in te, & pudore est affectus? aut quis hominum omnipotentem tuam ropavit opem, & fuit derelictus unquam?

Certè, Domina mea benedicta, Tu es defensio generis humani, portus & protectio eorum, qui ad te confugiunt.

O Quàm

erga V. Sanctissimam.

327

O Quàm innumeri peccatis dediti, jam DEUM deseruerant, omnemq; cœlestis patriæ cætum, ac DEUM ipsum abjurârant, negârantquè, & in desperationis voraginem sese præcipites dederant! qui tamen ad te confugientes, benignissimè à te servati sunt, donec, te intercedente, apud DEUM in gratiam restituerentur?

O Quoties tremendi Iudicis severam justitiam, aut mitigâsti, aut avertisti?

O Quoties apud Filium tuum dilectissimū, nobis indignis, gratiam & consolationem impetrasti?

Citiùs cœlum cum terra periret, quàm tu aliquem seriò te implorantem tua ope destituas.

Revera Tu es, & diceris Mater, & Regina misericordiæ. Tu es desperantium spes opportuna, & auxilio destitutorum adiutrix præsentissima, cujus honori tantum tribuit Filius dulcissimus, ut quidquid petieris, mox impetres; quidquid volueris, mox fiat.

Tibi regni cœlestis omnes thesauri & claves commissæ sunt, quibus cœlum omnibus te invocantibus, & in te sperantibus aperis, & nemini claudis.

O Quoties jam cecidissem, nisi tu me tua intercessione tenuisses? quoties periissem, nisi me protexisses, & conservâsses?

Insuperabilem, ô Deipara, spem tuam habens servabor: defensionem tuam possidens non timebo: tantummòdò compatere animæ meæ ad te suspiranti, & in te speranti: respice in me, & festina semper in adjutorium meum.

V4.

Ne

Ne finas me, ô consolatrix cordium, ne finas me elongari à te; intueri benignis illis oculis tuis desiderantem tibi placere.

Sicut enim in æternum vivere, ac salvus esse non potest is, quem à te aversum despexeris; ita in æternum perire non potest is, quem ad te conversum respexeris. Occurre, Domina, quærenti te, recipe confidentem in te, esto mihi semper propitia, ut salutem per te inveniam.

Eja candidum lilium, post DEUM spes mea maxima, ô MARIA dulcissima! loquere pro me bona, coram tuo dilecto Filio: fac verbum pro me efficaciter; age causam meam fideliter, vota mea impetra misericorditer; quoniam tibi confido, post Christum spes unica.

Tantummodo velis salutem nostram, & nequaquam salvi esse non poterimus.

Dic, ô MARIA Virgo benignissima, dic animæ meæ, ut audiam & sentiam. Ego sum Mater & Advocata tua, confide in me, non abijcet te cor meum. O quàm felix, si hoc verbum audire meruero! quàm felix si me tuo protegi sentiam auxilio! quàm felix, si in extremis mihi consolatrix adesse digneris; quàm felix, si gloriosum tuum vultum cernere merear in cœlis!

O Mater consolationis, exaudi me, protege me, consolare me, & adimple omne desiderium cordis mei.

*Actus petitionum variarum à Virgine
Sanctissima.*

O Dignissi-

O Dignissima Mater DEI! ô piissima Mater nostra, & unicum refugium, & solatium peccatorum, Sancta MARIA! ego maximus peccator, accedo ad thronum gratiæ & misericordiæ tuæ, & ad pedes tuos provolutus, toto cordis ac mentis affectu, supplex te rogo, ac per vulnera, ac pretiosum sanguinem dilectissimi Filii tui, ejusq; sacratissimam Passionem, obsecro ut semper pro me orare, & intercedere digneris ad Dominum DEUM nostrum.

Prohibet quidem mea abominabilis vitæ meæ turpitudine, quo minus ad te Dominā nobilissimam, Cœliq; Reginam excellentissimam accedam.

At quò vadam aliò, quàm ad clementissimam reus? ad misericordissimam peccator? ad Sanctissimam omnium vitiorum plenus? ad Beatissimam infelix?

Ah! per omnia, quæ in te operatus est DEUS, mirabilia, te obtestor, ne despicias me.

Impetra mihi apud Filiū tuum veniam & gratiā.

Non sit memor iniquitatum mearum, sed proiciat in profundū, immò miserationum ipsius abysus devoret, absorbeatq; omnia peccata mea.

Recordare, & monstra te nobis esse Matrem datam, & fac mihi securum accessum ad Filiū tuum.

O Misericordissima Domina & Mater, impetra mihi jugem, perfectissimamque contritionem de omnibus peccatis meis.

Utinam scindatur cor meum durissimum, ut lacrymæ mihi amarissimæ fluant die ac nocte,
quòd

quod tam ingratus, & tam rebellis DEO, & tam indevotus remaneo tot annis, infirmus ad omne bonum, impotens ad resistendum tentationi, & in omnibus delinquens.

Impetra mihi à dilecto Filio tuo uberem gratiam agnoscendi, desendi, & ritè expiandi omnia peccata mea, deinceps seriò vitam meam emendandi, & ferventi omnimodæ perfectionis studio ingratitudinem meam compensandi, ac demùm in gratia usq; in finem perseverandi.

Exaudi, Domina mea, vocem quâ clamo ad te, & ne despicias orationem servi tui. Si enim tu non respicies, quis aspiciet? Ne quidem ipse DEUS: à te enim non respectus, à DEO est despectus.

O Domina, omnes creaturæ derelinquant me, tantummodò tu non deseras me.

O serenissima Lux, & dulcissima serenitas, illumina me, doce me, dirige me in viam salutis æternæ, ut non aberrem.

Domina mea, quid est hoc, quia inimicus meus supplantat gressus meos? respice de cælo, & non adijce, ut etiam nunc illaqueent me decipulæ hostium meorum.

Ad te sunt oculi mei, Domina mea, ut eruas animam meam, de manibus quærentium eam. Tu es unicum refugium meum, in die tribulationis meæ.

Contine me sub tua protectione, Mater dulcissima, defende me à cupiditate mundi, à superbia vitæ,

vitæ, & à voluptate carnis, ut non solum illicita non faciam, aut appetam, sed etiam à licitis, à modò abstinēam, & tu sola cum Filio me delectes tuo.

O Spēs mea sancta, præbe mihi tranquillitatem, sedā omnem in me tempestatem, vitia ad radicem usq; extirpa, averte occasiones peccandi: contere caput serpentis, in me omnes illius laqueos mihi detege, & vires frange.

Succurre mihi tua potēti virtute, malaq; omnia mea pelle, ut Mediatrix & Domina, oratione, meritis, & potestate.

Effice me fortem, ut passionum & concupiscentiarum mearum vires frangam, nullis adversis deiiciar, nullis prosperis extollar, nullis tentationibus movear, animi quietem nulla unquam re turbari patiar, nihil præter DEI gloriam intendam, & quæram.

Dirige vitam meam, juxta tuum, tuiq; Filii dulcissimi beneplacitum, omnesq; actiones meas tuo honori consecratas suscipe, decoremq; & internam animi serenitatem mihi tribue.

Actus petitionis bonæ mortis.

O Virgo singularis, & DEI Mater ac nostra piissima, ego me totum semper, vitamque meam, sed præcipue finem vitæ meæ tibi commendo.

Tunc, tunc monstra te mihi Matrem misericordiæ, pietatis & clementiæ, tunc exhibe mihi jucundissimam præsentiam tuam. Appa-

Appareat mihi gloriosus vultus tuus in extremis, & consolatio tua lætificet egredientem spiritum meum, ô Mater clementissima.

O Beatum me, si te mitissimam Virginem liceat mihi in hora mortis præsentem videre, tuo frui solatio, tuisq; manibus auxiliariis conservari. Nihil enim tunc me terrebunt minæ conscientiae, non affligent peccata, non dæmones nocebunt.

Ego certè dum vivam, tuis laudibus cum gessiente lætitia studebo, ad te quos potero clientes adducam, me totum in obsequia tua effundam: Tu me in exitu vitæ, à tuis laudibus & obsequiis revertentem clementer suscipe: & cujus universa vita tibi consecrata fuit, non patiaris mortem esse à te alienam. Ego quasi in tuis brachiis suaviter conquiescens, vivere à modò studebo: Tu fac ut in ulnis tuis moriar, & expirem.

Succurre mihi in manu forti, Domina mea, cum hinc peccata, inde inimici mei undiq; coangustabunt me in extremis; comitare tunc animam meam, dum egrediens è corpore, aliud iter plenum periculis inire debet.

Eja Domina mea, Patrona & Advocata mea, Virgo MARIA, esto mihi Dux & Propugnatrix in tantis periculis: Tu me ab hoste protege, & hora mortis suscipe.

Non mihi prævaleat tunc inimicus; nihil suum in me inveniat; sint omnes animæ meæ fordes in meritis, & sanguine Filii tui abstersæ; nihil in ea maculæ, nihil scditatis remaneat.

Metuo

Metuo equidem difficile illud iter , & peccatis oneratum me sentiens totus contremisco : at tu metûs causas tolle , ô Mater benignissima, iter mihi para tutum , ut per te securus perrumpam hostium agmina, & misericordem à Filio tuo per te mihi placato recipiam sententiam

Scio me, ô Domina indignum, qui ad cœlestia aspirem: scio, quòd offensam DEI mei incurri, & mille gehennas promerui : attamen scio te esse Matrem misericordiæ, & miserorum peccatorum refugium tutissimum.

Confido de tua bonitate, quòd à peccatorum meorum nexibus, me à Filio tuo absolvi antequam moriar, procurabis, & simul emigrantem è corpore animam meam, manibus tuis suscipies, eamq; Christo Domino veræ Luci, æterno lumine illustrandam præsentabis.

† O MARIA Virgo dulcissima, si quando pro necessitate aliqua ex corde ad te clamavi, certè pro extrema illa mortis necessitate, maxime & cordialiter tibi supplico, ut me tunc non derelinquas, sed præsentia visitationis tuæ me infirmum confortet, ab inimico protegat, & desolatum confoletur.

Iterum, ac millies, commendo tibi humiliter & affectuosè animam meam, ut in hora egressionis ejus à corpore, eam suscipias, & ab omni potestate & invasione dæmonum eripias.

Hæc est hora, ô Virgo Mater Sanctissima, cuius ad memoriam contabesco, sciens tam enormi-

ter me oculos Filii tui offendisse, ante quos comparere, non sine causa, formido.

Hæc est hora illa tremenda, pro qua toties ad te cum lacrymis suspiro, ut eam mihi bonam & felicem impetres & facias.

Hæc est hora, in qua piam, & benignam te mihi Matrem experturum me confido: & licet reus nimis sim, & peccator, meæ tamen in te confidentiæ fructum, tunc me percepturū non diffido.

Appare tunc mihi, & consolans me, ô dulcissima; dic animæ meæ, ego Mater sum misericordiæ, confide in me, ego te non derelinquam, sed rogabo pro te Filium meum.

O Quantum solatium mihi tunc erit, si faciem tuam jucundissimam tunc videro, si consolationem sensero! quàm fortis fiam ad resistendum diabolo, quàm patiens inter dolores mortis, quàm resignatus ad omnem DEI voluntatem.

Sic, sic, Mater dilectissima, me conforta, sic me protege, sic me consolare & visita, ut fugiant à facie tua exterritiæ diabolicæ potestates, ab infestatione sua desistentes, & ego cum amorosa respirans in te fiducia, suaviter obdormiam inter brachia tua beatus in pace.

† O Multum desiderabilis MARIA Virgo, ne elongeris unquam à me, quoniam plurima hostium me premunt bella; noli tardare spes mea, quin statim succurras inter manus inimicorum penè deficienti. Quid enim sine te possum, aut faciam, in terribili præcipuè mortis articulo, si non adsis
ultro

ultrò propitia, cùm ne invocare quidem te potero?

Nunquid non recordaberis mei tunc, ô Domina? quid fiet de me, Mater, si tunc avertas faciem tuam à me? & dicant inimici mei, comprehendamus & diripiamus eum; quia non est qui eripiat & adjuvet. Quid agam miser, si tunc non inveniam in tua pietate refugium.

Veni Domina, ostende mihi tunc desiderabilem faciem tuam, & porrige manum periclitanti, extrahens me de profundis tam vehementium aquarum, ne obijciant hostes tuæ misericordiæ invidi, ubi est ejus Domina, de cujus clementia confidebat?

Veni dulcissima, festina in adjutorium meum, antequam inimicus meus me rapiat, antequam me involvant tenebræ, antequam infernus me devoret.

O Quandiu, quandiu dicetur adhuc mihi: ubi est Domina tua, expecta, & reexpecta.

Quando apparebo ante faciem tuam, ô charissima, ubi simul & faciem tuam, & dulcem ventris tui fructum mihi ostendas? ad hoc aspirat cor meum, & anima mea, ô MARIA, assume me velociter ad te, & comple desiderium meum; fiat, fiat.

Adesto Virgo super omnes speciosa, adesto mihi in occasu vitæ meæ.

Velis, ô Cœlestis decor domûs DEI, velis simul cum dulcissimo Filio tuo, cor servi tui veniens exhilarare, & pro hora mortis firmare.

Gere,

Gere, ô Mater piissima, gere continuam curam mei, & ne obliviscaris officii piissimæ Matris, nunc & in hora mortis meæ.

Ora pro me, ut sim fidelis usq; ad mortem, & ut fidem meam Filio tuo dilectissimo conservem usque in finem, ut de manu ipsius accipiam coronam vitæ.

Festina, ô Mater misericordiæ, veni, & fac, ut in occasu meo, oriatur mihi sol, non tam justitiæ, quàm misericordiæ.

Anima mea sit in manibus tuis, de quibus nemo potest eam rapere.

Potens es, etiam de portis inferni, potens es eripere me, & salvare me.

O Domina, tuis advolvor pedibus, oro ad sis mihi in hora mortis meæ tuâ præsentiam svavissimâ.

Serva me, tueri me nunc, & in extremo spiritu constitutum.

O Unica consolatio mea, defende me à tetris & horrendis dæmonum aspectibus.

Exurge, Domina piissima, exurge, & veni in adjutorium mihi, confundatur, & pereat inimicus meus à facie tua.

Suscipe miseram, ac desolatam animam meam, & deduc eam ad summi Judicis conspectum atque de æterna beatitudine, certam redde & securam.

Actus isti ne cœdium legenti afferant, in tres partes possunt partiri, juxta Signum + Crucis.

*Actus desiderii videndi Virginem Sanctissimam
in Cœlis.*

O Gloriosissima Dei-Genitrix Virgo MARIA, multum quidem gaudeo de bonis tuis, & de gratia DEI, quam habuisti in terris: sed multo magis desidero gaudere de tua gloria ineffabili, quam habes in cœlis.

O Quantum desidero videre vultum tuum, speciosissima Virgo! assume me velociter ad te, & comple desiderium meum.

Da mihi gratiam tuam, ut semper de te gaudeam, & post illud exilium te contempler in gloria.

O Svavissima Virgo, trahe me post te, ut curram in odorem unguenti tui pretiosi. Nardus enim tua dedit odorem svavissimum, & ideò Rex regum exaltavit te, & introduxit te ad solium gloriæ tuæ, ubi super omnes choros Angelorum exaltatam te videre, & inde æternis gaudiis perfundi cupio.

Quemadmodum desiderat cæcus lumen, ita, immò plùs, ô clarissima Stella maris! oculi mentis meæ gestiunt te videre: & libenter eligerent privari visu omnium, quæ sunt sub sole, ut te tantummodo, in quam desiderant omnes creaturæ aspicere, cernere valeant.

O MARIA pulchra ut Luna, electa ut Sol, cujus pulchritudinem sol & luna mirantur, fac me videre hanc pulchritudinem tuam, & ob eam adorare, & laudare Divinam Majestatem in æternum.

Fac, ut in aspectu rutilantis vultus tui, repleatur

tur gaudio cor meum, & lingua mea perpetua
jubilatione.

Fac, ut exultem æterna per sæcula de tua gloria, & de mellifluæ faciei tuæ sempiterna visione.

Concupiscit, & deficit virtus animæ meæ ad
contemplandam speciem, & gloriā tuam in cœlis.

Suspiro multum de tam longa tui absentia:
desidero multum ad te venire, & exhilarari de tua
præsentia.

O Quando videbunt oculi mei te Dominam
meam gloriosam, cœli terræq; Reginam?

O Quando adimplebitur desiderium animæ meæ,
in manifestatione gloriæ tuæ?

Quemadmodum desiderat cervus ad fontes aquarum:
ita desiderat anima mea ad te clarè intue-
ndum in cœlis, Dominam & Matrem meam dul-
cissimam.

Sitivit anima mea, ad te DEI Matrem viven-
tem & regnantem in cœlis: quando veniam, &
videbo lucidiorem sole faciem tuam?

O Quando rupto corporis mei vinculo, videbit
te, & laudabit anima mea?

Utinam adjungar Angelorum Choris, & Bea-
torum omnium societati laudantium te, ut medul-
la cordis mei, indefessè jubilet tibi Reginae cœli!

O Mater & Mediatrix nostra dulcissima! ad-
mitte me aliquando ad sempiternam tuam lætiti-
am, & deduc me in gaudia Filii tui, ubi DEO,
Tibi, & Sanctis omnibus collætari valeam, & in
æternum à vestro consortio, & conspectu nun-
quam separari.

Aspice

Aspice inter cæteros, me peccatorem famulum tuum, & favore tuo tam in vita, quàm in morte, me dirigens ad ineffabilem gloriam tuam contemplantam, admirandam, & laudandam tandem me perducito.

O gloriosa Domina & spes nostra, sicut mundus per manus tuas recepit Salvatorem; ita in manibus tuis spero me visurum Dominum meum JESUM Christum. Ita noctu oranti Beato Francisco in sinu deposuisti, ô Virgo Mater, parvulum Filium tuum, eumquè illi per noctem totam ad delicias cordis ejus reliquisti.

Verùm ego non sum dignus tanto favore tuo; sufficiet mihi ut videam, laudem, & amem in cælo dulcissimum Filium tuum, & te dilectissimam Matrem ejus in æternum.



A C T U S

Diversis temporibus

A viris spiritualibus exercendi.

Noctu evigilando identidem in sorde dicendum: Miserere mei DEUS secundum magnam misericordiam tuam: quamvis minor sim miserationibus tuis.

Miserere mei DEUS, sicut potes, scis & vis.

DEUS propitius esto mihi peccatori.

O DEUS meus & omnia.

O Beata Trinitas DEUS meus in te credo &

X2 spero:

spero: te adoro & laudo: te amo super omnia; & ex amore tui de omnibus peccatis doleo: te amplius offendere nolo: veniam, emendationem, vitamq; æternam à te spero: & me totum ad omnia quævis, offero.

JESUS, MARIA, sis mihi JESUS & MARIA.

JESUS, MARIA, JOSEPH, Angeli, Sanctiq; omnes, sint nobiscum semper.

Surgendo ex lecto. DEUS DEUS meus ad te de luce vigilo. In matutinis meditabor in te: quia fuisti adjutor meus: Ps. 62.

Cor meum & caro mea exultaverunt in DEUM vivum: Ps. 83.

Benedictio DEI Omnipotentis Patris, & Filii, & Spiritus Sancti, descendat super me & maneat semper.

Clementissime Domine DEUS meus, benedicat nos tua Omnipotentia. Instruat & dirigat tua Sapientia. Inflammet tua Charitas. Stabiliat nos tua Trinitas. Intrahat & uniat nos tua dulcis Unitas,

Benedicta sit Sancta & individua Trinitas: confitebimur ei; quia fecit nobiscum misericordiam suam.

Gloria Patri, & Filio, & Spiritui Sancto. Sicut erat in principio &c.

† O DEUS meus, spes mea, amor meus, & omnia, sis infinitè benedictus, infinities, ab omnibus, in omnibus, super omnia, gratis, propter te, in æternum, & ultra.

Gratias

Gratias ago bonitati tuæ pro requie, quam mihi hac nocte concessisti, & me dormientem à subitanea morte, & ab aliis periculis mentis & corporis præservasti. Commendo tibi hodie animam & corpus meum : serva me, quæso, ab omni peccato: doce me facere voluntatem tuam: & in omnibus actionibus me dirige. Peto, Domine, & desidero, ut ex singulis actibus, verbis, cogitationibus, motibus, & respirationibus meis resultet laus nominis tui. Peto, ut omnes Spiritus beati, & omnes Sancti tui glorificent te pro me, omni temporis momento. Tibi enim debetur laus, gloria, honor, & benedictio in sæcula sæculorum, Amen.

JESUS, MARIA, sis mihi JESUS, MARIA.

JESUS, MARIA, vobis dono cor & animam meam.

JESUS, MARIA, quoties respiro toties ad vos suspiro, & suspirare volo.

Actus Oblationis manè faciendæ.

Clementissime Domine DEUS meus, Pater, Fili, & Spiritus Sancte, qui me propter temetipsum creasti, & cui ob plurimas & gravissimas causas mei totius tributum debeo, ob id ego nunc, quantâ vi, & affectu possum maximo, me ipsum totum, unâ cum dulcissimo JESU Christo, & Virgine Sanctissima, universis Spiritibus beatis, & Sanctis, qui in cœlo sunt, ac justis, qui ubiq; existunt, quos mihi per affectum ar-

tiſſimè adſtringo ; & ſimul omnia verba , cogitationes & opera , immò omnes reſpirationes , & omnes cordis, corporis, & animi mei actus & motus, atq; cuncta momenta hujus diei, totiusquè vitæ meæ, uniendo hæc univerſa meritis & operibus JESU Chriſti Domini noſtri, & dulciſſimi Redemptoris mei, & Beatiffimæ Virginis MARIE, ſuaviſſimæ Matris & Patronæ meæ, & omnium Beatorum Angelorum, & Sanctorum , atq; juſtorum . qui unquam fuerunt, ſunt, vel erunt, ad maximam gloriam & honorem tuum dirigo & offero ! & ex amore tui, & propter amorem, & honorem, ac beneplacitum , & guſtum tuum , & ex intentione tendendi ad perfectionem cuncta dicere, cogitare & agere hac die, totoquè vitæ meæ decurſu volo.

O ſi præter anguſtum hoc cor meum univerſa poſſiderem corda, quotquot tibi placuère ab æterno, & in æternum placitura ſunt ; & præter ea, quæ tu creaviſti , ſi infinita alia haberem corda, quæ & ab æterno fuiſſent, & in æternum perdurare deberent, quæ nihil aliud agerent, niſi te reſpicerent, cogitarent, laudarent, & amarent.

Proteſtor coram te, totaq; curia cœleſti, hanc eſſe mentem meam, hoc votum, & deſiderium, in omnibus cogitationibus, verbis, & operibus meis, quinimò & in omnibus ſuſpiriis, motibus, & reſpirationibus, hoc me ſingulariter velle, & intendere, ut omnem illam actuum & cordium tuæ Divinæ Majeſtati placentium multitudinem congregem,

gregem, & te cum illis semper cognoscam, laudem atq; diligam super omnia: quod & modo facio, & post semper faciam; idq; puritate, quâ possum maximâ, sine ullo præmiî, vel pœnæ respectu, sed propter Te summum Bonum meum: quandoquidem multis titulis hæc tibi debeo, sed præcipuè ob hæc quatuor, illa tibi offero.

Primò in Holocaustum, ad tuam Divinam Majestatem protestandam, & unionem cordis mei tecum ineundam.

Deinde in Hostiam pro peccatis expiandis.

Præterea in Hostiam laudis & gratiarum actionis, ad gratiam pro beneficiis universalibus & peculiaribus referendam.

Deniq; in Hostiam pacificam, pro bonis & denis omnibus, quibus egeo, usq; ad beatitudinis adeptionem, impetrandis.

Præcipuè pro impetranda vera compunctione, peccatorum remissione, emendatione vitæ, ab omni peccato præservatione, victoria tentationum, Christiana perfectione, passionum mortificatione; præsertim NN. vitiorum extirpatione; maximè NN. virtutum acquisitione, præcipuè NN. pro dono perseverantiæ, & bona morte: pro lucrandis indulgentiis, quascunq; hodie lucrari possum: deniq; pro fidelibus defunctis; præsertim pro animabus NN.

Qui vult addat: Pro impetranda Ecclesiæ exaltatione, Hæresum extirpatione, Concordia Principum Christianorum, pro conservatione ob-

servantiæ regularis in tota nostrâ Religione; pro omnibus religiosis, ut omnes juxta suam vocationem sanctè vivant & serviant tuæ Majestati, pro liberando hoc Regno à pestè, fame, & bello, pro benefactoribus nostris, æternâ retributione; pro afflictis; captivis, agonizantibus, pro omnium Infidelium; Hæreticorum, Schismaticorum; & peccatorum conversione, pro inimicis nostris, pro omnibus, qui se cõmmendaverunt & cõmendant orationibus meis, & pro quibus aliquando proposui, & tu Domine DEUS meus, vis me orare.

Te itaque svavissime Domine mi, per viscera misericordiæ tuæ supplex oro, digneris has omnes oblationes meas admittere; & me in omni cogitatione, locutione, & actione juxta tuum beneplacitum dirige; à spiritu immundo, & à quovis peccato, quantumvis minimo; liberare, & in me ac de me quidquid tuæ pietati placuerit, semper facere; eamq; mihi præstare gratiam, ut nullam cordis mei partem, cum quacunq; re creata computem, sed totus; quantus quantus sum, uni tibi Creatori, DEO, Domino, ac summo Bono meo jugiter adhaeream.

O Domine effice me hominem secundum cõstitutum; quod ut fiat, tu hodie; ac semper in me opera mea omnia operare: tu in me cogita, tu loquere, tu age: tuis meritis opera mea conjunge.

Suscipe; Domine, universam meam libertatem; accipe memoriã, intellectum atq; voluntatem omnem. Quidquid habeo vel possideo, mihi largitus

gitus es, id tibi totum restituo, ac tuæ prorsus voluntati gubernandum trado. Amorem tuum solum cum gratia tua mihi dones, & dives sum satis: nec aliud quidquam ultra posco.

O DEUS, castorum corporum & incorruptarum animarum habitator! da ut nihil extra te diligam; ut te in sanctitate corporis, te in animæ puritate glorificem: amore te diligam, amore tibi serviam: Nam in te habeo omnia, quem amare appeto super omnia. Sic *S. Gertrudis*. DEUS meus concede mihi, ut in amore tuo permaneam usquē in finem. Sic *S. Aldegundis V.*

Actus Oblationis B. V. MARIE.

Tibi quoquē, ô Beatissima Virgo MARIA, cui meipsum totum post Filium tuum dulcissimum imprimis debeo, affectu quam possum maximo, offero omnes cogitationes, verba, & opera mea, nec non multitudinem illam cordium ad honorem tuum, cum plena tibi placendi in illorum singulis voluntate & intentione, nullam ut propterea aliam mercedem velim, quam ut purissimæ animæ tuæ sic aliquatenus voluptatem adferam.

Obsecro te, Regina Serenissima, ut hodie mihi adesse & auxiliari digneris, ut tua intercessione diem hunc in magna vitæ puritate, qualis tua fuit, dum vixisti, traducere queam.

Fac, ut cor meum nihil hodie & semper cogitet, loquatur, operetur, quod non sit in hono-

rem Divinae Majestatis, atque tuum, & proximi utilitatem. Doce nos, ut mente habitemus in cœlo, & ea, quæ in terris facimus, non faciamus negligenter.

Impetra mihi, ô Domina dulcissima, charitatem veram, quâ dulcissimum & dilectissimum Filium tuum Dominum nostrum JESUM Christum toto corde diligam, & te post ipsum super omnia, & proximum in DEO, & propter DEUM: sic ut de bono ejus gaudeam, nullumq; contemnam, neq; temerariè judicem, neq; in corde meo me alicui præponam.

Fac etiam, ô Sanctissima Dei-genitrix Virgo, ut dulcissimi Filii tui timorem pariter & amorem semper in corde meo habeam; atq; me in tua & ejus dilectione viventem & morientem, in viam salvationis & salutis dirige.

Eodem tempore matutino optimum esset aliquod Pactum cum DEO facere, aut jam semel factum renovare secundum exemplum, quod habetur supra pag: 240.

Simili modo posset aliquis eodem tempore seipsum B. Virgini in servum, aut filium offerre, cujus Oblationis, sunt Aëtus supra pa: 319. vel Pactum cum eadem facere, aut renovare: ut pag: 273.

Aëtus commendationis nostri Virgini Sanctissimæ.

O Superpiissima Mater DEI & Virgo MARIA! ô nostra singularis Mater & Advocata, post DEUM potentissima, sapientissima &

manè exercendi. 347

ma & benignissima! nos & nostros omnes ad te confugientes suscipe in Maternam tuam custodiam & directionem: adopta in filios tibi devotissimos: purga & præserva ab omnibus vitiis, exorna tua humilitate, castitate, charitate, obedientia, cæterisque virtutibus: impetra omnium necessariorum bonorum concessionem, & malorum liberationem ac præservationem: & da nobis hunc diem, & residuum vitæ nostræ sub honore tuo dignè trāfigere.

Ora etiam pro infirmis, agonizantibus, captivis, tentatis, afflictis, novitiis, & animabus purgandis. Et hanc domum tuam, universumq; Ordinem nostrum, Ecclesiam & Regnum, in omnibus tam interioribus, quàm exterioribus, sic conserva, rege & gubernare, ut cultus DEI & tuus animarumq; salus, hinc semper vigeat & crescat.

Deniquè fac, ut per Filii tui passionem & mortem, tuamq; intercessionem & merita, perfectè ab omni culpa & pœna hinc purgemur, in tuo servitio & cultu semper proficiamus, & usquè in finem perseveremus, & statim post mortem ad æternam DEI fruitionem tecum perducamur. Quod ut fiat, ecce Virgineo cordi tuo piissimo commendamus omnia nostra exercitia, verba, vota, passionem & opera, ut ex tuis adjungas, suppleas, offeras, optatamquè gratiam nobis referas: & ad cor Domini JESU dilecti Filii tui nunc & semper, & maxime in hora mortis nostræ nos introducas.

Actus

*Aëtus commendationis B. Virgini, & simul
S. Joanni Evangelista.*

O Intemerata, & in æternum benedicta, singularis atque incomparabilis Virgo Deigenitrix MARIA, gratissimum DEI templum, Spiritus Sancti Sacrarium, Janua Regni cœlorum, per quam post DEUM totus vivit Orbis terrarum: Inclina Mater misericordiæ aures tuæ bonitatis indignis supplicationibus meis, & esto mihi miserrimo peccatori pia & propitia in omnibus auxiliatrix.

O Joannes beatissime, Christi familiaris & amice, qui ab eodem Domino nostro JESU Christo Virgo es electus, & inter cæteros magis dilectus, atque in mysteriis cœlestibus ultrà omnes imbutus; Apostolus enim & Evangelista factus es præclarissimus: te etiam invoco cum MARIA Matre ejusdem Domini nostri JESU Christi Salvatoris, ut mihi opem tuam cum ipsa conferre digneris.

O Duæ gemmæ cœlestes, MARIA & Joannes! ô duo luminaria divinitus ante DEUM lucentia! vestris radiis scelerum meorum effugate nubila. Vos enim estis illi duo, in quibus Unigenitus DEI Filius, ob sincerissimæ Virginitatis meritum, dilectionis suæ confirmavit privilegium in cruce pendens uni vestrum ita dicens; Mulier ecce Filius tuus: deinde ad alium; Ecce Mater tua.

In hujus ergo tam sacratissimi amoris dulcedine, quâ tunc ore Dominico velut mater & filius ad invicem conjuncti estis, vobis duobus ego miserimus

ferrimus peccator commendo hodie corpus & animam meam: ut in omnibus horis atq; momentis, interiùs atq; exteriùs firmi custodes, & pii apud DEUM intercessores mihi existere dignemini. Poscite mihi, quæso, corporis & animæ salutem.

Agite, quæso, agite vestris gloriosis precibus, ut cor meum invisere & inhabitare dignetur Spiritus almus, gratiarum largitor optimus, qui me à cunctis vitiorum sordibus expurget; virtutibus sacris illustret, & exornet, in dilectione DEI & proximi mei perfectè stare & perseverare me faciat, & post hujus vitæ cursum ad gaudia ducat Electorum suorum benignissimus Paraclitus. Qui cum DEO Patre, & Filio vivit & regnat in sæcula sæculorum, Amen.

Hac commendatione sui quotidie utebatur S. Edmundus Episcopus, qui à B. Joanne admonitus fuit, ne illam unquam omitteret.

Eadem quotidie utens, vir quidam nobilis defensus est contra demonem, qui ei famuli specie à servitiis fuit.

Et S. Mechtildis ita sæpiùs ad Christum oravit.

Commenda me Domine Matri tuæ, sicut dilectum tuum Joannem ei, & eam Joanni commendasti.

Eadem Divinum amorem à Sancto Joanne petiit dicens:

Per illud munus, ô S. mi Joannes, quod DEO obtulisti; cum ejus Genitricis pio amore omnibus
charis

charis carere voluisti; rogo, ut impetres mihi, omne charum pro Christi amore respuere, ut ipsum toto corde valeam diligere.

Actus commendationis S. JOSEPH præcipuo nostro Patrono.

O Sancte JOSEPH Virginis Matris DEI Sponse purissime, periclitantium, & agonizantium, atque omnium B. MARIE Virgini Sponsæ tuæ, tibiq; devotorum servorum Patrone, Advocate, & Protector fidelissime, ego N. peccator licet vilissimus & indignissimus, omnem tamen spem meam & fiduciam in te, post DEUM & Sanctissimam Virginem Sponsam tuam, collocans, Te hodie in Patronum & Advocatum meum pro felici morte, & pro perfectione ac sanctitate vitæ consequenda, eligo, & propono, firmiterq; statuo, me nunquam contrarium honori tuo aliquid dicturum vel facturum; immò juxta meam possibilitatem, erga te devotionem inter fideles propagaturum, laudeique tuas, quibus poterò modis, enarraturum.

Obsecro, igitur, & obtestor te, per illum amorem & submissionem, quam tibi dulcissimus JESUS Filius DEI uti Nutritio suo, & Patri putativo, ac B. V. MARIA tanquam Sponso suo dilecto exhibuit: specialiter verò per illam consolationem animæ tuæ, & lætitiā cordis tui, quam in egressu animæ tuæ de corpore percepisti, dum tibi morienti assistentem JESUM & MARIAM habuisti;

habuisti; fuscipe me in servum perpetuum; adsis mihi semper in omnibus necessitatibus meis tam spiritualibus quàm corporalibus: defende me ab omnibus hostibus visibilibus & invisibilibus. Præcipuè verò in agone meo, tuum patrocinium afflicta anima mea experiatur, adsis illi Patronus in hac extrema necessitate, effice tuis sanctissimis precibus apud JESUM & MARIAM, quatenus me tunc sua præsentia dignentur consolari, mihi què morienti assistere: ut sic per bonam & sanctâ mortem ad felicem æternitatem transire valeam, ibi tecum simul beatè victurus.

Actus commendationis Angelis Sanctis.

AVe per suavissimum cor Domini JESU, singulari affectu, Angele mi custos pietate superna mihi peculiariter deputate: avete & vos omnes Angeli Sancti, quibus humiliter gratias ago pro vestra fidei custodia & benignitate: & obsecro vos, ut me propter multiplicem meam irreverentiam, inobedientiam, negligentiam, ingritudinem & alios defectus non deferatis; sed his omnibus vestra intercessione deletis, assistite mihi, ut dignè ambulem in vocatione mea.

Et quoniam nimis sum infirmus, ignarus, tepidus, instabilis, & ad omne malum proclivis; hostibusquè fortissimis, astutissimis, & crudelissimis undiquè circumdatus, & in maximis semper periculis constitutus: custodite me, quaeso, in omnibus viis meis; in manibus vestris me portate, &

ab

ab hostium omnium insidiis & impugnationibus protegente & liberate: in omnibus operibus & studiis meis me excitate, dirigite, adjuvate, & perficite: ac omnia opera mea DEO offerte: mihi quæ, & omnibus pro quibus teneor & intendo orare, optatam gratiam referte: atque in hora mortis me protegente, consolamini, suscipite, & ad Regnum gloriæ vobiscum perducite.

*Actus commendationis S. Matris nostræ
Teresiæ.*

AVe per Cor dulcissimum Domini JESU, ô S. Virgo Teresia, gaudeo de tua gloria, & gratias tecum ago Domino DEO pro omnibus bonis tibi collatis; tibi quæ, in augmentum gaudii & gloriæ tuæ, offero idem Cor dilectissimi ejusdem JESU, qui te in Sponsam sibi amabilissimam elegit. Obsecro te, per amorem JESU, quo flagras, impetra mihi licet indigno filio tuo duplicem tuum spiritum: spiritum, scilicet, Seraphicæ charitatis, & unionis cum DEO; spiritum quoque; contemplationis & devotionis: impetra omnes virtutes, quibus tu Divinæ Majestati placuisti, præsertim ardens desiderium & continuum studium acquirendæ perfectionis: quatenus castris tuis insertus, tuisque vestigiis inhærens, promissa tandem diligentibus DEUM præmia tecum consequi merear. Oro etiam, ut in fine vitæ meæ, tu Mater piissima, Patrona, & Advocata mea, me infidelem clientem & servum tuum, ab insidiis inimici defendere

fendere, digneris, tantamque contritionem & fontem lacrymarum mihi obtinere, ut peccatorum vinculis absolutus, subito valeam DEUM sine fine laudare, & cum ipso in æternum lætari. Quod ipse præstare dignetur, intercedentibus sanctis meritis tuis, qui in Trinitate perfecta vivit, & regnat in sæcula sæculorum.

*Actus gratiarum actionis pro donis omnibus
Sanctis collatis.*

Benedico te, amantissime JESU, DEUS meus, pro omnibus gratiis ac donis, quæ Sanctis tuis in hac vita mortali olim, & nunc in gloria tecum constitutis contulisti: præcipue vero his, quorum hodie est Festivitas in cœlis, aut in Ecclesia memoria in terris: & potissimum Ordinis nostri Sanctis & Patronis meis NN. Horum omnium orationes & merita tibi pro me offero, & per illos me tibi nunc in Cor tuum piissimum commendo, & per intercessionem ac merita horum Sanctorum obsecro, ut ego virtutes eorū, illis devotus existens, semper imitari studeam, eorumque in omnibus, sed præcipue in hora obitus mei auxilium sentiam, Amen.

Una sociarum S. Ursula quemdam Carthusianum docuit sic orare quotidie: B. Virginem: & S. Ursulam ac socias ejus. De quo Marches. Diarij 21. Octobris.

O Virgo Regina Virinum, summum Trinitatis Sacrarium, Angelorum speculum, scala Sancto-

rum omnium, tutum peccatorum refugium, cerne, ô pia, nostrum periculum: in morte tuum placatum ostende Filium: & tuum vultum gloriosum atquè rutilum.

Orate pro me, beatissimæ Virgines & Martyres, ut adversum me non prævaleant hostes terribiles.

Omnipotens æternæ DEUS, qui nos idoneos fecisti ad Majestatem tuam exorandam, fac Sanctas Virgines & Martyres tuas, Ursulam & socias ejus pro nostris intervenire peccatis, quarum meritis nobis indulgentiam largiaris.

Sancta quoq; M. Magdalena, B. Mechtildē monuit: Omnis, inquit, qui DEO gratias agit pro lacrymis, quas ad pedes Domini JESU fudi; & pro amore, quo tunc me totam replevit; orans ut lacrymas veræ poenitentiae obtineat, & divinum amorem sibi infundat; quod meritis meis obtinebit, ita, ut ante mortem Dominus ei peccata sua dimittat, & in DEI amore proficere faciat; Et iteò sic orabit.:

Gratias tibi ago, liberalissime misericordiarum Pater pro lacrymis, quas è corde & oculis S. M. Magdalenæ, vi amoris tui elicuisti, quas illa ad pedes Christi Filii tui uberrimas effudit: gratias tibi ago pro amore, quem tunc animæ & cordi illius infudisti, & illam totam replevisti, ex quo amore ejusdem Christi Domini nostri pedes lavit, & crinibus terfit: Rogo te per omnem illam misericordiam tuam, per JESUM Christum unigenitum Filium tuum, per B. Magdalenæ amorem

ac la-

ac lacrymas, ut des cordi meo veras pœnitentiæ lacrymas, omnia peccata mea mihi dimittas, & amorem tuum infundas frigido huic pectori meo, te deinceps, usquē ad mortem semper ampliùs atquē perfectiùs amare optanti, Amen.

Bonum est præterea nos commendare B. Barbaræ V.M. & per ejus merita mortem felicem à DEO postulare.

Hymnus ad S. Barbaram.

Ave Martyr gloriosa, Barbaraq; generosa,
Paradisi vernans Rosa, Castitatis Lilium.
Ave Virgo pulchra tota, Charitatis fonte lota
Dulcis, mitis & devota, Vas virtutū omniū.
Ave criminis ignara, Sponsū audis voce clara,
Veni pulchra, veni chara, Veni coronaberis!
Ave Barbara serena, Pulchra quasi luna plena
Singulari cantilenā, Sponsum Agnū sequeris.
Ave Barbara beata, Quæ cum Sponso præparata
Nuptiarum ad optata, Transivisti gaudia.
Ave fulgens margarita, In corona JESU sita,
Tam in morte quàm in vita, Sis nobis propitia.

Specie tua, & pulchritudine tua

Intende, prosperè procede, & regna.

Oratio.

OStende nobis, quæsumus, Domine, tuæ pietatis misericordiam, quam in Sancta Virgine & Martyre tua Barbara, piè & misericorditer ostendisti, ut ipsius meritis & precibus, à subitanea & improvisa morte liberemur,

& ante diem & horam exitus nostri, Pœnitentiæ, tuiq; Sacratissimi Corporis & Sangvinis, sacræquæ Undionis Sacramentis, salubriter perfruamur, eaquæ intercedente, ab omnium hostium incurſu protegamur, & ad te pia devotione & lætitia perducamur. Per Christum Dominum nostrum, Amē.

Multum solliciti esse debemus, ut illis Sanctis. quorum nomina, vel in Baptismo, vel in Religione nobis sunt imposita, vel qui sorte quolibet Mense nobis obvenerunt, vel quos ex nostra devotione in nostros Patronos eligimus, nos frequenter & ferventer commendemus, illorum auxilia in necessitatibus nostris imploremus, in virtutibus & in via perfectionis insignes progressus per eorum merita à DEO petamus; certissime persuasum habentes, quod pro nobis, invocati à nobis, fideliter orabunt: prout S. Mechtildis, dum Litanie de OO. SS. recitarentur, vidit B. Virginem, & omnes Sanctos, qui ibi nominabantur, flexis genibus pro hominibus orare. Lib: 4, cap: 4. Spirit: grat:

Nullus miretur formas Oblationum seu Directionum hic longiores paulò positas, quam sint in Instr: Novit data: quia ibi, exempli causa, data est norma, quam licet unicuiq; dilatare secundum suum placitum, devotionem, & necessitatem. Unde quomodo id fieri posset, idq; cum uberrimo animæ nostræ fructu, hic ostenditur.

Quod si alicui magis arridet forma brevior Oblationum & Directionum, utatur illâ brevissimâ,

vissimâ, quæ est sup: p. 340. à Signo + Crucis.

O DEUS meus, spes mea, &c.

Vel etiam illâ, quæ habetur in Instruct: Novit: quæ est hujusmodi.

Clementissime DEUS, cui me totum ex multis capitibus debeo, meipsum totum cogitationes, verba, & opera totius vitæ, sed hodierna die peculiariter unâ cum JESU Christo Domino nostro, Beatissima Virgine, universis Spiritibus Beatis, & Sanctis, qui in cælo, ac Justis, qui ubiq; existunt, quos omnes mihi arctissimè per affectum adstringo, dirigo ad gloriam Majestatis tuæ, tibiq; sine intuitu alio, per illa omnia placere impensissimè cupio, ac opto ultra ea, quæ recensui, innumera millia perfectissimorum cordium, quæ simul cum eis ab æterno tibi placuissent, & placitura in æternum essent, possidere; omniaquè hoc desiderio intra me concepta, tibi ad singulos halitus offero: in Hostiam pro peccatis expiandis; in Hostiam gratiarum actionis, ad gratiam pro beneficiis universalibus & peculiaribus referendam; in Hostiam pacificam pro bonis omnibus, quibus egeo, usquè ad beatitudinis adeptionem impetrandis; in Holocaustum ad unionem mei cordis tecum ineundam, & Divinam Majestatem tuam protestandam.

O Beatissima Virgo, ego me totum, & cogitationes, verba, & opera vitæ totius, sed hodierna die peculiariter, & universa corda illa, quæ recensui (quoad licet) quàm latissimè possum, in laudem tuam dirigo, & tibi per omnia illa placere summo perè cupio.

O Sancti Patroni mei speciales, Joseph, Michâél, Tereſia, N.N. ô Sancti hujus diei: ô vos omnes ac ſinguli Sancti, & Sanctæ DEI cum DEO jam regnantes: ex affectu omnium vobis devotorum, per ſuaviſſimum cor JESU Chriſti Domini noſtri, vos ſaluto & laudo, vobiſq; congratulor, & vobiſcum DEO gratias ago pro omnibus bonis vobis, & per vos nobis collatis & conferendis: obſecrans vos per charitatem, quâ DEUS vos creavit, vocavit, juſtificavit, & gloriſicavit, ut me dignemini adſcribere inter vobis devotos, purgare, illuminare, dirigere, accendere, perficere, protegere, & in hora mortis mihi aſſiſtere. Impetrate etiam mihi hoc N. & hoc N. Ipſum obitum meum attentius vobis commendo. Benignè me tunc conſolamini, confortate & protegente. Efficite veſtris precibus & meritis, ut anima mea munda tota hinc exeat, & ad vitam perveniat æternam.

Vel brevius. Sanctorum tuorum Patronorum noſtrorum, quæſumus Domine, meritis adjuvemur, ut, quod poſſibilitas noſtra non obtinet, eorum nobis interceſſione donetur. Per Chriſtum Dominum noſtrum, Amen.

Aëtus pro cunctis operibus noſtris cum fruëtu animarū noſtrarū inſigni ſemper expediendis.

PRemittitur hac de re doctrina. Præcipuum hoc munus eſt viri ſpiritualis, curare, ut tempus

pus cujuslibet diei atque horæ, benè & cum fructu & merito animæ suæ, quantum fieri potest, maximo, expendat. Nam tempus hujus vitæ nobis à DEO concessum, valdè pretiosum est: de quo sic B. Laurentius, Justin: ait: lib: de vita solit: c. 10. Quid, inquit, pretiosius tempore? Quid, quæso, illo fructuosius? Quid carius? Quid excellentius? Quidve amabilius? Sed, proh dolor! penè ab omnibus nihil habetur vilius, nihil tractatur inutilius, nihil indignius possidetur. Nullū temporis momentum præterit, in quo merita non valeant cumulari æterna. Cætera, quæ habemus in mundo, à nobis aliena sunt, tempus autem propriè nostrum est, si tamen illo utimur ad salutem. Illud siquidem divina nobis clementia contulit ad plangendum errata, ad pœnitentiam faciendam, ad promerendam indulgentiam, ad virtutes acquirendas, ad multiplicanda merita, ad vendicandam gratiam, ad inferni supplicia evadenda, & ad æternam gloriam consequendam. Sic ille. Ex quibus verbis patet, quàm magni æstimandum est præsens vitæ nostræ tempus. Unde nihil nos poterit magis affligere moribundos, quam temporis jactura, scientes tot optimas horas, tot dies opportunissimos, tot hebdomades ac menses, tot ipsos etiam annos tam otiosè nos consumpsisse. Immo & ipsi damnati nil adeò acerbè in gehenna deplorant, quàm vitæ tempus inter flagitia perditum: quemadmodum unus è damnatis cuidam Religioso oranti enarravit; ut refert Petrus Reginaldus.

Propterea *Sancti* ē *coelo* *S. Mechthildi* dice-
bant: Eja, quā felices estis vos, qui adhuc vi-
vitis in terris, & quā multa promereri potestis:
quia si homo sciret, quanta una die promereri
posset, mox atq; à somno evigilaret, tanto gaudio
cor ejus dilataretur pro eo, quod dies illa eluxis-
set, in qua DEO vivere, & ex DEI gratia suum
meritum ad DEI laudem augere posset, ut tota
die ad omnia, quæ agere, aut pati deberet, alacri-
or & fortior videretur.

Itaq; dum tempus habemus operemur bonum:
id est, opera bona semper faciamus. Sunt autem
tria operum nustrorum genera: Bona, Mala &
Media. *Bona opera dicuntur*, omnes actus vir-
tutum, quæ ex natura sua sunt bonæ: ut mortifi-
catio passionum, obedientia, oratio, & hujusmodi
alia. *Mala opera sunt*, omnia gravia peccata,
quæ sunt contra DEI mandata: ut furtum, homi-
cidium & similia. *Mala etiam & illa opera di-*
cuntur, quæ sunt præter divina mandata; ut sunt
venialia peccata: quæ ut ægritudines animæ ad
mortem spiritualem, eam disponunt. *Media sunt*,
quæ secundum voluntatem operantis bona vel
mala fieri possunt: ut usus cibi, potus, divitiarum:
& ejusmodi aliorum.

Mala opera, seu peccata mortalia, etiam veni-
alia, semper fugienda sunt viro spirituali: hæc
enim opera nō sunt vitæ spiritualis, sed sunt acti-
ones vitæ carnalis. Quod si aliquando viri spiri-
tuales & iusti in venialia labuntur peccata, id non
faciunt

faciunt prout sunt iusti, sed sicut homines infirmi & imbecilles, propter naturam per peccatum Adæ corruptam: tamen hæc peccata ad vitam spiritua-lem non pertinent; immò ipsi multum nocent: quia robur ejus labefaciunt, fervorem minuunt, & ad interitum disponunt.

Sola bona opera, quæ sunt actus alicujus vir-utis, à viris spiritualibus exercenda sunt: quia hæc propriè ad vitam spiritualem spectant.

Media etiam opera, ut deambulare, dormire, comedere, bibere, recreatione uti &c. licitè exer-ceri poterunt, proposito fine virtutis bono, qui est honestas, quæ est in quolibet opere virtutis: vel referendo illa in DEUM, ut ei per ipsa placeamus, & ad ipsius honorem illis utamur. Nam tunc e-runt opera bona, & ad vitam spiritualem perti-nebunt.

Debent igitur viri spirituales semper operari bonum: seu prædicta opera bona facere; & dare operam, ut sint cum eximio & multiplici fructu & merito ipsorum. *Ad quod requiritur.*

I. *Prævia deliberatio*, & electio agendorum, per quam actio nostra bona fit magis voluntaria & meritoria: & tales qui scienter, ex advenientia voluntaria, proposito, & delectu aliquid boni ope-rantur, prudenter & rectè operari dicuntur; qui etiam in Sacra Scriptura, servi prudentes & fide-les, & viri secundum cor DEI vocantur. Ideò, qui vult ut ei benè succedant opera ipsius, singulis diebus manè, vel pridie vespere prævideat agenda,
&

& quo fine, quo ordine, quo tempore, quo modo, qua cum diligentia & fervore est aliquid faciendum, & qui defectus vitandi sunt in actionibus suis. Nam sic agere, est hominis rationalis, prudentis, christiani, præcipuè Religiosi, & spiritualis, atquè in meritis singulariter crescentis. Sit autem regula actionum nostrarum. Voluntas DEI, illaquè tantum agere velimus, quæ DEUS vult, & quia DEUS vult.

II. *Requiritur*, ut homo aliquid boni faciens careat gravi peccato, sitq; DEO charus, hoc est, in gratia DEI & charitate existens, sine qua nihil DEO placet, nec ad meritum aliquid prodest. Et ideo bonum est, cuilibet actioni majoris momenti Contritionis actum præmittere.

III. *Requiritur Intentio recta*, ut omnia opera nostra fiant propter bonum finem. Est autem finis bonus, dum sit aliquid, vel ob honestatem, quæ est in quolibet actu virtutis: vel propter DEUM: quod tripliciter fieri potest, secundum S. Basilium. Tum ob metum pœnarum DEI; tum ob æternam DEI retributionem: tum ex amore DEI, ob ejus gloriam & honorem, & ut ei placeamus, gustumq; demus, atq; voluntatem ipsius impleamus, sine ullo ad nostrum commodum etiam spirituale respectu, & absq; ulla spe mercedis. Primus finis est servorum: secundus est mercenariorum: tertius filiorum. Et quamvis non peccent, qui faciunt aliquid propter metum, vel mercedem; amen non est hic finis illorum altissimus, qualem requirit

requirit *Apost: 1. Cor: 10.* ab omnibus Christianis, dicens: *Sive manducatis, sive bibitis, sive aliquid facitis, omnia in gloriam DEI facite.* Laudabiliter verò & cum insigni meritorum nostrorum augmento possumus plures variòsq; fines compatibles statuere actionibus nostris. Unde possumus velle aliquid agere, ut laudemus & honoremus DEUM, & simul Virginem Sanctissimã, omnes Angelos & Sanctos: ut imitemur eos: ut nos & omnes homines in holocaustum offeramus DEO: ut gratias agamus ei: ut satisfaciamus pro peccatis nostris & alienis: ut mereamur, utquẽ tam spiritualia quàm temporalia bona nobis & aliis impetremus.

IV. *Requiritur Ordo*, qui multum spiritualibus viris, & omnibus perfectionem amantibus & quærentibus, commendatur, ut illum semper in suis actionibus teneant; sine quo nihil benè peragere, nec perfectionem adipisci, nequẽ Domino DEO placere, neq; multum mereri, nec vitam sine tædio, & svaviter, ac fructuosè ducere queunt. Igitur, qui hæc mala vitare vult, servare ordinem & actionum & temporum conetur: ut, videlicet, eum ordinem actionum suarum custodiat, quem ipsi Lex divina aut humana, prout fit in Religione qualibet, statuit: atq; omninò omnes suas actiones tam ordinarias, seu sui status communes: quàm singulares ad arbitrium suum propositas, tempore & horã constitutã peragat: ita ut uniuscujusq; vita, dici possit *Ordinis vita*, cum

in ea secundum rectum ordinem omnia fiant; quem tamen aliquando ob urgentem necessitatem, proximi charitatem, & obedientiam, intermittere licet.

V. *Requiritur Modus operandi bonus*, ut omnia opera nostra benè fiant: hoc est, eo modo, quem vel Ecclesia, vel Religio, vel laudabilis consuetudo, vel recta ratio, & Prudentiæ virtus præscribit: v.g. ut Officium Divinum recitetur, Sacrum celebretur, Oratio, Examen conscientiæ, & alia, eo modo, & cum illis circumstantiis, vel Ceremoniis expediantur, prout sunt præscriptæ; atquè cum DEI præsentia.

Præmittendo imprimis unicuiquè actioni directionem, juxta formas in Discipl: Claustr: datas, vel hic inferiùs positas.

Deinde applicando seriò mentem & memoriam ad illa, quæ facimus, vel dicimus. Nam sæpè dum mente, vel ore proferimus hæc, & similia: Amo te DEUS meus. Doleo quòd te summum Bonum offenderim. Volo esse obediens, humilis, mansuetus: vivacem & formalem apprehensionem sensuum verborum istorum non habemus; & ideo nullum fructum & præmium ex his percipimus.

Præterea fugiendo festinationem: nam unicuiq; persvasum sit: meliorem esse Orationem Dominicam semel debitè dictam, quàm centies prolatam celeriter & indebitè. Quemadmodum & unum Opus, vel Propositum factum deliberatè, attentè, ferventer, devotè, heroicè, humiliter, resignatè, constan-

constanter, plùs apud DEUM valet, plùs illi placeat, plùs meretur gratiæ & gloriæ, quàm centum alia Proposita & Opera dissimili modo facta.

Insuper cum ea diligentia cuncta facienda, ac si quælibet actio ultima foret; sicut Christus Dominus S. M. Magdalenæ de Pazzis, id commendavit: Imaginare, inquit, omnia opera & verba tua fore ultima.

Cavendo occurrentia tunc negotia, quæ Diabolus sæpè in memoriam revocat, ut mentem distrahat.

Procurando, ut opera nostra sint operibus Christi, & B. Virg: & Sanctorum conformia.

Deniq; uniendo omnia opera nostra operibus & meritis JESU Christi Domini nostri, B. Virg: & omnium Sanctorum.

Insuper offerendo ad Gloriam DEI omnia, quæ in quâlibet actione reperiuntur: ut in Officio Divino omnia verba, syllabas, literas, sensum verborum, interpretationes illorum, omnes cogitationes, respirationes, cunctos actus, & motus animi & corporis, & volendo, ut hæc omnia & singula sint ipsimet actus intensissimi Fidei, Spei, Charitatis, Humilitatis, Obedientiæ, Pœnitentiæ &c. ita ut per unum opus, & actionem nostram plures virtutes exerceamus; quia hoc modo, tot merita lucratur, quot virtutes intendimus.

Possunt & alio modo in una actione variæ virtutes exerceri: videlicet ex motivo illarum aliquid faciendo: præcipuè verò curandum est, ut
omnia

omnia nostra fiant ex Charitate, & propter Charitatem DEI.

VI. *Requiritur Fervor*, qui quò fuerit intensior, eò actio nostra DEO gravior, & retributio ipsius erit major: Ideò melior est unus actus intensus, quàm mille remissi, qui fiunt ex tepida voluntate, cujus tepiditas, affert nobis tædium & molestiam in operando, & postea, præsertim in articulo mortis, conscientiae remorsum: jam verò è contrà, prompta & fervens voluntas minuit labores nostros, fatigatos recreat, laborantes exhilarat, & ad ultteriores labores alacriores reddit. *Hic fervor aliquando est sensibilis*, quem homo sentit tanquam æstum quendam in se, vel in corde, vel in pectore, vel in capite: & talis fervor est parvi faciendus. *Aliquando est spiritualis*, qui fit in animo, in intellectu & voluntate: & nihil est aliud nisi Alacritas, Vigilantia atq; seria Applicatio mentis ad aliquid operandum; quæ alacritas & diligentia dum crescit inter operandum in nobis, dicitur fervor intensus, qui nascitur ex appretiati-
one & æstimatione operis, & finis, propter quem fit operatio: videlicet, DEI virtutis, animæ salutis, æternæ gloriæ. Hic fervor dat omnibus virtutibus vitam, & pretium actionibus nostris, atq; augmentum meritorum immensum affert spiritualibus viris. Hic fervor fit sine ulla fatigatione nostra, solo tantummodò voluntatis imperio, conatu, & intentione exercetur. Sufficit enim si voluntas nostra imperet sibi: Volo, ut quotquot nunc
passus

cum fructu exercendis.

367

passus ambulando fecero (si contingat aliquem aliquò ire, vel deambulare) tot elicere actus charitatis, quo appretio, æstimo & præfero DEUM meum super omnia: ita ut secundo passu sit duplo, triplo, decuplo, centuplo & millies, millies, millies, intensior & ferventior actus meæ charitatis erga DEUM, quo magis appretiem, æstimem, & superexaltem super omnia DEUM meum: & tunc in ultimo passu intensissimus debet esse actus charitatis, secundum proportionem à voluntate determinatam & intentam. Nam tota hæc intensio charitatis pendet ab intentione & determinatione nostræ voluntatis. Et ideò quando voluntas nostra in primo passu intendit DEUM tantum amare, verè illum tantum amat: & si in secundo passu, & tertio; & in omnibus, intendit illum decuplò, vel centuplò amare, eò quod sit dignissimus infinities majori amore, etiam illum juxta hanc determinationem & intentionem suam decuplò, vel centuplò amat. Ecce quomodo sine ulla sui fatigatione incrementum fervoris & meritorum innumerabilium unusquisq; facile habere potest, solo voluntatis imperio & intentione.

Idipsum facere possumus in Corona, in singulis salutationibus: in Horis Canonicis, in singulis Psalmorum versibus, verbis, syllabis, & literis: in Sacrificio Missæ, in singulis actibus & motibus animæ & corporis, verbis quoque, syllabis, ac literis: in Oratione mentali, in singulis unius horæ minutis, quæ dicuntur sexaginta esse majora: & aliis actibus.

Hoc

Hoc idem fieri potest, in singulis disciplinæ actibus; in singulis aculeis cilicii; vel catenulæ ferreæ; statuendo, ut primi aculei punctura sit signum amoris DEI, quo ipsum amamus super omnia: secundi aculei sit signum decuplò majoris amoris DEI, quo ipsum decuplò magis amare volumus, quàm priùs: sic de tertio, quarto, & omnibus aculeis unius catenulæ determinare possumus.

Deniquè idipsum facere valemus in omnibus cogitationibus, verbis, actibus, & motibus animi & corporis nostri ab hoc præsentis vitæ nostræ instanti, usq; ad finem vitæ. Idem intelligendum, & de alijs actibus virtutum, quod dictum est de amore DEI.

Ex quo patet, quantos meritorum thesauros habemus in manibus nostris, quos quotidie infinites amittimus, tum per ignorantiam, tum per fœcordiam nostram, per quam hoc exercitium fastidimus.

Etiam ad Fervorem pertinet heroicos actus, & in gradu excellenti conari elicere. Heroici autem & sublimes actus dicuntur, vel ex objecto, seu ex re aliqua ardua & difficili: vel ex repugnantia personæ ad aliquid, ut videre ulcera sanie fluentia, & illam saniem sugere: vel ex solo conatu, seipsum in aliquo vincendi, ad quod habemus inclinationem.

Præterea fervens voluntas non debet esse contenta propriis; sed potest sibi appropriare omnia bona aliena, præcipuè Christi Domini, B. Virginis,

& omnium Sanctorum : potest quoq; ex actionibus & passionibus, alioquin inutilibus futuris, tam alienis quàm nostris, fructum sibi facere ; in alias creaturas transformari, ac pro eis DEUM collaudare: pro omnibus creaturis defectum Divinæ laudis supplere: desideria sua multiplicare & dilatare: omnes actiones bonas tam alienas, quàm proprias ratas habere ; omnes verò malas actiones retractare : idq; per nos totos, immò per ipsummet DEUM, juxta modos à Magistris spiritualibus præscriptos, à quibus Actus varios, hisce de rebus, pro usu hominum spiritualium, augere semper innumera sua merita desiderantium, formatos, pro nostris etiam Tironibus Religiosis, hic placuit ponere.

Ultimò requiritur Constantia in bonis operibus servanda, quæ nos facit in benè cæptis, non cedendo ullis impedimentis, molestiis, difficultatibus, perseverare usquè in finem : sine qua omnis labor susceptus in bonis actionibus æterno præmio vacuatur: & propterea ipse Auctor præmii cœlestis unumquemq; nostrum admonet, *Apoc: 2. Esto fidelis usq; ad mortem, & dabo tibi coronam vitæ.*

1. Actus Intentionis filialis faciendi omnia purè propter DEUM.

SANCTISSIMA TRINITAS DEUS meus, omnia opera mea, omnes actiones meas totius vitæ meæ & quidquid facio, quidquid patior, quidquid
Z
faciam,

faciam, pati arvè unquam, quocunquè modo, totum puro, & gratuito amorì tuo consecro.

Non meritum cupio, sed gustum tuum intendo: ipsum meritum, quod consequor, tuo gustui consecro:

Ipsum, quod mereri non intendo, aut quod gustui tuo consecro, non propter majus meum meritum, sed propter plenius, svaviusq; tuum Placitum, Tibi dignissimo DEO, semel pro semper, toto me, consecro.

Tibi, etsi non absquè te, attamen proinde ac si absq; omni à Te præmii ac boni spe, gratis, pure, ac nudè servio, servirequè in æternum volo.

Sufficit mihi placuisse Tibi; non tamen, quia placuisse Tibi bonum mihi, sed quia gratum ac placitum Tibi.

Amo Te, quia mihi places; ut Tibi placeam, ut mihi placeas: non quia id bonum mihi, sed quia id debitum Tibi; quia dignum Te; quia bonum, & gratum, & placitum Tibi: deniquè ut sit bonum, gratum, gustabile, placitumquè Tibi.

2. *Actus transformationis in omnes creaturas,
& in ipsis, & pro ipsis Oblationis sui
Divinae Majestati.*

Domine DEUS meus, volo omnem creaturam, omnem cujusvis creaturæ notitiam, potentiam, actum, passionem, affectum, circumstantiam, capacitatem, atomum meam esse, & re ipsa, quoad possum, plena voluntate, meam, & me illam, & illam vicissim me facio: omnesquè
illas

illas in unum me complector, & sic me in omnibus, omnes in me, pro me, pro omnibus, in tuum summè plenum, plenè summum omnimodè Tibi debitum, creaturæq; possibilem Amorem, Cultum, Dignificationem, voluntatis tuæ omnem Gustum, atque Expletionem, per omnes atomos atque momenta, & per omnes naturæ gratiæq; Ordines & Gradus expendo, exhaurio, do, dono, dedico, offero, sacrifico, holocaustifico, annihilo, toto me, semel pro semper, & pro omni æternitate, in unione meritorum JESU Christi, & Mariæ Virginis Matris ejus, omniumque Sanctorum.

3. *Actus Appropriationis sibi omnium bonorum creatorū & simul D.DEO Oblationis illorū.*

O DEUS meus, qui solus gratis salvare nos vis, potes, soles, debes. Ego N. paupercula creatura tua, omnium tuarum quarumcumque, imprimis autem rationalium creaturarū, usq; ad Beatissimam Virginem Mariam, usque ad Sacrosanctam JESU Humanitatem procedendo, omnes in genere, specie, numero, Tibi quomocunq; placitas, aut in omnem æternitatem placituras Actiones, Passiones, Potentias, Entitates, Perfectiones, mihi nunc ex dono gratiæ tuæ, & beneplacito voluntatis tuæ, voluntariè & deliberatè, assumo, approprio, atq; ad purum & nudum Gustum divinissimæ suavitatis, & suavissimæ Dignitatis tuæ offero, illisq; meas pauperculas Actiones, Passiones, & Entitates omnes conjungo, &

tam pro hoc præfenti momento, quàm pro tota vita mea reliqua, quàm pro mortis articulo, quàm deniq; pro toto æternitatis decursu, illas omnes cum hoc appropriationis aëtui habere intendo, tuæquè summæ Majestati, quantum digna est, subferno, substernereq; in æternum, & ultrà volo. Tibi DEO meo sit honor, ab omni, & pro omni creatura, creaturæq; atomo, in sæcula sæculorū

4. *Aëtus Intentionis seu Directionis operum & actionum passionumq; nostrarum totius vitæ ad varios fines.*

O Sanctissima Trinitas DEUS meus, per omnes, & singulas aëtiones, ac passiones totius vitæ meæ, quas omnes nunc voluntariè accepto de manu tua, volo laudare Te, videlicet, DEUM Patrem, Filium, & Spiritum Sanctum, & JESUM Christum, DEUM, Dominum, ac Redemptorem meum, Pretiosissimam DEI Parentem Virginem MARIAM, Sanctos omnes, Angelos & homines, & nominatim N.N.

Volo imitari Te Sanctissimam Trinitatem, JESUM Christum, præcipuè pro me passum, contemptum, stultum reputatū Beatissimam Virginem, & Sanctos omnes.

Volo gratias agere Tibi Sanctissimæ Trinitati, ex cujus gratia; JESU Christo, ex cujus merito; Sanctissimæ Virgini, Sanctisque omnibus, ex quorum precibus illa facio vel patior.

Volo mihi mereri gratiam sanctificantem; glo-

riam & vitam æternam; remissionem peccatorum, quæ nunc retracto; & poenarum quas merui. Tum id quod Divina vult voluntas tua; Augmentum charitatis, & virtutum omnium; Benedictionem in officiis, & necessitatibus meis.

Volo impetrare mihi & aliis Gratias actuales frequentes, efficaces, finales, Gratias sanctificantes, Gratias gratis datas, Gratias proficiendi heroicè, in omni sanctitate statui propria, Auxilia in consiliis, necessitatibus, officiis. Temporalium sufficientiam, præservationem à malis animæ & corporis, Perseverantiam in bono finalem.

Volo impetrare mihi, & Ecclesiæ, & sacro Ordini nostro, Conservationem & pacem, Propagationem & incrementum, vigilantiam Pastorum, Copiam Apostolicorum virorum, Exterminium scandalorum, & scandalisantium, ac hostium.

Volo satisfacere, & satisfacere pro peccatis meis & poenis eorum, quæ nunc retracto, pro poenis peccatorum alienorum, amicorum carne & spiritu, Superiorum, & subditorum & inimicorum; pro poenis quoq; animarum in purgatorio.

Volo omnes & singulos, & me per omnes ac per singulos, sacrificium tibi DEO meo & holocaustum facere, omnia mea ex voluntate deliberata, omnia pro hoc, & pro omni reliquo vitæ meæ, mortisque momento, omnia ad gustum & gloriam tuæ voluntatis Divinæ. In unione Sanctissimæ JESU Christi in mundo conversationis, meritorum, & orationum ejus, atq; B. Virginis, & omnium Sanctorum.

5. *Actus conformitatis cum DEI voluntate
in omnibus actionibus nostris.*

O Dulcissime Domine DEUS meus, volo ab hoc tempore deinceps omnia facere eo motivo, eoq; modo, quo Tu vis, & quia Tu vis illa fieri à me, propter omnium mandatorum, consiliorumque, & beneplacitorum tuorum impletionem, propter virtutum omnium Theologicarum ac moralium, supernaturalium, donorumque, & fructuum Spiritûs Sancti, in omni congruo mihi gradu affectionem, exercitationem, incrementum, propter gratiæ gloriæque Tuæ in me confirmationem. Propter instituti mei perfectam impletionem, propter totius mundi auxilium, propter omnium Sanctorum, omnium Angelorû, pretiosissimæ Parentis JESU Christi, Tuum verò Sanctissima Trinitas DEUS, inprimis honorem, & imitationem, super omnia verò, propter omnimodam Tui gustûs recreationem, adorandæ voluntatis executionem, summæ Bonitatis dilectionem, eminentissimæ Dignitatis exaltationem, mei deniq; universalem annihilationem, quia hæc est voluntas Dignitatis Tuæ, & Dignitas volûntatis Tuæ.

6. *Actus Oblationis D. DEO Actionum & Passionum, alioquin inutilium futurarum, tam
nostrarum quàm alienarum.*

Domine DEUS meus, qui omnia opera nostra operaris in nobis; operaris autem propter Gloriam tuam, & propter bonum nostrum,

rum, nequē quidquam in nobis, & à nobis otiosum esse vis: omnes actiones passionēq; meas, Angelorum, Beatorum, & omnium Entium creatorum, quocunquē modo Te DEO nostro dignas, ipsis autem creaturis, cæteroquin vel neglectas, vel inutiles, vel non necessarias, ego videns & agnoscens paupertatem meam, & simul nusquam exulare cupiens Gloriam tuam, utilitatēq; nostram, has omnes tam meas, quàm omnium creaturarum Actiones atq; Passiones, etiam atomicē computatas, Tibi DEO meo præsentō, Honori, Gloriæq; Tuæ consecro; pro meo, & pro omnium creaturarum capacium bono temporali, & spirituali, hujus & alterius vitæ, offero; ijsquē omnes defectuositates meas, & earum, qualescunquē suppleri cupio & intendo. In unione meritorum JESU Christi Domini nostri, & B. Virginis MARIÆ, omniumq; Sanctorum; idq; facio semel pro semper, & pro omni æternitate, ad purum gustum tuum, ô Sanctissima Trinitas DEUS meus.

7. *Actus Insignis exercitiū Amoris DEI, & aliorū affectuum, & virtutis Humilitatis.*

SANCTISSIMA Trinitas, DEUS meus, cupio Te amari, & amatum fuisse, ac fore, per omnia omnium temporum, Æternitatūq; instantia, à me, & ab omni creatura, creaturæquē portione, & atomo & momento.

Vellem Domine DEUS meus, in Te, toties, per omnia singulaquē momenta, & indivisibilia

Z4 mea,

mea, Amore digno Te, debitoq; tibi à me succendi; quoties ab intrinseco quælibet mobilia corporalia, & spiritualia mota sunt, moventur, movebunturq; per omnem Durationem, perquæ omnia instantia Durationis eorum, quoties, Domine, moventur folia & rami in arboribus, herbæ & gramina in campis, segetes in agris, animalia in terris, ære, & aquis, pulsus in animalibus, guttæ aquarum in fluviis, lacubus, fontibus, & mari, & nubibus, meteora quælibet in ære sensationes in cognoscentibus, intellectiones & volitiones in Angelis & hominibus, toties ego Te Domine pro me, & pro omnibus creaturis amo, & superamo, superq; amare volo, & propono in æternum.

Quidquid Domine inerat, inest, inerit, inesse possibile fuit, ac erit, unquam intensiōis ac fervoris; in omnibus Qualitatibus Actibusq; creaturarum omnium, naturalibus juxta & supernaturalibus, totum hoc intensiōis istius conglobamentum, cupio, & quantum possum, ac Tu donas, facio, inesse omni actui vitæ meæ, nominatim verò huic præsentī actui meo, quo Te, ô Trinitas DEUS, ô Incarnatum pro me Verbum, credo, spero, amo, adoro, veneror; timeo, desidero, laudo, magnifico, gratias ago, summè summum Bonum meum appeto, de omnibus bonis tuis gaudeo, & complaceo.

Domine, pro omnibus & singulis gratiis & atomis terræ, aquæ, æris, ignis, luminis, cœli, reliquarumq; creaturarum, in his contentarum, Te dignifico,

dignifico, Te laudo, Te timeo, Te spero, Te adoro, Te amo, toties replicando actuali voluntate mea, hos omnes & similes affectus atq; actus in te, quot sunt & esse possunt prædicta grana, prædictique atomi.

Sanctissima Trinitas, istis omnibus actibus, affectibusque, quos hoc die aut hora, hocq; in loco tempore, occasione, vel quavis aliâ præteritâ, præsentî, ac futurâ, in Te, eliciunt & elicient, sub quacunq; pia motione, adinventione, industria, formalitate, circumstantia, omnes creaturæ tuæ, omnes pii & boni servi tui, omnes prædestinati, omnis triumphans & militans Ecclesia, afficior ego quoq; pauperculus vermis in Te, illos Tibi offerendo, infinities volendo, & repetitos perfectiores, ac plures esse cupiendo, de illis, & per illos Tibi congaudendo, propterq; illos, omnes auctores illorum amando, honorando, & appetiando.

Quidquid est Domine, aut fuit, aut erit, aut possibile est unquam & uspiam, vilitatum & humiliationum naturalium, & voluntariorum, supernaturaliumque, ijs omnibus ego, mi DEUS, coram Te, & Tibi humilio, & vilifico me, meamque totaliter substantiam, ita, ut atomus in me non sit ullus, non sit motus animi mei ullus, qui non sit coram Te, propter Te, & Tibi, omnimodolibet humiliatus & vilificatus. Humilio me, Domine, Humilitate JESU Christi, DEI mei, humilio me Humilitate Beatissimæ Virginis MARIE,

RIÆ, Angelorum Sanctorumq; omnium humilitate totius Ecclesiæ, humilitate omnium hominū, omnium creaturarum reprobarum & damnatarum, humilitate omnium rerum in cœlo, & sub cœlo, in terra & intra terram existentium: humilitate vilitatum, sordium, sæcium, sentinarum, putredinum, corruptionum, purgamentorum, excreationum omnium. Humilitate deniq; omnis, & totius Nihili, ita, ut his omnibus humilitatibus, ac vilitatibus, , instar spongiæ penetrer undiquè, instar piscis innatem in eis totus, instar avis volitem aère circumdatus, ut deniq; totus per omnia, in corpore & anima, omniq; substantia, capacitate, motu, atomo, instanti horum omnium, non solum humilis, aut vilis, sed ipsissima humilitas, vilitas, abjectio, contemptus & contemptibilitas, confusio & odiositas efficiar. Tibi DEO meo ad gustum, mihi autem ad debitum omnimodè explendum & exæquandum, ut quantum Tu dignus es, tantum ego vilis sim in æternum.

2. *Actus variorum affectuum erga DEUM
per creaturas.*

Aspiciendo agros, in corde dicendum. O DEUS meus, hæc omnia, quæ nunc video, videlicet, hos agros (idem dicendum videndo prata, vel hortos) & simul omnes agros per totum mundum, & quidquid in eis ante ab initio mundi excrevit, & nunc crescit, crescetq; ad finem mundi, omnes segetes, herbas, flores, gramina, totam
Enti-

entitatem, substantiam, accidentia, proprietates, & partes, & atomos illorum, Tibi tanquam mea, & me totum cum eis, & in eis, in holocaustum fvavissimum offero, & pro eis infinitas gratias ago, Te adoro, laudo, magnifico, & superexalto, toto me, semel pro semper, affectu tuo, affectu Sanctissimæ Humanitatis JESU Christi D.N. B. Virginis, omnium Angelorum, & Sanctorum.

Quod si audiantur aliqui soni, vel voces, vel cantus, dicendum: Clementissime DEUS, omnibus sonis instrumentorum musicorum, tonitruorū, campanarum, tubarum &c. omnibus vocibus hominum & animalium, omni cantu mortalium & volucrum, Te DEUM meum laudo, veneror, amo, ættimeo, desidero, dignifico, Tibi obedio, Te timeo, adoro & exalto super omnia, toto me, semel pro semper, affectu tuo &c: *ut supra.*

Quoties videntur densissime pluvie, grandines, nives, & ingentes arene cumuli, totaq; moles terræ dicendum: Dulcissime DEUS, pro omnibus, & cum omnibus, & per omnes pluvie guttas (idem dicendum de grandinis, vel nivium granis, vel terræ arenis) Te DEUM meum laudo, veneror &c: *ut supra.*

Quod si quis viderit aliquam Bibliothecam plurimis libris instructam, dicat: Domine DEUS meus, omnibus his libris, qui hîc sunt, & in toto mundo, omnibus foliis, lineis, verbis, syllabis, literis, in illis contentis, omnibus quoq; ingeniis, & labore Scriptorum, ac Impressorum Te agnosco, laudo &c: *ut supra.*

Quo-

Quoties audimus tot millia hominum martyrio, vel bello, vel fame, vel alio modo periisse, toties intra nos dicamus: Utinam Domine DEUS, cum Martyribus omnibus, ex amore tui, pro honore tuo, & pro Fide, atque proximorum salute, occubuissem! sicut & nunc mori, eadem de causa, sum paratus, tua gratia adjutus, in qua sola confido. Jam verò qui tum martyrio, tum bello, tum fame, tum peste, vel quocunque modo extincti sunt, omnium morte Te DEUM meum agnosco, laudo &c.

Quod si Regna, Civitates & homines conspexerimus: immò pecudum, volucrum, piscium, reptilium, vermium agmina, dicendum: Benignissime DEUS, pro omnibus, cum omnibus, & omnibus Regnis, Civitatibus, populis, atque pecudum, volucrum, piscium, reptilium, vermium agminibus, Te agnosco, laudo, &c.

Si quando ingrediamur templum aliquod augustum, pulchrè ornatum, & apparatu Ecclesiastico instructum, sic in laudes DEI prurumpamus, dicentes: Laudo, & superexalto, amo, adoro, & benedico, Te DEUM meum altissimum, Tibique infinitas gratias ago pro ijs sumptibus, quibus hoc templum est exstructum, pro his hominibus, qui expensas pro illo exstruendo fecerunt, qui manibus, arte, consilio ad illud ædificandum concurrerunt, qui illud picturis, imaginibus, aulæis, ornârunt; qui vario apparatu, vasis aureis & argenteis ditârunt, qui Cantores, ut cantu, campanas,

cum fructu exercendis.

381

campanas, ut sono suo, ad laudandum DEUM homines provocarent, providerunt: pro his igitur omnibus, & cum his, & per hæc Te infinities adoro & magnifico, affectu tuo &c.

Si viderimus in templo orantes homines, hinc occasione sumpta, sic in corde DEUM alloquamur: Superamandissime DEUS, cum ego nihil boni agere sciam, ideo omnium fidelium pios in Te motus & affectus, orationes & devotiones, pia exercitia, Ecclesiæ preces, & Sacrificia, Religiosorum vota, mortificationes, labores, cuncta hæc, ac si essent mea, Tibi DEO & Creatori nostro in Sacrificium offero, & cum his omnibus, & per hæc omnia Te DEUM meum laudō, veneror, &c. ut supra.

9. Actus Oblationis Horarum Canonicarum.

O DEUS, cujus immensam Majestatem adorat omnis Ecclesia Sanctorum. Offero Tibi has Ecclesiæ Tuæ Sanctæ preces à me indigno die hodierno recitandas, offero imprimis omnes à Matutino usq; ad Completorium Horas, offero omnes earum affectus & sensus, à Spiritu Sancto, & ab Ecclesia Sponsa tua, intentos, atque hic depositos. Offero omnia earum Puncta, Commata, Sententias, Verba, Literas. Offero omnes Motus lingvæ meæ, & Manuum mearum, omnes Ictus oculorum, omnes Respirationes, omnes Cogitationes, & affectiones animæ meæ, omnes mei totius Commotiones, in hac præsentī oratione interventuras. Accepta

Accepta igitur hoc tributum servitutis meæ, Tu, qui es Dominus meus, Rex meus, DEUS meus, Solus, Unus, Naturalis, meq; mancipium Tuum naturale & voluntarium, Spiritu tuo Sancto, & Gratia efficaci atque abundanti purifica, confirma, sanctifica, ut Tibi servitium meum in Sanctitate & iustitia & perseverantia, semper exhibere valeam, qui in Trinitate perfecta vivis, & regnas, unus DEUS, in sæcula benedictus.

Domine DEUS, offero Tibi totaliter hanc omnem actionem meam cum omnibus aliis, quas, hujus occasione, per quamcumq; corporis & animæ potentiam exercebo; quia hæc est voluntas Tua, & hoc Dignitas voluntatis Tuæ requirit.

10. *Actus Supplementi defectuum nostrorum in Laudibus Divinis.*

Agnosco DEUS meus, infinitè plurima, in Laude tua, Tibi à me, & ab omnibus creaturis debita deperire, malitiâ, ignorantia, fragilitate, imprudentiâ, defectuositate nostra. Cupio mi DEUS supplere, & reipsâ quoad possum suppleo defectus istos omnes nostros, amore tui, æstimatione, & dignificatione præsentis actuali, qua te DEUM nostrum, omne bonum nostrum, amo & superamo, dignifico, adoro, & superadoro, cupio & supercupio, laudo & superlaudo, pro me & pro universis creaturis, secundum omne quod debetur, & quod debemus Tibi, possibileque est nobis, & Tu dignus es. Ut ita Tibi DEO nostro, sit

sit laus plena, sit gloria perfecta, sit exaltatio pro nostro posse, desiderio, & velle, adæquata, ex nunc in æternum, semel pro semper, millies millies majori quàm unquam fervore, atomicè, in Unione Sangvinis, Meritorum, Conversationis JESU Christi, Beatissimæ Virginis & omniũ Sãctorũ.

II. Actus majoris momenti Actionibus nostris præmittendus.

SANCTISSIMA TRINITAS DEUS meus, Te agnosco, amo, desidero, laudo, adoro, Tibi obedio, Te timeo, veneror, dignifico, & exalto super omniã.

Affectu Tuo, affectu Sanctissimæ amabilissimæque Verbi æterni JESU Christi Humanitatis, affectu B. Virginis MARIE, affectu omnium Beatorum Spirituum: affectu omnium Sãctorum atq; Sãctarũ: affectu deniq; omnium creaturarum.

Per hanc actionem N. meam, & per omnes præteritas, præsentis, futuras actiones, passionesq; meas, omnium potentiarum, corporis & animæ meæ, omniumq; creaturarum, mihi & communi-
one creationis unitarum, & affectione liberæ voluntatis, atque charitatis erga illas, propter Te DEUM meum, impersonatarum, atque insubstantiatarum.

Semel pro semper, pro tota vita, proque omnibus & singulis momentis vitæ, sive existentie meæ, aut etiam partium mearum, & omnium creaturarum.

Majori

Majori quàm unquam hætenus fervore Spiritûs, milliesq; millies majori proportionem, & incremento fervoris, puritatis, charitatis, diligentia, ac dignificationis Tui, vilificationis autem mei.

Ad purum, & omnem gustum Tuum; ad nullum præmium, bonumvè meum, ad nullum guttum, bonumvè creatum, à Te separatum: præterquam ad eos fines, quos gustui, beneplacitoq; dignitatis ac voluntatis Tuæ subordinatos, specialiter, in omnibus universim, & singulis specificè actionibus, passionibusquè intendere, vel possum, vel debeo, vel Tu vis.

Seraphicè, Mariane Christiformiter, omnitudinaliter, incessabiliter, hujusq; unius actûs, & affectus, pro omnibus substitutivè.

In unione mihi appropriatorum, Tibi autem DEO oblatoz meritorum JESU Christi, B. V. MARIÆ, Sanctorû omniû, & Angelorû.

Atomice, Sacrificativè, heroicè, omnipossibiliter, dignè te, dignissima Trinitate DEO meo.

Quia mihi places, ut mihi placeas, ut Tibi placeam, ampliùs, & ampliùs, & ampliùs. *Hic Actus saltem semel in die fieri potest.*

Forma oblationis cujuscunq; Actionis nostræ.
Dulcissime Domine JESU, amore Tui, multum desidero nunc & semper, quidquid Tibi gratius fuerit, perficere. Et quia certus sum, te velle ut hoc nunc faciam; ideò abnegans & relinquens omnem meam voluntatem, & aliud quodcunq; volo propter Te, & ut desiderio Tuo satisfaciens,
gratum.

gratum Tibi præstem obsequium, istud nunc aggre-
di, & perficere: in unione omnium operum &
meritorum Tuorum, ad Tuam laudem & omni-
um salutem. Adjuva, dirige, & conforta me, ut
hoc secundum Te, per Te, & Tecum incipiam
& perficiam.

*Alia forma, quam Christus Dominus S. Me-
chtildem docuit.* Domine in unione Amoris, quo
Te in laboribus exercere dignatus es, & adhuc
in anima sine intermissione operaris, & nunc o-
pus hoc mihi injunxisti; Tibi ad laudem, & pro
utilitate universitatis illud facio; orans, cum per-
fectissima operatione Tua illud uniri & perfici;
qui dixisti: *Sine me nihil potestis facere.*

Alia. Sanctissima Trinitas unus DEUS, hoc
opus omnibus Domini JESU, & Beatissimæ illius
Matris, ac Sanctorum Tuorum meritis, & amoris
conjunctum, Tibi in holocaustum amoris offero.
Facio hoc amore amoris tui; quia dignus es omni
amore, omni reverentia, & obsequio, DEUS meus.

Alia. O Dulcissima Virgo MARIA, tibi ego
omnes actiones meas, totius diei (vespere dic:
noctis) mensis, anni, vitæ meæ præsentis, præ-
teritæ & futuræ commendo, easquæ tuis Sanctissi-
mis manibus & meritis, gratiis & donis exornan-
das, atq; Sanctissimæ Trinitatis conspectui, pro
me offerendas committo; quatenus enim à me
sunt, indignissimæ conspectu ejus sunt.

Alia. In manus tuas, Domine JESU, & in
tuas Purissima Virgo MARIA, commendo omnia

Aa opera

Actus pro cunctis operibus
opera mea, & hoc præsens opus meum, illudquē
utriusquē vestrū meritis, operibus, & toti in
mundo conversationi unio, ornandumq; & San-
ctissimæ Trinitati offerendum trado.

Alia. Omnes actus meos, mi JESU dulcissi-
mo, in vulneribus, & corde tuo depono, ut in eo
detenti, sublimentur, & sic dignē Sanctissimæ
Trinitati, tuis & dilectissimæ Matris tuæ Virgi-
nis MARIE manibus offerantur.

12. *Modus Intensionis Actuum Amoris DEI,*
& *aliarum virtutum cum ineffabili me-*
riti, Gratiæ, & Gloriæ augmento.

Hujus rei aperitur *Mysterium*. Hæc intensio
dependet à Voluntatis intentione, determinati-
one, & imperio, quæ potest sibi sic imperare.
Volo viginti passus facere ex charitate DEI, &
ad singulos passus elicere actum Charitatis, (quæ
consistit in æstimatione & prælatione DEI super
omnia) alium atquē alium, alio ferventiorē &
intensiorē, atquē ejusmodi omninō, ut quolibet
actu magis æstimem & superexaltem DEUM; &
tunc actus ille Charitatis in ultimo passu erit in-
tensior vigesies, & meritum apud DEUM majus
toties.

Quod si voluntas sic statueret: Desidero vehe-
menter & volo, quolibet passu in dupla proporti-
one ferventiorē & intensiorē elicere actum
Charitatis in DEUM; tunc ultimus actus
Charitatis in passu vigesimo, esset major gradibus

cum fructu exercendis.

387

536870912. hoc est, quingentorum triginta sex millionum octingentorum septuaginta millium, nongentis duodecim.

Quod si itatueret in decupla, vel centupla, vel millies millies in majori proportionem intensiorem Actum Charitatis Divinae elicere, quanto augeretur ille Actus merito, gratiae, & gloriae, humana cogitatio id capere vix potest.

Et quod dictum est de Amore DEI, hoc idem intelligendum de omnibus virtutibus.

Sed advertendum est, ut omnes actus virtutum fiant ex motivo Charitatis, & propter Charitatem, & cum Charitate, & in Charitate: hoc est, ab homine existente in Gratia & Charitate: & hoc ideo, quia licet omnis actus virtutis elicetus ab homine in Charitate DEI posito, meritorius esse possit; longè tamen majus meritum erit, quando fiet ex Charitate & propter Charitatem. Nam aliarum virtutum actibus non datur à DEO meritum Gratiae & Gloriae par ipsis Actibus, seu æquale in actuum gradibus, sed multò minus, ut Theologi dicunt: ita ut si actus virtutis sit fervens ut sex, non rependantur illi sex gradus gratiae, vel gloriae, sed tantum duo: id est tertia parte minus. Jam verò actibus Charitatis, quibus super omnia diligitur DEUS, respondet meritum gratiae & gloriae ipsi actui æquale, & simul meritum Habitus Charitatis. Quamvis hoc verum sit, quod etiam latitudini actus elioiti alicujus virtutis, respondeat latitudo augmenti Habitus illius virtutis, cuius est Actus.

Aa2

Hujus

Hujus rei Exempla sequentia dantur.

I. *Exemplum pro matutino tempore.* Sanctissima Trinitas DEUS meus, ego omnia instantia hujus diei, totiusq; vitæ meæ, & omnes actus meos à me quocunq; modo in vita mea perficiendos, offero ad infinities majorem tuam gloriam & honorem & purum gustum tuum sine ulla spe præmii, & in Beatissimæ Virginis ac Omnium Sanctorum honorem: Et protestor omnes illos actus meos, & omnes partes illorum etiam minimas & atomicas me facere velle in Testimonium Amoris tui, & ex amore tui, & propter amorem tuum; & ex affectu & amore in Christum Dominum, B. Virginem, & S. Joseph, & SS. N.N. & ex motivo Gratitude, Humilitatis, Contemptus mei, Patientiæ, Pœnitentiæ, Obedientiæ, Castitatis, Paupertatis, Resignationis &c. (vel illius virtutis, quam aliquis proposuit exercere aliqua die, vel hebdomadâ, vel mense) ita ut velim in quolibet actu & parte ejus esse decuplò, centuplò, & millies millies majorem & intensiorem Charitatem tuam, & affectum in Christum Dominum B. Virginem, S. Joseph, ac omnes Sanctos; & Gratitude &c. & ex majori pariter & intensiori motivo Charitatis tuæ, Gratitude, Humilitatis, &c.

II. *Exemplum pro Oratione mentali, quæ solet unâ durare horâ.* Domine DEUS meus, offero Tibi hunc Actum Orationis præsentis, & istud tempus, & omnes actus & motus potentiarum animæ & corporis in hac Oratione futuros,

&

& horum actuum & temporis partes minimas etiam atomicas ad tuam majorem Gloriam, & Beatæ Virginis ac Sanctorum omnium Honorem. Et protestor, me facere velle hanc Orationem, & illa prædicta omnia à me, & in me, fieri in Testimonium Amoris tui & ex Amore tui, & propter Amorem tuum, & ex motivo Gratitudeinis, Humilitatis &c. ita ut velim in omnibus prædictis esse decuplò, centuplò, & millies millies majorem & intensiorem Charitatē tuam, & Gratitudeinē, &c. Et ex majori & intensiori motivo Amoris tui & Gratitudeinis.

III. Pro Officio Divino. Clementissime DEUS, ego te affectu tuo, & Sanctissimæ Humanitatis Christi Domini nostri, ac B. Virginis, & Omnium Sanctorum laudare, & has Horas tibi persolvere volo, quarum omnia verba, syllabas, literas, commata, puncta, & omnes motus & actus animæ & corporis, atq; momenta temporis offero ad majorem Gloriam & gustum tuum, & in B. Virginis ac Sanctorum omnium Honorem, & protestor hæc omnia à me velle fieri in Testimonium Amoris tui, & ex Amore tui & propter Amorem tuum, & ex motivo Gratitudeinis &c. *ut suprâ.* Similiter offerantur Missæ Sacrificia, Concionēs, &c.

IV. Pro Disciplina. Dulcissime DEUS, ego hanc disciplinam, qua corpus meum castigare volo, & omnes ictus illius in unione Passionis Domini nostri JESU Christi, & meritorum ejus, &

Aa3 B. Vir-

B. Virginis ac omnium Sanctorum offero &c. & protestor hanc disciplinam & omnes ictus illius me velle facere in Testimonium Amoris tui, ex amore tui &c. ita ut velim, in omnibus ictibus & singulis esse decuplò &c. *Simili modo offerantur punctura Cilicii, & Catenula ferrea.*

V. Pro Corona B. Virginis. O MARIA Virgo purissima, Mater DEI Sanctissima, hanc Coronam, quam modo recitare volo, & singulas salutationes, & simul omnia atq; singula verba, syllabas, literas, respirationes meas, & omnes actus & motus animi & corporis, & temporis momenta, offero ad infinities maiorem gloriam Sanctissimæ Trinitatis; honoremq; tuum, & omnium Sanctorum: & protestor omnes salutationes, & cætera prædicta à me fieri in testimonium Amoris DEI & tui, & ex Amore DEI & tui, & propter Amorem DEI & tuum, ita ut velim in omnibus prædictis, esse decuplò, centuplò & millies, millies maiorem & intensiorem Amorem DEI & tui, & ex maiori & intensiori motivo Amoris DEI, & tui.

VI. Eodem modo deambulando possumus offerre actum ipsum, & singulos passus. Benignissime DEUS, ego nunc deambulare volo ex Amore tui, & Ob-dientia, & Resignatione, Humilitate, & Contemptu mei. Itaq; hunc actum, & partes, atque atomos actus & temporis, & omnes passus, offero ad infinities maiorem Gloriam tuam, & B. Virginis ac omnium Sanctorum honorem: & protestor me velle & intendere in his omnibus, &
ad

ad singulos passus elicere actum Charitatis tuæ, & Obedientiæ, Resignationis, Humilitatis & Contemptus mei, alium atq; alium, decuplò, & millies millies ferventiorum & intensiorum.

VII. Similiter quælibet Actio offerri potest.
Domine DEUS, offero Tibi hanc actionem, & omnes ejus partes, etiam atomos, intendendo cuncta facere majori & majori decuplò, centuplò, & millies millies intensione Amoris tui, Obedientiæ, Resignationis, Humilitatis & Contemptus mei, &c.

VIII. Possumus etiam assumere aliquem Actum pium v.g. istum. DEUS meus amo Te super omnia: & repetere eundem Actum 33. trigiesies & ter, ita ut intendamus quemlibet actum accipere decuplò, & centuplò, & millies millies ferventiùs & intensiùs, ex motivo Amoris DEI, Gratiitudinis, & Imitationis Christi Domini nostri. Hoc modo.

O DEUS meus dilectissime JESU, amo Te super omnia; quem actum Amoris tui intendo & volo repetere 33. trigiesies ter, in honorem 33. annorum, quibus vixisti nobiscum pro salute nostra in terris; ita ut velim quemlibet actum Amoris tui, decuplò, centuplo, & millies millies ferventiorum, & intensiorum esse, & ex motivo intensiori Amoris tui, & Gratiitudinis, ac Imitationis tui.

Possumus vel hunc actum Amoris DEI, vel similem alium pluries iterare: hoc est, quinquagies vel centies, &c. prout alicui placebit, pro

*Actus pro cunctis operibus
majori meritorum augmento. Præsertim hos
Actus saltem ter in die in Honorem Sanctis-
simæ Trinitatis.*

Sanctissima Trinitas, Pater, Fili, & Spiritus
Sancte, Unus, Solus, Summus, Verus DEUS, se-
cundum mentem & sensum piorum virorum, toto
Te, toto me, Amo, Ætimo, Benedico, Concupi-
sco, Dignifico, Exalto, Glorifico Te, Gaudeo de
eo quod es, operaris, & habes, Laudo, Magnifi-
co, Prædico, Sacrifico, Volo & zelo Te, quia es
id, quod es, utq; sis id, quod es, propter Te.

Toto Te, toto me, Gloria Tibi, Patri & Filio
& Spiritui Sancto : sicut erat in principio &
nunc &c.

DEUS meus, toto Te, toto me, desidero, &
dono Tibi Te, ut sis id, quod es.

DEUS meus, Tibi vivo, deambulo, lego, ci-
bum fumo, dormio, colloquor, operor, taceo, Sa-
crum audio, Sacrum facio, servio, obedio, ut Tu
sis id, quod es, propter Te, toto me, toto universo.

Et hæc profero ita, ut velim quemlibet actum
ex prædictis decuplò, centuplò, & millies millies
ferventiorem & intensiorem esse supra alium; &
ex motivo eodem modo majori & intensiori
Amoris tui.

Dixi secundum mentem & sensum piorum
virorum: Toto Te, toto me; quia in his pauculis
dictionibus multa includuntur, prout viri
aliqui piissimi, & Magistri spirituales sentiunt,
docent & declarant, quæ his brevitatis causa
non ponuntur.

Ex

Ex his omnibus, quæ hic allata sunt de modo intensiōis Actuum Amoris DEI, & aliarum virtutum, & ex aliis Actibus paulò antè allatis, patet, quanti meritorum thesauri sint in manibus nostris, quos quotidie infinities amittimus: vel ideò, quia ignoramus atque non advertimus, vel quia negligimus, ac dissimulamus, & præ ignavia tantillum conatum adhibere nolumus, ut tanta animæ lucra conquiramus, non tantùm singulis diebus, sed etiam vitæ nostræ momentis; & ut gratiores DEO efficiamur, & DEUM vicissim nobis Gratiorem, Dignorem, & Pretiosorem efficiamus. Deniq; ut thesaurizemus nobis pro diebus malis, morbi, scilicet, & senii, quæ Actus virtutum frequentes & ferventes exercere homines impedire solent: utquè tolerabiliorem nobis Mortis horam, atq; Purgatorii moram faciamus: aut etiam, ut, per Divinam Gratiam, corpore soluti immunes à Purgatorii flamma ad cælum evelemus.

Præcipuè autem inter alia, hæc commendata esse, pro majori merito lucrando, vellem: videlicet, Modum Intensiōis Amoris DEI, & aliarum virtutum: Actum antecedentem num: 12. *Et Pa-*
sta supra posita: pag: 240. Præsertim pag: 262.

Insuper danda nobis est opera, ut, quod lingua, aut cor nostrum dicit, vita & mores non contradicant; ut, dum amorem in DEUM, lingua vel corde profiteamur, eundem Amorem DEI, per Mortificationem passionum, amoris proprii, & voluntatis, & per Contemptum nostri, & simplicem
Obedi-

Obedientiam DEO, & Superioribus nostris confirmemus.

A C T U S

Ante Sanctissimum Sacramentum exercendi.

TRiplex est Finis, propter quem voluit Christus Dominus nobiscum in SS. Sacramento permanere in terris. Ad nostrum solatium. Ad Sacrificium. Ad animarum nostrarum Nutrimtum.

Itaq; sicut Sancti habentes praesentem Christum Dominum, ineffabile inde percipiunt solatium in coelis: ita & nos debemus gaudere de ejus praesentia in SS. Sacramento in terris; quod saepe saepius in die, aut saltem ter, visitandum; ut in omni necessitate certissimum subsidium, in omni tribulatione singulare solatium, in omni rerum eventu praesentissimum consilium & auxilium habeamus. Visitando autem SS. Sacramentum.

Primo. Salutare debemus Christum Dominum ibi praesentem. *Deinde,* Actus Religionis, Fidei, Spei, Charitatis, Gratitude, Contritionis &c. exercere. *Insuper* petere pro nobis, & pro aliis, gratiam aliquam necessariam ad DEO placendum, eique perfecte serviendum. *Quod fieri potest per ejusmodi Actus.*

Ave Domine JESU Christe, verus DEUS & Homo, qui ex voluntate Patris, cooperante Spiritu Sancto, Te mihi nascens in socium, convalescens in edulium, moriens in pretium, regnans in praemium

mium dare dignatus es, ego pulvis & cinis, indignus conspectu tuo, ob innumera peccata mea, de quibus medullitus doleo ex amore tuo: Te Dominum, ac DEUM meum hic verè præsentem, omnium creaturarum possibili affectu, saluto, adoro, laudo, glorifico, & ab omnibus, in omnibus, super omnia adorari, laudari, amari, & glorificari desidero in æternum, & ultrà. Agnosco & amplector Charitatem tuam erga me, qua me cum Patre & Spiritu S. ab æterno sic dilexisti, creasti, redemisti, justificasti, vocasti, hucusq; tam ingratum deduxisti, & conservasti, & ut spero glorificabis in æternum; & ex toto cordis affectu gratias ago, atq; in sacrificium laudis, & gratiarum actionis, omnium Sanctorum obsequia, & meipsum Tibi in unione infinitorum tuorum meritorum offero. Totus tuus esse, & permanere desidero, sicut Tu totus meus esse dignaris, ô JESU DEUS cordis mei, & pars mea in æternum! In Te, ô ineffabilis Veritas, credo; in Te, ô unica Spes mea, spero; Te, ô infinita Bonitas, amo, & amare desidero propter Te, super omnia, in æternum; gaudeo de omni Perfectione, Beatitudine & Gloria tua, meq; tibi totum usq; in mortem, & annihilationem mei resigno. Utinam semper sic Te amassem, & nunc amarem, & nunquam offendissem, nec offenderem posthac in æternum! doleo de omnibus peccatis meis, quia Tibi, quem super omnia diligo, displicent, cupio, & propono seriò emendare, & pro ijs satisfacere: in satisfactionem me,

me, & omnem vitam meam tuo obsequio offero :
 veniam cum finali gratia precor, & spero per Te,
 ô bone JESU, in cujus meritorum abyssum me
 demergo, Tu æterna charitate tua supplere di-
 gneris imperfectũ desiderium meũ, mequẽ tuis indutũ
 meritis Sanctissimo tuo penitus in omnibus con-
 forma beneplacito, nec in æternum permittas me
 separari à Te, (*hic fieri potest Communio spiri-
 tualis hoc modo*) Hæc ut efficacius consequi me-
 rear, veni, ô bone JESU, fons omnis Gratiae in
 cor meum, posside & reple illud gratiã tuã, &
 conforma illud Sanctissimo Cordi tuo in vita, in
 morte, in æternitate. O JESU Dominus meus &
 DEUS meus, sim totus tuus, & Tu meus in æ-
 ternum. In Te vivam, in Te moriar, in Te pe-
 rennem, misericordias tuas decantans, & cum
 Cherubim, & Seraphim incessabili voce Tibi pro-
 clamans, Sanctus, Sanctus, Sanctus, Dominus DE-
 US Sabaoth : Similem veniam & misericordiam
 omnibus, pro quibus mori dignatus es præsta, de-
 functis requiem, vivisque gratiam concedens, ut
 Tibi perfectissimè, sicut scis, & vis placeant, Te
 ament, & glorificent, una cum DEO Patre &
 Spiritu Sancto nunc, & semper, & in sæcula
 sæculorum, Amen.

*Actus Adorationis Christi in SS. Sacramento
 affectu Sanctorum omnium.*

Domine JESU Christe, DEUS & Homo,
 in hoc SS. Sacramento præsens, ego pul-
 vis tuus, & cinis, adoro Te illo affectu,
 quo

quo te in cunis adorârunt pastores & Magi. Adoro Te illo affectu, quo te adorabat viventem hic in terris, & nunc in cœlo adorat pretiosissima Parens tua. Adoro Te illo affectu, quo Te adoravit Centurio, & omnes viatores devotè communicantes, quicunq; Tibi placuerunt. Adoro deniq; Te illis affectibus Laudis & Adorationis, quibus Te adorârunt, adorant, & tota æternitate adorabunt, omnes Beati Cœlites. Horum voce & affectu, Tibi DEO meo hic præsentem canto: Sanctus, Sanctus, Sanctus Dominus DEUS Sabaoth. Dignus es Domine accipere Honorem, & Gloriam, & Benedictionem, Tibi hic verè præsentem DEO & Agno sit Honor & Gloria, ab omnibus, in omnibus, super omnia. O si omnium Electorum tuorum corda amore Tui inflammantissima, si ora in laudem tuam eloquentissima nunc haberem, omnibus illorum cordibus Te amarem, omnibus illorum vocibus Te laudarem. Sed quia id præstare non possum; ecce nunc omnes illorum Laudis, Adorationis, Amoris affectus erga Te, sive elicitos, sive per totam æternitatem eliciendos, approbo, & Tibi nunc præsentem ac offero in supplementum meæ tepiditatis. Vos verò omnes Sancti Angeli, vos Sancti Patroni mei, S. Joseph & SS. NN. adjuvate meam impotentiam. Magnificate mecum & pro me istum Dominum meum hic præsentem, & exaltemus Nomen ejus nunc, & in æternum.

Alius

Adoro Te Domine JESU Christe, in hoc Sanctissimo Sacramento, quod propter me inhabitare dignaris. Assumo omnes omnium creaturarum salutationes, & affectus, ijsque Te omnibus adoro, veneror, & colo, hancq; adorationem in æternum continuare volo. Credo enim, & viva fide profiteor, quia in hoc Sanctissimo Sacramento, Tu es Rex gloriæ Christe. Tu Patris sempiternus es Filius, &c. &c. *ut in Hymno.*
Te DEUM laudamus.

Rhythmus S. Thomæ Aquinatis, coram Sanctissimo Sacramento dicendus.

Adoro Te devotè latens Deitas,
Quæ sub his figuris verè latitas:
Tibi se cor meum totum subiicit,
Quia Te contemplans totum deficit.
Visus, gustus, tactus, in Te fallitur,
Sed auditu solo tutè creditur,
Credo quidquid dixit DEI Filius,
Nil hoc veritatis verbo verius.
In cruce latebat sola Deitas,
At hic latet simul & Humanitas;
Ambo tamen credens, atque confitens,
Peto, quod petivit latro pœnitens.
Plagas sicut Thomas non intueor;
DEUM tamen meum Te confiteor.
Fac me Tibi semper magis credere,
In Te spem habere, Te diligere.

O memo-

O memoriale mortis Domini,
Panis vivus, vitam præstans homini;
Præsta menti meæ de Te vivere,
Et Te illi semper dulce sapere.
Pie Pelicane JESU Domine,
Me immundum munda tuo sanguine.
Cujus una stilla saluum facere
Totum mundum quit ab omni scelere,
JESU, quem velatum nunc aspicio,
Oro, fiat illud, quod tam sitio,
Ut Te revelata cernens facie,
Visu sim beatus tuæ gloriæ, Amen.

*Oratio Sancti Augustini coram Sanctissimo
Sacramento dicendo.*

Domine JESU noverim me, noverim Te,
Nec aliud cupiam nisi Te. (pter Te
Ut odiā me, & amē Te, Quidquid agā pro-
Humiliem me, exaltem Te. Nihil cogitem, nisi Te,
Mortificem me, & vivam in Te;
Quæcunquē veniant, accipiam à Te.
Persequar me, sequar Te; Semper optem sequi Te,
Fugiā me, cōfugiā ad Te; Dignus sim defendi à Te.
Timeam mihi, timeam Te, Simq; de Electis à Te.
Diffidā mihi fidā in Te. Obedire velim propter Te.
In nullo afficiar nisi in Te, Aspice me, ut diligā Te.
Voca me, ut videam Te, Et in æternum potiar Te.

Similiter

*Actus ante Sanctissimum
Similiter Oratio S. Ignatii.*

A Nima Christi sanctifica me:
Corpus Christi salva me:
Sanguis Christi inebria me:
Aqua lateris Christi lava me:
Passio Christi conforta me:
O bone JESU exaudi me:
Intra vulnera tua absconde me,
Et ne permittas me separari à te:
Ab hoste maligno defende me:
Ab omni peccato libera me:
In hora mortis meæ voca me;
Et jube me venire ad Te,
Ut cum Sanctis & Electis tuis
Laudem Te, in sæcula sæculorum.

Oratio quoq. S. Francisci.

O Domine DEUS meus, quis es Tu, &
quis ego? ecce hic sto ante Te Domine,
tanquam mendicus ante divitem, petens,
ut divitias Gratiae tuæ mihi pro modulo meo par-
ticipare velis.

O Domine JESU, hic sto ante Te, ut servus
ante Dominum, petens cibum & potum Corporis
& Sanguinis tui, simul & vestem Charitatis, quæ
multitudinem operit peccatorum.

O Domine, hic sto ante Te, ut reus ante Ju-
dicem terribilem, petens ut mihi Judex pius esse
velis, quando separabitur anima mea à corpore,
& ante Tribunal tuum præsentabitur.

O Domine

O Domine hîc sto ante Te, sicut amicus ante Amicum, petens ut eximia Charitas tua trahat me ad Te, me liget in Te, & non permittat me unquam separari à Te.

O Domine hîc sto ante Te, tanquam filius ante Parentem, petens confidenter, ut necessaria, & salutaria quæq; mihi provideas, & Paternam hæreditatem mihi finaliter non velis denegare.

Actus variarum virtutum & affectuum coram Sanctissimo Sacramento exercendi.

CRedo firma fide, & confiteor Domine JESU Christe, Te in hoc Sacramento esse verum DEUM & Hominem, & quidquid Sancta Mater Ecclesia de hoc Sacramento credendum proponit, firmissimè amplector.

Adoro Te hîc præsentem, cultu latriæ, affectu totius Ecclesiæ militantis & triumphantis.

Gaudeo de omni honore & gloria, quam habes ab Angelis, & fidelibus, per totum mundum in hoc Sacramento.

Doleo de omnibus Hæresibus, blasphemis, Sacrilegiis, irreverentiis, quibus ab hæreticis, & malis Catholicis in hoc Sacramento offenderis.

Ago Tibi gratias, cum tota Ecclesia tua, pro institutione, administratione, & usu hujus Sacramenti, tam mihi, quàm aliis concessio.

Desidero, ut ab omnibus creaturis rationalibus adoreris, & glorificeris in hoc Sacramento, & dignè suscipiaris.

O Domine, totus sum tuus, eroq; in æternum, sicut totus meus esse voluisti in hoc Sacramento.

S. S. S. Trinitas, respice in faciem Christi tui hic verè præsentis, quem Tibi nunc offero in Sacrificium Latreuticum, Eucharisticum, Propitiatorium.

O Domine, da mihi quæso gratiam, ut Te in hoc Sacramento, prout oportet, colam, & suscipiam, ac demum in cœlesti convivio, da ut Te fruatur in æternum.

Miserere omnium hominum, pro quibus Sacrosanctum Sangvinem tuum fudisti. Converte, & renova miseros peccatores. Da vivis veniam & gratiam: da fidelibus defunctis requiem, lucemquæ sempiternam, Amen.

Hæc sunt, quibus uti possumus visitando Sanctissimum Sacramentum, quod ad minus ter in die facere deceret: etiam à longè conversa facie ad aliquam Ecclesiam.

A C T U S

Audiendo Missam exercendi.

TEmpore Missæ, quæ est representatio vitæ & Passionis Christi D. N. bonum est tunc ista mysteria recollere; videlicet, ab Initio, ipsius sacratissimam Incarnationem, Nativitatem, Infantiam. Ab Evangelio, ad Sanctus; ipsius laboriosam vitam & Prædicationem. A Canone, Captivitatem ejus, Flagellationem, Coronationem, Crucis bajulationem. In Elevatione, ipsius Cru-

us Crucifixionem. In Communionem sepulturam. Vel attendendo ad illa, quæ à Sacerdote dicuntur, eadem mente revolvere, & meditari. Vel præmissa Directione, seu Oblatione audiendæ Missæ, Aëtus variarum virtutum & affectuum exercere; & ad Communionem spiritualem sese disponere.

Aëtus Oblationis Missæ.

O Pater æternè, qui sic dilexisti mundum, ut Filium tuum unigenitum dares pro redemptione nostra: quid pro tanto munere & amore retribuam Tibi? Ecce ipsum Filium tuum unigenitum; quo nihil Tibi charius, nihil nobis pretiosius, in Sacrosancto Missæ Sacrificio offert Tibi Sancta Ecclesia. Suscipe igitur Sancta Trinitas unus DEUS hoc Sacrosanctum Sacrificium Corporis & Sangvinis Domini nostri JESU Christi, quod ego indignus servulus tuus, unà cum Sacrificiis omnibus Tibi unquam oblatis aut offerendis, unitum Sanctissimo Sacrificio ab eodem Domino nostro, in ultima cœna, & ara Crucis oblato, per manus Sacerdotis offero Divinæ Majestati tuæ, omni possibili pietatis affectu, ex puro amore tuæ infinitæ bonitatis, secundum Sanctissimam ejusdem Domini nostri, & Sanctæ Matris Ecclesiæ intentionem.

Ad maximam æternamquæ Divinæ Majestatis tuæ Gloriam, Amorem, & Beneplacitum.

In protestationem supremæ excellentiæ, & Do-

404 *Aetus audiendo*
minii tui, & nostræ subjectionis, & dependentiæ
à Te.

In perpetuam commemorationem Passionis ac
Mortis ejusdem Domini nostri.

In honorem augmentumquè gloriæ B. Virginis,
totiusquè Curiae cœlestis.

In gratiarum actionem pro omnibus benefi-
ciis Sanctissimæ Humanitati Christi Domini no-
stri, B. Virgini Matri ejus, omnibus Beatis, &
Patronis meis, singulariter S. Joseph, & Sanctis
N. N. atquè Prædestinatis, & mihi indignissimo
hucusq; collatis & conferendis in æternum.

In satisfactionem peccatorum meorum, omni-
umquè fidelium vivorum & defunctorum.

Præcipuè verò offero pro his N. N. vel pro hac
gratia obtinenda. Secundariò pro his NN. mihi
peculiariter commendatis, omnibusquè pro quibus
orare soleo & teneor: ad impetrandam defunctis,
requiem, & vivis gratiam Te agnoscendi, aman-
di, glorificandi, nunc perfectè in via, deinde be-
atè in cœlesti patria.

O Si Divinissimo huic memoriali Passionis Do-
mini nostri, monumento Potentiæ, Sapientiæ &
Bonitatis ejus assistere possem ea attentione, de-
votione, reverentiâ, quàm exigit ipsius Divinæ
Majestatis præsentiæ? Desidero id præstare, ex to-
tis præcordiis meis. Suscipe & perface hoc desi-
derium meum, ô clementissime DEUS meus, &
ad id complendum copiosam gratiam & benedi-
ctionem, largire. Per merita ejusdem Christi
Domini

Domini nostri, & B. Virginis Matris ejus, ac omnium Sanctorum.

Post hæc, vel Aëtus virtutum pro singulis Feriis supra destinatos: vel varios affectus in Patris supra positos contentos exercere licebit.

Aëtus tempore elevationis Hostiæ & Calicis exercendi.

O JESU Fili DEI & MARIE Virginis, Dominus meus, & DEUS meus infinitè amabilis, qui amore mei crucifigi, & in cruce mori dignatus es, adoro, amo & glorifico Te, omnium creaturarum possibilium possibili affectu, cum Patre & Spiritu Sancto; & ex animo desidero, ut adoreris, ameris, & glorificeris infinities ab omnibus, in omnibus, super omnia, omni possibili modo, gratis, propter Te, nunc, semper, in æternum, & ultrà.

Credo in Te, spero in Te, amo Te, & quidquid amas, propter Te; Doleo Purè propter Te, quòd unquam offenderim Te. Ignosce, indulge, supple per Te.

En ex hoc momento paratum cor meum ad omnem nutum tuum. Tuus sum, eroquè in æternū, posside me, & tuæ voluntati penitus conforma.

Pater respice in faciem dilectissimi Filii tui, quem tibi in Sacrificium laudis, gratiarum actionis & propitiationis offero, & per illius lacrymas, sudorem & sanguinem, per gemitus & suspiria, per labores & obsequia, per dolores & supplicia,

per infinita ejus merita miserere mei, illorū N.N.
& omnium, pro quibus mortuus est, gratiam
largiens Te perfectè semper amandi, tuamq; San-
ctissimam voluntatem amplectendi, & exequendi,
in tempore & æternitate.

Per eundem dilectum Filium tuum misere-
re misericordissime Pater animarum fideliū defun-
ctorum mihi peculiariter commendatorum N. N.
omnibusquē pro quibus præcipuē me vis orare;
veniam & requiem æternam illis clementer indul-
gendo, ut Te æternū benedicant, laudent &
glorificent, cui debetur omnis laus, Honor & Gloria.

*Qui vult potest aduere aliquem Aëtum ex il-
lis, qui sunt supra positi, pro visitando Sanctis-
simo Sacramento.*

*Aëtus Laudis Sanctissimi Sacramenti tempore
elevationis exercendus.*

Dignus est Agnus qui occisus est accipere
virtutem, & Divinitatem, & Sapientiam,
& fortitudinem, & honorem, & gloriam,
& benedictionem. *Apoc: 5.*

LAUDETUR SS. SACRAMENTUM

Tot Laudibus.

Quot in cælo Stellæ, in igne scintillæ, in
aëre atomi, in mari guttæ, in terra pul-
veres: quot Vere flores, Æstate grana, Au-
tumno folia, Hyeme nives, & grandines: quot
corporeæ in universo creaturæ: quia dignus es,
Domine

Missam exercendi.

407

Domine universorum, qui sub corporeis vini & panis speciebus latens, verè Tu es DEUS absconditus.

LAUDETUR SS. SACRAMENTUM

Tot Laudibus.

Quot ullo opere exhiberi, quot ore proferri, quot corde omnium hominum excogitari unquam potuere vel possunt. Quia dignus es Tu Domine & Pater noster: qui nos cibus & potas quotidie, à quo semel redempti sumus pretioso Corpore & Sangvine, quasi Agni immaculati.

LAUDETUR SS. SACRAMENTUM

Tot Laudibus.

Quot omnes Angeli, quot Sanctissima Trinitas suâ Potentiâ depromere, Sapientiâ concipere, Bonitate optare potest, omni modo, omni loco, omni tempore, in æternum, & ultrâ. Quia dignus es Tu Dominus DEUS meus, qui nobis donas non tantum Humanitatem, verum etiam Divinitatem tuam. Dominus meus & DEUS meus, laudabilis, & gloriosus, & super-exaltatus in sæcula.

Hoc Aëtu possumus uti, tum post Communionem Sacram; tum visitando SS. Sacramentum.

Aëtus pro Communionem Spirituali.

O Domine JESU, agnosco Te verum esse panem vivum, qui de cælo, ut nos teipso pasceres, descendisti, & intra has species

Bb4

panis

panis & vini mira dulcedine, stupenda dignatione, potentia admirabili Te abdidisti: scio Te cupidum pascendi animam meam.

Credo verbo quod dixisti: Qui manducat me, vivet propter me. Ecce panis vive, miser ego fame & frigore penè confectus, infirmitatibus multis obnoxius, accedo ad Te, ut manducans Te, plenius & verius vivam de Te, fovear à Te, & saner à Te; confido Te non averfaturum indignitatem, infirmitatem & inopiam meam.

Sed verè profiteor, quòd non sum dignus, ut intres sub tectum meum, propter multitudinem & gravitatem peccatorum meorum, de quibus nunc ex amore tui doleo; quia Te DEUM infinitè amabilem, offendi. Utinam non amplius Te offendam! Ideòq; etiam non præsumo Te modò inducere in hospitium cordis mei, Sacrosancti Corporis tui reali manducatione: sed scio & credo cum Centurione, Te etiam absentem, id est, sine Sacramentali Communionem, uno solo verbo me possidere, curare, & sanctificare.

Veni igitur ad me Domine, & sana peccatricem animam meam, ciba esurientem, refice imbecillem: Tu qui ex voluntate Patris, cooperante Spiritu Sancto, per mortem tuam mundum vivificasti; vivifica me, pascere me, sanctifica me hoc Sacrosancto Corpore & Sangvine tuo.

Veni Domine JESU; veni dilecte mi; veni DEUS meus, Dominus meus, Spes mea, Amor meus & omnia; posside regnum cordis mei; con-
forma

forma illud Cordi tuo, ut idem velit, idem nolit tecum, nunc semper & in æternum: & spero, quia exaudies, vel jam ob tuam infinitam benignitatem exaudisti vota, desideria, & preces pauperis. Itaque omni possibili affectu Tibi gratias ago: sit benedicta in æternum infinita Bonitas, Charitas & Misericordia tua, quam multiplicas super me indignum & ingratum, sic Te mihi communicando in socium, edulium, pretium, & præmium. En ex hoc momento Te, & quidquid amas, amo, & amabo super omnia in æternum: gaudeo de omni perfectione, beatitudine & beneplacito tuo, meque Tibi usq; in mortem, & annihilationem mei resigno. Supple pie JESU, imperfectum meum, & miserere mei, libera me ab omni peccato, fac me tuis semper inhærere mandatis, & à Te nunquam separari permittas.

A C T U S

Pro Sacra Communionem & Missa.

PRemittitur de Præparatione, tum ad præcommunicandum, tum ad celebrandum Informatio. Tantum tamq; ineffabile Christus in Sanctissimo Sacramento nobis præstitit beneficium, ut, teste S. Augustino Tract: 84. in Joan: Cum Dominus sit Omnipotens, plus dare non potuerit: cum sit Sapientissimus, plus dare nesciverit: cum sit Divissimus, plus dare non habuerit: quòd nihilominus parvi aestimant tepidi, ignavi & ingrati Catholici, qui cum modica Præparatione,
ponde-

ponderatione, & devotione ad illud sumendum sæpè accedunt, non considerantes quid percipiunt; nec infinitam hujus SS. Sacramenti præminentiam & excellentiam. Itaque ut, non ad iudicium, nec ad damnationem nostram, illud percipiamus, debitum modum seu Præparationem hac in re adhibeamus.

Præparatio hæc est duplex: Remota & Proxima. Remota consistit in vitæ Sanctitate, quæ requirit, Fugam peccatorum etiam minimorum, Mortificationem & abnegationem sui, Orationis exercitium, & Præsentiae DEI, ac virtutum, singulariter Contemptum sui, atq; continuum Conatum ad intimam Unionem cum DEO ineundam.

Proxima consistit primò. In Puritate conscientiae, quam debemus procurare, vel per Sacramentalem Confessionem omnium peccatorum, etiam venialium voluntariè commissorum: vel per veram Contritionem etiam de minimis DEI offensis dolendo. Verùm, si aliquis, quod absit, in peccatum mortale laberetur, hoc omninò per Confessionem expiandum esset.

Secundò consistit in Devotione, quæ nascitur in nobis ex pia tanti mysterii consideratione, ex cuius defectu nauscat anima multorum super cibo isto, tanquam levissimo. Debemus enim considerare *Quis* nobis in SS. Sacramento offertur, *Quid*, *Cui*, *Cur*, *Quomodo*? Offertur enim nobis totus Christus, qui est verus DEUS & Homo perfectus: itaque datur hîc nobis Divinitas & Humanitas Christi:

Christi: datur Corpus, Sangvis, & Anima ejus benedicta: datur vita, actiones, labores, Passio & merita ipsius: datur Pater & Filius & Spiritus Sanctus: quia omnes tres Personae Divinae sunt unus DEUS; & ubi est una, ibi simul est & altera & tertia. Dantur omnes gratiae & dona caelestia: quia datur DEUS, qui est fons omnium gratiarum & donorum caelestium. Insuper dantur hic nobis omnia; quia DEUS est Omnia. *Quis offert?* Ipsemet Christus, qui est Unigenitus DEI Filius; offert & DEUS Pater suum Filium; offert & Spiritus Sanctus, qui est unum cum Patre & Filio. *Cui offert?* Homini vilissimo & abominabili peccatori, ingrato servo, infideli, inobedienti, & quod plus est, inimico, & proditori. *Cur offertur?* In cibum & potum; in animae nostrae Nutrimentum, & ut intimè Christo uniamur, ac in ipsum transformemur; ut maneamus & vivamus in illo, & ipse in nobis; ut repleat nos donis caelestibus; ut pignus futurae gloriae & vitae aeternae habeamus. *Quomodo offertur?* Cum admirabili Charitate, benignitate, clementia, humilitate, patientia; immò cum summa suae Divinae Majestatis exinanitione offert se hic nobis Christus, Rex Regum, & Dominus Dominantium.

Haec igitur ante SS. Communionem ponderanda sunt, ut excitemus in nobis veram Devotionē, & per hanc, simul profundam Humilitatem, debitam Reverentiam, ardentem DEI Amorem, praecipuè verò vehemens Desiderium, & inflammatū Fervorem,

Fervorem, ut non ex arida consuetudine, & cum tepiditate ingratiſſima DEO, quæ impedit, ne hoc SS. Sacramentum in anima noſtra ſuum effectum producat, & ne aliquam ipſi gratiam communi- cet: ſed ex ardenti affectu, & deſiderio ferventi honorandi DEUM, & uniendi ſe intimè cum eo, unusquiſquè ad illud percipiendum accedat.

Poſſumus quoq; pro devotione nobis paranda, & illis affectibus prædictis, videlicet, Humili- tatis, Reverentiæ, Amoris DEI &c. in nobis ex- citandis, conſiderare Chriſtum Dominum ſub va- riis titulis; nimirum, quòd ſit DEUS, Dominus, Salvator, Rex, Iudex, Pater, Magiſter, Advocatus, Paſtor, Medicus, Frater, Amicus, Sponſus, Sol, Lux, Fons aquæ vivæ, Cibus animarum no- ſtrarum, Leo, Agnus, Aquila &c. quorum nomi- num multorum conſiderationes habentur apud Molinam Carthuſi.

Et hæc accommodare unusquiſquè valebit ad quotidianam Præſentiam DEI; nimirum.

Die Dominico; Quòd ſit Paſtor, qui naſci di- gnatus eſt in ſtabulo, ut ibi inveniret ovem per- ditam; ſeu hominem ut jumentum factum.

Fer. 2. Quòd ſit Magiſter, qui pedes Diſcipu- lorum ſuorum lauando docuit nos humilitatem.

Fer. 3. Quòd ſit Advocatus noſter, qui in horto obtulit ſeipſum ad mortem, ut nos Patri- æterno reconciliaret.

Fer. 4. Quòd ſit Iudex, qui pro nobis iniuſtè iudicatus eſt; & ideo vivorum & mortuorum Iudex factus eſt.

Fer.

Fer. 5. Quòd sit Rex, qui pro nobis ludibriosâ purpurâ indutus & spineâ coronâ ornatus est.

Fer. 6. Quòd sit Pater noster, qui tanquam Pelicanus verus Sangvine proprio pullos suos, id est, nos, filios suos vivificavit.

Sabbato: Quòd sit Medicus, qui per vulnera sua sanavit vulnera nostra, & qui morte sua ab infirmitatibus, & à morte nos liberavit.

Et quoniam Religiosi nostri pro præparatione ad S. Communionem solent considerare aliquod Punctum ex Evangelio Festi occurrentis; ideò credant se optimè facturos, illud Punctum considerationis dirigere ad Christum Dominum sub aliquo titulo; ita, ut, si in illa consideratione adverterint, quòd sint inobedientes; tunc considerent Christum, ut Dominum, & supremum Superiorem suum, cuius mandata transgrediuntur: si verò cognoverint, quòd sint transgressores legum & Constitutionum Religionis; tunc Christum Dominum agnoscant ut Regem, & Legislatorem, cuius leges non servant: si autem perspexerint, quòd non habeant mortificatas passiones; quòd sint proclives ad iram, ad commoditates, & æstimationem sui, vel honorem: tunc proponant sibi Christum Dominum ut Salvatorem nostrum, qui pro salute nostra factus homo, fuit mansuetus, humilis, fugiens commoditates, ac omnia oblectamenta, & honorem. Et hoc debet esse ante exercitium Actuum variorum affectuum, qui debet exerceri proximè ante Communionem, ad quam eundo cogitandum est, quòd ego
venio

venio ad Regem meum, vel Dominum meum, vel JESUM Salvatorem meum, aut sub aliis titulis. Nam talis cogitatio, & Recollectionem, & Devotionem affert nobis.

Quod si cuiquam id non placuerit, aut difficultatem aliquam in hoc sentiret; tunc more solito, consideret aliquod punctum ex Evangelio Festi occurrentis, & aliqua faciat proposita tum extirpandi hoc vel illud vitium, defectum & imperfectionem, quam sæpius committit; tum mortificandi certam passionem sibi magis molestantem; tum exercendi quampiam virtutem sibi magis necessariam (quod similiter fiat ante exercitium Affectuum) & hæc Proposita post Communionem renovet, & offerat Domino nostro, à quo gratiam, ad exequenda illa, ferventer petat.

Possumus præterea & Orationem quotidianam matutinā mentalem pro Præparatione ad SS. Communionem dirigere, & Proposita facta in Oratione, sumpto SS. Eucharistiæ Sacramento, renovare, & Christo Domino offerre, & ab illo auxilium, ad illa implenda, postulare.

Aetus variorum Affectuum & virtutum, ante Missam & Communionem exercendi.

O Superdilectissime JESU, qui propter nos homines nostramq; salutem descendere de cælis, & incarnari de Spiritu S. ex MARIA Virgine, & Homo fieri; ac in laboribus jejuniis, vigiliis, in summa humilitate, paupertate, obedientia,

entia; patientia, omniumq; virtutū perfectā exercitatione, in mundo vivere: præterea acerbissimos dolores, angustias, plagas, innumera cruenta vulnera, & varia Passionis tormenta perferre, Sacratissimum Sangvinem totum effundere; deniquè in Cruce mortem crudelissimā & ignominiosissimā pro nobis subire; & in horum perennem memoriam SS. Eucharistiæ Sacramentum instituere dignatus es, in quo Corpus tuum in cibum, & Sangvinem in potum fidelibus tuis dedisti, & à nobis offerri & sumi, in omnem desiderabilē fructum animarum nostrarum & salutem ordinasti.

Actus Admirationis. O admirandam tuam bonitatem, dulcedinem, pietatem ac liberalitatem, per quam, tam magnum ac singulare beneficium, tantum & tam ineffabile donum nobis contulisti, ita, ut, quamvis Omnipotens sis, plūs dare nobis non possis: quamvis infinitè Sapiens, plūs dare nescias: quamvis Ditissimus sis, plūs dare non habeas.

Actus Fidei. Credo enim firmissimè, & veratq; viva fide profiteor, quia Tu ipse, DEO Patri æqualis in gloria & potestate, in hoc Sacramento, verè & realiter præsens es, perfectus DEUS, & Homo perfectus, Dominus, Creator & Governator universorum immensæ Majestatis, totus, qui es, & tantus, quantus es, cum omnibus gratiis, virtutibus, & meritis vitæ & Passionis tuæ; quæ omnia nobis in SS. Sacramento donas.

Humilitatis. Ad quod Sacramentum, & ad tuum Sacratissimum Corpus & Sangvinem pretiosum

sum (offerendum &) sumendum, ecce nunc, Benignissime JESU, me vilissimum & indignissimum hominem, inutilem & infidelem servum tuum vocas. Sed, ô bone JESU, quomodo sine pudore & confusione, aut quomodo sine timore ac tremore ad Te accedere audebo ego ingratiſſimus homuncio, qui pro tot beneficiis à Te susceptis, & pro tam frequenti SS. Eucharistiæ receptione, nihil nisi offensas gravissimas, & injurias maximas Tibi semper reddidi, & usq; nunc reddo? Quomodo ego iniquissimus peccator, & homo flagitiosissimus, ac sordibus innumerabilium scelerum plenus coram Te apparebo? Quomodo ego pulvis & cinis, vilissimus terræ vermiculus, & abominatio omnium creaturarum maxima Tibi Domino tremendæ Majestatis appropinquabo? Verè agnosco & confiteor, quia Domine non sum dignus, ut intres sub tectum meum, ob multitudinem & gravitatem peccatorum meorum. Et iterum non sum dignus, ob multiplicitatem beneficiorum tuorum, & ingratitudinum mearum. Et centies millies, ac infinities non sum dignus, ob corporis & animæ sæditatem, & abyssalem mei nihili vilitatem. Nihil enim mihi debetur, nisi æterna à Te repulsa: nisi gehennæ cruciatus sempiterni: nisi ut hoc momento aperiat suas fauces infernus, & me devoret propter plurima peccata, & abominabilia scelera mea.

Contritionis. De quibus peccatis omnibus & sceleribus meis, jam non ex metu pœnarum inferni,

ferni, sed ex puro & gratuito amore tui, atq; intensissimo & omni possibili compunctionis affectu doleo, & dolere semper singulis momentis temporis, & æternitatis desidero.

Spei. Et quia major est Bonitas & Misericordia tua, quam mea iniquitas & malitia; ideò confido me veniam peccatorum meorum, & gratiam emendandi vitam meam à te obtenturum: præterea per Sacramenti hujus vitalissimi virtutem spero æternæ me gloriæ compotem fore, requē in sempiternum fruiturum; quamvis omnia solus peccata commissem, quæ à mundi exordio non modò ab hominibus sceleratis, verum etiam à Dæmonibus sunt commissa: Et quidni sperem in te, ô summa Spes, & unica Salus animæ meæ! qui non venisti vocare justos, sed peccatores, & qui pro nobis impiis & peccatoribus mori dignatus es.

Charitatis. Verè enim DEUS Salvator meus es, & Bonus es super omne bonum: & ideò diligo te Christe JESU, qui ex nimio amore mei in carnem venisti, & ad mortem usq; me dilexisti, & in signum hujus amoris in Sacramento teipsum mihi dedisti. Amo, inquam, te super meipsum & omnia; aut certè sic amare te, & tibi soli semper adhærere vehemèter desidero. Utinam per virtutem Sacramenti hujus, tanta inter te & me còalescat amoris unio, ut nihil me separare queat à Charitate Christi Salvatoris mei.

Conformitatis. Et quamvis ego sim nequam & pessimus, & indignus ullo tuo beneficio: tamen

Cc quia

quia tu es infinitè Bonus, qui ex tua infinita bonitate me ad te venire jubes, & ut ego Sacrum Corpus & Sangvinem tuum nunc (offeram &) sumam, vis & dignaris: ideò non ex aliqua præsumptione, neq; ex propria quæstione, sed ex sola hac tua dignatione & voluntate, cui amanter obedire debeo & volo; neq; ex affectu meo tepido & indevoto; sed amantissimæ & devotissimæ Matris tuæ, Beatorum Angelorum, & hujus diei Sanctorum, Patronorumquè meorum specialium, & omnium glorificatorum, omniumq; justorum & animarum purgandarum, & universarum possibilium creaturarum possibili reverentiæ, gratitudinis, amoris & devotionis affectu, desidero ex toto corde superdignissimum hoc (Sacrificium offerre &) Sacramentum devotè sumere: idq; in unione excessivæ illius Charitatis, quâ tu DEUS noster pro nobis Homo fieri, pati & mori, & hoc Sacramentum in ultima cœna instituere & à nobis in tui memoriam (offerri &) sumi ordinasti & voluisti: & in unione devotionis & amoris, quo devotissima Mater tua & omnes Sancti ac justī, qui nos præcesserunt, te in hoc Sacramento tam fructuosè sumpsērunt.

(*Pro Sacerdotibus.* Volo autem offerre hoc Sacrosanctum Sacrificium Corporis & Sangvinis tui, unitum illi Sanctissimo Sacrificio, quod tu ab æterno, & à primo in mundum ingressu, totâ vitâ offerre desiderasti, atquè in ultima cœna & cruce obtulisti, & nunc offers tanquam Summus.

& sempiternus Pontifex assistens ad dexteram DEI Patris, & interpellans pro nobis; unâ cum Sacrificiis omnibus tibi placitis unquam oblatis, & hodie per totum mundum, & deinceps unquam offerendis, nomine totius Ecclesiæ tuæ Sanctæ, ex puro & sincero amore tui, ac desiderio placendi tibi, tuiq; Sanctissimi beneplaciti complendi, & faciendi, quod tu ipse instituiti ac præscripsisti, secundum tuam Sanctissimam, ac S. Matris Ecclesiæ intentionem.)

Intentionis. Ad maximam, infinitam æternamq; tuæ Divinæ Majestatis laudem, cultum, obsequium, honorem & gloriam.

In recognitionem & protestationem supremæ tuæ Excellentiae & Dominii tui in me & in omnes creaturas, & omnimodæ nostræ subjectionis, servitutis, & dependentiæ à te.

In memoriam & venerationem tuæ Sacratissimæ Incarnationis, Nativitatis, Vitæ, Passionis, Mortis, Resurrectionis, & Ascensionis tuæ.

In honorem & augmentum gloriæ B. Virginis MARIE & Angelorum, Sanctorumq; hujus diei, & Patronorum meorum, omniumq; Beatorum.

In gratiarum actionem pro omnibus donis, gratiis, privilegiis & charismatibus Sanctissimæ tuæ Humanitati, & B. Virgini Matri tuæ, Sanctis hodiernis, Patronis meis, & omnibus Beatis ac prædestinatis, & pro beneficiis mihi indignissimo hucusq; collatis & conferendis in æternum.

In satisfactionem & propitiationem pro meis,

omniumque fidelium vivorum, & defunctorum peccatis.

Ad efficaciter impetranda omnia bona nobis ad tuum Divinum obsequium, & salutem nostram necessaria, corporalia & spiritualia, temporalia & æterna: & pro impetrandis omnibus donis tuis, quibus ego usq; ad beatitudinem vitamq; æternam consequendam. Specialiter autem pro obtinenda meritorum tuorum participatione, peccatorum meorum remissione, & à futuris præservatione, extirpatione vitiorum N. N. mortificatione passionum N. N. acquisitione virtutum N. N. vitæ Sanctitatis, atque cordis puritatis, & pro finali in gratia tua perseverantia, & bona morte.

Sacerdotes addant. Pro Ecclesiæ tuæ custodia contra hostium insultus & pericula, Adunatione in vera fide, spe, & charitate: Directione per Spiritum tuum, Beatos Angelos, ac bonos Prælatos, Reges & Principes: ac in omnibus Reformatione.

Pro Summo Pontifice Papa nostro, Cardinalibus, Patriarchis, Episcopis, Abbatibus, Parochis & aliis curam animarum gerentibus: in speciali pro R. P. N. Generali, & aliis nostri Ordinis Prælati, ut omnes dignè & utiliter præsent, ad suam & subditorum salutem.

Pro Sacerdotibus, & universo Clero, eorumque vitæ sanctitate & cordis puritate.

Pro Statu Religionum sanctarum, & cunctis Religiosis, præsertim nostræ, & fratribus nostris: pro conservatione Observantiæ regularis, & perfecta Votorum nostrorum redditione. Pro

Pro Augustissimo Christianorum Imperatore & Serenissimo Rege nostro; & cunctis Magnatibus ac Senatoribus hujus Regni atq; Nobilibus: cæterisq; Catholicis Principibus, eorumq; directione, prosperitate, mutua pace ac concordia: & adversus hostes Ecclesiæ victoria.

Pro Turcarum, Infidelium, Hæreticorū, Schismaticorum, eisq; faventium, & cæterorum Ecclesiæ adversariorum repressione, expugnatione, & conversione.

Pro universo omnium Satorum populo tuo, ut singuli juxta statum suum dignè Tibi serviant.

Pro justorum conservatione, profectu, & finali perseverantia.

Pro peccatorum digna pœnitentia, emendatione & justificatione.

Pro captivorum, ægrotantium, tentatorum, peregrinantium, pauperum & omnium afflictorum consolatione, & salutari liberatione, sicut vis, scis, & potes.

Pro temporum tranquillitate, morborum depulsionem, & omnium necessariorum convenienti provisione.

Pro animarum purgandarum refrigerio, luce, & quiete.

Pro omnium negotiorum nostrorum directione & felici consummatione.

Pro meis & fratrum meorum parentibus, consanguineis, fratribus, consæderatis, benefactoribus, amicis & inimicis nostris, meæ curæ com-

missis & commendatis, & pro his, quos quovis modo offendi, vel qui me unquam offenderunt.

Deniq; pro omnibus ac singulis, pro quibus tu nos vis aut tenemur, vel intendimus orare: juxta singulorum gradum & necessitatem, meamque obligationem, vel specialem intentionem, & maxime juxta sapientissimam tuam dispositionem, atq; Paternam bonitatem: non juxta meam tepiditatem & indignitatem.

Petitio. O Pater misericordiarum dives in omnes qui invocant nomen tuum: me & omnes illos, quos cōmemoravi, cum necessitatibus nostris, tam interioribus quàm exterioribus in manus tuas paternas commendo & resigno; in ea perfectissima resignatione, qua tu teipsum in horto cum sudore sanguineo, & in Cruce, cum lachrymis DEO Patri commendasti & resignasti: ex affectu tuo, & tecum dicens: Abba, Pater, omnia tibi sunt possibilia; si vis potes nos exaudire. Ergo sicut seīs expedire ad tuam gloriam & animarum salutem, & sicut vis & potes, exaudi nos.

Specialiter autem, obsecro te, Pastor bone, & Panis vive, JESU dulcissime, da nobis hodie sic carnem tuam manducare, & sanguinē tuum bibere: teq; perfectum DEUM & Hominem in hospitium cordis nostri sic recipere, ac retinere, ut fructum omnem, ad quem hoc Sacramentum instituisi, & quem in præcedentibus Sanctis tuis operatus es, in nobis etiam opereris: & maxime ut juxta verbum tuum, in te maneamus; & per
te,

te, ac propter te vivamus, & omnia operemur; tuq; vicissim in nobis maneat, vivas, & libere opereris quaecunq; volueris.

Suscipe ergo me Domine JESU secundum eloquium tuum, & non confundas me ab hac expectatione mea: Et in Sacris vulneribus tuis & Sangvine ablue me, & emunda ab omnibus immunditiis meis & negligentis: Sana & præserva à peccatorum vulneribus & reliquiis: Da mihi omnes virtutes & justitias vitæ & Passionis tuæ: & præpara tibi locum in anima mea juxta beneplacitum & gustum tuum, in quo teipsum recipere & habitare digneris.

Præterea da mihi omnia merita & virtutes, omnem fidem, reverentiam & devotionem: omnem puritatem, charitatem & gratitudinem; quibus devotissima Mater tua & Sancti hujus diei, & omnes Patroni mei, atq; Beati & Electi hoc Sacramentum, dum hic in terris adhuc essent, venerati sunt, susceperunt, & obtulerunt, atq; etiam nunc venerantur & adorant: & quibus tui amici, & justii omnes specialiter devoti adhuc in hac vita degentes, quotidie illud venerantur, & adorant, offerunt & suscipiunt.

Deniq; in altissimo amore, quo possibile est cor nostrum erga te affici, & cum vehementissimo desiderio, & reverentia dignissima, quibus unquam exceptus es ab aliquo Sanctorum; da mihi & omnibus tuis devotis hodie & deinceps Sacrosanctum Corporis & Sangvinis tui Sacramentum

(offerre &) sumere cum tali intentione, ac si omne desiderium & reverentiam, omnemq; amorem quo unquam cor humanum aliquod flagravit, haberemus : Tu amorem illum in me suscipe, non prout est in me, sed ac si talis ac tantus esset, quantum eum esse vellem. Suscipe me etiam hodie in holocaustum perpetuum : ecce enim cum hac Sacra (Oblatione &) sumptione Corporis tui Sacratissimi, in ea Charitate, qua DEUS Pater te nobis dedit, & tu temetipsum in ara Crucis pro nobis DEO Patri obtulisti : & per Spiritum S. a fidelibus tuis in Missæ Sacrificio offeris, & te ipsum offers : offero etiam tibi in æternum beneplacitum tuum meipsum totum, & quidquid possum, & habeo cum universa creatura ad relinquendum, agendum & patiendum quidquid volueris in tempore & æternitate.

Aspirationes B. Pasche in Babyloni, quibus ipse utebatur ante Communionem.

O Immenso Domine DEUS meus, qualis hæc liberalitas tua, & quanta magnificentia tua, quam mihi tribuis, quod cum sis DEUS Omnipotens & æternus, Creator & Redemptor meus, jubes ut te in cordis mei visceribus recipiam, & in pectoris mei abscondam arcanis.

O Bone JESU! O Salus mea! Pauperulam animam meam Tibi offero, & cor meum tepidum Tibi trado. Fons aquæ vivæ munda me.

O Cœle-

O Cœlestis Pater, da mihi virtutem ad opus
hoc maximum perficiendum!

O Fili, Sapientia Patris, da mihi intellectum
& prudentiam!

O S. Spiritus, Amor Patris & Filii, accende
cor meum, & animam meam igne tuæ charitatis
purifica, ut hoc Sanctissimum Sacramentum, viva
fide, & pura mente recipiam!

*Iste quoq; Petitiones multum à multis
commendantur.*

INeffabilem misericordiam tuam DEUS æternæ
Pater omnipotens humiliter exoro, ut Filium
tuum Unigenitum eo mihi affectu in SS. Eu-
charistia, & cum illa cœlestium donorum copia
largiaris, cum qua cum Virgini Sanctissimæ in
Incarnatione dedisti.

Obsecro te Unigenitum DEI Patris Verbum,
ut cum eo affectu, & cum illa cœlestium dono-
rum plenitudine animæ meæ peccatrici te com-
municēs, cum qua te communicare dignatus es
Matri tuæ Sanctissimæ in tua Incarnatione.

Te quoq; Dator omnium bonorum, & Largi-
tor Spiritus S. deprecor, ut ita præpares & dispo-
nas cordis mei tabernaculum, ad recipiendum SS.
Sacramentum & per illud tantum donorum tuo-
rum benignè impertiri digneris, sicut præparasti
& disposuisti corpus & animam B. Virginis ad
Verbum æternum concipiendum, & quantum per
illud eidem gratiarum contulisti.

O inte-

O intemerata, & in æternum benedicta, singularis atq; incomparabilis Virgo Dei-genitrix MARIA, obsecro te, ut mihi impetres tantum erga Christum Dominum in Eucharistia recipiendum amarem, quanto eum prosecuta es, dum cum in vlnis gestares.

Vos, beatæ mentes Angelicæ, imploro, & humiliter exoro, ut mihi tantam reverentiam à Domino nostro impetrate velitis, quanta ei, & in terris commoranti servivistis, & quanta nunc in cœlis ad ejus obsequium vos impenditis.

Vestris meritis omnium Sanctorum Spiritus impetrare mihi dignemini, tantam devotionem, & tantam abundantiam virtutum, ad dignè recipiendum Redemptorem nostrum, cum quanta in carne mortali viventes SS. Eucharistiam recipiebatis, aut Missæ Sacrificium offerebatis.

Rogo te, Domine JESU Christe, per tuam Sanctissimam Humanitatem, ut cum eo, mihi te velis communicare in SS. Sacramento affectu, cum quo suscipere dignatus es carnem fragilitatis nostræ, & cum quo in Cruce Animam tuam dedisti pro nobis, & SS. hoc Sacramentum, in memoriam tuæ Passionis instituisi; & cum ea cœlestium donorum largitione, quæ respondeat tuis meritis per vitam, Passionem, & mortem tuam, pro humano genere acquisitis, in beneficium & ad salutem nostram, ut per hanc plenitudinem donorum cœlestium, humanitas mea, quàm similima reddatur Sanctitati Humanitatis tuæ; ut fiat
mem-

Et Communionem exercendi.

427

membrum quàm maximè proportionatum tibi
Capiti meo.

Deniq; potest addi Aëtus, qui est supra pag: 383. his verbis expressus: Aëtus majoris momenti Aëtionibus nostris præmittendus.

Præterea ut sit purior anima nostra, ad obtinendam plenariam indulgentiam: possunt; qui volunt, Religi si, ante hanc præparationem hic postam, Ps. 50. Miserere mei DEUS &c. devotè recitare. Et Sacerdotes pro lucranda indulgentia. 50. annuū, quam Gregorius XIII. concepit cuilibet Sacerdoti dicenti hanc Intentionis Formam.

Ego volo celebrare Missam, & conficere Corpus, & Sangvinem Domini nostri JESU Christi, juxta ritum S. Romanæ Ecclesiæ ad laudem Omnipotentis DEI, totiusq; curiæ triumphantis; & ad utilitatem meam, totiusquæ curiæ militantis: pro omnibus qui se commendaverunt orationibus meis in genere & in specie, & pro felici statu S. Romanæ Ecclesiæ, Amen. Gaudium cum pace, emendationem vitæ, spatium veræ pœnitentiæ, gratiam & consolationem S. Spiritûs, perseverantiam in bonis operibus, tribuat nobis Omnipotens & misericors Dominus, Amen.

Hæc Præparatio ad Missam Et Communionem, quia est prolixior pro impeditis, Et variis negotiis distentis: ideo pro illis alia brevior ponitur, in qua multe virtutes exercentur.

O Dulcis-

O Dulcissime Salvator Christe JESU, qui propter nos homines nostramque salutem descendisti de cœlis; & incarnari de Spiritu Sancto, ex MARIA Virgine, & Homo fieri, ac mortem crucis acerbissimam & ignominiosissimam subire dignatus es. *Adoro te* in toto corde meo, laudo, & benedico: *Et Gratias ago Tibi* ex intimis visceribus animæ meæ, quod tanta Charitate nos miserè perditos redemeris pretio Sangvinis tui. Et in hujus Amoris tui memoriam, nec non in pignus futuræ gloriæ, tam admirabili Potentiâ, Sapientiâ, & Bonitate dederis nobis in cibum & potum ipsum Corpus & Sangvinem tuum: Deniq; ad hæc Divina Mysteria, me vilissimum peccatorem in numerum tuorum (Sacerdotum) Servorum, tuâ ineffabili clementiâ vocare dignatus sis.

Sed heu infelix ego homo, qui hætenus tam indignè vocatione mea vixi, & toties & tam graviter te DEUM meum offendi peccatis meis (præsertim his N.) At nunc de iis doleo ex intimo corde meo, ob amorem tui super omnia: & deinceps tibi soli servire, placere, & adherere propono.

Proindeq; nunc accedens ad mensam Conviviæ tui, ex omni affectu cordis mei tibi (hoc Sacrificium Missæ) dignissimam Hostiam Corporis & Sangvinis tui, quam tu ipse semel pro nobis in ara Crucis obtulisti, pura & simplici intentione offero ad Laudem & gloriam æternæ Majestatis tuæ.

tuæ. In memoriam Sacratissimæ Incarnationis, vitæ, Passionis ac Mortis tuæ.

In gratiarum actionem pro omnibus donis & beneficiis, toti cætui Electorum, & mihi licet indignissimo hucusquæ præstitis: vel unquam præstandis.

In propitiationem peccatorum meorum & hominum universorum.

Præterea pro salute fidelium omnium vivorum, pro Ecclesiæ tuæ Sanctæ Præsulibus & Prælati atq; Pastoribus, pro omnibus Statibus Ecclesiasticis, sæcularibus, Religiosis, pro omnibus Regibus, Principibus & Magistratibus Christianis, pro parentibus, consanguineis, fratribus, benefactoribus amicis, ac inimicis nostris, pro illis qui se meis orationibus commendarunt, & qui me contristaverunt, aut quos ego contristavi, offendi, juvare dum potui, neglexi; pro omnibus afflictis, tentatis, infirmis, agonizantibus, in angustiis & periculis positis, & pro cunctis, pro quibus orare tu me vis, & ego teneor: deniquè pro fidelibus defunctis, specialiter pro his N. N. & quorum nulla est apud homines memoria, & qui præ cæteris antiquiùs in purgatorio detinentur.

Et utinam ex omni affectu, fervore, & desiderio amicorum tuorum, seu jam regnantium in cælis, vel adhuc militantium in terris, hoc tam grande tuæ pietatis opus peragere possem, (vel potuissem.)

Corde siquidem credo, mi JESU, & ore confiteor,

ſiteor, quia Pater æternus, DEUS ſeipſo ſummè beatus, potens, perfectus, & nullius egens, ſecundum infinitam miſericordiam ſuam ſic dilexit mundum, ut te Filium ſuum Unigenitum nobis daret Salvatorem.

Credo quog; quod tu ipſe Patri æqualis per omnia, ex vi immenſæ charitatis tuæ de ſinu Patris deſcendiſti in uterum Virginis, & propter nos homines Homo factus eſ.

Credo quod ex amore noſtri hoc Sacramentum in ultima cœna inſtituens, verum Corpus & Sangvinem tuum, id eſt, teipſum nobis ad manducandum dediſti. Et deniq; Patri tuo factus obediens uſq; ad mortem, temetipſum pro nobis hoſtiam in ara Crucis obruliſti.

Ideôq; ſpero in te, & magnâ fiduciâ venio ad te, ô Domine, qui noſtri cauſâ tam mira facere, & tam dira pati voluiſti. Quid enim negabis, qui ſic amaſti, ut teipſum dares?

Amo te quog; ô Bone JESU, ex tota virtute cordis mei; & ſemper deinceps & in æternum amabô, ſi tû dederis.

Sed quid retribuam tibi Domine pro tanto munere, & pro omnibus quæ retribuïſti mihi? Ecce abnego memetipſum, & totum me, id eſt, corpus, animam & omnia mea in omne beneplacitum benigniſſimæ Voluntatis tuæ plenè reſigno.

Verùm, quid habeo, quod non acceperim? Quid eſt homo, ſi comparetur Factori ſuo? Quid vilis creatura, vermis terræ, miſer peccator, &
ſervus

servus inutilis præstare poterit DEO, Creatori, ac Domino suo?

Agnosco quia inops & pauper sum ego; Ideoque *humilis me* sub potenti manu tua, tu verò ô Domine JESU, utpote Advocatus & Mediator meus, dives in meritis & miserationibus, suscipe causam meam.

Et ex thesauro immensæ Charitatis tuæ fero opem inopiæ meæ: & pretium Sangvinis tui, omniumq; meritorum tuorum repræsentata æterno Patri tuo: & hinc supple omnem defectum meum, præcipuè hujus meæ, heu, nimis modicæ & imperfectæ præparationis, quâ ad hæc SS. Mysteria venio, ut sic ei per te placeat obsequium indignissimæ servitutis meæ.

Fac etiam, ô Bone JESU, per omnes miserationes tuas, ut hoc tremendum Mysterium, & admirabile donum charitatis tuæ debita semper Fide, Reverentiâ & Gratitudine prosequar: idque puro & ardenti corde nunc & semper recipiam: Statum hunc quoq; meum Religiosum, ad quem me ex singulari gratia vocare dignatus es, Charitate, Castitate, Humilitate, Mansuetudine, Patientia, Sobrietate &c. Moribusq; Tibi placitis, & (Sacerdote) fideli servo tuo dignis excolere studeam. Idq; ut servitus mea magis Tibi placeat ad majorem Gloriam tuam, Ecclesiæ utilitatem, & propriam, proximiq; salutem.

Unde tandem supplex obsecro, ut per virtutem Corporis & Sangvinis tui abstrahas cor meum
efficaciter

efficaciter ab omnibus noxiis affectibus N.N. qui gustum ac fructum hujus Sacramenti impediunt, & intimè tibi unias, & incorpores, ut gustem, quàm suavis sis Domine, & unus t cum efficiar spiritus, ut tu in me, & ego in te maneam; adeoq; nihil sit, quod me unquam separare valeat à te. Nam tibi adhærere mihi bonum est. Quid enim mihi est in cælo, & à te quid volui super terram? ô pars mea DEUS in æternum!

*Imploratio Beate MARIE Virginis Matris
DEI ante Missam & Communionem.*

O Domina mea Sancta MARIA: ô Mater DEI & Virgo dignissima: ô Angelorum & Sanctorum omnium Imperatrix gloriosissima; ô nostra singularis Mater & Advocata post DEUM potentissima, sapientissima, & benignissima! Multum desidero sub honore tuo Filii tui Sacrum Corpus & Sangvinem hodie & deinceps (offerre &) sumere: sed quia ad hoc nimis sum indignus & insufficiens: per te, obsecro, accessum habeamus ad Filium, ô benedicta Inventrix Gratiae, Genitrix vitæ, Mater salutis: ut per te nos suscipiat, purget, illuminet & perficiat: qui per te datus & natus est nobis. Excuset apud ipsum, tua puritas & integritas culpam nostræ impuritatis & corruptionis. Humilitas tua DEO grata; nostræ veniam impetret superbiæ & vanitati: copiosa Charitas tua nostrorum cooperiat multitudinem peccatorum: & fecunditas gloriosa, fecundi-

fecunditatem nobis conferat meritum. Domina nostra, Mediatrix nostra, Advocata nostra, tuo Filio nos reconcilia, tuo Filio nos repræsentata & commenda, tuo Filio nos conjunge & incorpora. Fac 6 benedicta per gratiam quam invenisti; per prærogativam quam meruisti: per misericordiam quam peperisti: ut qui te mediante dignatus est particeps fieri miseriæ & infirmitatis nostræ: te quoque intercedente participes nos faciat Corporis, & Sangvinis sui, gratiarumque & virtutum Passionum & meritum suorum: tandemque gloriæ & beatitudinis suæ, JESUS Christus, Filius tuus, Dominus noster, DEUS benedictus in sæcula.

Invocatio Angelorum Et omnium Beatorum Spirituum.

O Michaël, Gabriel, Raphael. O Angele mi Custos & Patrone. O Archangele hujus Monasterii, & totius Ordinis nostri Archangeli. O Princeps hujus Regni & Domini ac Diocesis. O omnes ac singuli beatorum Spirituum Ordines.

Angeli, (Potestates, (Throni,
Archangeli, (Virtutes, (Cherubim,
Principatus, (Dominationes. (Et Seraphim.

Ut sub vestro honore dignissimum (Missæ Sacrificium offerre, &) Corporis & Sangvinis Domini Sacramentum devotè suscipere possimus: state, obsecro nobiscum juxta aram templi; mittite ignem de altari Divini Cordis in corda nostra;

Da

suscipite

fuscipite incensa orationum nostrarum in aurea
thuribula cordium vestrorum, ut sic per vos ascen-
dat fumus aromatum nostrarum in conspectu DEI.
Eja semper & ubiquè, sed maximè in hoc tanto
mysterio nos purgate, illuminate & perficite; nos
protegitè, dirigite, & honestate. Offerte etiam
pro nobis, & nobis donate vestram humilitatem,
puritatem, & simplicitatem: vestram charitatem,
Sapientiam, & stabilitatem: vestram deniquè de-
votionem, gratitudinem & fervorem, cæterasque
virtutes & perfectiones vestras, quibus ornati DEO
placeamus, & gratum obsequium exhibeamus.

Invitatio Sanctorum.

O Sancti hujus diei, O Patroni mei speciales
S: Joseph, N.N. O Sancti Patriarchæ,
Prophetæ, gloriosi Apostoli, Evangelistæ
& Discipuli Domini: invictissimi Martyres: San-
ctissimi & devotissimi Pontifices, Sacerdotes, &
Confessores: religiosissimi Anachoritæ, Monachi,
& Regulares omnes: electissimæ Christi Sponsæ,
Virgines & Continentes: ô omnes & singuli San-
cti in cælo cum Christo regnantes & epulantes:
per illud ardentissimum charitatis incendium, quo
toti ardetis in DEUM, nostram purgate immun-
ditiam, illuminate ignorantiam, & tepiditatem
accendite: omnemque vestram fidem, reverentiam,
puritatem, charitatem, & devotionem, cæterasque
virtutes quibus Domino unquam placuistis (maxi-
mè in sumptione & oblatione hujus Sacramenti
&

& Sacrificii , & in die gloriosæ assumptionis vestræ in cœlum) nobis donate ; ut sic sub honore vestro Sacrosanctum Corpus & Sangvinem Domini nostri, devotè & fructuosè sumere (& offerre) possimus.

In honorem Spirituum beatorum tantorum Principum tuorum, & omnium Sanctorum, amantissime Domine offero tibi hoc permagnificum Sacramentum in laudem æternam , & in augmentum gaudii, gloriæ & beatitudinis ipsorum. *Sic Sancta Gertrudis aliquando ante Communionem oravit.*

O Virgo Beatissima, & omnes Angeli , Sanctique omnes ac Sanctæ DEI, offerte pro me Domino ad quem accedo , dignitatem omnem , quâ vestrum quilibet paratus fuit ad quamlibet gratiam recipiendam. Domine JESU , dignare offerre pro me perfectionem illam , quâ in hora Ascensionis paratus adstitisti DEO Patri ad suscipiendam glorificationem. *Ita eadem S. Gertrudis Virgo.*

O dulcissima Virgo MARIA , oro per illam innocentissimam tuam puritatem, quâ Unigenito DEI Filio in tuo Sacratissimo virginali utero placitam mansionem præparasti , ut tuis precibus ab omni macula emunder.

Præterea rogo te per profundissimam illam tuam humilitatem , ob quam super omnes choros Angelorum & Sanctorum exaltari meruisti , ut omnes negligentiae meæ suppleantur.

Insuper te deprecor , per amorem illum ineffabilem,

bilem, qui te inseparabiliter DEO conglutinavit,
ut mihi meritorum diversorum copia præstetur.
*Sic Beata Virgo MARIA Sanctam Gertrudem
orare docuit.*

*Aëtus Desideriorum ante ipsam Communio-
nem exercendi.*

O DEUS scrutator cordis mei, cupio fume-
re, utinam re ipsa possim, mirabile &
cœleste Sacramentum, omni, quâ par est,
pietate & religione, omni affectu, desiderio, &
fervore Angelorum, & Electorum tuorum.

Domine, ante te omne desiderium meum: pa-
ratum cor meum DEUS, paratum cor meum:
quod totum tibi offero.

Desiderium pauperis exaudi ô Domine, præpa-
rationem cordis ejus audiat auris tua.

Suppleat Divina & immensa tua benignitas,
quidquid humana mea non valet infirmitas. Fac
ut puro corde tibi conjungar, & intimo affectu
Majestati tuæ Divinæ uniar.

Aufer à me piissime JESU, quidquid Tibi di-
splicet in me: & quidquid oculos purissimæ tuæ
Divinitatis offendit, procul remove à me; & effice
me hominem secundum cor tuum.

Præpara tibi gratam & amœnam habitatio-
nem in me, & exorna me inopem meritis Sacra-
tissimæ Passionis tuæ, cujus memoriam in hoc
augustissimo Sacramento reliquisti.

Desidero Te millies mi JESU; quando venies?

Me

Me lætum quando facies? me Tibi quando
unies?

Quemadmodum desiderat cervus ad fontes a-
quarum; ita desiderat anima mea ad te DEUS.

Quis dabit mihi amantissime JESU pennas
sicut columbæ, & volabo in desiderio, cupiens
requiescere in te?

Ecce enim in siti desideriorum ferventi affectu
confidens hodie venio ad te, & tibi cor meum
in habitaculum humiliter offero, tuam exorans
elementiam, ut dignanter advenias in animam
meam, & in medio cordis mei sedem tibi collo-
ces, ut delicias tuas in me, qualis qualis sim, eti-
am habere digneris.

Cum gaudio atque humilitate obvians tibi,
fuscipio te amantissime JESU, ex affectu totius
Universitatis, in unione amoris illius, quo tu
Creator & Dominus pro nostra salute in mundum
advenisti, & mortis amaritudinem non recusasti.

Heu dilecte mi, dilecte mi, ego indignissimus,
nihil, quod tuam Divinam condecet magnificenti-
am, præparavi: sed totam substantiam meam offe-
ro pietati tuæ, desiderans & orans, ut ipse tibi-
met digneris præparare, quidquid tuam Divinam
in me summè delectare potest benignitatem.

O quis mihi det in hac hora cor purum, cor
mundum, cor novum, ab omni fæce repurgatum,
amore tuo Divino bone JESU succensum, ut
veniens paratam tibi in corde meo invenias re-
quiem, nihilquè reperiatur in me, quod oculos

purissimæ Majestatis tuæ offendere possit?

Heu me, quantis cum lacrymis lugerè fatis possum, quod nunquam tibi dulcissimo amatori meo, & dignissimo hospiti ad me adventanti, condignam in corde & anima mea exhibui mansionem, sed inhonestè nimis à me fugavi te, nequè unquam aurem tibi præbere volui. Ignosce **JESU**, dulcis amor, tantæ meæ infidelitati & irreverentiæ, nequè me in æternum proicias à te, sed redde teipsum mihi, ut sub umbra alarum tuarum deinceps in pace quiescam, & sub protectionis tuæ firmissimo scuto omnes insidias inimici potenter à me propulsem, malaquè omnia dimittam, & perficiam omne bonum, donec suaviter totus liquefiat, & satietur ad plenum in te Spiritus meus.

O MARIA flos Virginum, contege nunc & deterge pallio tuæ misericordiæ, maculas cordis & animæ meæ, ne coram oculis divinæ justitiæ compareant: comitare me nunc dulciter euntem in occursum Filio tuo, da illum mihi, & pone suaviter inter ulnas animæ meæ, ut benedictionem ab ipso anima mea recipiat, eumquè cum omni sua Divina virtute, decenter præparatus suscipere, eidemquè reclinatorium gratum & dulce in anima mea præbere possim.

Virgo dulcissima **MARIA**; ecce nunc conspectui Divinæ Majestatis assistens, humiliter tuo me commendo patrocinio. Suscipe me tanquam bona Mater & Advocata, & loquere pro me bona apud
Filium

Filium tuum: offer illi in suppletionem meorum defectuum tua merita; quibûs decoratus, placeam in oculis Altissimi.

In ipsa Communione.

O Anima mea, ecce jam propè est Dominus tuus, ecce venit Sponsus tuus, exi obviam ei; aperi januam adventanti Domino & DEO tuo; da locum Creatori tuo; præbe accessum Sponso tuo, qui tanto cum amore ad te properat.

Unde hoc mihi? unde hoc mihi, ut veniat Dominus meus ad me? Domine non sum dignus, ut intres sum tectum meum: verumtamen si ita placitum est tibi, nec aliter fieri vis, ecce servus tuus, fiat mihi secundum voluntatem & beneplacitum tuum. Ingredere jam in animam meam benedicte Domine, & miserere mei.

Sumpto SS. Sacramento. Corpus tuum Sanctissimum & Sanguis tuus pretiosus Domine JESU Christe, custodiat corpus & animam meam in vitam æternam, & pax tua sit mecum, Amen.

Actus Gratiarum actionis post Communionem Exercendi.

O JESU infinitè amabilis, DEUS meus, spes mea, amor meus, & omnia, unde mihi indignissimo terræ vermiculo, peccatori miserrimo, filio ingratiissimo tanta dignatio, tanta miseratio, tanta dilectio, tantæ Majestatis,
Dd4 benigni-

benignitatis, charitatis, ut tu sic venias ad me? atque Corpus & Sanguinem tuum, id est, teipsum modo prorsus admirabili in hoc Sacramento largiaris? O Charitas! ô pietas! ô novum & grande beneficium!

Tunc DEUS meus ad me venire dignaris? Rex ac Dominus summæ Majestatis, ad infimum servum? DEUS ad hominem? Creator ad creaturam?

An nescis, quis sim ego? pulvis utique & cinis, vas sordidum, esca vermium, & ad hunc tu de cœlo venis? Verè confiteor, quia aliis omnibus fidelibus debetur cœlum, mihi soli infernus, & ibi non alius locus, nisi sub pedibus omnium reproborum, damnatorumque, infimus.

Ergo tu, quem ego credo esse DEUM verū, Creatorem, Regem, ac Dominum universorum, ad me tam vilissimum & indignissimum venire dignatus es? O bonitas! ô benignitas! Quid igitur retribuam Domino, pro omnibus quæ retribuit mihi? Utinam aperiantur labia mea, & repleatur os meum laude, ut cantem gloriam tuam, tota die magnitudinem tuam, & enarrem universa mirabilia tua!

Magnificet anima mea Dominum, tot tantisque affecta ejus beneficiis: & exultet spiritus meus in DEO salutari meo: quia respexit humilitatem servi sui; & fecit mihi magna qui potens est, & esurientem implevit bonis.

Benedic ergo nunc anima mea Domino, &
omnia

omnia quæ intra me sunt, Nomini sancto ejus: benedic anima mea Domino, & noli oblivisci omnes retributiones ejus; Qui propitiatur omnibus iniquitatibus tuis; qui sanat per hujus Sacramenti virtutem, omnes infirmitates tuas.

Benedicant te, ô DEUS salutis meæ, omnia interiora mea, & tota substantia & virtus mea. Jubilent tibi desideria Præcordiorum meorum & vota: quia tu es DEUS meus.

Magnus es Domine & laudabilis nimis; & quis narrabit potentias tuas, auditas faciet omnes laudes tuas? ego quidem, etsi omnia membra meæ verterentur in lingvas, & omnes vitæ meæ respirationes in tui laudes, & gratiarum actiones: attamen longè minor essem cunctis miserationibus tuis. Unde agnoscens insufficientiam meam, id unum votis omnibus exopto, ut omnes creaturæ tuæ, mecum & pro me laudent, & benedicant nomen tuum in æternum.

Agnoscaris, adoreris, ameris, glorificeris, & superexalteris infinitè, infinities, ab omnibus, in omnibus, super omnia, gratis propter te, in ætèrnum, & ultrà.

† Sed ante omnia, ô clementissime Pater æterne DEUS, accipe laudes & gratiarum actiones, quas Filius tuus Salvator noster, assumpta Humanitate, ab instanti Incarnationis toto vitæ suæ decursu persolvit.

Et illas præcipuè, cum instituens hoc Sacramentum, & quasi jam tum agnoscens impares nos
esse

esse gratis tanto beneficio referendis, elevatis oculis in cœlum, ad te DEUM Patrem suum Omnipotentem, omnium nostrum nomine tibi gratias egit.

Suscipe, & illas gratiarum actiones, quas Beata Virgo Unigeniti Filii tui Mater tibi obtulit, quando eum, quem ego ipse jam inclusum pectori meo complector, ipsa suis castissimis visceribus concepit, portavit, & peperit: nec non & illas, quas toto vitæ suæ tempore, & potissimum quoties jam sublatum in cœlos, in Sacramento recepit, ex ardenti cordis desiderio, & intima devotione persolvit.

Benedicant quoque, & laudent te omnes Angelici Spiritus, qui throno Majestatis tuæ jugiter tremantes assistunt, & cantant incessabili voce dicentes: Sanctus, Sanctus, Sanctus.

Desidero quoque ex toto corde, ut omnes Sancti & amici tui, tecum modo regnantes in cœlis, quorum Communionem credimus, compensent suis dignissimis laudibus, quas unquam hic in terris in usu, & veneratione hujus Sacramenti, devotissime obtulerunt, & quas tibi modo decantant, cum revelata facie comedunt panem vitæ, & torrente voluptatis tuæ potantur.

O utinam pariter omnium piorum fidelium affectus, fervores, & omnia tibi in terris placentium vota, desideria, & merita, in me unum colligere possem: & sic tota animi intensione te amare, & honorare, pro tanto amore & honore, quo me in hoc Sacramento dignatus es. Pro-

Profiteor enim, si quotquot in mundo fuerunt, sunt, aut erunt devotorum, qui debita cum præparatione, devotione, & fructu, diviniſſimum hoc Sacramentum unquam acceperunt, vel accipient: Si inquam, eorum omnium conatus, deſideria, & grati pitiqûe affectus, in me unum concurrerent, libens fanè & ultrò prorsus in laudem & gloriam Nominis tui, & debitam gratiarum actionem converterem. Et tamen (ingenuè fateor ô Domine) servus inutilis eſſem; nec condignè te laudare poſſem; quia major es omni laude.

Sed parce mihi Domine, quia inops & pauper ſum ego, & ſaltem deſiderium pauperis, ſeu obſequium bonæ voluntatis non deſpicias.

O utinam benedicant omnia opera Domini Domino, laudent & ſuperexaltent eum in ſæcula.

Quibus deerit tempus ad tam prolixam gratiarum Actionem faciendam, poterunt hoc totum à ſigno † Crucis relinquere.

Actus Oblationis Chriſti DEO Patri.

O Pater miſericordiarum, & DEUS totius conſolationis quomodo dilexiſti nos! ita nimirum, ut Filium tuum Unigenitum dares; ſemel quidem in pretium, ſed in dies in cibum. Quid tibi pro tanta charitate vilis ego creatura retribuam? hoc ipſum, quò tu nihil dignius dare poteras; ego nihil majus accipere. Ipſum inquam, dilectiſſimum Filium tuum offero tibi mi Pater, quem pro ſalute mea tam amantem obtulifti;

tulisti; & in hoc (Sacrificio) Sacramento, quod pro jugi illius beneficii memoria celebramus, tam gratosè (offerendum) sumendum dedisti.

Quem potius tibi offeram ô Pater æterne, quàm Filium tuum, in quo tibi benè complacuiſti? Quem alium dirigam intercessorem ad te ego reus, nisi hunc, qui est propitiatio pro peccatis meis: Ecce spes mea, tota fiducia mea, Christus JESUS, Filius tuus, Salvator meus. Noli quæſo, despiciere hanc oblationem meam, quamvis id mereatur offerentis vilitas; sed aspice precor propiti-
us, quia in infinitum est major oblatis dignitas.

Respice in faciem Christi tui, qui tibi pro nostra salute factus obediens usquè ad mortem, in Cruce pro nobis sese hostiam obtulit.

Attende in Filio, quod te moveat; misereri servo; & dum dilecti Filii tibi patent vulnera, mea quæſo tegantur scelera: & quia caro mea te laceſſivit ad iram, Caro Filii tui te flectat ad misericordiam.

Suscipe igitur ô Sancte Pater omnipotens æterne DEUS sanctam hanc & immaculatam Hostiam Filii tui, quam ego indignus famulus tuus tibi offero, una cum omnibus ejus virtutibus, meritis, vulneribus, cruciatibus, plagis, suspiriis, Sacri sudoris ac cruoris guttis.

In unione illius amoris, quo ipse tibi in Arâ Crucis semetipsum obtulit, in laudem & gloriam nominis tui; in gratiarum actionem pro omnibus beneficiis tuis in me, & in totum genus huma-

num collatis, in expiationem quoque peccatorum meorum; in suppletionem omnium defectuum meorum; in solatium & refrigerium omnium fidelium vivorum & defunctorum.

Oblatio nostri ipsimet Christo.

O Amantissime Salvator, quàm magna est misericordia tua super me! qui ut me Satanæ mancipium liberares, tu verus DEI Filius temetipsum in Ara Crucis DEO Patri in redemptionis pretium obtulisti; ut verò me pasceres & confortares, temetipsum nunc in cibum dedisti, quàm parum hucusque redamavi te sic amantem me? quid retribuì tibi pro omnibus, quæ tribuisti mihi, nisi peccata, negligentias, & ingratitude, toties te offendendo, toties pretium Sangvinis tui conculcando? Agnosco & detestor ingratitude meam tantam erga te, atq; ex puro amore tui doleo, quòd unquam offenderim te infinitè amabilem. Ignosce, quæso omnia peccata mea DEUS meus, spes mea, amor meus & omnia.

Sed quid nunc retribuam tibi Domino pro his omnibus, quæ nunc retribuisti mihi? scio te velle ut præbeam tibi cor meum: Igitur offero tibi cordis mei & animæ meæ medullam, in æternam laudem & gloriam tuam: quia tu es ipse Paterni cordis medulla dulcissima, langventis animæ sagina, & perfectio beatissima. Offero me ipsum tibi totum, qui me totum fecisti, & qui te totum nunc mihi dedisti. Suscipe me in sacrificium

ficiū & servum perpetuum. Totus tuus sum
eroq; semper, sicut tu totus meus esse dignaris.

Tu es, erisque DEUS cordis mei, & pars mea
JESU in æternum! Credo in te, & quidquid
revelasti ô infallibilis veritas, & pro hac S.Fide,
per tuam gratiam, mori sum paratus.

Spero in te. ô æterna Beatitudo nostra, & per
infinitam misericordiam tuam, & pretiosissima
merita tua, veniam, gratiam & gloriam, cum om-
nibus necessariis mediis mihi promissâ te daturum
confido, & me totum à te pendere, & nihil sine
te posse agnôsko & profiteor.

Amo, & amabo te, & omnia, quæ tu amas,
propter te, ô Fons infinite omnis boni; quia bo-
nus es in te, & infinite amabilis.

Gaudeo de infinita perfectione, beatitudine &
amabilitate tua, & de omni obsequio, laude, &
gloria tibi ab Electis tuis, & creaturis omnibus
unquam reddita, reddenda, ac reddi possibili.

Te, ut Principium ac finem meum supernatu-
ralem, DEUM meum infinitæ Majestatis, omni-
um Sanctorum triumphantium & militantium as-
fectu, supplex nihilum adoro, laudo, glorifico, ac
glorificare cupio in æternum; & in centrum ni-
hili mei, (cū gratiâ tuâ solâ sim id, quod sum)
infra omnes me demitto, & Majestati tuæ inclino.

Te, tuumquē in omnibus beneplacitum brachi-
is dilectionis & resignationis arctissimē complector,
omniquē possibili reverentiæ, fiduciæ, amoris, &
pietatis affectu veneror, & exosculor, ac comple-

Et Communionem exercendi. 447

eti, venerari, & exosculari semper in ævum percipio; licet me velles beata visionis carere, modò gratiâ & amore tuo nunquam destituar.

Quidquid in me est affectûs erga creaturas, totum id in te solum transfero; quidquid egero in omnem æternitatem, aut passus fuero, hoc totum ad tuam solius gloriam & honorem offero.

Desidero novo fervore me totum tuo impendere servitio, & omnia vitia eradicare, atquè defectus omnes & imperfectiones, maximè hunc particularem defectum N. corrigere, in omnibus virtutibus proficere, præsertim in hac N. specialiter me exercere, firmissimè propono.

Et hic est locus renovandì proposita in consideratione ante Communionem & Missam facta.

Actus Petitionis.

VERùm ô Domine, velle quidem adjacet mihi, perficere autem non invenio; Ad te itaque levavi oculos meos: quia imperfectum meum viderunt oculi tui. tu respice, precor, oculis misericordiæ tuæ infirmitatem meam; nam sine te nihil boni facere possumus; ex te autem est sufficientia nostra.

Da quod jubes, & jube quod vis, ô JESU DEUS meus, & omnia, per te, & infinita tua merita. Da ut te ferventer, continuè & efficaciter, amem super omnia; te in spiritu & veritate adorem, glorificem, & benedicam in omni tempore. Laus tua semper sit in ore meo, & amor tuus in corde meo.

Cupio,

Cupio, Domine, desidero, & opto magis desiderare semper, ac magis amare te; atque ideo, ut amare te magis possim, cupio dissolvi, & esse tecum, ubi perfectè amem te. Quia tamen adhuc manere me vis in corpore mortis hujus, volo & ego, quamdiu tibi sic placet.

Domine, à quo fluunt sancta desideria, desidero habere desiderium amandi Te tantum, quantum te amandi desiderium habuerunt, & habebunt omnes, qui tibi placuerunt, & placebunt ab Adamo, usque ad ultimum omnium mortalium tibi placentium. Desidero quidquid habent Seraphini omnes, & omnes dilecti ac Electi tui, unà cum teipso Rege ac Domino nostro, ac MARIA Virgine omnium Electorum Regina: Et si hoc desiderium non habeo, desidero ipsum habere; Da mihi quæso illud. Da præterea, ut ex amore tibi serviam fideliter, tuamque beneplacentem voluntatem in omnibus semper, & ubique impleam: tibi; in omnibus quàm maximè placeam.

O Scrutator cordis mei, vides quàm sim fragilis & pronus ad hoc N. vitium, & ad illos N. defectus: ego quidem lapsum cavere propono, sed tamen labor, nisi tu manum supponas. Scis quomodo optimè, ô Domine, quomodo Abnegatione, Humilitate, Contemptu mei, Obedientiâ, Patientiâ, Modestiâ, proximi Charitate, & aliis virtutibus indigeam: tribue itaque mihi ad acquirendas istas virtutes & alias omnes gratiam tuam, qui tam copiosum gratiæ thesaurum, immò teipsum gra-

tiæ Auctorem in hoc Sacramento dedisti, & me nunc ad illius participationem tam clementer admisisti.

Adjuva me DEUS, Salvator meus, & propter, gloriam Nominis tui ab omni peccato libera me, & salva me; quid est enim JESUS, nisi Salvator? verè non est aliud nomen sub cælo datum hominibus, in quo oporteat nos salvos fieri.

O Domine, quia tam dignanter venisti ad me, non dimittam te, nisi benedixeris mihi, tu qui aperis manum tuam, & imples omne animal benedictione.

O utinam accipiam benedictionem à Domino, & misericordiam à DEO salutari meo! quatenus eam de virtute in virtutem, donec clarè te videam DEUM Deorum in Sion, quem nunc in Sacramento velatum, & per speculum in ænigmatate video.

O Bone JESU, cujus viscera misericordiæ omnibus patent: qui neminem vis perire, sed omnes homines salvos fieri, ideoquè pro omnibus mortem subiisti: salvos fac servos tuos, DEUS meus, sperantes in te: Memor esto Congregationis tuæ, quam possedisti ab initio.

Subveni quæso famulis tuis, quos pretioso Sanguine tuo redemisti. Mitte eis Domine auxilium de sancto, & de Sion tuere nos.

Miserere parentum, fratrum, amicorum, inimicorum, benefactorumquè nostrorum, omnium afflictorum, periclitantium, agonizantium, omnium-

Ecce quæ

quē Infidelium, Hæreticorum, Schismaticorum, & peccatorum, & cunctorum, qui se commendaverunt, & commendant orationibus meis, & universorum, cujuscunquē sint statūs, hominum, & pro quibus teneor, & tu vis me orare. Communica iis meritum pretiosi Sangvinis tui, in salutem nostram effusi; ut in vita præsentī, gratiam ad serviendum & placendum tibi perficiant, & sic demum ad æternæ vitæ gloriā perveniant; ut ope gratiæ, sic vitam præsentem intituant, ut tandem in cœlis æternæ vitæ præmia recipiant, & teipso fruantur æternū.

Insuper miserere omnium fidelium defunctorum: Requiem æternam dona eis Domine, & lux perpetua luceat eis.

O Dulcissima Virgo MARIA, quæ eundem Dominum quem ego modo suscepi, de Spiritu S. conceptum, in Sacratissimo utero tuo portare meruisti; intercede pro me apud eundem Filium tuum: omnisq; negligentiae & indignitatis, in summi hujus Sacramenti sumptione commissæ, veniam mihi impetrare digneris.

O Sancti DEI omnes adeste mihi, quæso, precibus meritisquē vestris, ut panis ille cœlestis, & Viaticum divinum, quod modò sumpsi, mihi contra omnes infirmitates, pericula & insidias præstet robur & tutamen: ut in fortitudine cibi illius ambulem per hujus mundi desertum usquē ad montem DEI, & ibidem dulcissima illius fruitione vobiscum jugiter gaudeam; & DEUM unā vobiscū laudem per omnia sæcula, Amen. *Actus*

*Actus post Missam aut Communionē exercendus,
à P. Anton : Molina Carth : multum
commendatus.*

O Pater misericordiarum, & DEUS totius consolationis : qui ex abundantia infinitæ charitatis tuæ, dedisti nobis Unigenitum Filium tuum, ut omnis, qui credit in eum, non pereat, sed habeat vitam æternam : utquæ ex immenso meritorum ejus thesauro nostra suppleatur inopia : En ego miser peccator, sed per misericordiam tuam vocatus in societatem Filii tui : nunc quoquæ particeps factus sum Corporis & Sangvinis ejus. Proindequæ illum jam in pectore meo complector, & tunc jam rem meam intimè mihi conjunctam, possideo.

Atquæ ut talem, in unione charitatis, quâ se ipsum olim dedit pro nobis in ara Crucis & modo se dat & communicat in Sacramento Altaris ; tibi eum offero, unâ cum omnibus meritis atquæ virtutibus, in æternam laudem & gloriam tuam : ut in illo tibi perfectè complacereat : & nos, qui tibi placere de actibus nostris non valemus, dilectissimi Filii tui meritis & patrocínio, perfectè placeamus.

Offero tibi Pater sanctissimè, omnem ejus charitatem, religionem, obedientiam, humilitatem, pauperatē, mansuetudinem, patientiam, cum aliis omnibus virtutibus, quibus excelluit, ut totum, quod mihi deficit, per illas suppleatur.

Cumquæ ego debitas tibi gratias agere neque-

Eccam

am pro beneficiis in me collatis, offero tibi omnes laudes, quas ipse obtulit, cum visibilis inter homines versaretur in terra; & quas tibi nunc offert in gloria.

Cum verò satisfacere nequeam tibi debitis seu peccatis meis: offero tibi omnes ejus labores, jejunia, vigilias, fatigationes, orationes; quidquid deniquè fecit aut pertulit, à primo instanti conceptionis, quousquè spiritum emisit in Cruce: omnes angustias, dolores, ac tormenta passionis, omnem sanguinem pro me effusum, omnia vulnera pro me accepta, ac mortem pro me toleratam.

Ecce hic est thesaurus Pater clementissime, in quo totam spem reposui: hæ sunt divitiæ, quas offero in satisfactionem omnium debitorum meorum.

Aspice pie Pater in faciem Christi tui, & cum sit hic Filius tuus dilectus, in quo tibi semper benè complacuit, qui mihi nunc intimè conjunctus est; supplex rogo, ut me quoquè respicias oculis misericordiæ tuæ sub ejus protectione ac tutela, sub umbra meritorum ipsius compareo coram te, ut illum præcipuè intuens, me quoquè clementer ac benignè respicias, tanquam mancipium ejus; & servum perpetuum.

Ne permittas, obsecro, ut pereat illa anima, quæ toties in se recipit Filium tuum, qui à te missus venit in mundum, quærere & salvum facere quod perierat. Hoc præsta mihi per infinitam misericordiam tuam, Amen.

Aliqui

Aliqui Magistri spirituales suadent, ut post Sanctam Communionem septem dona petamus à Domino, similia illis, quæ B. Virgo, (Auctore S. Bonaventura lib: 6. Medit: cap: 3.) quotidie à DEO postulabat.

Domine DEUS meus, te supplex per merita & intercessionem B. V. Mariæ obsecro, illa mihi tribuere digneris, quæ ipsa quotidie olim vivens in terris à te postulabat: videlicet.

1. Auxilium efficax, ut præceptum amoris tui compleam.
2. Ut proximos meos, & quidquid tu diligis, constanter & ego diligam.
3. Ut quidquid tu ipse odio habes, verissimè & ego odio habeam.
4. Ut humilitate, castitate, obedientiâ, contemptu sæculi, & universis virtutibus animam meam exornes.
5. Ut corpus meum ac mentem meam, dignū tui habitaculum facias.
6. Ut aliquando tandem post hanc mortalitatem, Beatissimam Virginem Matrem tuam, & Humanitatem Sanctissimam tuam, oculis carnis clarè videam, & oculis mentis Divinitatem tuam aspiciam atquè possideam.
7. Ut in hoc templo, & in omnibus, quæ sunt in toto terrarum orbe, ab universis Sacerdotibus & fidelibus dignam venerationem accipias.

Circa hanc materiam aliqua prænотanda sunt. Et imprimis, quod Examen conscientie nihil est aliud, quam exquisita discussio, quæ cogitationes, verba, & opera nostra expendimus, & quæ sunt mala commissa, atq; bona omissa cognoscimus; ut peccata nostra detestemur, & indignationem DEI à nobis avertamus, vitamque nostram corrigamus. Est verò Examen istud maxime necessearium viris spiritualibus & religiosis. Primò, Ad acquirendam animæ puritatem, quæ comparatur per fugam peccatorum, extirpationem vitiorum, correctionem omnium defectuum & imperfectionum; quorum omnium habenda est clara cognitio, per exquisitam conscientie discussionem.

Secundò. Ad acquirendam vitæ sanctitatem, quæ comparatur per abnegationem perfectam sui, mortificationem sensuum, inordinatorum affectuum compositionem, & virtutum acquisitionem, in quibus quantum quisque proficiat, Examen conscientie declarat.

Tertiò. Ad obtinendam perfectionem; quia Examen hoc, est singulare perfectionis instrumentum.

Est autem duplex. Generale & Particulare. *Generale examen est illud*, in quo omnes cogitationes, verba, actiones, omissiones examinantur, vel totius vitæ, vel unius anni (quod faciunt illi,
 qui

qui per Confessionem generalem peccata sua expiare volunt) vel unius Mensis, vel hebdomadæ, vel totius dici aut dimidii, vel unius horæ. *Particulare examen illud dicitur*, in quo inquirimus de uno aliquo vitio, quod specialiter eradicare; vel defectu, quem corrigere; vel virtute, quam exercere aliquo Mense, vel hebdomadâ, vel die, proposuimus.

Sunt autem Examinis partes, seu puncta sex, quæ in hoc Disticho continentur.

*Solve DEO grates, pete lumen, discute mentē,
Delicti veniam posce, recide malum.*

Hoc est, Gratiarum actio, Luminis petitio, Conscientiæ discussio, Contritio, & veniæ postulatio, Firmum propositum emendationis.

In gratiarum actione commemoranda sunt beneficia DEI tam generalia, quàm particularia illo die, & alijs nobis concessa: & quantum ad animam; ut est SS. Communio, inspirationes Divinæ, tentationum victoria, ab hostibus defensio, occasionum peccandi remotio: & quantum ad corpus; ut est cibi & potûs, indumentorum, commodæ habitationis, & aliorum necessariorû provisio.

In petitione luminis rogandus est Dominus DEUS, ut nos faciat cognoscere omnia peccata, negligentias, defectus & imperfectiones, ac omissiones eorum quæ facere debuimus.

In discussione conscientiæ examinandæ sunt. *Primo*, Cogitationes, an fuerint vanæ, otiosæ, noxiæ, superbæ, mundanæ, de alienis factis cen-

foriæ. *Deinde verba*; an fuerint sine licentia, in locis vetitis, tempore prohibito, contra charitatem prolata: præterea, an fuerint otiosa, inconsiderata, superflua, detractoria, contentiosa, aspera, sæcularia, deceptoria, falsa, & scandalosa. *Opera quoq;* examinanda sunt *imprimis mala*, quæ sunt contra DEI præcepta, contra Regulam, Constitutiones & Vota commissa. *Deinde bona*; ut sunt, opera obligationis: videlicet, Officium Divinum, Oratio mentalis, Exercitium Præsentiae DEI, Missæ celebratio vel auditio, Coronæ B. V. recitatio, Examen conscientiae, in Cella bona occupatio, Mortificatio, spiritualis Lectio, sedula in virtutibus Exercitatio: in quibus quomodo nos gessimus, an omnibus directiones præmisimus, an bona intentione, hoc est, solò desiderio placendi DEO, & ex amore ipsius; & an ferventer, attentè & perseveranter cuncta fecimus, exactè omnia discutienda sunt: & *ex his patebunt omissiones eorum, quæ facere obligati sumus.*

Præcipuè autem inquirere debemus, quomodo circa vitium propositum aliquod eradicandum, & circa defectus corrigendos, atque virtutis assumptæ exercitium laboravimus: quoties in eadem vitia lapsi sumus, vel eisdem defectus & imperfectiones commisimus, aut actus virtutis elicere negleximus. Hinc enim faciliè deprehendemus, an proficiamus vel deficiamus.

In eliciendo actu contritionis veræ, & detestatione peccatorum etiam minimorum maxime desudan-

desudandum est. Nam hoc est unicum utilissimum & efficacissimum medium ad animum à vitiis purgandum, & à peccatis liberandum. Unde non mirum quòd post tot examina, sicut etiam post tot Confessiones, facilè ad eadem peccata atquè defectus revertimur; quia non sumus solliciti verum dolorem & abominationem delictorum nostrorum, atquè specificam particularium defectuum detestationem, cum firmo proposito eosdem vitandi atquè emendandi, habere.

Actus Gratiarum actionis.

O Beata Trinitas unus DEUS, quomodo multiplicas super me misericordiam tuam, sic me ab æterno diligendo, in tempore creando, redimendo, justificando, vocando, conservando, fovendo, ad bonum excitando, ab inimicis protegendo (die Communionis: Pane Angelorum animam nutriendo) Corpori cibum competentem, & vestitum, & alia necessaria mihi providendo. Pro his igitur aliisque omnibus & singulis beneficiis mihi, & aliis omnibus unquam exhibitis & exhibendis, ex intimo corde meo tuæ Divinæ Majestati gratias ago, non solum meo, sed omnium creaturarum etiam possibilium nomine & affectu: idquè si fieri posset, continuare desidero purè propter te omni possibili gratitudinis excessu in omnem æternitatem. Et in compensationem, non solum me totum cum omnibus, quæ dedisti mihi, sed insuper omnes omnium Sancto-
rum

rum triumphantium & militantium, humilitatis, gratitudinis, amoris, omniumquè virtutum actus, & pia desideria, sacrificia laudis & obsequia, simili affectu tibi Domino DEO meo offero, in unionem infinitorum meritorum Domini nostri JESU Christi, & omnium meritorum B. V. MARIE, ac omnium Sanctorum.

Qui vult poterit uti hac Gratiarum actione Sancti Francisci.

Omnipotens, sanctissime, altissime & Summe DEUS, quia nos omnes miseri & peccatores non sumus digni nominare te, suppliciter exoramus, ut Dominus noster JESUS Christus, Filius tuus dilectus, unâ cum Spiritu S. Paraclito gratias agat tibi, sicut tibi & ipsis placet, pro omnibus beneficiis tuis mihi collatis All:

Et gloriosam Matrem Beatissimam MARIAM semper Virginem & omnes Sanctos qui fuerunt, erunt, & sunt, propter tuum amorem humiliter deprecamur, ut, sicut tibi placet, pro beneficiis tuis, tibi gratias referant summo DEO, verò, æternè & vivò, Alleluja.

Vel illa S. Gertrudis. DEUS meus, misericordia mea, persolve pro me, tibi metipso pro omnibus bonis tuis, quæ fecisti, facis, & facturus es mihi, laudes æternas, immensas, quales tu potes; laudans te in te, in me, & pro me. Laudet te omnium misericordiarum tuarum immensum pondus. Jubilet tibi pro me gloriosissimæ Virginis Matris MARIE dignissimum cor & anima, admirabile tabernaculū gloriæ tuæ. *Actus*

O Sapientia æterna, Dulcissime JESU, tu es Lux vera illuminans omnem hominem venientem in hunc mundum, illumina quæso tenebras meas, ut videam, & sciam, quid desit mihi. Tu nosti omnia abscondita cordis; & omnes gressus meos consideras. Da ergo, ut quidquid hodie contra te, cogitando, loquendo, vel operando, aut omittendo deliqui, id plenè cognoscam, & recogitem tibi in amaritudine animæ meæ.

Hic fiat Examen conscientia, eo modo, ut dictum pag: 455.

Actus Contritionis, & Petitionis veniæ.

Domine DEUS meus, ô quam graviter in multis peccavi hodie in cælum & coram te? fateor quia plurima iniquè egi, & malum multiplex coram te feci: ideò nunc ex totis præcordiis meis, atq; ex amore tui, doleo de omnibus peccatis meis: doleo, quia te DEUM infinitè bonum, & summè dilectum offendi; Specialiter autem doleo ob amorem tuum, quia tam frequenter hodie, & aliàs, te Dominum meum offendi v.g. per inobedientiam, (vel per impatientiam; vel per immodestiam oculorum, vel per defectum silentii: vel per alios defectus N. N. vel per neglectos actus virtutis propositæ) detestor hæc omnia, quia sunt offensa tua, atque tuæ infinitæ bonitati contraria, sed quia major est misericordia tua,

tua, quam malitia mea, propterea veniam à te, & gratiam emendandi vitam meam spero; & per infinitam misericordiam tuam obnixè precor. Ego autem hæc omnia & alia peccata mea, occulta & oblita, gravia & minima, depono in charissima vulnera tua, & in pretiosissimum Sangvinem tuum: projicio in immensum ignem amoris tui: demergo in pelagus exuberantium meritorum tuorum: & abscondo in abyſſo infinitarum misericordiarum tuarum & miserationum: ut ibi per merita Sanctissimæ Humanitatis tuæ, & acerbissimæ Passionis: nec non per preces & merita beatissimæ Matris tuæ Virginis MARIE, & beatorum Angelorum, atque omnium Sanctorum expientur, absorbeantur, & ad nihilum redigantur.

Actus Proposita Emendationis.

O Utinam nunquam te amplius offendam. Utinam tibi semper in omnibus placeam. Utinam omnia quæ ad me spectant ex puro amore tui, modo supremo, ad honorem, tuumque beneplacitum, impleam, sicut me facturum firmissimè statuo, decerno & volo; sed quia sine te non valeo; tu ergo qui das velle, adde posse, ac perficere. Da quod jubes, & jube quod vis; ut sobriè, justè & piè vivam in hoc sæculo; & æternum te laudem cum Sanctis tuis in futuro.

Cui placet addat hanc Petitionē, quam Christus Dominus docuit S. Birgittam. Rogo te piissime JESU, per quinque vulnera tua, & per dolorem,

dolorem, qui de venis tuis perforatis, ad cor processit, ut conservare me digneris hodie, ac semper, ne cadam in peccata. Da quoque mihi virtutem resistendi telis inimici. Domine DEUS, cui nihil est impossibile, & qui omnia potes, da mihi fortitudinem faciendi bona opera, & in bonis posse perseverare.

Brevior modus exercendi hæc Puncta Examinis.

*A*Nte omnia fiat *Petitio luminis*. Benignissime JESU, qui es lux vera, illumina me, quæso, & fac me cognoscere omnia beneficia tua, quæ à te hodie percepi; & peccata mea, quibus tuam Divinam Majestatem offendi.

Deinde fiat recognitio beneficiorum DEI, & discussio conscientiæ de actibus nostris, ab ipso diei principio: si alacriter surreximus, & primi ad Chorum venire curavimus: si Directionem generalem totius diei, & alias minores ante actiones nostras fecimus: in Choro, in Oratione mentali, si debito modo nos gessimus: in cella, si benè & fructuosè tempus expendimus: si numerum certum mortificationum, & actuum virtutum propositarum implevimus; si officium à Superioribus injunctum exactè egimus; si voluntariè sæpiùs obedientiam transgressi sumus: quoties illos defectus & delicta commisimus, quæ vitare & corrigere statuimus.

Post hæc fiat Gratiarum actio. Infinitas tibi gratias ago Domine DEUS meus, pro universis benefi-

462 *Actus temp: exam: Consc: exer:*

beneficiis tuis mihi hac die, & totâ vitâ collatis: præsertim (die communionis: pro hodierna SS. Eucharistiæ perceptione) pro tua ab hostibus meis protectione, & à multis periculis animæ & corporis liberatione, & omnium commoditatum, rerumq; mihi necessariarum provisione &c. Pro quibus sit tibi laus, gloria, gratiarum actio in sempiterna sæcula. *Qui vult addat Psalm: Laudate Dominum omnes gentes &c.*

Contritio. Sed heu me, quàm ingratus hac die, & semper extiti in te Dominum meum: quia te in multis offendi, præsertim negligentia, tepiditate inobedientia, & aliis peccatis NN. de quibus omnibus & singulis etiam minimis, doleo ex amore tui: specialiter autem doleo ob amorem tuum, quia toties defectum hunc NN. commisi, quem vitare propter te proposui: & quia actus hujus virtutis NN. fideliter non exercui, prout ob amorem & honorem tuum statui.

Propositum emendationis, ac veniæ & auxilii DEI petitio. Amplius te, tuâ Divinâ gratiâ adjutus, offendere nolo; & veniam à te, ac emendationem spero, & humiliter peto; quia sine te nihil facere possum. Parce precor per mortem & amorem Filii tui JESU Christi mihi misero peccatori, & dimitte mihi, quidquid hodie, vel unquam in te, in proximum, & me ipsum peccavi. Misere mei DEUS, sicut scis, vis, & potes.

ACTUS

In principio cuiuslibet horæ exercendus.

GRatias tibi ago DEUS meus, pro omnibus & singulis totius vitæ meæ & horæ elapsæ, elapsuræquè beneficiis. Doleo intimè ex amore tui, quòd hanc horam sine tua Præsentia, sine mortificatione, sine exercitio virtutum, & sine fructu animæ meæ expendi (si est verum, quòd ita expenderis) & non juxta beneplacitum tuum. Volo Domine sequentî horâ totâquè vitâ meâ, majori, quàm unquam hætenus fervore spiritûs, milliesquè millies majori proportionè, & incremento fervoris, puritatis, charitatis, diligentiae, ac dignificationis tui, vilificationis autem mei, ad purum & omnem gustum tuum, dignè te, omnia facere, ideò quia mihi places, ut mihi placeas, ut tibi placeam, ampliùs, & ampliùs, & ampliùs.

Vel sic brevius. Volo Domine, cum majori centuplò & millies, millies, millies, amore tui & fervore, sequentî horâ & aliis tibi servire, & in omnibus tibi placere, quàm præcedenti.

Similiter possumus facere in principio cuiuslibet diei, & Hebdomadæ, & Mensis.

Aëtus ante somnum exercendi.

Videlicet: Ratihabitionis omnium bonarum Actionum. Sanctissima Trinitas DEUS meus, ratas habeo propter te, & ex amore tui, omnes Actiones, & Passiones meas, quocunquè modo habitas, & quocunquè modo bonas, ratas etiam habeo

habeo eadem omnium omnino creaturarum, incipiendo à Christo Domino, ad ultimum usque atomum creatum: ratas habeo in specie etiam illas, quæ sunt occasione mea, aliquo modo in te DEUM meum exercita. Et ratas habeo omnes, ac singulas, in omni earum latitudine, sensu, circumstantia, in unione meritorum JESU Christi, B. V. MARIE, & Sanctorum, majori quam unquam fervore spiritus, milliesque millies majori proportionem fervoris, dignificationis, charitatis; quia hæc est voluntas tua, & dignitas voluntatis tuæ.

Aëtus Retractionis malarum Aëtionū.

O DEUS dignissime, qui nos creaturas tuas in gloriam tuam creasti, sed à nobis, infinitis modis, ac malitiis, quotidie offenderis. Doleo, quantum possum, ex amore tui, pro omnibus & singulis peccatis, atque malitiis in te, primum quidem à me, deinde ab omni creatura commissis, atque etiam committendis. Nolo mi DEUS, nolo ullam malitiam à me, ab omnique creatura alia commissam esse, ac fore, eam ex nunc retracto, detestor & execror; quia te, DEUM dignissimum, agnosco, amo, æstimo. Nolo te in æternum offendere. Nolo te offensum esse. Nolo offendi te, à præterita, præsentis, futura, viva, & damnata creatura. O quis det, ut te omnes laudent, & ut omnia mala ab eis commissa, & committenda, non sint commissa, non sint committenda, sed potius, ut omnia sint in laudem

laudem tuam, quàm maximam conversa. DEUS meus vides voluntatem meam, vides, quòd cupiam, ut nihil sit in creaturis tuis, malum in oculis tuis. Cupio, & propono, quantum in me erit, impedire omnia mala & displicita tibi. Offero tibi totam vitam, vitam JESU Christi, Beatissimæ Virginis MARIE, Sanctorum omnium & singulorum; offero totum me, cum omni capacitate mea ad refarciendam læsam malitiis meis, bonitatem, dignitatem tuam: pro quibus malitiis offero tibi hunc Actum qui sequitur Amoris, (Æstimationis, Adorationis, Humiliationis, Doloris, Mortificationis, Abstinentiæ) in supplementum tibi dignissimo DEO meo, uniendo illum meritis mihi per gratiam tuam appropriatis, JESU Christi, Beatissimæ Virginis, Sanctorumquæ omnium. Amo te igitur super omnia, æstimo, adoro, dignifico, exalto, benedico, toto me, totis viribus, actionibus, passionibusquæ meis, majori quam unquam fervore spiritûs, milliesquæ millies majori proportionem illius, semel pro semper, Seraphicè, Marianè, Christiformiter, atomicè, sacrificativè.

Actus Commendationis nostri Divinæ Majestati.

O Superamandissime DEUS meus, Creator corporis mei & animæ, qui temporum vicissitudines disponis nobis ad levamentum & solatium animæ & corporis nostri; quia tu vis, ut nunc quiescam & somnum capiam, ideò ut ti-

bi obediam, & in hoc tuæ Divinæ Majestati quàm maximè placeam, in unione illius amoris, quo commodum hoc nobis providisti, & ipse in terris ad honorem Patris & hominum salutem confimili uti voluisti, ego peccator indignus omni bono tuo, hoc commodum in æternam laudem & gloriam tuam, Beatæ Virginis MARIE & omnium Sanctorum, atquè corporis mei necessitatem suscipio. Rogo te clementissime DEUS respice me misericordiâ tuâ, & præsta mihi gratiam tuam, ut è somni abundantia non tepeſcam in ſervitio tuo; nec ſomni inquietudine deficiam à ſervitio tuo; ſed moderare ſomnum meum ad honorem & beneplacitum tuum, quem ad corporis levamentum habere præcepisti. Serva me illæſum à potestate & illuſione inimici, ne mihi noceat in corpore & anima. Obſecro te, ut præſerves me hac nocte, totâquè vitâ meâ, ab omni peccato, & periculo; foveas neceſſario & quieto ſomno: excites & facias alacriter ſurgere ad tuum ſervitium tempore ſtatuto, quod per gratiam tuam facere propono.

Commendatio noſtri B. V. MARIE.

O Amabiliſſima Mater, glorioliſſima Dei-genitrix Virgo MARIA, tu es, eriſquè æternum Mater mea gratioſiſſima, unicè colenda, amâda, gloriſicâda. Sim ego quoq; ſervus tuus, & filius peculiariffimus. Monſtra te mihi eſſe Matrem,

Vesperî exercendi.

467

trem, nunc, semper, æternum, ô clemens, ô pia,
 ô dulcis Virgo MARIA. Suscipe me in mater-
 nam tuam custodiam & protectionem, in gratiam
 & amorem, in patrocinium & tutelam materni
 cordis tui. Fac ut hac nocte inculpatè somnô utar,
 & ad te laudandum festinus expergiscar.

Qui vult addat Hymnum.

A*ve Maris Stella &c. S. Angelo Custodi*
Commendatio. O Amantissime Angele DEI,
 qui hucusquè tam fidelis custos es mei, dignare
 insuper hac nocte, cor & corpus meum immacu-
 latum servare, ut tecum merear SS. Trinitatem
 in æternum contemplari, amare, & glorificare.

Sanctis Patronis nostris Commendatio. O vos
 Sancti Patroni mei, S. Joseph & NN. & omnes
 Beati, supplete vices fragilitatis meæ, benedicendo
 nunc & semper pro me laudando & superexal-
 tando Dominum DEUM nostrum, misericordias
 ejus in æternum cantantes; gratiamquè mihi im-
 petrate, in gratia ejus vivendi, quiescendi, mori-
 endi, & gloriâ ejusdem vobiscum per totam æ-
 ternitatem perfruendi.

Petitio Benedictionis.

O Beata Trinitas unus DEUS, dignare mi-
 hi dare tuam sanctam Benedictionem ube-
 remq; gratiam tibi in somno & vigilia,
 in vita & morte, puro corde & casto corpore per-
 fectè

fectè semper placendi, tequè glorificandi indeficienter nunc in terris, olim beatè in cœlis, cum quo tale Pactum facio; videlicet: Quoties per hanc noctem respirabo, toties in me volo trahere corda & affectus omnium Electorum tuorum, atq; illis toties te adorare, amare & laudare, & quidem in proportionem Geometricam dupla, immò decupla aut centupla; ita ut sequenti respiratione affectus sit duplò, decuplò, centuplò intensior, quàm fuerit præcedens. *Idem Pactum manè facere bonū est.*

Alia Benedictio, quam B. V. MARIA devotissimum sibi servum Ord: S. Dom: Religiosum docuit, ut se præmuniret, contra Dæmonem, tentare eum & decipere volentem, signando se ipsum his verbis.

Benedicat me DEUS Pater, qui cuncta creavit ex nihilo.

Benedicat me DEUS Filius, qui hominem perditum reparavit sanguine proprio.

Benedicat me DEUS Spiritus Sanctus, cujus me salvet piæ consolationis infusio.

Testatur id Thomas Cantimprat: 2. Apum: cap: 53. Antequam obdormiant Religiosi nostri, prævideant, quam die sequenti virtutem exercere, quem sensum & passionem mortificare, quos defectus, in quibus actibus & occasionibus vitare debent; statimq; Imaginariā DEI Præsentiam sibi proponant, cui indormire curent, ingeminando: JESUS, MARIA, JOSEPH, Angeli,

geli, Sanctique omnes sint nobiscum semper.

JESUS, MARIA, sis mihi JESUS, MARIA.

JESUS, MARIA, vobis dono cor, & animam meam.

JESUS, MARIA, quoties respiro, toties ad vos suspiro, & suspirare volo.

Illumina Domine oculos meos, ne unquam obdormiam in morte: ne quando dicat inimicus meus: Prævalui adversus eum.

In manus tuas Domine commendo spiritum meum.

Pax Domini nostri JESU Christi, & virtus sacratissimæ Passionis ejus. Signum S. Crucis, & titulus triumphalis, JESUS Nazaraenus Rex Judæorum. Integritas quoque Beatæ V. Mariæ: Custodia SS. Angelorum, & suffragia omnium Electorum sint inter me, & omnes inimicos meos, nunc & in hora mortis meæ.

In nomine Patris, & Filii, &
Spiritus Sancti, Amen.

Ad M.D.T.O.M.G.B.V. Mariæ
S.L.O.C.H. nec non OO. SS.
Cultum ac Venerationem.



TABELLA
ACTUUM ISTORUM
 Per Hebdomadas & ferias distinctorum.
Actus Hebdomadae I. Viae Purgativae.

Pro Dom: p. 2.	ACTUS	Sensuum & Passionum in comm: Amoris proprii pag: 3. 5. 7. Visus, Pass:	ACTUS	Acedix. p. 8.	ACTUS	Diligentiz. p. 10.
Pro Fer: 2. p. 12.	CONTRITIONIS	Amoris & Desiderii, Iudicii proprii. p. 14. 15. 17. Odoratus.	EXTIRPATIONIS	Superbix. p. 18.	CONTRITIONIS	Humilitatis. p. 20.
Pro Fer: 3. p. 22.	CONTRITIONIS	Pass: Gaudii, Voluntatis propriiz. p. 25. 26. 28.	EXTIRPATIONIS	Avaritiz. p. 30.	CONTRITIONIS	Paupertatis. p. 32.
Pro Fer: 4. p. 34.	CONTRITIONIS	Tactus, Pass: Odii, & Fugz, Tristitiz. p. 36. 37. 39.	EXTIRPATIONIS	Luxuriz. p. 41.	CONTRITIONIS	Castitatis. p. 42.
Pro Fer: 5. p. 44.	CONTRITIONIS	Auditus, Pass: Spei, Audaciz. p. 46. 47. 48.	EXTIRPATIONIS	Invidiz. p. 49.	CONTRITIONIS	Charitatis. p. 51.
Pro Fer: 6. p. 53.	CONTRITIONIS	Gustus, Pass: Desperationis Timoris. p. 56. 57. 59.	EXTIRPATIONIS	Gulz. p. 60.	CONTRITIONIS	Abstinenz. p. 61.
Pro Sab: p. 62.	CONTRITIONIS	Sensuum & Passionum. Pass: Irz. p. 65. 68. 69.	EXTIRPATIONIS	Irz. p. 70.	CONTRITIONIS	Manſuetudinis. p. 72.

Actus

Actus Hebdomade II. Viæ Illuminativæ.

Dō:	Imitationis Chrī: p. 75.	Abnegatio- nis, p. 77.	Contēptus mūdi, p. 78.	Diligentiæ, p. 80.
Fer: 2.	Humilita- tis, p. 80.	Contēptus fui, p. 80.	Puritatis cordis, p. 82	Prudentiæ, p. 84.
Fer: 3.	Justitiæ p. 87.	Observati- regul: p. 90.	Obedientiæ, p. 92.	Timoris Dei, p. 93.
Fer: 4.	Fortitudi- nis, p. 96.	Patientiæ p. 98	Mansuetu- dinis, p. 99.	Castitatis, p. 100.
Fer: 5	Constantiæ p. 100.	Modestiæ, p. 101.	Veritatis, p. 102.	Charitatis, p. 103.
Fer: 6.	Temperan- tiæ, p. 104.	Dilectionis inim: p. 105	Abstinētiæ, p. 107.	Compassio- nis, p. 107.
Sab:	Silentii, p. 111.	Solitudinis p. 113.	Paupertatis p. 115.	Compassio- nis, p. 115.

Actus Hebdomade III. Viæ Unitivæ.

Dō:	Fidei, p. 119.	Spei veniæ, p. 122.	Spei vitæ æ ternæ p. 124	Desiderii perf: p. 126.
Fer: 2.	Amoris pro ximi, p. 131	Benignita- tis, p. 132	Zeli salut: prox: p. 134.	Desid. amā- di Deū p. 136
Fer: 3.	Religionis, p. 138.	Devotionis, p. 140.	Pietatis, p. 142.	Petit: amor: Dei, p. 145.
Fer: 4.	Magnanimi- tatis, p. 147	Rectæ intē- tion: p. 149.	Perseveran- tiæ, p. 151.	Amoris Dei p. 153
Fer: 5.	Fiduciæ, p. 155.	Resignatio- nis, p. 157.	Longanim: p. 160.	Ad Cor Do- mini, p. 162
Fer: 6.	Rectæ volū- tat: p. 164.	Vigilantiæ, p. 166.	Zeli hōris Dei, p. 169.	Desid: pati- endi, p. 171.
Sab:	Simplicita- tis, p. 174.	Gratitudi- nis, p. 176.	Præsentii Dei, p. 177.	Pet: aor: D a V. SS. p. 180

Actus

Actus Hebdomada IV. Via Unitivæ.

Dō:	ACTUS	Erga SS. Trinitatem, p 183	Admiratio- nis, p. 186	Gaudi- p. 189.	DESIDII
Fer: 2.	ACTUS	Ob ej9 infinitā Bonitatē, p 192	Desideriorū p 194.	Laudis, p 197.	VIDENDI
Fer: 3.	ACTUS	Ob ej9 infinit: Pulchr: p 201	Delectatio- nis, p. 203.	Des: ut oēs aēt D. p 205	DEUM
Fer: 4	AMORIS	Ob bōfic: Cre ationis, p 209	Adorat, o- nis, p. 211.	Laudis, p. 213.	VIDENDI
Fer: 5.	AMORIS	Ob benefic: Re- dempt: p 216.	Laudis, p. 219.	Oblationis p. 220.	DEUM
Fer: 6	DEI.	Ob benef: Ju- stificat: p. 224.	Gratitudi- nis, p. 226.	Petit: lacry mā: p. 229	DEUM
Sab:	DEI.	Ut finis ultimi, p 231.	Gr pro Be nef: voc: ad Rel: p. 233	Laudis, p. 235.	DEUM

Post hæc sequuntur exercitia variorum Affectuum & Actuum, in quacunquē perfectionis via peragenda, videlicet:

- Pacta cum DEO facta* - - - - - pag: 240.
Pactum cum Beata Virgine factum. - - - - - pag: 273.
Actus variorum affectuum erga Virginem Sanctiss:
scilicet Actus Imitationis B. V. MARIÆ. p 277.
Actus Laudis Virginis Sanctissimæ. - - - - - p. 280.
Actus Salutationis. - - - - - p. 282.
Actus Benedictionis. - - - - - p. 288.
Actus Estimationis. - - - - - p. 290.
Actus Desideriorum. - - - - - p. 292.
Actus petitionis Amoris Christi & Beatiss: Virg:
ab eodem Christo Domino & B. V. - - - - - p. 294.
Actus petitionis Amoris erga V. SS. ab eadem. p. 296.
Actus Amoris erga Virginem Sanctissimam. p. 297.
Actus Amoris erga V. SS. ut DEI Matrem. p. 299.
Actus Amoris erga V. SS. ut Matrem nostr: p. 301.


Actus


<i>Actus Amoris erga V. SS. ob ejus pulchrit:</i>	p. 304.
<i>Actus Amoris erga V. SS. ob ejus in nos ben:</i>	p. 307.
<i>Actus Affectus erga Nomen Virg: Sanctiss:</i>	p. 311.
<i>Actus Gaudii nostri de omnibus bonis V. SS.</i>	p. 313.
<i>Actus Gaudiorum ipsius Virginis Sanctiss:</i>	p. 315.
<i>Actus Gratiarum actionis pro benef: DEI Virg:</i>	
<i>Sanctiss: collatis.</i>	p. 317.
<i>Actus Oblationis in servum Virg: Sanctiss:</i>	p. 319.
<i>Actus Comm: nostri V. SS. ut Matri nostræ</i>	p. 321.
<i>Actus Oblationis cordis nostri Virg: Sanctiss:</i>	p. 323.
<i>Actus Spei in Virgine Sanctiss.</i>	p. 325.
<i>Actus petitionum variarum a Virgine SS.</i>	p. 328.
<i>Actus petitionis bonæ mortis.</i>	p. 331.
<i>Actus desiderii videndi V. SS. in cælis.</i>	p. 337.
<i>Actus varii mane exercendi.</i>	p. 339.
<i>Modus cuncta opera cum fructu expediendi.</i>	p. 358.
<i>Actus Intentionis filialis.</i>	p. 369.
<i>Actus transformationis in omnes creaturas.</i>	p. 370.
<i>Actus Appropriationis sibi omnium bonorum cre- atorum.</i>	p. 371.
<i>Actus Directionis action nostrar: ad varios fines.</i>	p. 372.
<i>Actus Conformitatis cum DEI voluntate.</i>	p. 374.
<i>Actus Oblationis D. DEO inutilium actionum.</i>	Ibid:
<i>Actus variorum affectuum & humilitatis.</i>	p. 375.
<i>Actus affectuum erga DEUM per creaturas.</i>	p. 378.
<i>Actus Oblationis Horarum Canonicarum.</i>	p. 381.
<i>Actus supplementi defectuum in laud: Divinis.</i>	p. 382.
<i>Actus Intentionis ante opera nostra.</i>	p. 383.
<i>Modus Intensionis Amoris DEI.</i>	p. 386.
<i>Actus ante SS. Sacram: exercendi.</i>	p. 394. & 401.
<i>Actus audiendo Missam exercendi.</i>	p. 402.
<i>Præparatio ante Missam & Communionem.</i>	p. 409.
<i>Actus ante Missam & Commun: exercendi.</i>	p. 414.
<i>Actus post Missam & Communionem.</i>	p. 439.
<i>Actus tempore examinis conscientie exercendi.</i>	p. 454.
<i>Actus Vesperis exercendi.</i>	p. 463.

E R R A T A

Sic Corrige.

- Pag: 23. v. 21. piissime, l. piissimæ.
 Pag: 29. v. 25. nocium, l. nocivum.
 Pag: 52. v. 2. depecemur, l. deprecemur.
 Pag: 56. v. 30. spotu, l. potu.
Ibid: v. 31. emper, l. semper.
 Pag: 62. v. 13. ad cofortandū, l. ad confortādū.
 Pag: 70. v. 3. ex omnibns, l. ex omnibus.
 Pag: 72. v. 24. voluit, l. noluit.
 Pag: 84. v. 1. affectu, l. affectum.
 P. 160. v. 1. taman, l. tamen.
 P. 179. v. 24. mens, l. meus.
 P. 200. v. ult: mple, l. imple.
 P. 201. v. 24. sacritate, l. sanctitate.
 P. 246. v. 13. Domino, l. dominio.
 P. 248. v. 9. tnis, l. tuis.
 P. 286. v. 7. totaq; l. rosaq;.
 P. 353. v. 24. Ursula, l. Ursulæ.
 P. 436. v. 1. inseperabiliter, l. inseparabiliter.
 P. 464. v. 27. creatura, l. creatura.





Biblioteka Jagiellońska



stdr0026217

